


ದೇವನಲೆ

(ಕೊಡಗಲ್ ನಲೆನಿಂದ ದೇವಡ ಕಥೆ)

100



ಎಳ್ಳಾದಾನವು

ಶ್ರೀ ಬಡ್ಡಿಲರ ಹುಣಿ ಚಂಗಪ್ಪ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ
ಮಡಿಕೇರಿ

ದೇವನೆಲೆ

[ಕೊಡಗಲ್ ನೆಲೆನಿಂದ ದೇವಡ ಕಥೆ]

ಎಳ್ಳಾನವು :

ಶ್ರೀ ಬಡ್ಡಿರ ಎನ್. ಮಣಿ ಚಂಗಪ್ಪ



ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,
ಮಡಿಕೇರಿ

"DEVANELE" written by Sri Baddira N. Mani Chengappa, Kolagadal, Cherambane. Published by The Karnataka Kodava Sahithya Academy, Madikeri.

ಆದ್ಯ ಮುದ್ರಣ : 2011

ಪ್ರತಿ : 250

© ಎಲ್ಲಾ ಹಕ್ಕುಗಳ ಕಾತ್ ಬೆಚ್ಚಿತ್.

ಪ್ರಕಟ ಪಡೆತನವು :

ವಿನೋದ್ ಚಂದ್ರ,

ರಿಜಿಸ್ಟ್ರಾರ್

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಕ್ರಯ : 144 ಉರಪಿಯ

ಪುಸ್ತಕ ಕೊಟ್ಟವ ಜಾಗ:

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮ್ಯಾನ್ಸ್ ಕಾಂಪೌಂಡ್, ಮಡಿಕೇರಿ - 571 201

ಫೋನ್ : 08272 - 229074

ಅಚ್ಚುಕಾರ :

ಪ್ರೀ ಕೃಷ್ಣ ಕಂಪ್ಯೂಟರ್ಸ್ ಅಂಡ್ ಪ್ರಿಂಟರ್ಸ್

ಫೂಜಾ ಆರ್ಕೆಡ್,

ಮೂನಿಯರ್ ಕಾಲೇಜ್ ರೋಡ್, ಮಡಿಕೇರಿ

ಫೋನ್ : 08272 - 224919, 94481 35592

ಅಧ್ಯಕ್ಷಾಂಡ ತಕ್ಕಾ

ಕೊಡವ ಸಾಹಿತ್ಯ ಬೊಳಚೆರ ಬಟ್ಟೆಲುಂಡ್. ಇಂಞಾಚ್ಚಕೂ ಬೊಳತುವದೇ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿರ ಗುರಿ, ಉದ್ದೇಶ.

ಕವಿ, ಕವಯತ್ರಿಯ ಇರ್ ಪೊಲಣೆ ಸೃಷ್ಟಿ ಆಪವು ಅಲ್ಲ. ಕಲ್ಪನಾ ಲೋಕತ್‌ಲ್ ತೇಲಿಯಂಡ್ ಬಾಳಾಡೀ ಪುರಾಡೂ ಪ್ರಯತ್ನೊ ಇಂಜಕ ಮಾತ್ರ ಕವನ ಸೃಷ್ಟಿಯಾಪ.

ಕೊಡವ ಭಾಷೆಲ್ ಕವನ ಸಾಹಿತ್ಯತಾರ ಬೊಳಚೆ ಕಮ್ಮಿಂದೆ ಎಣ್ಣಲು. ಶ್ರೀ ಬಡ್ಡೀರ ಮಣಿ ಚಂಗಪ್ಪ ಅಯಿಂಗಡ ದೇವನೆಲೆ ಪುಸ್ತಕ ಕೊಡವ ಸಾಹಿತ್ಯ ಕ್ಷೇತ್ರಕ್ ಓರ್ ಕೊಡುಗೆ.

ಇದ್ ನಂಗಡ ಮಿಂಞಾತ ಪೀಳಿಗೆಕ್ ಆಧ್ಯಾತ್ಮಿಕತಾರ ಬೊಳಚಾಂದೆಣ್ಣೊಲು. ಇಯಂಗ ಈ ಪುಸ್ತಕತ್ ನಂಗಡ ಏದೇದ್ ದೇವ ಏದೇದ್ ಊರ್‌ಲ್ ನೆಲೆನಿಂದಿತ್‌ಂದ್ ಪಿಂಞ ಏದೇದ್ ಊರ್‌ಲ್ ಏದೇದ್ ದೇವಡ ದೇವಸ್ಥಾನ ಉಂಡ್‌ಂದ್ ಆಧಾರಪೂರ್ವಕಾಯಿತ್ ಎಳ್ಳಿತ್. ಇದ್ ನಂಗಡ ಮಿಂಞಾತ ಪೀಳಿಗೆಕ್ ಓರ್ ಕೊಡುಗೆ. ಇಂಞಾಚ್ಚಕೂ ಕಥೆ, ಲೇಖನ ಇಯಂಗಡ ಮನತೊಂಜಿ ಬೂವಡ್‌ಂದ್ ಬಯಂದವಿ.

ಮುಡಿಕೇರಿ

ಐಮುಡಿಯಂಡ ರಾಣಿ ಮಾಚಯ್ಯ

ಅಧ್ಯಕ್ಷ

ಮುನ್ನುಡಿ

ಶ್ರೀಮಾನ್ ಬಡ್ಡಿರ ಮಣಿ ಚಂಗಪ್ಪ ಎಳ್ಳಾನ ದೇವಡ (ದೇವನೆಲೆ)ವಿಶೇಷ ನೆಲೆರ ಪುಸ್ತಕತನ ನಾನ್ ಓದಿನೋಟನದುಂಡ್. ಅದ್ ನಂಗಡ ಮಿಳ್ಳಾತ ಸಂಸಾರ ಸಾಗರಕ್ ಒರ್ ಅಧ್ಯಾತ್ಮಿಕ ಬೊಳ್ಕೊಂದೆಣ್ಣೊಲು. ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಇದ್ ಓರ್ ಪೊಂಬೊಳ್ಕು ಆಯಿತುಂಡ್. ಕೊಡವ ಮಾಲೆ ಕೊಡಗಲ್ ನೆಲೆಯಾನ ದೇವಡ ಕಥೆ ಮಾಲೆ ಮುಖ್ಯವಾಯಿತ್ ಈ ಪುಸ್ತಕತರ ಆರಾಧನೆಲ್ ಓದಿತ್ ಗೊತ್ತ್ ಮಾಡಿಯವಲು.

ದೇವ ಒಬ್ಬನೆ, ಆಚೇಂಗಿ ದೇವಳ ಜನ ವಿಧ ವಿಧತ್ಲ ಪೂಜುವ. ದೇವಕ್ ಅವತಾರ ಅದೆಚ್ಚಕೊ ವಿಧ ವಿಧತ್ಲ ಉಂಡ್. ಅದ್ನೆಲ್ಲ ಈ ಪುಸ್ತಕತಲ್ ಹೆಚ್ಚಿ ಕಮ್ಮಿ ಉಳ್ಳದ್ ಕಾಂಬ. ಅಲ್ಲತೆ ದೇವ ನೆಲೆನಿಂದ ಊರ್ ನಾಡಲ್ ಏದೇದ್ ದೇವ ಪಿಳ್ಳಾ ದೇವಸ್ಥಾನ ಉಳ್ಳಾನ ಮಿಳ್ಳಾಕ್ ನಂಗಡ ಜನಕ್ ಗೊತ್ತಾಪನ್ನನೆ ಅಧಾರ ಪೂರ್ವಕವಾಯಿತುಂಡ್.

ಈ ಪುಸ್ತಕತ್ಲೆ ಅದೆಚ್ಚಕೊ ದೇವಡ ಪೆದತರ ಅವತಾರತನ ಎಳ್ಳಿತ್ಕಾಂಬ. ಇದ್ ಮಿಂಚಿತ್ ಮಕ್ಕಕ್ ವಂಶಪಾರಂಪರಿಯ ಆಧಾರವಾಯಿತುಂಡ್. ಇದ್ನ ಎಲ್ಲಾರೊ ಓದುವದಲ್ಲತೆ ಮನೆ ಮನೆಲೂ ಬೆಚ್ಚಂಡ್ ನಂಗಡ ಕೊಡವ ಮನೆ ಕೊಡಗಲ್ ಮತಬೇಧಯಿಲ್ಲತೆ ಬೊಳ್ತಂಡೂಂದ್ ಕೇಟೋವಿ.

ಇಕ್ಕ ನಡಪದ್ ಕಲಿಯುಗ. ಎದುಕುಲ ನಾಶ ಆನಪಿಂಚ ಕಲಿ ಪುಟ್ಟಿಯೆ. ಈ ಕಲಿಯುಗ 5,106 ಕಾಲ ಕಯಿಂಜಿತ್ ಇಂಚಿ 4,26,896 ಕಾಲ ಉಂಡ್. ಇದತ್ ಪತ್ತ್ ಅವತಾರವೊ ಪತ್ತ್ಕುರಿ ಸರ್ವನಾಶವೊ ಉಂಡ್. ಮಾನವಂಗ ದ್ರೌಪದಿರ ಮಾನಭಂಗ ಆನಪಿಂಚ ಪುಟ್ಟಾನವು. ಇದ್ ಎಲ್ಲಾ ದೇವಡ ಮಾಯಂದೆಣ್ಣೊಲು.

“ (ಬೊಳಿಯಡಂಗಡ ಕೊಡವಾಮೆ) ”

ಎಳ್ತೆಕಾರಂಡ ತಕ್ಕ್

5

ಪುನರಪಿ ಜನನಂ, ಪುನರಪಿ ಮರಣದೇಣ್ಣುವೊ ಗೀತಾ ಸಾರಾಂಶ ಪೋಲೆ ಮಾಲೋಂಗಳೇ ಆಯಿತ್ತಿರಡ್, ಬೋರೆ ಬೋರೆ ಜಾತಿ (ಪ್ರಾಣಿ, ಪಕ್ಷಿ, ಕ್ರಿಮಿಕೀಟ)ವೇ ಆಯಿತ್ತಿರಡ್ ಈ ಕಬ್ಬೂಮಿಲ್ ಪುಟ್ಟನವು ಎಣ್ಣೊವೊ ಪರಂಬ್‌ಲ್ ಪಾಪ ಪೊದ್ದಾನ ಕೆತ್ತ ಕುಂಡ್‌ರೊಳ್‌ಲ್ ತೊಯಿಂದ್ ಕಳಿಪಂಜಿ ಎಕ್ಕೇಂಗೊಮ್ಮ ಆದಿನಾರಾಯಣ ದೇವಂಡ ಕಚ್ಚಿಕ್ಕಲ್ಲಣಿ ತೇರೊಕೆ ಚೋರೆ ಎರ್‌ಚಿ ಎಲ್‌ಂಬ್, ಶೀತ, ನಾತ ಪೊದ್‌ಂಜ ಈ ತಡಿನ ಬುಟ್ಟಿತ್ ಅಳಿರೇಂಗೆ ಇಲ್ಲಿ ಬುಟ್ಟಿತ್‌ಪೋನ ನಲ್ಲಾಮೆ ಏದ್‌ಂದ್ ಇಲ್ಲಿ ಉಳ್ಳ ಚೋದ್ಯ.



ಜಬ್ಬೂಮಿಕ್ ಬಪ್ಪಕ್ಕಲೂ ಅರೆಬೆತ್ತಲೆಯೇ ಬಪ್ಪ ನೇಮ. ಪೋರತ್ತಾಂಗ್ ಈ ಮಾಯ ಪೊದ್‌ಂಜ ಜಬ್ಬೂಮಿಕ್ ಇಳಿಯೊಕ ಮೊಟಂಡೇ ಬಂದಿತ್ತಿಪ್ಪ. ಇಲ್ಲಿ ಸಮ್ಮಂಧಪಟ್ಟವು ಮಿಷಿಲ್ ತೆಳಿಚೆಂಡಿಪ್ಪ. ಇಲ್ಲಿಯತ್ರ ನಾಟಕ ತೇಂದಿತ್ ಪೋಪಕ ಒರೂ ಸದ್ವಿಲ್ಲತೇ ಕಣ್ಣ್ ಮುಚ್ಚಿಯಂಡೇ ಉಸರ್ ಕೊಡಿಕೈಡ್ ಮಡಿತ್ ತಡಿನೋ ಕೊಂಡ್ ಪೋಪಕ್ ಕಯ್ಯತ್ತೆ ಎಲ್ಲೆಲ್ಲಿಯೋ, ಎನ್ನೆನ್ನೆಯೋ ಚಾಡಂಡ್ಯಾಯಿಪೋಪ. ಕೂಟ್‌ಕಾರಳೆಲ್ಲಾರೂ ಚಾಕ್ರಿಕೆಚ್ಚಿತ್ ಎಲ್ಲೊಸೋ ಒಯಿಚಿತ್ ನರ್ಕಕ್ಕೊ, ಸ್ವರ್ಗಕ್ಕೊ ಪೋಪಾಂದಾನಕೊ ಪುಟ್ಟಿತ್ ತಿಂದುಂಡಿತ್ ಬಾಳೆನ ಭೂಮಿ ತಾಯಿರ ಋಣ ತೇಪಾಂಗೂ, ಅಪ್ಪವ್ವಂಗ ಚಾಕ್‌ನ ಋಣ ತೇಪಾಂಗೂ, ಕೂಡ್ಯಾಡಿ ಬದ್‌ಕೆನ ಕೂಟ್‌ಕಾರಡ ಕೂಟ್ ಋಣಕ್ಕೂ, ಭೂಮಿ ತಾಯಿರ ಉಂಡ ಉಪ್ಪೊಕ್ಕೂಳೆರ ಋಣ ತೇಪಾಂಗಾಯಿತು, ನಂಗಡ ಎಳಿಯ ಪೀಳಿಗೆಕ್ ಚೆರಿಯ ನೆನಪೊಕಾಯಿತ್ ಎಲ್ಲಿತ್ ಬೊಳಿಪಡ್ತನ ಈ ಚೆರಿಯದಾನ ಕರ್ ಪುಸ್ತಕತನ (ಚೆರಿಯದಾಯಿತ್) ಎಲ್ಲಿತ್ ಮಹಾಜನಡ ಮಡ್‌ಕ್

ಒಪ್ಪಿಚಿಟ್ಟಿದಾಯಿತುಂಡ್. ಎಳಿಯ ಕುಂಞಿಯಕ್ಕಾಯಿತ್ ನಾನ್ ಅದತ್
ಎಳ್ದಾನ್ ಚೆರಿಯ ಪುಸ್ತಕ ರೂಪತ್ಲ ಕೆಜ್ಚೆ ಚೆರಿಯ ಸೇವೆಂದೆಣ್ಣಕ ತಪ್ಪಾಗ.

ಇದತ್ ಕಂಡ್ ಬಪ್ಪ ತಪ್ಪ ನೆಪ್ಪನ ಹಂಸ ಕೀರ ನ್ಯಾಯಪೋಲೆ ಒಪ್ಪಿ
ಮಾಡ್ತೊಂಡ್ಂದ್ ಈ ಮಾರಿಪತ್ತ್ ತಂಗಳ ಕೇಟೋವಿ.

ಆಚೇಂಗಿ ಇಂದಿಕ್ಕ ವಿದ್ಯಾ, ವಿಜ್ಞಾನ ಪಿಂಞ ಸಿರಿ ಸಂಪತ್ ಪೊದ್ಂಜ
ಕಾಲತ್ ನಂಗ ಕೊಡವ ಕೋವುಲ್ ಚೆನ್ನಂಗ್ ಮಾಲೊಂಗ ದೇವಳೆ ಇಲ್ಲೆ.
ಎಲ್ಲಾನೋ ಮಾನವಂಡ ಅಂದಭಕ್ತೀಂದೂ, ಮೂಢನಂಬಿಕೆಂದೂ ಎಣ್ಣಿಯುಂಡ್
ಪಂಡೆಯತ ಎಳೆತ್ಲ್ ಮರಂಜ ಅಜ್ಜ ತಾತಪ್ಪಂಗ ಭಕ್ತಿ ಭಾವತ್ ಮಾಡ್ನ
ಸಂಸ್ಕೃತಿ, ಪದ್ಧತಿ ಉಡ್ಪ್ ನಡ್ಪಲ್ ಇನ್ನತ್ತಾನೆಲ್ಲಾ ಮಾಡ್ನ ಆಚಾರ
ವಿಚಾರಕ್ಕೇ ಕುತ್ತ ಮಾಡ್ವ ಓರ್ ಬರಿಯ ಸಂತಾನ ನಿಯಂತ್ರಣ, ಚೋರೆ
ಮಿಶ್ರಣ ಕೊದಿಲ್ ತೊಯಿಂದ್ ಕಳಿಚಂಡ್ ಪಿಂಗಡ ಬುಡ (ಪರೋಕ್ಷ)
ಕುತ್ತಿನಾಶಾಪಕ್ ಪುರ್ಂಡ್ಟ್ಟಿಂಡುಳ್ಳದ್ ಅವನತಿರ ಮೊಳಿ ಆಯಂಡುಂಡ್.

ಇದ್ಂಗೆ ಎಚ್ಚರ ಇಲ್ಲೆ ನಂಗಡ ಕೊಡವ ಮಾಲೆ ಪೊಮ್ಮಾಲೆ
ಕೊಡಗಲ್ ಏಳಜ್ಜಂಗಡ ಭಕ್ತಿಭಾವ, ನೇಮ, ನಿರ್ಕ, ನೀತಿನೋ ಭಕ್ತಿನೋ
ಕೊದ್ಚಿತ್ ದೇವಲೋಕತ್ಂಜಿಯೋ ಪರರಾಜ್ಯತ್ಂಜಿಯೋ ಬೋರೆ ಬೋರೆ
ದೇವ ಅವತಾರಿಯಳಾಯೆಂಡ್ ಈ ಮಣ್ಣೊ ಪಿಂಞ ಮಾಲೊಂಗಳೊ ಈ
ಮಣ್ಣಲ್ ನೆಲೆ ನಿಂದ ಮಮ್ಮಾಯತ್ನ ನಾನ್ ಅಂಜಿತ್ತೊ, ಅರಿಯತೆಯೂ,
ಕೇಟಂಜಿತ್ತೊ ಖುದ್ ಪೋಯಿತ್, ನೋಟಿತ್ತೊ, ಮಹಾ ಜನಳ ಕೇಟಿತ್ ಚೆನ್ನಂಗ್
ಅರ್ಂಜಂಡಿಯೆ ಬೋರೆ ಬೋರೆ ದೇವಡ ಮಹಿಮೆನೋ, ಸ್ಥಳ ಮಹಿಮೆನೋ
ಆಪಚ್ಚಕ್ಕೂ ಮುಟ್ಟಿಗೆ ನಿಗತ್ತೋಡೆ ಮುಷಿಲೋ ಎಳ್ಳನದಾಯಿತುಂಡ್.

ಇಂದಿಕ್ಕ ಮಹಾಭಾರತ, ರಾಮಾಯಣ, ಬೋರೆ ಬೋರೆ ಪ್ರರಾಣ ಕಥೆಯೂ,
ಪೋರತ್ತಾಂಗ್ ಪುಟ್ಟೋಲೆ ಪಳಮೆ, ಭಗವಂತಂಡ ಪಾಟ್ ಅಲ್ಲತೆ ಬೋರೆ ಬೋರೆ

7

ಮಹಾ ಪುರುಷಂಗ ಎಳ್ಳಾನ ನಾಟಕ ಪುಸ್ತಕ ಇಪ್ಪಕ್ಕಾಪಕ ಈ ಪುಸ್ತಕ ದೇವಡ ಕಥೆರ ಅವಶ್ಯಕತೆ ಉಂಡಾಂದೂ ಚೆನ್ನಂಗ್ ಜನಡ ಅಭಿಪ್ರಾಯ ಬಕ್ಕು.

ಇಂದಿಕ್ಕ ಪರ ರಾಷ್ಟ್ರಕಾರಡ ಪೊದಿಗೊಂಡ್ ಕೊಡವ ಸ್ವರೂಪತಾನೇ ತೇಕಿತ್ ಬಾಲ ಇಲ್ಲತ ಕೋಡಂಗಲಾಯಿತ್ ದೇವ ದೆಯ್ಯಡ ವೊಯಕ್ ಕೆಣ್ಂಜಿತ್ ಇಡೀ ಕೋವೇ ಮುಡಿಯೋಂದೆಣ್ಣಕ್ಕ ಅರ್ಥಹೀನ.

ಎನ್ನೇಂಗಾಡ್, ಏದೇಂಗಾಡ್ ನಾನ್ ಈ ಪುಸ್ತಕ ಎಳ್ಳದುವಕ್ ಶಾರೀರಿಕ, ಮಾನಸಿಕ, ಸಹಾಯ ತಂದ ಎಲ್ಲಾ ಕೊಡವಾಭಿಮಾನಿಯಕೂ, ಈ ಪುಸ್ತಕತಾನ ಬೊಳಿ ಪಡ್ತಾನ ಕೊಡವ ಸಾಹಿತ್ಯ ಅಕಾಡೆಮಿಕೂ ನಾಡ ಮನದುಂಬ್ನ ಪಂದನನ ಈ ಮಾರಿಪತ್ ಅರ್ಪ್ಚಿಡುವಿ.

"ಸತ್ಯಂ ಶಿವಂ ಸುಂದರಂ"

ನಿಂಗಡಂವನಾನ

ಬಡ್ಡಿರ ಮಣಿ ಚಂಗಪ್ಪ

ಕೊಳಗದಾಳು, ಚೇರಂಬಾಣೆ ಅಂಚೆ

8.

ಒಳ್ಳೆ ಪಾಳೆಲ್

1. ಐನ್‌ಮನೆ
2. ಪಾಕತಮ್ಮೆ (ವನದುರ್ಗಿ), ಕೊಳಗಾಳ್
3. ಪಾಕತಮ್ಮೆ ದೇವಿರ ನಮ್ಮೆ
4. ಅಯ್ಯಪ್ಪನೂ, ನಾಗಣ್ಣನು ಕೊಡಗಲ್ ನೆಲೆ ಎಡ್ತದ್
5. ನೆರಿ ಬಯ್ಯಕ್ ಬಂದಿಯೆ ಎನ್ನನೆ ?
6. ಕೇತ್ರಪ್ಪ ದೇವಡ ಮಹಿಮೆ (ಬೇಂಗೂರ್)
7. ಕಲಿಯಾಟ ಪೊನ್ನಪ್ಪ, (ಅಜ್ಜಪ್ಪ)
8. ಕಾಕೋಟಚ್ಚನೂ ತಂಗೆ ಅಕ್ಕವ್ವ ಈಯೆಂಗಡ ಕಥೆ (ಮಮ್ಮಾಯ)
- ಕಾಲ ಭೈರವ
9. ಪುಗ್ಗೆರೊಕ್ಕಡ ಮೊಣ್ಣಯ್ಯ (ಕ್ರಿ. ಶ. 1600)
10. ಬೈತೂರ್ ಜಾಗ ಮಹಿಮೆ
11. ಅಂಜ್ ವಿಚಾರ
12. ಮೈತ್ತುಂಜಯ ದೇವಸ್ಥಾನ (ಬಾಡಗರಕೇರಿ, ಬಿರುನಾಣಿ)
13. ರಾಮಸ್ವಾಮಿ ಕಣಿವೆ (ರಾಂಪುರ) ಕ್ಷೇತ್ರವರ್ಣನೆ
14. ಇರ್ಪುಕ್ಷೇತ್ರ ಭೀರ್ಯ
15. ಎಮ್ಮೆಮಾಡ್ ಸೂಫಿಶೇಖಿಮಾರ್‌ರ ಮಹಿಮೆ
16. ಸತ್ಯಹರಿಶ್ಚಂದ್ರಂಡ ಸತ್ಯ ಕಥೆ (ಹರಿಶ್ಚಂದ್ರ, ಹೊದವಾಡ)



ಐನ್‌ಮನೆ

ಕೊಡವ ಮಾಲೆ ಪೊಮ್ಮಾಲೆಲ್ ಕೊಡವ ಫಲ ವಿಧತ್ರ ನೈಪಲ್ ನೈಚಿತುಂಡಾನ ಫಲಗುಂಡೂ ನಾಡ್, ನಗರ, ರಾಜ್ಯ, ರಾಷ್ಟ್ರ ಪೋರತ್ತಾಂಗ್ ಇಡೀ ಲೋಕತ್ಲೆಲ್ಲಾ ಕೇಳಿ ಕೀರ್ತಿ ಎಡ್ತೂ ರಾಷ್ಟ್ರ ರಕ್ಷಣೆ ಪಿಂಞ ಕಾಪಲ್ ಮಿಲಿಟರಿಯೊ ನೈಚಿತ್ ಪರೋಪಕಾರಿಯಳಾಯಿತ್ ಧೀರಂಗಾಂದೂ ಶೂರಂಗಾಂದೂ ಪೆದಕ್ಕಾಂಡಿತೂ ಕೊಡವಗುಡ್ಡೆರ ಬದ್ಕೇ ಶೂರಂಗಾಂದೂ ಒರ್ ಪ್ರತ್ಯೇಕ ಮಹಿಮೆ ಉಳ್ಳದಾಯಿತೂ ಈಯೆಂಗಡ ಪುರ್‌ಡ್, ಧೈರ್ಯ, ಸಾಹಸ, ಸತ್ಯ, ನೀತಿ, ನಿರ್ಕೌ ನ್ಯಾಯ ಧರ್ಮ, ಸತ್ಯ, ಸಂಸ್ಕೃತಿ, ಪದ್ಧತಿ, ಉಡ್ಪ್ ನಡ್ಪ್ ಊಣೆ ತೀನಿ, ಆಟ್‌ಂಬಾಟ್ ಚಾಯಿಚಂದ ಋಷಿ ಪ್ರೀತಿ ಆಸೆ, ಅಕ್ರ, ವಿಶ್ವಾಸಿ, ಒಗ್ಗಟ್ ಒತ್ತೋರ್ಮೆ, ದಾನ ಶೂರತ್‌ನತ್ತ್ ಬೋರೆ ಬೋರೆ ರಾಜಂಗ ಅರ್ಜಿತ್ ಕೊಡವ ಇಡೀ ಲೋಕತ್ಲ್ ಮಹಿಮಾ ವಿಶೇಷತ್ಲ್ ನೈಪುಣ್ಯ ಪಡ್‌ಂದಿತ್ ಉಂಡ್‌ಂದೆಣ್ಣುವೊ ಸೊಲ್ಲಂಜಿತ್ ಬೋರೆ ಬೋರೆ ನಾಟ್ಪಲ್ ಕೊಡವ ಗೆದ್ದಿತ್ ಕೇಳಿ ಕೀರ್ತಿಲ್ ಭಾಳ್ ಬದ್ಕನಡ್ಪುವೊದ್ ರಾಜಂಗಡ ಮನಕ್ ಅರ್ಜಿ ವಿಚಾರ ಆಯಿತುಂಡ್.

ಪಂಡ್ ತ್ರೇತಾಯುಗತ್ಲೇ ಶ್ರೀಮನ್ನಾರಾಯಣ ವತಾರೀ ಶ್ರೀರಾಮಚಂದ್ರ ಕೊಡವಡ ಅದಿದೇವತೆಯಾನ ಶ್ರೀಮೂಲ ಕಾವೇರಮ್ಮೆ ಮಹಾ ತಾಯಿರಲ್ಲಿಕ್ ಮೊಟ್ಟ್ ಇಟ್ಟಿತ್ ಪಂಚಾಯಿತಿಗೆ ತೀತ ನಿರೂಪಣೆ ಸ್ಕಾಂದ ಪುರಾಣತುಂಡ್. ಅದ್‌ಂಗ್ ಮುಪ್ಪಡೆ ಕೊಡವ ನೆಲೆಗೊಂಡ ನಿರೂಪಣೆ ಸ್ಕಾಂದ ಪುರಾಣತುಂಡ್. ಶ್ರೀ ಮೂಲಕ ಕಾವೇರಮ್ಮೆ ಮಹಾತಾಯಿಯೇ ಕೊಡವಡ ಅದಿದೇವತೆಯಾಯಿತುಂಡ್‌ಂದಿಪ್ಪಕ್ಕ ಕೊಡವಡ ಆದಿನೆಲೆಯೇ ಕೊಡಗ್‌ಂದ್

ದೃಢತೆಗ್ಲೆ. ಅಂದಂಜಿಯೇ ಕೊಡವ ಮಾಲೆ ಪೊಮ್ಮಾಲೆ ಕೊಡಗಂದ್ ಪೆದ ಬಂದಯೆ. ಇನ್ನನೆ ಇಪ್ಪಕ್ಕ ಕೊಡವ ಎಲ್ಲಿಂಜ ಪೆದ ಬಂದಿಯೆ ಇನ್ನನೆ ಕ್ರೋಢದೇಶತ್ತ್ಂಜ ಬಂದಿಯೆಂದೆಣ್ಣುವೊ ಚೆನ್ನಂಗ್ ಅರಪಡಿಪ್ಪಕ್ಕಾರಳಾನ ಕೊಡವಡ ಚೋದ್ಯ ಅರ್ಥಹೀನವಾಯಿತುಂಡ್. ಕೊಡವ ಪುಟ್ಟಲಾಯಿತೇ ಕ್ರೋಢ ದೇಶಾಂದಾಯೆ. ಅಕ್ಕಲೇ ಕೊಡಗರ ಕುಂದ್ ಮೊಟ್ಟಾನ ಒಯ್ಯಿಲ್, ಒಡಿಕತ್ತಿಲ್ ಮಾಂದಿತ್ ಕೆತ್ತಿತ್ ಭೂಮಿ ಜಾಗ ಮಾಡಿಯೆಂಡಿತ್ತ್ಂದ್ ಪಳಂಚೊಲ್ ಇಪ್ಪಕ್ಕ ಇಂದಿಕ್ಕ ರಾಜಂಗಡ ಕಾಲತ್ಲ ಕೊಡವಡ ವೀರತನಕ್ಕಾಯಿತ್ ಜಮ್ಮ ಜಾಗೀರ್ ಉಂಬಳಿ ಇನ್ನತಾನ ಕೊಡ್ಡಿತ್ಂದೆಣ್ಣುವೊ ಕಲ್ಪನೆ ಅಚ್ಚಕ್ಕೆ ಚಂದ್ರವರ್ಮ ತಪಸ್ಗೊಂಡಿತ್ ಪಾರ್ವತೀ ದೇವಿ ಸಂತುಷ್ಟಳಾನಾನಂಗುಂಡ್ ಅವಡ ವರ ಪೋಲೆ ಓರ್ ಕನ್ನಿನ ಅವ ಮಂಗಲ ಕೈಚಿತ್ ಪುಟ್ಟನವೆ ಕೊಡವ. ನಂಗಕ್ ಅವನೇ ಗುರು ಆಯಿತುಂಡ್ ಇದಂಗೊಕ್ಕಣೆಕ್ ಅಗಸ್ತೀ ಮುನಿ ಕಾರಣಾಂತರತ್ ಕೊಡವಕ್ ಶಾಪ ಇಟ್ಟ ನೇರತ್ ಅದಿದೇವತೆ ಶ್ರೀಮೂಲ ಕಾವೇರಮ್ಮೆ ಮಹಾತಾಯಿ ಮರು ಶಾಪ ಆಯಿತ್ ನಿಂಗ ಕೊಡವ ಭೂಮಿಕ್ ಬಿತ್ ಬಿತ್ತಿತ್ ಅದಾನ ಪರ್ಚಿತ್ ಓರ್ ನಾಟಿ ನಟ್ಟೋಳಿಂದ್ ಆಶೀರ್ವಾದ ಮಾಡ್ನ ಪುಲಗುಂಡ್ ಅಂದ್ತೊಟ್ಟ್ ಇಂದೋಳ ಅನ್ನನೇ ಕೆಯ್ಯುವೊ ನೆಲೆ ಉಂಡ್. ಅದ್ ಎಕ್ಕ? ಎಚ್ಚಕ್ ಕಾಲಕ್ ಬಯ್ಯ ದೇವ ಪುಟ್ಟಿತ್ ಪೊರಬುದ್ಧಕಾಲತ್ಲೇ ಇಲ್ಲಿ ಕೊಡವ ನೆಲೆ ಇಂಜತ್ಂದಾಪಕ ಬೋರೆ ಅಪಹಾಸ್ಯ, ರಾಜಕೀಯ ದುರುದ್ದೇಶತ್ರ ಹೇಳಿಕೆಕ್ ಜಾಗ ಉಂಡಂದಾಚಾ? ಇಲ್ಲಿಯೆತ್ರವು ನಂಗ ಬೋರೆ ದೇಶತಿಂಜ ಬಂದಿಯೇ ಅಲ್ಲಿಯೆತ್ರ ಜನಡಾತ್ ನಂಗಡ ಉಡ್ಪಾರ ಕೋಲ ಪರದೇಶತ್ಲ್ ಕಂಡ್ ಬಪ್ಪಂದೂ, ಆನಂಗುಂಡ್ ಕೊಡವ ಬೋರೆ ದೇಶತ್ಂಜ ಬಂದಿಯೆಂದೆಣ್ಣುವೊ ಶುದ್ಧ ಪೊಟ್ಟತಕ್ಕ. ಆಂಡ ಬದ್ಲ ನಂಗಡವು ಇಲ್ಲಿಂಜ ಪರದೇಶಕ್ ಪಾರಿಪೋಯಿತ್ ಅಲ್ಲಿ ನೆಲೆ ನಿಂದಿತ್ ನಂಗಡ ಉಡ್ಪಾರ ಮಾದ್ರಿ ಅಲ್ಲಿಯೂ ಕಂಡ್ ಬಪ್ಪಂದೆಣ್ಣುವೊ ಸರಿ.

ಏಳಜ್ಜಂಗಡ ಕಾಲತ್ಲೇ ಕೊಡವಡ ಐನ್ಮನೆ ಇಂಜಿತ್ತುಂಡೇಂಗ್ಯೊ

ರಾಜಂಗಡ ಕಾಲತ್‌ಂಜ ಕೊವಡ ಐನ್‌ಮನೆರ ಸ್ವರೂಪ ನಂಗಡ ಶೌರ್ಯಕಾಯಿತ್ ಅರಮನೆರ ಮಾದ್ರಿಯೇ ಕೆಟ್ಟಿಯೋಳಿಂದ್ ರಾಜಂಗ ಹುಕುಂ ಕೊಡ್ತಾಂಡ ಫಲಗುಂಡ್ ಮುಂದ್ ಮನೆ ಕಟ್ಟಾನದಾಯಿತುಂಡ್. ಅದತ್ನು ಚೆನ್ನಂಗ್ ವಕ್ಕಕಾರ ಮುಂದ್ (ನಾಲ್‌ಕಟ್ಟು) ಮನೆ (ಐನ್‌ಮನೆ)ನ ರಾಜಂಗಡ ಹುಕುಂ ಪೋಲೆ ರಾಜಂಗಡ ಅರಮನೆ (ಕೋಟೆ) ಪೋಲೆ ಕೆಟ್ಟಿತ್.

ಇಂದಿಕ್ಕ ಕೊಡವ ಕೋವುಲ್ ಎಚ್ಚೆಕ್ಕೆಚ್ಚಕ್ಕೊ ಬುದ್ಧಿವಂತಂಗಳೂ, ವಿದ್ಯಾವಂತಂಗಳೂ ಶೌರ್ಯವಂತಂಗಳೂ ಉಂಡೇಂಗ್ನು ಪಂಡೇತ ಓರ್ ಅಜ್ಜ (ಕಾರಣ) ಕೆಜ್ಜ ಐನ್‌ಮನೆರ ಬಾಚಿಕ್ (ಸಾರಿ) ಬಪ್ಪದಿಲ್ಲೆ. ಅಜ್ಜ (ಕಾರಣ) ಒಬ್ಬನೇ ಕೆಟ್ಟಾನ ಐನ್‌ಮನೆರ ಕೋಲ ಶೀಲತ್‌ನ ಅಳಂದ್ ನೋಟ್‌ಚೇಂಗಿ ಇಂದಿಯತ್ರ ಸಕಲ ಚಾಕ್ರಿ ಪೆರ್ತ್ ಚೆರಿಯೆದೆಂದ್ ಎಣ್ಣುವಂಡು. ಐನ್‌ಮನೆರ ಮಂಬಣ, ಮರಪಣಿ, ಕೌಕೋಲ್, ಕಂಬ್, ಐಮರ, ಮಣ್ಣುತ್ತರ ಇನ್ನತ್ತಾನ ಅಳಂದ್ ಕೆಟ್ಟಚೇಂಗಿ ಇಂದಿಯತ್ರ ದಂಡ್ ಮೂಂದ್ ಮನೆ ಕಟ್ಟೊಲು. ಅಂದೇ ಸಹಕಾರ (ಕೂಟ್‌ಪಣಿ) ಮನೋಭಾವನೆ ಅಚ್ಚಕ್ಕ ಚಾಯಿಲ್ ಇಂಜತ್‌ಂದ್ ಅರಿವಾಪ.

ಓರೋರ ಕಂಬ, ಐಮರ, ಬುಟ್ಟಿ, ಮೋಂದಾಯ, ಕೌಕೋಲ್ ಇನ್ನತ್ತಾನೆ ತೋಕ್ ಏಳೆಟ್ಟು ಪತ್ತಾಳ್ ಬೋಂಡಾಯಿತ್ತಿಕ್ಕು. ಓರೋರ್ ಕೌಕೋಲ್‌ನ ಇಕ್ಕತ್ತ ದಂಡ್ ಮೂಂದ್ ಕೌಕೋಲ್ ಮಾಡುವಲಿಂಜತ್. ಆ ಕಾಲತ್ಲ ಮಿಂಞಾತ್‌ರ ಪೀಳಿಗೆ ಏಳೆಳ್ಳ ಕಂದಲೆಕೆತ್ತಣೆಕ್ ಮನೆ ಉಳಿಕೆ ಆಕೊಂಡುಂದೆಣ್ಣುವೊ ದೃಷ್ಟಿ ಇಂಜಿತ್ತೇ ಇಂಜಿತ್ತಿಕ್ಕು. ಕೆಂಡಿರ ಮೊಟ್ಟ್ ಅಪರೂಪತ್ರ ಮಾದರಿ ಆಯಿತುಂಡ್. ಐನ್‌ಮನೆರ ಎದಿಕೆ ಮೊಟ್ಟ್ ಕಯ್ಯಾಲೆ, ಕಯ್ಯಾಲೆರ "ಐಮರ ಕಂಬ್" ಇಚ್ಚೆಕಾಂಡ ಕೂಟ್‌ಕೊತ್ತ ಕೆತ್ತಪಣಿ (ಕುರಿಕುತ್ತಲ್) ಯಳ ಕೇಕಿಯಕಟ್ಟೊಳೆ ಪಡಿ. ಅದ್ ದುಂಬ್‌ನ ದೇವತೆ ಒಡ್ನೋಲಗ (ಕೊಂಬುಕೊಟ್ಟು) ಇನ್ನತ್ತಲ್ಲಾ ವಿಶೇಷ ಮಾದ್ರಿರ ಕಟ್ಟೊಳೆಪಡಿ. ಓರ್ ಪಡಿಲ್ ಇಕ್ಕತ್ತ ಮೂಂದು ಪಡಿ ಮಾಡುವಲು. ಒಳ್‌ಕ್ ನುಗ್ಗನನ್ನಕ್ಕೆ ನೆಲ್ಲಕ್ಕಿ ನಡುಬಾಡೆ, ತೂಕ್ ಬೊಳ್‌ಕ್ ಪಿಂಞ ಚೌಕಟ್ಟು ಮಂದ್,

ಬುದ್ಧ ಮಳೆನೀರ್ ಮುಂದಂಜ ಪೊರ್ವೆಪೋಪಕ್ ಉಳ್ಳ ಪೊಯಿವ,
 (ಒಳಚರಂಡಿ) ಬೆಚ್ಚಿತ್ತಿಂಜಿತ್ತಿಪ್ಪ. ಮುಂದಾನಾಲ್ ಚೌಕಟ್ಟಾಕೊತ್ತಿತ್ ನಾಲ್
 ಬರಿಲ್ ಬಾಡೆಕೊತ್ತಿತ್ ಕಂಬಿ ಐಮರ ನಾಲ್ ಬಲ್ಯ ಕಂಬಿ, ನಾಲಾತ್ಲ ಒಂದ್
 ಗುರುಕ್ಕಿಪ್ಪ ಪುದಿಯದಾಯಿತ್ ಬಾಕೆ ಬಂದ ಮಂಗಲಕರ್ತಿ ಭಕ್ತಿಲ್ ಕಾಲ್
 ಪುಡ್ಚಿತ್ ತೊತ್ತವೊ ಪದ್ಧತಿ ಉಂಡ್. ಅಂದೆಂಜಿ ಅವಕ್ ಮನೆರ ಹಕ್ಕು
 ಕ್ಕೊಚ್ಚಿಂ ದ್ ತೀರ್ಮಾನ. ಅಪ್ಪರ್ಲ್ ಕನ್ನಿ ಕೋಂಬರೆಂದೊಂದಿಪ್ಪ. ಇದ್ಂಗೆ
 ಅದ್ಂಡದೇ ವಿಶೇಷತೆ ಉಂಡ್. ಐನ್ಮನೆಲ್ ಒಟ್ಟು ಒಯಿಂಬದ್ ಕೋಂಬರೆ
 ಓರ್ ಪತ್ತಾಂಡ ಅಡಿಗಮನೆ ಉಂಡ್. ಅನ್ನನೆ ಅಟ್ಟಕ್ ಪತ್ತುವಕ್ ಗಟ್ಟಿ ಮುಟ್ಟಾನ
 ಬಲ್ಲಿಯದಾನ ಓರ್ ಏಣಿ ಇಪ್ಪ. ಐನ್ಮನೆರ ಒಳ್ಲ್ ವಾಸ ಮಾಡುವೆಂಗಳ
 ಅನುಕೂಲಕೊತ್ತಿತ್ ಅಟ್ಟತ್ತೊ ಅನುಕೂಲತೆ ಇಪ್ಪ. ಇಚ್ಚಕ್ಕಾಂಗೊತ್ತಿತ್
 ಐನ್ಮನೆರ ಎದಿಕೆ ಇಲ್ಲೇಂಗಿ ಬಲ್ ಬರಿಲ್ ತರ್ಪ (ನಕಿನಾರ) ವಕ್ಕಡ ಗುರು
 ಕಾರಣಂಗೆ ಓರ್ ಕೈಮಡ ಇಪ್ಪ. ಇದ್ಂಗೆ ಕಾರಣಂಗೆಟ್ಟೊ (ಗುರುನೆಲೆ) ಎಣ್ಣವ
 ಐನ್ಮನೆರ ಒಳ್ಳನೋ ಪೊರ್ಮೆ (ತೆತ್ತಿನ) ಒಡ್ಡಿತ್ ಚಾಣತ್ತೀರ್ ತಳ್ಳಿತ್ತೊ
 ಸೂರ್ಯೋದಯಕ್ಕೂ ಅಸ್ತಮಾನಕ್ಕೂ ನೆಲ್ಲಕ್ಕಿ ಬಾಡಲ್ ತೂಕ್ಬೊಳ್ಳತ್
 ಅಂದಿತಿರಿ ಕತ್ ಚಿಟ್ಟಿತ್ ತೊಪ್ಪ ನೇಮ ಉಂಡ್. ಅನ್ನನೇ ಪೊರ್ಮೆ ಕೈಮಂಡತ್ತೆ
 ಅಂದಿತಿರಿ (ಬೊಳ್ಳ) ಬೆಚ್ಚಿತ್ ತೊಪ್ಪನೇಮ ಉಂಡ್. ಉದಯಮಾನತ್ತೊ
 ಅಸ್ತಮಾನತ್ತೊ, ನಲ್ಲತ್ತೊ, ತೀಯಂದಾತ್ತೊ ಬಾಡಲ್ ಅಕ್ಕಿ ಕನಿಚಿತ್ (ನಲ್ಲದ್
 ಪಂದಿತ್) ಗುರುನೆ ತೊತ್ತಿತ್ ಕೈಮಡತ್ಲ ಮೀದಿ ನೀರ್ ಬೆಪ್ಪ ಪದ್ಧತಿ ಉಂಡ್.
 ಚೆನ್ನನೇರ ಬೆಮ್ಮಂಜಿನಿಂದಿತ್ ಬೆಚ್ಚಿ ಮೀದಿನ ಎಡ್ಡಿತ್ ತೊಟ್ಟೊ ನಕ್ಕುವೊ
 ನೇಮ ಉಂಡ್. ಪೋರತ್ತಾಂಗೆ ವಾರಂಡೆಕ್ಕೊಮ್ಮ ವಕ್ಕಕಾರ ತಾಮನೆ ಮೂಡಿಯ,
 ಬೆಂದೂ ಚಂಜಾದಿಯಳ ಕಾಕಿ ಕೂಟಿತ್ ಗದ್ದಾಳ ಮಾಡಿತ್ ಅದ್ ಶುದ್ಧತ್
 (ಬಾರಣ) ಗುರು ಕಾರಣನೆ ತೊತ್ತಿತ್ ಮೀದಿ ಬೆಚ್ಚಿತ್ ತೊಪ್ಪ ಪದ್ಧತಿ ಉಂಡ್.

ಐನ್ಮನೆರ ನಾಲ್ ಬರಿಲು ಓರೋರ ಕಂಡಿ (ಪಟ್ಟಿ) ಇಪ್ಪ. ಕೇಕಿಯ

ಕಂಡಿರೆದಿಕೆ ಕಲ್ಲಾರ ದಂಡ್ ಉಬ್ಬಕಂಡಿ, ಮಿಂಞಾಕ್ ಕೋಕಿಯ ಕಂಡಿಲ್ ಓಣಿಯೊಂದಿಪ್ಪದ್ ನೇಮ. ವಕ್ಕಕ್ಕೋರ್ ಒಕ್ಕ ಕಳ, ಕಳಕೊತ್ತಕಲ್ಲಾರೋರ್ ಬೋಟಿಂದೂ ಇಲ್ಲತ್ತಿಲ್ಲೆ. ವಕ್ಕಕಾರಕ್ ಕುಳಿಪಕ್ ಪತ್ತಾಂಡ ಕುಳಿಪ ಗುಡ್ಡ (ಬಾತ್‌ರೂಮ್) ನೆಲ್ಲಾ ಕುಟ್ಟಿತ್ ಅಕ್ಕಿ ಮಾಡೋಕ್ ಪತ್ತಾಂಡ ವರಕೊಟ್ಟ್ ವಕ್ಕಡ ಭೂಮಿ (ಬೇಲ್) ಜಾಗಕೊತ್ತಿತ್ ಕಾವಲ್‌ಕಾಯಿತ್ (ವಕ್ಕಡ ರಕ್ಷಣೆಕ್ಕಾಯಿತ್) ನಾಥ, ಪೂದ, ಕುಳಿಯ, ಕಲ್ಲುರ್ಟಿ, ಪಂಜುರ್ಲಿ, ಪೊಟ್ಟಿ, ಮರ್ತ ಪಿಂಞ ಕೊರ್ತಿ ಇನ್ನನೆ ಏಳ್‌ಕೂಟ್ ಮೂರ್ತಿ, ಇಲ್ಲೇಂಗಿ ಪತ್‌ಕೂಟ್ ಮೂರ್ತಿದ್ ಅದದ್ ಸ್ಥಾನ ಕೊಡ್ತಿಪ್ಪ. (ಸ್ಥಾಪನೆ ಮಾಡ್ತಿಪ್ಪ) ಇನ್ನತಾಂಗಲ್ಲಾ ಸಮ್ಮಂದಪಟ್ಟನ್ನೆಕೆ ಪಟ್ಟಮಳಗುಂಡೂ ಮಲಿಯಳಗುಂಡೂ ನೇಮ ಪೋಲೆ ಪಾಯಸ ಬೆಪ್ಪದೂ ಕೋಳಿ ಅರ್ತಿತ್ ವಾರಾಂಡ್‌ಕೊಮ್ಮ ಕೂಡಿತ್ ಪೂಜುವದುಂಡ್ (ದೇವಕ್‌ಕೊಡ್ಪ್) ವಕ್ಕಡ ಅನುಕೂಲ ಪೋಲೆ ಎಡೆ ಬುಟ್ಟಿತ್ ವಾರಾಂಡ್‌ಕೊಮ್ಮ ಇಲ್ಲೇಂಗಿ ದಂಡ್ ಕಾಲಕೊಮ್ಮ ವಕ್ಕಕಾರ ಕೂಡಿತ್ ನೇಮಪೋಲೆ ಪಾಲೆಯಳಗುಂಡ್ ಕಟ್ಟಿಂಗೋಲ(ತೆರೆ) ಪೊರ್ಮೆಕೆಟ್ಟ್‌ಚಿಟ್ಟಿತ್ ಎಡೆಬೆಚ್ಚಿತ್ ತೊಪ್ಪದೂ ಇಪ್ಪ. ಅನುಕೂಲ ಪೋಲೆ ಗುರುಕಾರಣನ ಮಲಿಯಂಗಳಗುಂಡ್ ಮನೆರ ಒಳ್‌ಲ್ ತೆರೆ (ಕೋಲ) ಕೆಟ್ಟಿಚಿಟ್ಟಿತ್ ಕಾರಣಂಗ್ ಬಾರಣಿ ಕೊಡ್‌ಪದ್ ಉಂಡ್. ಐನ್‌ಮನೆರ ಎಲ್ಲಾ ನಡ್ಪ್ ಕೊಡ್‌ಪ್ಪೂ ಅದದ್ ವಕ್ಕಡ ಪಟ್ಟಿದಾರಂಗ ಮುಂಬಾಯಿತಿಪ್ಪ. ಅಯಿಂಗ ಅದದ್ ವಕ್ಕಕ್ ಓರ್ ಬೋಟಿ ಉಳ್ಳನ್ನೆಕೆ ಹಿಡ್‌ಕಟ್ಟ್ ಹದ್ದ್‌ಬಸ್‌ಲ್ ನಡ್ಪ್‌ವಕ್ಕೋರ್ ಆದಿ ಮೊಳಿಯಾಯಿತಿಪ್ಪ. ಅಯಿಂಗಳ ತರ್ಪ್‌ಚಿಟ್ಟಕ ಬೋಟಿಯಿಲ್ಲತ ಕಳತ್ರ, ಮಾದ್ರಿ, ಕೊಡವಡ ಬುಡ ನಾಶ ಆಯಿಪೋಪದ್ ಕಂಡಿತ ನೇರೇ. ನಲ್ಲಾಂಗಲ್ಲ ಇದಿಚ್ಚಿಕ್ ಕೊಡವಡ ಐನ್‌ಮನೆರ ವಿಶೇಷತೆ (ಮಹಿಮೆ) ಆಯಿತುಂಡ್. ವಕ್ಕಡ ಐನ್‌ಮನೆರ ವಿಶೇಷತೆ. (ಮಹಿಮೆ) ಆಯಿತುಂಡ್. ವಕ್ಕಡ ಐನ್‌ಮನೆ, ಗುರುಕಾರಣನ ನಂಬಿತ್ ಅಲ್ಲಿ ವಕ್ಕಡ ನಲ್ಲಾಮೆ, ಕೆಲ್ಲಾಮೆ ನಡ್ಪ್‌ವೊ ನೇಮ.

ಇಂದಿಕ್ಕ ಶೋಕಿ ಕಳಿ ಪೆರ್ತಿತ್ ಐನ್‌ಮನೆಕ್ ಕೂಡುವೊದೆ ಓರ್ ಕೋಳ್

ಮಟ್ಟಿಂದಾಯಿತು. ಅನ್ನನೆ ಐನ್‌ಮನೆರ ತೇಕಿ ನಡಾಂದನ್ನಕ್ಕೆ ಕೊಡವಡ ಬೀರ್ಯ, ಬರ್ಕತ್, ಅಯಿಮೆ, ಕೋಯಿಮೆ ಕಮ್ಮಿ ಆಯೆಂಡೂ, ನಂಗಡ ಸಂಸ್ಕೃತಿ, ಪದ್ಧತಿ, ನಡ್ಲ್ ಉಂಡಾಂದೆಲ್ಲಾ ಓರ್ ಪ್ರದರ್ಶನ, ಮೇಳ ವಿಶೇಷ ಆಯಂಡ್ ಮಾರ್ಕೆಟ್, ವ್ಯವಹಾರ ಆಯೆಂಡತ್. ಪಟ್ಟದಾರನ ಮೂಸುವವೇ ಇಲ್ಲತ್ತಾಯಂಡತ್.

ಅಂದ್ ಮಹಾತ್ಮ ಗಾಂಧೀಜಿ ಎಣ್ಣಾನ ತಕ್ಕ ಪಡ್‌ಚವು, ಅರ್‌ಂಜವು, ವಿದ್ಯಾವಂತಂಗ, ಅನುಕೂಲಸ್ಥಂಗ ಎಲ್ಲರೂ ಒಗ್ಗೂಡಿತ್ ಪೇಟೆ ಪಟ್ಟಣತ್‌ಂಜ ಊರ್ ನಾಡ್‌ಕ್ ಪೋಯಿತ್ ಅಲ್ಲಿಯೆತ್ರ ಜಾಗ, ಅಲ್ಲಿಯೆತ್ರ ಜನಾಂಗಳ ಉದ್ಧಾರ ಕೆಯ್ಯೊಂದೂ ಎಣ್ಣುವಾನ ಇಂದಿಕ್ಕ ಕೊಡವ ಆಂಗ್ ಬೆಲೆ ಕೊಡ್ತತ್ತೆ ಕಾರಣಾಂತರತ್ಲ ಊರ್ ಬುಟ್ಟಿತ್ ಪಟ್ಟಣ ಸೇರಿತ್ ಪೋರತ್ತಾಂಗ್ ಅಲ್ಲಿ ಅಯಿಂಡ್ಯಂಡ ಅನುಕೂಲಕ್ಕಾಯಿತ್ ಅಲ್ಲಿಯೆತ್ರ ಜನ (ಕೊಡವ) ಕೂಡಿಯೆಂಡ್ ಕೊಡವ ಸಮಾಜ ಕೆಟ್ಟಿಯೆಂಡ್ ಅಲ್ಲಲ್ಲಿ ನಲ್ಲಾವೆ ನಡ್ತಿಯೆಂಡ್ ಪೋಯೆಂಡುಂಡ್. ಅದ್ ಅಯಿಂಡ ಅನುಕೂಲ. ಆಚೇಂಗಿ ಸಮಾಜಕಾರ ಅಲ್ಲಿ ಪ್ರೆಸಿಡೆಂಟ್ ಕಾರ್ಯಕಾರಿ ಮಂಡಳಿಯೆಂದ್ ಮಾಡಿಯೆಂಡ್ ಬೊಳ್‌ಂದಂಡ್ ನಲ್ಲಾವೆ ನಡ್ತುವೊದ್ ಏಕಾಏಕಿ ಕೊಡವಡ ಉದ್ಧಾರಾಂದ್ ಪ್ರಪಂಚತ್ರ ಎಲ್ಲಾ ಕೊಡವಡ ಆಡಳಿತತ್‌ನ ಕೈಕ್ ಎಡ್ತೆಂಡ್ ಅಯಿಂಡ ಕೋಯಿಮೆ ಪೋಲೆ ತೀರ್ಮಾನ ಮಾಡಿತ್ ಕೊಡವಡ ಪುಡ್ತತ್ತೆ ತೇಕಿತ್ ವಿಷಯ ತೀರ್ಮಾನ ಮಾಡೋದ್ ಕೊಡವಡ ಕುಲಕ್ ಬಂದೊದಗ್‌ನ ಕೇಡ್‌ಂದ್ ದಾರೂ ಅರಿಯತ್ತದ್ ಪೆರ್ತ್ ಬಲ್ಯ ಆಯಿಪೋಯೆಂಡತ್.

ಇಂದಿಕ್ಕ ಒರೇ ಸಮಾಜತ್ಲ ನೂರಾರ್ ಮಂಗಲ ಮಾದ ಕೈಪದುಂಡ್. ಅಲ್ಲಿ ತೂಕ್‌ನ ತೂಕ್ ಬೊಳ್ಳೆತ್ರ ಬೆಂಬರತ್ ಕಾವೇರಮ್ಮೆನ ಪೋಟೋ ಬೆಚ್ಚಿತ್ ವಕ್ಕಣ್ಣ ಗುರುಕಾರಣಂಗಕ್ಕೂ ಅಕ್ಕಿ ಕನ್ನಿತ್ ಕಾವೇರಮ್ಮೆನೋ ಕಾರಣನೋ ತೊಪ್ಪದುಂಡ್. ಕಾವೇರಮ್ಮೆ ಆಚೇಂಗಿ ಸರ್ವವ್ಯಾಪಿ ಆನಾನಂಗುಂಡ್ ಕೊಡವ ಕಾಕ್‌ನಲ್ಲಿ, ನೆನತಲ್ಲಿ ಇಕ್ಕು. ಆಚೇಂಗಿ ಓರೋರ್ ಸಮಾಜತ್ಲ ಎಲ್ಲಾ ವಕ್ಕಡ

ಕಾರಣಂಗೆ ಅಲ್ಲಿಕ್ ಎತ್ತುವೊದುಂಡೋಂದ್ ಸಂಶಯ. ಸಮಾಜತ್ಲೆ ಅಯಿಂಚ್ಚೆಂಡನಲ್ಲಾಮೆ, ಕ್ಲಾಮೆ, ಜೀರ್ಣೋದ್ಧಾರತ್ರ ತೀರ್ಮಾನ ಎಡ್ಡಕ್ ಅದದ್ ಸಮಾಜಕ್ಕಾರಡದ್ದೇ ಹಕ್ಕಾಯಿತಿಕ್ಕು. ಆಚೇಂಗಿ ವಕ್ಕಣ್ಣ ಪಟ್ಟಿದಾರಂಗ, ಊರ್ತಕ್ಕ ತೌಂದಾರಿಯ, ಕಾವುಕಾರಂಗಳ ಕಾಕಿಕೂಟಿತ್ ಇಡೀ ಕೊಡವಡ ಸಂಸ್ಕೃತಿ, ಪದ್ಧತಿ, ನಡ್ಡ್, ಉಡ್ಡ್, ಆಚಾರ, ವಿಚಾರತ್ರ ಬಗ್ಗೆ ತೀರ್ಮಾನ ಎಡ್ಡ ಹಕ್ಕು ಸಮಾಜಕ್ಕಾರಕ್ ವಿಂಡಿತಾ ಹಕ್ಕಿಲ್ಲೆಂದೆಣ್ಣುವಾನ ಅರ್ಜಿತಿಕ್ಕುಂಡಿಯೆದ್ ಅವಶ್ಯ.

ಅಡಿಕೆ ಪಾಳೆರ ಬಫೆ ಊಟ (ಸಮಾಜತ್ರ) ಓಪನ್ ಬಾರ್ ಕೊಡವಕ್ ಅಂಡ್ನ ರಾಕ್ಷಸ ವ್ಯಕ್ತಿಯೆಂದೆಣ್ಣುಂಡ್ವಾಪ ಸಮಾಜಾಂದೆಣ್ಣುವಾನ ಕೊಡವ ಅದೋರ್ ಶೋಕಿಕಳಿ. ಮೇಳತ್ರ ಮೊಳಾಂದ್ ಬಳ್ಳಿಯೆಂಡುಳ್ಳದ್ ಕೊಡವ ಅಪಾಯತ್ರಂಜಿಕ್ಕಿತ್ತನೆ ಕಟ್ಟು ಸೂಚನೆ (ಮೊಳಿ) ಆಯಿತ್ ಕಾಂಬ. ಅದ್ ಬುಟ್ಟಿತ್ ಐನ್ಮನೆಲ್ ಕೇಕ್ ಮೊಟ್ಟ್ ಕಂಡಿ, ಕನ್ನಿಕಂಬ್, ಕನ್ನಿಮೂಲೆ ಕೋಂಬರೆ, ಐಮರ ಕಂಬ ಇನ್ನತಾಂಗೆಲ್ಲಾ ಅದದ್ಂಡ ವಿಶೇಷತೆ, ಮಹಿಮೆ, ಶಕ್ತಿ ಸಾಮರ್ಥ್ಯ ಇನ್ನತ್ತದೆಲ್ಲಾ ಅಲ್ಲಲ್ಲಿ ಎದ್ಕಂಡಂಡ್ ವಕ್ಕಕಾರಳ ಅಲ್ಲಲ್ಲಿ ಭಯ ಭಕ್ತಿ, ಗತ್, ಗೌರವ, ಗಾಂಭೀರ್ಯ ಉಂಡಾಕಿತ್ ಅಯಿಂಚ್ಚೆಂಡ ನಡ್ಡ್ ಉಡ್ಡ್ ತಕ್ಕು, ಬಾಕ್ ಕಳಿ, ತಳಿ, ಇನ್ನತ್ತಾನ ನಿರ್ಕ್ ನಿಯಮತ್ಲಾ ಹಿಡ್ಡತ್ ಪುಡ್ಡಿ ಬೆಚ್ಚಿತ್ ಕಾರ್ಯಂಭೀರ್ಯ ನಡ್ಡಿತ್ ಅಯಿಪ ಶಕ್ತಿ ಅಲ್ಲಿ ಇಂಜತ್. ಕೂಟಕ್ ಪಕ್ಕತ್ತೇ ಕಾರಣಂಗೆಟ್ಟು (ಕೈಮಡ) ಇಂಜಂಡ್ ವಕ್ಕಕಾರ ಚೆರಿಯದೊ ಬಲ್ಲಿಯದೊ ಓರ್ ಕಂಬೋಡಿ (ನೆಟ್ಟಿಲ್) ಉಂಡಾಯಿತ್ ಕೊಡವ ಎಲ್ಲಾ ವ್ಯವಹಾರತ್ಲೆ ಅಡ್ಡಿ ಬೆಚ್ಚಿತ್ ಕಾರ್ಯ ತೇತಿತ್ ಪೊರದಾಟುವಂಜತ್. ಅಲ್ಲಿಕ್ ಭಾಗ್ಯ ಭರ್ಕತ್ತೂ ಇಂಜತ್. ಅದ್ ಬುಟ್ಟಿತ್ ಸಮಾಜತ್ಲೆ ಎಳಿಯದ್ ಪೆರಿಯಂದೆಣ್ಣುವಾಂಗೆ ಭಿನ್ನ ಭೇದವಿಲ್ಲದೆ ಪೊಗೆ ಬಲಿಯೂ, ಕಕ್ಕುಡಿಯೂ ವಕ್ಕಚ್ಚೆ ನಡ್ಂದಂಡಿಪ್ಪ. ಇದ್ ಪೆರ್ತ್ ಬಲ್ಲಿಯ ಅಪಾಯ ಅವನತಿ, ಅವಲಕ್ಷಣ ಕೂಡಾ. ಕೊಡವ ಸಮಾಜ ಪುಟ್ಟಿಲಾಯಿತ್ ಎಳಿಯಂವ ಪೆರಿಯಂವಂಡ ಕಾಲ್ ಪುಡಿಕತೆ ಅಯಿತ್... ಬಾಯಿಂದ್ ತೀತ್ರವ. ಪೊಮ್ಮಕ್ಕ ಎಲ್ಲಾ ಮಂಡ ಆಟಿತ್ ಕೊಟ್ಟೆಕಣ್ಣ್

ಉರ್ಚಿರುವಾ ಕಣ್ಣ್ ಮರ್ಚಿರುವಾ.

ಐನ್‌ಮನೆರ ಒಳ್‌ಲೇ ಎನ್ನಂಗ್? ಪೊರ್ಮೆ ಸುತ್ತಾ ಕಟ್ಟಿ ಕೂಡ ಓರ್ ತರತ್ರ ಗಾಂಭೀರ್ಯ, ಭಕ್ತಿರಸ ಗತ್ತ್ ಗೌರವ ಉಳ ಪರಿಸರ ಆಯಿತುಳ್ಳಾನಗುಂಡ್ ಅಲ್ಲಿ ಕೂಡ್‌ನ ಎಳಿಯದ್ ಪೆರಿಯದ್‌ಂದ್ ಅಯಿಂಡಯಿಂಡ ಭಕ್ತಿ ಗೌರವ ಇನ್ನಾಲೇ ಉಂಡಾಯವಾ. ಐನ್‌ಮನೆ (ನಾಲ್‌ಕೆಟ್) (ಮುಂದ್ ಮನೆ) ಮುಂದ್ ಬಾಯಿಕಂಡಿ, ಅದ್‌ಂಡ ಗತ್ತ್ ಬೋರೆ. ವತ್ತೆ ಪೊರೆಲೂ ಅಚ್ಚಕ್ಕೇ. ಇನ್ನತ್ತ ಪರಿಸರತ್ತ್ ಅಲ್ಲಿ ಕೂಡ್‌ನೈಂಗಕ್ಕೂ ಓರ್ ತರತ್ರ ಭಕ್ತಿ ಭಾವ ಉಂಡಾಯೆಂಡ್ ಅಡ್ಕತ್ ಇಪ್ಪ. ಸಮಾಜತ್ಲ್ ಪರಸ್ಪರ ಸಮ್ಮಂಧ ಇಲ್ಲತ ಮಾದ್ರಿ ಗೌರವ ಕೊಡ್ವಕ್ ಭೋದ ಇಲ್ಲತ್ತಾಯವಾ. ಇದ್‌ಂಗೇ ಎಣ್ಣುಪೊ ಪರಿಸರಂದ್.

ಇಚ್ಚಕ್ಕಲ್ಲತೆ ಎಂಗ ಕೊಡವ ಎಂಗಡ ಮಿಂಞಾತ್ರ ಪೀಳಿಗನೆ (ಕುಂಞಿಯಳ) ಉದ್ದಾರಕೆಯೊಂಡುಂದಾಚೇಂಗಿ ಎಂಗಡ ಮಹಾಕವಿ ಅಪ್ಪನೆರವಂಡ ಅಪ್ಪಚ್ಚ ಮಹಾಕವಿ, ನಡಿಕೇರಿಯಂಡ ಚಿಣ್ಣಪ್ಪಚ್ಚ, ಮಾರ್ಷಲ್ ಕೊಡಂದೆರ ಕಾರ್ಯಪ್ಪಚ್ಚ, ಜನರಲ್ ಕೊಡಂದೆರ ತಿಮ್ಮಯ್ಯಚ್ಚ ಇನ್ನತ್ತ ಮಹಾನ್ಯಾವಂಗಡ ವಿಷಯ, ಸವಾಜಕ್ ನಲ್ಲದ್ ಕೆಜ್ಚ ಇಞಾಚ್ಚಕ್ಕೋ ಕೊಡವಡ ನಲ್ಲಾವೆ, ದೇವಾನೇವತೆಯಡ ಮಹಿಮೆ, ಆಟ್‌ಪಾಟ್, ಸಂಸ್ಕೃತಿ ಪದ್ಧತಿ, ನಡ್ವ, ಉಡ್ವ, ಇನ್ನತ್ತ ಮಹಿಮಾ ಪೂರ್ವ ವಿಷಯತ್ತ್ ಸ್ಕೂಲ್ ಕಾಲೇಜಿಲ್ ಕ್ಲಾಸ್‌ವಾರ್ ಚೂರ್ ಚೂರ್, ಚೆರಿಯ, ಚೆರಿಯ ಪುಸ್ತಕತ್ತ್ ಪಾಟಕಾಯಿತ್ ಕೂಟುವೆನ್ನಕ್ಕಾಂಡು. ಕಾಲತ್ತೋಡ್ ಕಾಲತ್ತಾಚೆಂಗ್ಯೂ ಕೊಡವ ಬಾಷೆಕ್ ಲಿಪಿ ಉಂಡಾಕಿತ್ತೇ ಉಂಡಾಕೊಂಡು. ಶ್ರೀ ಮೂಲ ಕಾವೇರಮ್ಮ ಮಹಾತಾಯಿನೊ ತಲೆ ಬಲ್ಲಿಯ ಈಶ್ವರ ಇಗ್ಗುತ್ತಪ್ಪನೋ ವಾರೆಂಡೆಕ್ಕೊಮ್ಮಾಂಡಾಚೆಂಗ್ಯೂ ತೊಪ್ಪನ್ನನ್ನ ಅಭ್ಯಾಸ ಮಾಡಂಡಿಯ ಅವಶ್ಯ ಉಂಡ್.

ಕೊಡವಡಲ್ಲಿ ಎಚ್ಚಕ್ಕೆಚ್ಚಕ್ಕೋ ಜನ ಬಡವಂಗಳಾಯೆಂಡ್ ಓರ್ ಪೊತ್ ಸೆರಿ ಆಯಿತ್ ಉಂಬಕ್ ಕೂಳ್ ಇಲ್ಲತೆಯೂ, ಮೇಲ್‌ಕ್ ಸೆರಿಯಾಯಿತ್ ತುಂಡ್

ಪೊಡಿಯಕ್ ತುಂಡ ಬಟ್ಟೆಯಿಲ್ಲತೆಯೂ ಉಳ್ಳ ಕೊಡವಳ ದಾರೂ ಕಾಂಬದಿಲ್ಲೆ. ಕಂಡಕ್ಕೋ ಮನ ಪೊಮುಲೆ. ಅನ್ನತ್ತೆಂಡ ಕೂಡ ಸರಿ ಆಯಿತ್ ಇಕ್ಕ ಪರೆವಕ್ಕೂ ಚೆನ್ನಂಗ್ ಕೊಡವಕ್ ಸಮಾಧಾನೊ ಇಪ್ಪುಲೆ. ಇದ್ ಪೆರ್ತ್ ಅವಲಕ್ಷಣ. ಅಪಶಕುನ ಕೂಡ ಅಕ್ಕು. ಅಲ್ಲತೆ ಕೊಡವ ಪರಜಾತಿ ಕೊದಿಯಂಗಳಾಯಿತೂ ಸ್ವಜಾತಿ ವಿರೋಧಿಯಳಾಯಿತೂ ಉಳ್ಳದ್ ಅವಲಕ್ಷಣ. ಓರ್ ಕಡೆ ಕಾಲಕ್ ಕುರ್ಕ ಮೊಟ್ಟೆ ಇಟ್ಟನ್ನಕ್ಕೆ ಆಯೆಂಡತ್. ನಂಗಡಲ್ಲಿ ಸ್ಕೂಲ್‌ವಾರ್, ಕ್ಲಾಸ್‌ವಾರ್ ಓದಿತ್ ಒಂದನೇ ಶ್ರೇಣಿಲ್ (ಫ಼ಸ್ಟ್ ರೇಂಕ್) ಪಾಸಾನ ಮಕ್ಕಕ್ ಸ್ಕಾಲರ್‌ಶಿಪ್‌ಂದೂ, ಇನಾಮ್‌ಂದೂ ಮೆಡಲ್‌ಂದೂ ಕೊಡ್ಪ ನೇಮ ಉಂಡ್. ಆಚೀಂಗಿ ಸೊನ್ನೆ ಮಾರ್ಕ್ ಎಡ್ತ ಮಕ್ಕಳ ಮೂಸುವೊಕ್ಕೇ ಪೋಪುಲೆ. ಇದ್ ಕೊಡವಡಲ್ಲಿ ಕಂಡಂಡುಳ್ಳ ಪೆರ್ತ್ ಬಲ್ಯ ಅವಲಕ್ಷಣ.

ಪಂಡ್ ರಾಜಂಗಡ ಕಾಲತ್ಲ ಕೊಡವಡ ನಮ್ಮೆನ ಒರೇ ದಿನತ್ಲ ಪೋಯಿತ್ ನೋಟಿತ್ ಮಜಾ ಮಾಡುವಕ್ ಕಯ್ಯಲೇಂದೆಣ್ಣಂಡ್ ಕೈಲ್‌ಪೊಳ್ಡ್ ನಮ್ಮೆನ ಬೋರೆ ಬೋರೆ ದಿನತ್ಲ ಕೈಪನ್ನೆಕೆಯೂ ಬೆಚ್ಚತ್. ಇನ್ನತ್ತಾನ ಕೊಡವ ಎಂಗಡ ಒತ್ತೋರ್ವೆಲ್ ಕೂಡಿತ್ ಪಂಡ್‌ಪೋಲೆ ಪುತ್ತರಿನ ಪಾಡಿ ಇಗ್ಗುತ್ತಪ್ಪಂಡಲ್ಲಿ ಕಣಿಯ ರಾಶಿ ಬೆಚ್ಚಿತ್ ನೋಟಿತ್ ತೇರ್ಮಾನಕ್ ಒತ್ತಿತ್ ಮೋಪ್‌ಕೂಟ ನಡ್ಡಿತ್ ಒನ್ನಾಂದೇ ನಡ್ತುವೊಕೂ, ಕೈಲ್ ಪೊಳ್ಡನೋ ಓರೋರೆ ದಿನ ನಡ್ತುವನ್ನೆಕೆಯೂ ತೇರ್ಮಾನ ಮಾಡಿತ್ ಪತ್ತ್ ಒತ್ತಿತ್ ಮುತ್‌ಂದೆಣ್ಣುಪೊ ಪಳಂಚೊಲ್‌ಕೊತ್ತಿತ್ ಒನ್ನಾಂದೇ ನಡ್ತುವೆನ್ನಕ್ಕಾಕಂಡು. ಇದ್ ಕೊಡವಕ್ ಇಗ್ಗುತ್ತಪ್ಪ ದೇವಡದೂ ಅಯಿಂಡೆಂಡ ವಕ್ಕಡ ಗುರುಕಾರಣಂಗಡದೂ ಎಂಗಡ ಕೊಡವಡ ಗುರು ವಂದಮೌರ್ಯಂಡದೂ ಪಿಂಞ ಕಾವೇರಮ್ಮೆರದೂ ದಯೆ ಇಪ್ಪಾಂದೆಣ್ಣುವಾತ್ಲ ಒರ್‌ಚ್ಚಿಕ್ಕೂ ಸಂಶಯ ಇಪ್ಪೆ. ಕೊಡವ ಉದ್ಧಾರಾಪಕ್ ಕೆಯ್ಯಂಡಿಯ ಪಣೇಂದೆಣ್ಣಕ್ಕ ವಕ್ಕೆಣ್ಣ ಸಮಿತಿ ಉಂಡಾಕಿತ್ ಅದ್‌ನ ಊರೂರ್ ನಾಡ್ ದೇಶಾಂದ್ ಸಮಿತಿ ಉಂಡಾಕಿತ್ ವಕ್ಕೆಣ್ಣ ಪಟ್ಟಿದಾರಂಗಳೊಕ್ಕೊಯ್ತಿತ್ ಮೋಪ್‌ಕೂಟ ನಡ್ಡಿತ್ ಈಡ್‌ಂಬಿ ಪುಡಿಚಿಕ್ಕ ನಮ್ಮೆ ನಮ್ಮೆಲ್ ಪದ್ಧತಿ, ಉಡ್

ನಡ್ಡ್, ಆಚಾರ ವಿಚಾರ ಸಂಸ್ಕೃತಿ ಇನ್ನತಾಂಡ ಕೂಟ್‌ಕ್ ಮಂಗಲ, ಚಾವು ಮಾದತ್ರನ್ನತ ನಮ್ಮನ ನೆರವೇತ್ಪಾಂಡನ್‌ಟ್ಪಲ್ ವೋಪ್‌ಕೂಟ ಉಂಡಾಕಿತ್ ಒರೆ ಪೋಲೆ ನಡ್ಡುವನ್ನಕ್ಕೆ ಪ್ರತಿ ತಿಂಗ ಸೆಮಿನಾರ್‌ರ ಮಾದ್ರಿಲೇ ತೀರ್ಮಾನ ಉಂಡಾಕಿತ್ (ಪಳಿಯಾನ) ಪುದಿಯಾನ ಬಲ್ಯತೆ ನಡ್ಡುವನ್ನಕ್ಕಾಕಂಡು.

ಕೊಡಗೊಂದೆ ಪೆದತ್ತ್ ಮೂಲೆತ್ ಕಾವೇರಿ ನಾಡೊಂದ್ ಪೆದ ಇಡೊಂಡುಂದ್ ಅಲ್ಲಲ್ಲಿ ಸದ್ವ್ ಕೇಕತೆಯೂ ಇಲ್ಲೆ. ಕಾಲ ಕ್ರಮೇಣ ಕಾವೇರಿ ನಾಡ್‌ಂದ್ ಪೆದ ಉಂಡಾಕಿತ್ ಕೊಡವಡ ಸೊತ್ತೇ ಇಲ್ಲತ್ತನ್ನೆಕ್ಕೆ ಕಣೆ ಉಂಡಾಕೊಂದ್ ಆಕತಿಪ್ಪಾಲೆ ಖಂಡಿತಾ. ಇದ್‌ಂಗ್ ಕಾರಣ ಕೊಡವ ಗುರು ಮಂಜ್‌ಕಳಿ ಕಳಿ ಪಾಂಡದೂ ಪಿಂಞ ರಾಜಕೀಯ ಅಂಬ್ಲಿಲ್ ಕೊಡವತೊಯಿಂದ್ ಕಳಿಪದೇ ಮುಖ್ಯ ಕಾರಣವಾಯಿತುಂಡ್.

ಈಂಗ್ ಎಂಗೆಲ್ವಾ ಒಗ್ಗಟ್ ಒತ್ತೊಪ್‌ರ್‌ಲ್ ಶ್ರೀ ಮೂಲ ಕಾವೇರಮ್ಮನೋ, ಶ್ರೀ ಇಗ್ಗತ್ತಪ್ಪ ದೇವಳೋ ವಕ್ಕಣ್ಣ ಗುರು ಕಾರಣಂಗಳೇ ತೊತ್ತಿತ್ತ್ ಒಬ್ಬುದ್ದಿಲ್ ನಡ್ಡುಂಡಿಯೆ ಕಾರ್ಬಾರ್ ಮುಖ್ಯವಾಯಿತುಂಡ್.

ಐಂಬತ್ತಾರ್ ದೇಶ (ಅರೀಪಕ್ಕಾಯಿತ್)

1. ಅಂಗ, 2. ಮಂಗಳ, 3. ಕಳಿಂಗ, 4. ತೆಲ್‌ಗ್, 5. ಸಿ ಕೊಂಗ, 6. ಲಾಟ, 7. ಬಂಗಾಳ, 8. ಚೋಳ, 9. ಕೇರಳ, 10. ಗೌಳ, 11. ಪಾಂಚಾಲ, 12. ಸಿಂಹಳ, 13. ಕುಂತಳ, 14. ನೇಪಾಳ, 15. ಮಲೆಯಾಳ 16. ತುಳುವ, 18. ಕೊಂಕಣ, 19. ಕುರು, 20. ಮಗಧ, 21. ಮತ್ಸ್ಯ, 22) ವಿದರ್ಭ, 23. ಕೋಸಲ, 24. ಶೂರಸೇನ, 25. ಕಾಶ್ಮೀರ, 26. ಮಹಾರಾಷ್ಟ್ರ, 27. ಕರ್ಣಾಟಕ, 28. ಕಿರಾತ, 29. ತುರುಷ್ಯ, 30. ಶಂಕರ, 31. ಬರಮೆ, 32. ತಿಗರ್ತ, 33. ನಿಷಧ, 34. ಮದ್ಯ, 35. ಜೈನ, 36. ಬರ್ಬರ, 37. ಬಾಹ್ಯೀಕ, 38. ಲಾಟ, 39. ಜೈನ, 40. ಕರಾಳ, 41. ಜೌಡ್ರ, 42. ಘೋಜರ, 43. ಕಾಂಬೋಜ, 44) ಮ್ಲೇಚ, 45. ಸೌರಾಷ್ಟ್ರ, 46. ಸೌವೀರ, 47 ಪಾಂಡ್ಯ, 48. ಹೂಣ,

49. ಯವನ, 50. ಹೈದಯ, 51. ಅರ್ಯಾವರ್ತ, 52. ಭೋಜ, 53. ದ್ವೈಪ, 54. ಅಮೇರಿಕ, 55. ಉತ್ತರ ಕುರು, 56. ಗ್ರೈಟ.

ಕೊಡಗ್ ಪನ್ನೆರಂಡ್ ಕೂಡಿ (ಕೊಂಬ್)

ಪಂಡ್ ಆಳ್‌ನ ಕೊಡಗ್ ರಾಜಂಗಡ ಕಾಲತ್ ದೇಶತ್ ಪನ್ನೆರಂಡ್ ಕೊಂಬಾಯಿತ್ ಪೊವುತ್ತೊಂಡ್‌ಂದ್ ಗ್ಯಾನ ಮಾಡಿತ್ ಕೇರಳತ್‌ಂಜ ಮಯ್ಯಿರಿ (ಕಚ್ಚಿ ಉರೈಯಿಂಗಳ) ಯಳ ಆಳ್ ಅಯಿಚಿತ್ ಕಾಕಿತ್ ತಂದ್ ಕೊಡಗ್‌ನ ರಾಜಂಗ ತಾಂಡ ಪೊನ್ನಳ್ಳ ಪಾನಿಲ್ ಕಚ್ಚಿ ಅಳ್‌ಂದಿತ್ ಕೊಡ್ತಿತ್ ಪನ್ನೆರಂಡ್ ಕೊಂಬ್ ಕಚ್ಚಿನ ಉರಿತ್ ಮಾಡಿತ್ ತರೂಂಡೂಂದ್ ರಾಜಾಜ್ಜೆ ಮಾಡ್‌ಚಿ. ರಾಜಂಡ ಹುಕುಂ ಪ್ರಕಾರ ಮುಯ್ಯಿರಿಯ ಕೊಂಬ್ ಪಣಿ ತ್‌ಚಿತ್ ರಾಜಂಡ ಪಾದ ಮಿಂಞ ಪನ್ನೆರಂಡ್ ಕೊಂಬ್‌ನ ಬೆಚ್ಚಿತ್ ಇದ್‌ನ ಕಂಡ ರಾಜಂಗ ಸಂತೋಷ ಅಯಿತ್ ಪೊನ್ನ್ ಪಣ ಕೊಡ್ತಿತ್ ಅಯಿನ ಬುಟ್ಟಿತ್.

ರಾಜ ತಾಂಡ ಪಡೆಯಾಳಿಯಳ ಕಚ್ಚಿ ಕೊಂಬ್ ಉದೊಕ್ ಗಟ್ಟಿ ಮುಟ್ಟಾ ಚಾಂಡಾಳಂಗಳ ಪನ್ನೆರಂಡಾಳ್‌ನ ಕಾಕಿ ಕೂಟ್‌ಚಿ. ಪನ್ನೆರಂಡ್ ಚಾಂಡಾಳಂಗೆ ಓರೋರ ಕೊಂಬ್‌ನ ಕೈಕೆಡ್ತಂಡ್ ಗಾವುದಕ್ಕೋರಬು ಸಾಲ್ ಕೆಟ್ಟಿ ನಿಂದಿತ್ ರಾಜಂಡ ಹುಕ್ಕುಮ್ ಪ್ರಕಾರ ಬಾಯಿ ಊದ್‌ಚಿ. ಬಾಯಿ ಬೆಚ್ಚಿತ್ತೋದಣ್ ಪನ್ನೆರಂಡ್ ಕೊಂಬಾಚಿ. ಒಂದನೆ ಕೊಂಬ್‌ರ ಕೋಟಿ ಬೆಟ್ಟ ಕೆಂಡಿಲ್ ನಿಂದತ್. ಅದ್‌ಂಗ್

1. ಕೋಟಿ ಬೆಟ್ಟ ಕಂಡಿಂದೆಣ್ಣುವಾ. ಅಲ್ಲಿ ನಿಂದ ಚಾಂಡಳ ದಮ್ ಕಟ್ಟಿ ಊದಣ್ ಪೆಗ್ಗಳಯ್ಯಪಂಡ ಪೆಗ್ಗಳ್ ಕಂಡಿಲ್ ಸ್ವರ ನಿಂದತ್. ಅದ್‌ಂಗ್ 2. ಪೆಗ್ಗಳ್ ಕಂಡಿಂದೆಣ್ಣುವಾ. ಅಲ್ಲಿ ನಿಂದ ಚಾಂಡಾಳ ಕೊಂಬ್ ಉರ್ದಣ್ ಚೋಮಗಿರಿಲ್ ಸ್ವರ ನಿಂದತ್. ಅದ್‌ಂಗ್ 3. ಚೋಮಗಿರಿಂದೆಣ್ಣುಪ್. ಚೋಮಗಿರಿಕ್ ಮೋಳ್‌ಲ್ ನಿಂದಿತ್ ಚಾಂಡಾಳ ದಮ್ ಕಟ್ಟಿ ಕೊಂಬ್ ಉರ್ದಣ್ ಅಂಡ ಸ್ವರ ಪೋಯಿತ್ ಇಗ್ಗುತ್ತಪ್ಪ ದೇವಡ ಪಾಡಿ ತೋರ ಕಂಡಿಲ್ ನಿಂದತ್. ಅದ್‌ಂಗ್ 3. ಪಾರಿ ತೋರ ಕಂಡಿಲ್ ನಿಂದತ್. ಅದ್‌ಂಗ್ 4. ಪಾಡಿ ತೋರ

ಕಂಡೀಂದೆಣ್ಣುವ. ಪಾಡಿ ತೋರ ಕಂಡಿಂಜ ಚಾಂಡಾಳ ಕಚ್ಚಿಕೊಂಬ್ ಊದಣೆ ಕ್ಷೇತ್ರಪ್ಪ ತಣ್ಣಮಾನಿ ಕಂಡಿಲ್ ಸ್ವರ ನಿಂದತ್. ಇದಂಗ್ 5. ತಣ್ಣಮಾನಿ ಕಂಡಿಂದೆಣ್ಣುವಾ. ಚಾಂಡಾಳ ಅಲ್ಲಿಂಜಿ ಉರ್ಪಣೆ ಪೆರಾಚೆಲ್ ಮಾಚ್ಚಾಲಪ್ಪ ದೇವಂಡ ಚೆಂಬ್‌ರಾಜ ಕಂಡಿಲ್ ಸ್ವರ ಪೋಯಿತ್ ನಿಂದತ್. ಇದಂಗ್ 6. ಚೆಂಬ್‌ರಾಜ ಕಂಡೀಂದೆಣ್ಣುವಾ. ಅಲ್ಲಿ ನಿಂದ ಚಾಂಡಾಳ ಕಚ್ಚಿಕೊಂಬ್ ನಲ್ಲಾಂಗ್ ಬಾಯಿ ಬೆಚ್ಚಿ ಊದಣೆ ಆಂಡ ಸ್ವರ ಪೋಯಿತ್ ಕಾಳೇರಪ್ಪ ದೇವಡ ಕಡ್ಡ ಕಂಡು ಕಂಡಿಲ್ ಸ್ವರ ನಿಂದತ್. ಇದಂಗ್ 7. ಕಡ್ಡ ಕಡು ಕಂಡೀಂದೆಣ್ಣುವಾ. ಅಲ್ಲಿಂಜಿ ಕೊಂಬ್ ಉರ್ಪಣೆ ಸ್ವರ ಪಾಲೇರಿಲ್ ಅಯ್ಯಪ್ಪ ದೇವಡ ಪಟ್ಟಿ ಪೊಳೆ ಕಂಡಿಲ್ ಸ್ವರ ಪೋಯಿ ನಿಂದತ್. ಇದಂಗ್ 8. ಪಟ್ಟಿಪೊಳೆ ಕಂಡೀಂದೆಣ್ಣುವ. ಪಟ್ಟಿ ಪೊಳೆ ಕಂಡಿಂಜಿ ಕಚ್ಚಿಕೊಂಬ್ ಉರ್ಪಣೆ ನಂದಲಪ್ಪ ದೇವಂಡ ಪೂಮ ಕಂಡಿಲ್ ಸ್ವರ ಪೋಯಿ ನಿಂದತ್. ಅದಂಗ್ 9. ಪೂಮಡ ಕಂಡೀಂದೆಣ್ಣುವ. ಪೂಮಡ ಕಂಡಿಂಜ ಚಾಂಡಾಳ ಕಚ್ಚಿ ಕೊಂಬ್ ಉರ್ಪಣೆ ಸ್ವರ ಪೋಯಿತ್ ಸಿದ್ವೇಶ್ವರ ದೇವಂಡ ಗದ್ದಿಗೆ ಕಣಿವೆಲಾನಿಂದತ್. ಇದಂಗ್ 10. ಗದ್ದಿಗೆ ಕಣಿವೆ ಕಂಡೀಂದೆಣ್ಣುವ. ಗದ್ದಿಗೆ ಕಣಿವೆಲಾನಿಂದಿತ್ ಕೊಂಬು ಉರ್ಪಣೆ ಆಂಡ ಸ್ವರ ಪೋಯಿತ್ ಮದೂರಪ್ಪ ದೇವಂಡ ಪಾಲತ್ತೇರಿ ಕಂಡಿಲ್ ಸ್ವರ ನಿಂದತ್. ಇದಂಗ್ 11. ಪಾಲತ್ತೇರಿ ಕಂಡೀಂದೆಣ್ಣುವಾ. ಪಾಲತ್ತೇರಿ ಕಂಡಿಂಜಿ ಉರ್ಪಣೆ ಚಾಂಡಾಳಂಡ ಕೊಂಬ್‌ರ ಸ್ವರ ಪೋಯಿತ್ ತಿರು ನೆಲೆ ಕಂಡಿಲ್ ನಿಂದತ್. ಅದಾನ 12. ತಿರುನೆಲ್ಲಿ ಕಂಡೀಂದೆಣ್ಣುವ.

1. ಕೋಟೆ ಬೆಟ್ಟ ಕಂಡಿ, 2. ಪೆಗ್ಗಳತ ಕಂಡಿ, 3. ಸೋಮಗಿರಿ ಕಂಡಿ, 4. ಪಾಡಿತೋರ ಕಂಡಿ, 5. ಕೇತ್ರಪ್ಪ ದೇವಂಡ ತಣ್ಣಮಾನಿ ಕಂಡಿ, 6. ಮಾಚ್ಚಾಲಪ್ಪ ದೇವಂಡ ಚೆಂಬ್‌ರಾಜ ಕಂಡಿ, 7. ಕಾಳೇರಪ್ಪ ದೇವಡ ಕಡ್ಡ ಕಡು ಕಂಡಿ, 8. ಪಾಲೇರಿ ಅಯ್ಯಪ್ಪ ದೇವಡ ಪಟ್ಟಿ ಪೊಳೆ ಕಂಡಿ, 9. ನಂದಾಲಪ್ಪ ದೇವಂಡ ಪೂಮಡ ಕಂಡಿ, 10. ಸಿದ್ವೇಶ್ವರ ದೇವಂಡ ಗದ್ದಿಗೆ ಕಣಿವೆ ಕಂಡಿ, 11. ಮದೂರಪ್ಪ ದೇವಡ ಪಾಲತ್ತೇರಿ ಕಂಡಿ, 12. ತಿರುನೆಲ್ಲಿ ದೇವಡ ತಿರುನೆಲ್ಲಿ ಕಂಡಿ ಇನ್ನನೆ ಪನ್ನೆರಂಡ್ ಕಂಡಿ.

ಪಾಕತಮ್ಮ ದೇವಿ (ವನದುರ್ಗಿ) (ಕೊಳಗದಾಳ)

ಬೇಂಗ್‌ನಾಡ್ ಕೊಳಗದಾಳ ಊರ್‌ಲ್ ಈರುಳ್ಳಿ ಬನತಾರ ನಡುಲ್ ಪಂಚೇರಿ ಬನತ್ಲ ಉಂಡಾನ ಪಾಕತಮ್ಮ ದೇವಿರ ಕಥೆ. ಪಂಡ್ ಪೂರ್ವ ಕಾಲತ್ಲ ಕುಂಬ್ಬಾರ್ (ಮಾರ್ಚಿ) ತಿಂಗತ್ರ ನಲ್ಲೋರ್ ದಿನತ್ಲ ಕಾಡ್‌ಲ್ ಗುಡಿಸಿಲ್‌ಲ್ ವಾಸ ಉಳ್ಳ ಕಾಟಳಂಗ ಓರ್ ದಿನ ಕೂಟ್ ಕೂಡಿತ್ ಪಿತ್ಯಾಂದ್ (ನಾಳೆ) ಮುಚ್ಚ ಬೋಟೆ ಪೊರಟತ್.

ಬನ ಕಾಡ್ ಸುತ್ತಿತ್ ನೋಟಿತೂ ಮುಚ್ಚಂಡ ಜಾಡ್ ಕಂಡ್‌ಲೆ. ಬೋರೆ ಜಾತಿಯಳೋ ಕಣ್ಣ್ ಕಂಡ್‌ಲೆ. ತಿರ್ಗೀ ತಿರ್ಗೀ ಅಪಕ್ಕ ಬೆದಾರ ಕಾಚೆಕ್ಕ ಉಟ್ಟಿ ಮಂಡೆ ಕಾಂಜಿತ್ ಬಾಯಾರಿಕೆ ಆಚಿ. (ದಾವ ಆಚಿ) ಕಾಡ್‌ಲ್‌ಡೀ ನೀರ್ ತೇಡ್‌ಚೆಂಗ್ಲೂ ನೀರ್ ಎಲ್ಲಿಯೂ ಕ್‌ಟ್ಲೆ. ಬೇರ ಪುಡ್‌ಚ ಮಕ್ಕುಕ್ ಅವದಿಲ್ಲತಾಚಿ. ಕೂಟ್‌ಲ್ ಪರಿಯಂವ ದೇವಡ ಮರೆ ಬುದ್ಧಕ್ಕ ಎಂಗಕ್ ನಲ್ಲದ್ ಕ್‌ಟ್ಟುವಾಂದ್ ಎಣ್ಣೆಚಿ. ತಾನನ್ನೆನ್ನೆಕ್ಕೆ ಎಣ್ಣೆತ್ ಪಂಚೇರಿ ವನತ್‌ಲ್ ತಟ್ಟಾನ ನಲ್ಲ ಜಾಗ ನೋಟಿತ್ ಕೊಕ್ಕಲೆನ ನೀಕಿತ್ ಕಾಡ್ ಬಾಳೆ ಎಲ್ಕಂಡ ಬೆಚ್ಚಿತ್ ಸಣ್ಣಕ್ಕಿನ ತೊರ್ಜಿತ್ ಆಂಡ ಮೇಲೆ ತೆಂಗನ ಬೆಚ್ಚಿತ್, ತೆಂಗರ ಮೇಲೆ ಗೋಟಡ್ಚೆ ಬೆಚ್ಚಿತ್ ಆಂಡ ಮೇಲೆ ಸಣ್ಣ ಚೂದ್ ಕುತ್ತಿತ್ ಚೂದ್‌ರ ಮೀದಲ್ ದಂಡ್ ಕಾಲ್ ಊರಿತ್ ಕಣ್ಣ್ ದಂಡ್ ಚಿಮ್ಮಿಯಂಡ್ ಕೈಚೋಡ್‌ಚಿ ತೊತ್ತಂಡ್ ಪರಮೇಶ್ವರನೋ ಪಾರ್ವತಿ ದೇವಿನೋ ವನತ್ ಸೆನತಂಡ್ ದಾವುಕ್ ನೀರಾಂಡುಂದ್ ಉಗ್ರ ಜೀವರಾಶಿಯಕ್ ಪಡಿ ಅಳಂದಂಡ್ ಬಂದಿತ್ ಈರುಳ್ಳಿ ಬನಕ್ ನೇರೆ ಆಕಾಶ ಮಾರ್ಗತ್ ಪ್ರೋಯೆಂಡಿಷ್ಟುಕ್ ಪಡಿ ಅಳಂದಂಡ್ ಬಂದಿತ್ ಈರುಳ್ಳಿ ಬನತಾರ ನಡುಲ್ ಕಾಟಾಳ ತಪಸ್ಸು ಮಾಡ್ವಾನ ಪಾರ್ವತಿ ದೇವಿಕಂಡಿತ್

ತಾಂಡ ವಡಿಯಂಡ ಕೂಡೆ-ಪತಿದೇವಾ ಆ ಬಾಂಗಾಡ್‌ರ ನಡುಲ್ ಕಾಟಾಳ ಮಾನವ ಉಗ್ರ ತಪಸ್ಸು ಮಾಡುವ. ಅಂವಂಗ್ ಎನ್ನತ ಕಷ್ಟ ಬಂದಿತ್ತಿಕ್ಕುಂದೆಣ್ಣುವಾನ ನಂಗ ಅರಿಯಂಡೂಂದೆಣ್ಣೆತ್ ಆತ ಆ ತಪಸ್ಸು ಮಾಡ್ತೊ ಮಾನಂವಂಡ ಪಕ್ಕ ದೇವಾಂದೇವಿಯೂ ಪೋಯಿತ್ ನಿಂದಿತ್ ಪ್ರತ್ಯಕ್ಷ ಆಯಿತ್ ತಾನ್ ತಪಸ್ಸು ಮಾಡುವ ಕಾರಣ ಎನ್ನಂದ್ ಕೇಪಕ್ಕ ಪಾದಕ್ ಅಡ್ಡ ಬುದ್ಧತ್. ಇದ್‌ನ ಕಂಡ ಪಾರ್ವತಿ ಪರಮೇಶ್ವ ನೀಕ್ ಬಂದ ಕಷ್ಟ ಎನ್ನಂದೂ ತಾಂಗ್ ಬೋಂಡ್ಯಾನ ವರ ಎಂತಂದೂ ಕೇಟಿತ್.

ದೇವಡ ಈ ತಕ್ಕ ಕೇಟಿತ್ ಕಾಟಾಳ ಮಾನಂವ ನಡ್‌ಂದ ಕಥೆನ ಎಣ್ಣೆಚಿ. ಈ ಬಾಕಾಡ್ ಬನತ್ಲ ಮುಚ್ಚ ಬೋಟಿ ಪೋನಲ್ಲಿ ದಾವು ಪರ್ತಿತ್ ನೀರ್‌ಕ್ಕಾಯಿತ್ ಕಾಡ್ ಇಡೀ ತೇಡಿತ್ ಆವದಿಲ್ಲತ್ತಾಚಿ. ಇದ್‌ಂಗಾಯಿತ್ ತಂಗಳ ಮನತ್ ನೆನತಿತ್ ಉಗ್ರ ತಪಸ್ಸು ಮಾಡಿತ್ ಬೋಡ್‌ನದಾಚೀಂದೆಣ್ಣೆಚಿ.

ಆ ತಕ್ಕ ಕೇಟಿ ಪಾರ್ವತಿ ಪರಮೇಶ್ವರ, ಕುಂಞಿ ನೀನ್ ಬೊತ್ತಂಡಾಂದೆಣ್ಣೆತ್ ಪರಮೇಶ್ವರ ತಾಂಡ ಕೈಲಿಂಜ ಪಾತೂರ ಕೋಲ್‌ಲ್ ತಪಸ್ಸು ಮಾಡ್‌ನ ಜಾಗತ್ ಚೌಕಟ್ಟಾಯಿತ್ ಮಂಡಳ ಬಂದಿತ್ ಬೆಮ್ಮಂಜಿ ನಿಂದತ್. ಅಕ್ಕಣೆಕ್ ಕಥೆ ಮಾಯ ದೇವ ಮಾಯ ಮಮ್ಮಾಯತ್ಲ ಮಂಡಳ ಚೌಕಟ್ಟರ ಒಳ್‌ಲ್ ಭೂಮಿ ಬಗ್ಗಿತ್ ನೀರ್ ಕೆರೆ ರೂಪಗೊಂಡತ್. ನೋಟಿಯೆಂಡಿಜೆನ್ನೆಕ್ಕೆ ಕುಂಡ್‌ರ ನಂಡುಂಜಿ ಚೂದ್ ಬಣ್ಣತ ನೀರ್ ಪೂರಂದುಳ್ಳೆಚಿ. ನೋಟಿಯೆಂಡಿಜೆನ್ನೆಕ್ಕೆ ಕೇಕಿಯ ದಿಕ್ಕಕ್ ನೀರ್ ದುಂಬಿತ್ ಒಕ್ಕುವೊಕ್ ಸುರು ಆಯೆಂಡತ್. ಇದ್‌ನ ಕಂಡಿತ್ ಪಾರ್ವತಿ ಪರಮೇಶ್ವರಂಗ ಕಾಟೋಳ ಮಾನವಂಗಕ್ ಈ ತಕ್ಕ ಪಂದ್‌ತ್. ನೀ ಕೆಜ್ಜ ತಪಸ್ಸಿರ ಫಲಗೊಂಡ್ ಕುಡಿಪಕ್ ನೀರಾಚಿ. ಇಕ್ಕಣೆಕ್ ನೀನ್ ಕಾಟಾಳ ಮಾನಂವನಾಯಿತ್ತಿಂಜಿಯ. ಮಿಂಞಕ್ ನೀನ್ ಕಾರೂಳಿ ಮುನಿಂದೆಣ್ಣುವೊ ಪೆದ ಪೋಲೆ ಬದ್‌ಕ್‌ಂದೆಣ್ಣೆಚಿ. ಅನ್ನನೆ ಎಣ್ಣೆತ್ ಪಾರ್ವತಿ ಪರಮೇಶ್ವ ಅಶೀರ್ವಾದ ಮಾಡಿತ್ ಕಣ್ಣೆಕ್ ಮರೆ ಆಚಿ.

ತಾನಲ್ಲಿಂಜಿ ಡೀವಾರ ಕಾರೂಳಿ ಮುನಿರಾಯ ಬೋಟೆಕ್ ಬಂದಯಿಂಗಳೆಲ್ಲಾ ಕಾಕಿ ಕೂಟಿತ್ ಸಂತೋಷತ್ ನೀರ್ ಕುಡಿಚಿತ್ ದಾವ ಅಡ್ಡಿ ಕೊಂಡಂಡ್ ಕುಳ್ಳಿ ತಳ್ಳಿತ್ ಉಟ್ಟು ತಣುವಾಯೆಂಡ್ ಅಯಿಂಡ್ಯೆಂಡ ಮನೆಕ್ ಪೋಯೆಂಡತ್. ಅಲ್ಲಿಂಜಿಪ್ಪರ ನೀಲಕೆರೆ ಮನೆಕ್ ಪೋಯೆಂಡತ್. ಅಲ್ಲಿಂಜಿಪ್ಪರ ನೀಲಕೆರೆ (ಶುದ್ಧಕೆರೆ)ರ ಏರಿಲ್ ನೀರ್ ಪೀತಕ್ ಪುತ್ತ್ ಒಂದ್ ಪುಟ್ಟಿ ಬಾತ್. ಕಾಲ ಮಿಂಞಾಕ್ ಪೋಪಕ ಬೊಳಂದ ಪುತ್ತ್ ಬಲ್ಲಿಯೆದಾಯಿತ್ ನೇರ್ಚಿ. ಕಾಳಿಕಮ್ಮೆ ದೇವಿರ ಬಾಕಡ್ ಬನತ್ಂಜಿ ಭಾರೀ ಜೋರಾನ ವಾಯುಕಾತ್ ಬೀಂದ್ಚಿ. ಆ ನೇರಕ್ ಗಾಳಿರ ಪೋಯಿತ್ಂಗುಂಡ್ ಪುತ್ತ್ ವಡ್ಂದತ್. ವಡ್ಂದ ಪುತ್ತ್ ರೊಳ್ಂಜಿ ಚಿತ್ತಾಲ್ (ಆಲ್ಗಿಡ) ಕುಂಞಿಯೊಂದ್ ಪುಟ್ಚಿ.

ಕಾಟರೆರ ಒಳ್ಳಲ್ ದೇವ ಮಾಯ ಮಮ್ಮಾಯ ಓರ್ ಬೊಳ್ಳ ಚಂಗ್ ಪಿಂಞೋರ್ ಚೋಂದ ಚಂಗ್ ಕುಂಞಿಯ ಪುಟ್ಚಿ. ಪತ್ತ್ ಕಾಲ ಕಯ್ಯುವಕ ಚಂಗ್ ಬೊಳ್ಳ ತೇಂದಿತ್ ಬಲ್ಲಿಯದಾಚಿ. ಅನ್ನನೆ ಇಪ್ಪಕ ನಲ್ಲೋರ್ ದಿನತ್ಲಾ ಕಾಳಿಕಮ್ಮೆ ದೇವಿರ ಬಾಕಾಡ್ ಬನತ್ಂಜಿ ಜೋರಾನ ಕಾತ್ ಬೀಂದ್ಚಿ. ಕಾತ್ ಬೀರಣೆ ಆಲ್ ಮರತ್ರ ಕೇಕ್ ಪೋನ ಪಾಲ ಕೊಂಬ್ಲ್ ಕಾರ ಕಾಟರೆರೊಳ್ಲಾ ಚಂಗ್ ಚಂಗ್ ಮುಟ್ಚಿ. ಮುಟ್ಚಿನ ಚಂಗ್ ದಂಡೂ ನಡ್ಂದತ್. ಅಕ್ಕಣೆಕ್ ಕಥೆ ಮಾಯ ಮಮ್ಮಾಯ, ದೇವ ಮಾಯ ಮಮ್ಮಾಯ ವಡ್ಂದ ಬೊತ್ತ್ ಚಂಗ್ ರೊಳ್ಂಜಿ ಅಯ್ಯಪ್ಪನೂ ನಾಯಳೂ ಪುಟ್ಚಿ. ಚೋಂದ ಚಂಗ್ ರೊಳ್ಂಜಿ ಮೂವ (ಮೊಂದ್) ಮಕ್ಕ ದೇವಿಯ ಸೂರ್ಯ ಉದ್ಚಿ ಪೋಲೆ ಪುಟ್ಟಿ ಪೊರಂದುಳ್ಳಿ. ಈಯೆಂಗ ಆಲ್ ಮರತ್ರ ಕೊಂಬ್ಂಜಿ ಕೊಂಬ್ಕ್ ಪಂದ್ಂಡ್ ಚಪ್ಪಲೆಲ್ ಕಳಚಂಡ್ ಅನ್ನನೆ ಬಾವಂಜತ್.

ಇನ್ನನೆ ಇಪ್ಪ ಕಾಲತ್ ನಲ್ಲೋರ್ ದಿನತ್ಲಾ ಕುಡಿಪಕ್ಕಾನ ಬೊಳ್ಳಾನೆ ಬಾಂಗಾಡ್ ಇಡಿಯ ನೀರ್ ತೇಡಿತ್ ಕೊಟ್ಟಿ ಬಾಯಿ ಬುಟ್ಟಿ ಅಂದ್ಂಡ್ ಬಪ್ಪಕ ದೇವಡ ನೀರ್ ಕೆರೆನ ಕಣ್ಣ್ ಕಂಡತ್. ನೀರ್ ಕುಂಡ್ನ ಕಂಡ ಬೊಳ್ಳಾನೆ ನೀರ್ ಕುಡಿಪಕ್ ಆಂಡ ಪಕ್ಕ ಪೋಕಣೆ ದೇವಿಯಡ ಮಾಯಕ್ ಕೆರೆಲಿಂಜ ನೀರೆಲ್ಲಾ

ಬತ್ತಿ ಪೋಯಿತಿಂಜತ್. ಇದಾನ ಕಂಡಿತ್ ಬೊಳ್ಳಾನೆ ಏರ ದುಃಖ ಪಟ್ಟತ್. ಆಕಾಶಕ್ ನೋಟಿಯಂಡ್ ಬಾಯಿಬುಟ್ಟ್ ಅಂದರ್ತ್. ಅಕ್ಕಣೆ ಬೊಳ್ಳಾನೆ ಚಿತ್ತಾಲ್ (ಅರೆ (ಅಲ್ಮರತ್ಲ) ದೇವಿಯಳ ಕಂಡಿತ್ ಬಾಯಿಬಿಟ್ಟ್ ಅಂದರ್ತ್. ಇದಾನೆಲ್ಲಾ ಕಂಡ ದೇವಿಯ ಬೊಳ್ಳಾನೆಕ್ ತಕ್ಕ ಪಂದರ್ತ್. ಎಂಗ ನೀಕೋರ್ ವರ ತಪ್ಪಂದೆಣ್ಣೆ ಚಿ.

ಅದ್ನ್ ಕೇಟ ಬೊಳ್ಳಾನೆ ಆಕುಪೋಕೊಂದ್ ಒತ್ತತ್. ಅಕ್ಕಣೆಕ್ ಮಮ್ಮಾಯ ದೇವಮಾಯ ಮಮ್ಮಾಯ ನೀರ್ ಕೆರೆರ ಒಳ್ಂಜಿ ದುಂಬಿ ಮಂಜರ್ತ್. ಇದಾನ ಕಂಡ ಬೊಳ್ಳಾನೆ ನೀರ್ ಕುಡ್ಡಿತ್ ಕುಳಿಚಿತ್ ಸಂತೋಷತ್ ಅಲ್ ಮರತ್ರಡಿಲ್ ಪೋಯಿತ್ ನಿಂದತ್. ಇದಾನೆಲ್ಲಾ ನೋಟಿಯೆಂಡಿಂಜ ದೇವಿಯ ಅಯ್ಯಪ್ಪನೂ ನಾಯಿಯಳೂ ಚಿತ್ತಾಲ್ (ಅಲ್ಮರ)ರ ಕೊಂಬ್ಂಜಿ ಬೊಳ್ಳಾನೆಕ್ ಈ ತಕ್ಕ ಪಂದರ್ತ್. ಈ ಬಾಂಗಾಂಡ್‌ರ ನಡುಂಜಿ ನಾಡ್ ಸುತ್ತಿಯೆಂಡ್ ಪೋಕ ಎಂಗ ನೆಲೆ ನಿಪ್ಪಕ್ ಜಾಗ ಆಂಡು, ಚಾಂದ್ ಪೂಪು ಪೂಜೆ ಆಂಡು. ಆನಗುಂಡ್ ಇಲ್ಲಿಂಜಿ ಪೊರ್ಡಾನಾದೆಣ್ಣೆನ ಬೊಳ್ಳಾನೆ ದೇವಂಗಳ ಪೊರ್ಕಂಡ ಕರೆಕ್ಕಾಯಿತ್ ಕಡ್ಯಣೆ ಬೊಳ್ಳಾನೆರ ಚೌಟ್ ನೀರ್ ಕೆರೆರ ಏರಿ ಒಡ್ಂದಿತ್ ನೀರ್ ಒಕ್ಕೋಕ್ ಸುರು ಆಚಿ. ಒಕ್ಕಿತ್ ಪೊಳೆಯಾಯಿ ಪಂಜರ್ತ್. ನಡ್ಂದ್ ಮಿಂಘಕ್ ಬಾಕಾಡ್ ಬರಿಯೋಳ ಅಂಗಿ ಜೂಂಗಿ ಬಂದಿತ್ ಉಪ್ಪು ಕುಂದ್‌ರ ಕೊಡಿಲ್ ದಿಕ್ಕ ನೋಟ್‌ಚಿ. ಅಲ್ಲಿಂಜಿ ಪೂರ್ತಿತ್. ಪಟ್ಟ ಮೊಟ್ಟೆರ ಕೊಡಿಲ್ ನಿಂದಿತ್ ನೋಟಾಣೆ ಪಾಕೇರಿರ ನಡುಲ್ ತಲೆದೇವಿ (ಬನಶಂಕರಿ) (ಪಾಕತಮ್ಮೆ)ಕ್ ತಾನ್ ನಿಕ್ಕಂಡಿಯೆ ಜಾಗ ಕಂಡತ್. ಅಲ್ಲಿಂಜಿ ಪೂರ್ತಿತ್ ದೇವ ಕುಂದ್‌ರ ಕೊಡಿಲ್ ನಿಂದಿತ್ ನಾಲ್ ದಿಕ್ಕ ನೋಟ್‌ಚಿ. ನಾಲ್ ದಿಕ್ಕ ನೋಟಣೆ ಬೊಳ್ಂಜೆಂದೆಣ್ಣೆವೊ ಕೇರಿಲ್ ಇಂದಿಯತ್ರ ಬಾಚರಣೆಯಂಡ ವಕ್ಕಡ ಮನೆನ ಕಂಡಿತ್ ಪಿಲ್ ಪೊರೆರ ಮೀದಲ್ ಚೂದ್ ಬಣ್ಣತ್ಲ ಪೊಗೆ ಕಂಡತ್. ಕೋಳಿ ಕೂವೊದ್ ಕೇಟತ್. ಚೋಮ ಕೆನೆ ಬೆಪ್ಪದ್ ಕೇಟತ್. ಅಂದಿಯೆತ ದಿನ ಕುಂದ್‌ಲ್ ಒಳ್ಂಜಿತ್ ಪಿತ್ಲೆ ಪೊಲ್ಚೆಕ್ ಮೂಂದಾಳ ದೇವಿಯ ಪಟ್ಟತ್ತಿಯ ರೂಪತ್ಲ ಬಾಚರಣೆಯಂಡೊಕ್ಕಡ

ಮನೆಕೆ ಪೋಯಿತ್ ಕೇಕಿಯ ಪಟ್ಟಿಲ್ ನಿಕ್ಕಣೆ ಆ ವಕ್ಕಡ ಯಜಮಾನ ಮಂದಯ್ಯ
 ಅವಂಡ ಪೊಂಗ ಓಮವ್ವೊ ಸೂರ್ಯೋದಯತ್ರ ನೇರಕ್ ಮನೆ ಓಡ್ಡಿ ತಳ್ಳಿತ್
 ಶುದ್ಧಗೊಂಡಿತ್ ಕೇಕ್ ಪಡಿ ತೊಂದಿತ್ ನೋಟಣೆ ಪಟ್ಟಿಲ್ ಮೂಂದಾಳ್ ಪಟ್ಟಿತ್ತಿಯ
 ನಿಂದದ್ ಕಂಡಿತ್ ತಾಂಡ ಪತಿದೇವಂಗ್ ಕಂಡ ಕಥನ ಎಣ್ಣೆಚಿ.

ಮಂದ್ಯ ಬೈಯಿಂಬ ಎದ್ ಬಂದಿತ್ ನೋಟಣೆ ಪಟ್ಟಿಲಿಂಜ ಪಟ್ಟಿತ್ತಿಯ
 ಮೂಂದಾಳೂ ಮನೆಕೆ ಪತ್ತಿತ್ ಐಮರತ್ ಅಲ್ಲದ್ ಕಂಡತ್. ಅಯಿನ ಕೈತೊತ್ತಿತ್
 ಅಡ್ ಬುದ್ಧತ್. ಇದ್ ನ ನೋಟಿಯೆಂಡಿಂಜ ಓಮವ್ವೊ ಚೆಂಬ್ ನೀರ್ ಬೆಚ್ಚಿತ್
 ಬಂಬಲಿಯ ಕೇಟಿಕ್. ಬೊಳ್ಳಿಕಂಡಿಲ್ ಪಾಲ್, ಅಕ್ಕಿ, ತೆಂಗ, ಬಾಳೆಪಣ್ಣೆನೆಲ್ಲಾ
 ಮೊರತ್ಲ್ ಕ್ಕಾದಿತ್ ಅಯಿಂಜುಕೆ ಬೆಚ್ಚಿತ್ ಕಾಲ್ಕಡ್ ಬೂವ. ಇದ್ ನ ಕಂಡ
 ದೇವಿಯ ಈ ತಕ್ಕ ಪಂದರ್ತ್. ನೆಂಗ ಮೂಂದ್ ದೇವಿಯ ನಿಂಗಡ ಮನೆಕೆ
 ಬಂದ ಕೇಳಿಕ್ ಇಂದ್ ತೊಟ್ಟ್ ಮಿಂಞಾಕ್ ಈ ವಕ್ಕಡ ಮನೆಲ್ ಪಂದಿ ಕೋಳಿ
 ಚಾಕತಿ. ಕಳ್ಳಪುಳಿ ಕಾಚಿತ್ತಿ. ಪಟ್ಟಿಮಡ ಪೋಲೆ ಅದ್ ಶುದ್ಧ ಬೆಚ್ಚೋಳಿ. ನಿಂಗ
 ಪಾಲ್ ಪಣ್ಣೆ ಬಯ್ಯಾಡ್ ತಂದಿತ್ ಎಂಗಕ್ ತಕ್ಕಾರ ಕೆಚ್ಚಾಂಗ್ ಅಕ್ಕಿ ನೆಲ್ಲ್
 ಪೊಲಿಯೆಡ್. ಚಿಂಗ ಬಾಳೆ ನೇರಡ್. ಪುಣ್ ಪಣ ಪರ್ಕಡ್ ಈ ಮನೆಲ್
 ಸಂಸಾರ ಪರ್ಕಡ್. ಕೊಟ್ಟ್ ದುಂಬ ಪಯ್ಯು ಅತ್ತಕಡ್ ಪರ್ಕಡ್. ಇನ್ನನೆ
 ಪಂದಿತ್ ಅಶೀರ್ವಾದ ಮಾಡಿತ್ ಮಂದಯ್ಯಂಗಣ್ಣೆಚಿ. ಈ ಕೇರಿರ ತಲೆಲ್
 ಪಾಕಕ್ ನಡ್ ಎಂಗಡ ಮುಂಬೆಲ್ಲಾ ಈ ವಕ್ಕ ನಡ್ಚೊಳೆಂದಣ್ಣೆಚಿ. ಅಶೀರ್ವಾದ
 ಕೆಚ್ಚಿತ್ ಕಣ್ಣೆಕ್ ಮರೆ ಆಚಿ. ಕಣ್ಣೆಕ್ ಮರೆ ಆಪಾಂಗ್ ಮಿಂಞಾ ಮಂದಯ್ಯಂಡ
 ಕೂಡ ಈ ತಕ್ಕ ಪಂದರ್ತ್. ನಿಂಗ ತಂದ ಬಯ್ಯಾಡ ಪಾಲ್ ಪಣ್ಣೆ ಎಲ್ಲಾನೋ
 ದೇವ ಕುಂದ್ ಕೊಡಿಲ್ ಅಲ್ಲಿ ಎಲ್ಲಾ ಬೇಂಗಿಯವ. ಇದ್ ಒಂಡ ಮೊಳಿಯೋಲೆ
 ಇಂದ್ ತೊಟ್ಟ್ ಮಿಂಞಾಕ್ ಕಾಲ ವಾರಾಂಡೇಕೋರಮ ದೇವ ಕುಂದ್
 ಮೋಳ್ ಕೆ ದಂಡ್ ಕೇರಿ ಕೂಡಿತ್ ಪಟ್ಟಿಮಳ ಕಾಕಿತ್ ನೈವೇದ್ಯ ಬೆಚ್ಚಿತ್
 ಚಾಂದ್ ಪೂಜೆ ಕೆಚ್ಚಿತ್ ಎಂಗಳ ನೆನತಿಯೋಳೆಂದ್ ಮರೆ ಆಯೆಂಡಿತ್.

ಅಲ್ಲಿಂಜ ಪೂರ್ತಿವು ಮೂವ ಮಕ್ಕ ದೇವಿಯ ದೇವ ಕುಂದ್

ಮೋಳಾಕ್ಕೆತ್ತಿತ್ ಅಯ್ಯಪ್ಪನೂ ನಾಯಳೂ ಅಡ್ಡ ದೇವಿಯ ಪಾಲ್ ಪಣ್ಣ್ ಬೇಂಗಿತ್ ಅಲ್ಲಿಂಜ ಪೂರ್ಟತ್. ಅಲ್ಲಿ ತೊಟ್ಟ್ ಇಂದೋಳ ದೇವ ಕುಂದ್ ಮೋಳಾಲ್ ಬೊಳ್ಂಜೆಕೇರಿ, ಪಾಕಕೇರಿ ಇವು ದಂಡ್ ಕೇರಿ ಕೂಡಿತ್ ಪಟ್ಟಮಳ ಕೂಟಿತ್ ನೈವೇದ್ಯ ಬೆಚ್ಚಿತ್ ಚಾಂದ್ ಪೂಜೆ ಕೆಜ್ಜಿತ್ ದೇವಳ ನೆನಪದುಂಡ್.

ದೇವ ಕುಂದ್ ಮೋಳಾಂಜ ಪೂರ್ಟ ಮೂವ ಮಕ್ಕ ದೇವಿಯ ಅಯ್ಯಪ್ಪನು ನಾಯಿಯಳೂ ದೇವ ಕುಂದ್ ಬರಿಯೊಳ ಪಾಕೆಲರಿ ನಡುಕ್ ಸಾಗಿತ್ ಚೋಕಿರೋಡೆ ಮೊಟ್ಟೆಲ್ ನಾಲ್ ದಿಕ್ಕ ನೋಟಣೆ ಕೂಟ್ಲ್ ತಲೆ ದೇವಿಕ್ ಎಲ್ಲಾ ಚೋಡೆ ಒತ್ತಿತ್ ನೆಲೆ ನಿಪ್ಪ ಬಾಗ ಕಂಡ್ ಸಂತೋಷತ್ ಮಹಾತಾಯಿ ಬೊಳ್ಳನೆರ ಬೆನ್ನಂಜ ಪಾತಾಳಕ್ ತಾಂದಿತ್ ಮಮ್ಮಾಯತ ಮಹಾತಾಯಿ ಕಲ್ಲಾಯಿತ್ ಮೂಡಿ ಪೊರ ಪೂರ್ಟಿತ್ ಅಂದ್ ತೊಟ್ಟ್ ಇಂದೋಳ ಪಾಕತಮ್ಮ ದೇವಿಂದ್ ಪೆದ ಬಾತ್.

ಇಚ್ಚೆಕ್ಕೆಲ್ಲಾ ಕಣೆ ಪಾಂಚೇರಿ ವಸತ್ಂಜ ದೇವ ಕೆರೆ ನೀರೆಲ್ಲಾ ಉಕ್ಕಿ ಒಕ್ಕಿಯುಂಡ್ ಬಂದಿತ್ ಪಾಕತಮ್ಮ ದೇವಿರ ಮುಂಬಾರಕ್ಕಾಲೆ ಏಳ್ ಕುಂಡ್ ತೀರ್ಥಾಯಿತ್ ಪೊಳೆಯಾಯಿತೊಕ್ಕಚಿ. ಪಾಕತಮ್ಮ ದೇವಿಕ್ ನಿತ್ಯ ಪೂಜೆ ಕೈಯೋಕ್ ತೀರ್ಥಕ್ ನೀರಾಚಿ. ಇದ್ನೈಲ್ಲಾ ಕಂಡಿತ್ ಪಾಕತಮ್ಮರ ಬಾಕಿ ದಂಡ್ ತಂಗೆಯ ತಕ್ಕ ಕೇಟಿತ್, ನೀಕುಳ್ಳ ನೆಲೆಯಾಚಿ ಅಕ್ಕಯ್ಯ ನಂಗಕ್ ನೆಲೆ ಎನ್ನನೆ ಕೇಪಕ, ಪಾಕತಮ್ಮ ಮಹಾತಾಯಿ ಈ ತಕ್ಕ ಪಂದರ್ತ್. ಕೇಳಿ ತಂಗೆಯಳೇ, ನಿಂಗ ಬೊತ್ತಂಡ ಬೊರ್ಂಡಂಡ. ನಿಂಗಕುಳ್ಳ ನೆಲೆ ತಪ್ಪಿ, ಇಲ್ಲಿಂಜ ನಾನ್ ನೋಟನಕ್ಕ ಕೊಳಗದಾಳಾರ ನಡುಲ್ ನೀಕೊತ್ತ ನೆಲೆಯುಂಡ್. ಅಯ್ಯಂಡೋಡೆ ಮೊಟ್ಟೆಲ್ ಎಲ್ಲಾ ಚೋಡೋತ್ತೋರ್ ಜಾಗ ಉಂಡ್. ಅಲ್ಲಿ ನೀ ನೆಲೆಗೊಂಡ. ಅಲ್ಲಿ ಪೋಯಿ ನಿಂದವ ಬೊಳ್ಳಾನೆಕ್ ನೆಲೆ ಕೊಡ್. ಕಾಲೋರಾಂಡೆಕ್ಕೋರಮ ಕಾವೇರಮ್ಮ ದೇವಿರ ತೀರ್ಥ ಕುಡ್ತೊಳಿ. ನಾಳ್ ನಮ್ಮ ಕೈಚೋಳಿಂದಣ್ಣಚಿ.

ಈ ತಕ್ಕ ಕೇಟಿತ್ ಪಾಕತಮ್ಮ ದೇವಿರ ದಂಡಾಳ್ ತಂಗೆಯಳೂ,

ಅಯ್ಯಪ್ಪನೂ ನಾಯಿಯಕ್ಕೂ ಬೊಳ್ಳಾನೆರ ಬೆನ್ನಲ್ ಪಾಕಕೇರಿಂಬ ಪೊರ್ಟತ್. ಕೊಳಗದಾಳ್ ಊರ್‌ಕ್ ಸಾಗಿತ್ ಅಯ್ಯಂಡೋಡೆ ಪೊಟ್ಟೆಲ್ ನಿಂದಿತ್ ನಾಲ ದಿಕ್ಕೆ ನೋಟೊಕ ಎಲ್ಲಾ ಜೋಡೊತ್ತ ಜಾಗ ಕಂಡಿತ್ ಸಂತೋಷತ್ ಮಹಾತಾಯಿ ನೆಲೆ ನಿಂದಿತ್. ಅಯ್ಯಪ್ಪಂಗೂ ನಾಯಿಕೂ ತಾಂಡ ಬಲೆ ಬರಿಲ್ ಜಾಗ ಕೊಡ್ತತ್. ಅಂದ್ ವೊಟ್ತ್ ಇಂದಾಕಣೆಕೋ ಪೊಪದಿ ಅಮ್ಮೇಂದ್ ಪೆದಬಾತ್. ಕೂಟ್‌ಲ್ ಕಡೆ ದೇವಿ ಬೊಳ್ಳಾನೆರ ಬೆನ್ನಲ್ ಅಲ್ಲಿಂಬ ಪೊರ್ಟತ್. ಬಾಡಗ ಊರ್‌ಲ್ ಚಂದುರೋಡೆ ಪೊಟ್ಟೆಕ್ ಸಾಗಿತ್ ಅಲ್ಲಿ ಪೋಯಿ ನಿಂದಿತ್ ನೋಟಣೆ ಎಲ್ಲಾ ಒತ್ತೋರ್ ನೆಲೆಕೊವ್ವಕ್ ನೆಲೆ ಕಂಡತ್. ಬಾದಾತ್ ಪೊಪ್ಪೊದಿ ಅಮ್ಮೇಂದ್ ಅಂದೊಂಬ ಪೆದಗೊಂಡತ್. ಇದ್‌ನೆಲ್ಲಾ ಕಂಡಿತ್ ಬೊಳ್ಳಾನೆ ಈ ತಕ್ಕ ಪಂದರ್‌ತ್. ಉಯ್ಯ ಎನ್ನಡ ಮಹಾತಾಯಿ ನಿಂಗಕೆಲ್ಲಾ ನೆಲೆ ಆಚಿ. ಈರುಳ್ಳಿ ಬನತ್‌ಂಜಿ ಪೊರ್ಮವಕ ಪರ ತಪ್ಪಿಂದೆಣ್ಣೆತುಳ್ಳಿರಾ, ಇಕ್ಕ ನಾಕ್ ನೆಲೆ ಎನ್ನಂದ್ ಕೇಟತ್. ಅಕ್ಕ ಬಾಡತೋದಿ ಮಹಾತಾಯಿ ಈ ತಕ್ಕ ಪಂದರ್‌ತ್. ಕೇಳ್ ನೀ ಬೊಳ್ಳಾನೆ ಈ ಊರ್‌ಡ ಪಡ್‌ಇಲ್ಕಾರ್‌ಕ್ಕಾಯಿತ್ ಕಾವೇರಮ್ಮ ಮಹಾತಾಯಿ ಪೊಳೆ ಆಯಿತ್ ಒಕ್ಕುವಾ. ಆ ಪೊಳೆಲ್ ಕುಳ್ಳಿತ್ ಕಾವೇರಿರ ಏರಿಲ್ ಕಲ್ಲಾಯಿ ಮಂಜೊಳಿ. ಕಾಲೋರಾಂಡೆಕ್ಕೋರಮ ಊರೆಲ್ಲಾ ಕೂಡಿತ್ ನೀಕ್ ಚಾಂದ್ ಪೂಜೆ ಕೆಜ್ಜವಾಂದೆಣ್ಣೊಚಿ. ಇನ್ನನೆ ಈರುಳ್ಳಿ ಬನತ್‌ಂಜಿ ಪೊರ್ಟ ಮೂಂದ್ ದೇವಿಯ ಅಲ್ಲಲ್ಲಿ ನೆಲೆಗೊಂಡತ್.

ಪಾಕತಮ್ಮ ದೇವಿರ ನಮ್ಮ

ಈ ಮೂಂದ್ ದೇವಿಯ ನೆಲೆಗೊಂಡ ಅದದ್ ಊರ್‌ಲ್ ದಿನಾಲೂ ನಿತ್ಯ ಪೂಜೆಗೊಂಡಿತ್ ಚಾಂದ್ ಪೂವು ಬೇಂಗೋಂದುಂಡ್. ಆನಲ್ಲಿ ಪಾಕತಮ್ಮ ಬೊಪ್ಪಡತಂಡ ವಕ್ಕಕಾರ ತಕ್ಕಂಗಳೂ, ಮುಕ್ಕಾಟಿ ಬಲ್ಯ ಮನೆಲ್ ಭಂಡಾರ ಬೆಪ್ಪಂದೂ ನಡಂದ್ ಬಂದಂಡುಂಡ್.

ಕಾಲಕೊಮ್ಮ ಡಿಸೆಂಬರ್ ಪದ್ದಂಜಾಂಗ್ ನಮ್ಮ ನಡ್ ನೇಮ ಉಂಡ್. ಪಾಕತಮ್ಮರ ನಮ್ಮ ಓರ್ ದಿನ ಮಹಾಪೂಜೆ ನಮ್ಮಂದೂ, ಪಿತ್ಯಾಂದ್ ಕಳಸ ಪೂಜೆಂದೂ ನಡುವ ಪದ್ಧತಿ. ಡಿಸೆಂಬರ್ ಪದ್ದಂಜಾಂಗ್ ಪೊಲಾಕ ಒಯಿಂಬದರೆ ಗಂಟೆಕ್ ಭಂಡಾರ ಮನೆಲ್ ತಕ್ಕಕಾವುಕಾರಂಗ ಕೂಡಿತ್ ಉರ್ಕಾರ ಒಕ್ಕಂಗೂಡಿತ್ ಮುಕ್ಕಾಟಿ ವಕ್ಕಡ ಐನ್‌ಮನೆಲ್ ಕೂಡಿತ್ ದೆವ್ವಾದನೆ ಬಂದಿತ್ ನೇಮ ಪೋಲೆ ಪದ್ಧತಿ ನಡ್ಡಿತ್ ಕೆಟ್ವೆಕೆಟ್ಟಿತ್ ಅಲ್ಲಿಂಜೆ ಭಂಡಾರಡ್ತಂಡ್ ದುಡಿಕೊಟ್ವೆ ಪಾಟಾಯಿತ್ ಪಾಕತಮ್ಮರ ದೇವಸ್ಥಾನಕ್ ಭಂಡಾರ ಕೊಂಡ್‌ಪೋಯಿತ್ ಬೆಪ್ಪ ಪದ್ಧತಿ. ಕೂಡ್‌ನೈಂಗೆಲ್ಲಾ ಪಾಕತಮ್ಮರ ಏಳುಕುಂಡ್ ತೀರ್ಥತ್ಲ ಕುಳ್ಳಿತ್ ಶುದ್ಧ ಮುದ್ರಿಕೆಲ್ ಇಪ್ಪ.

ಬಂದ ಭಕ್ತಾದಿಯಳೆಲ್ಲಾ ಪೊಳೆಲ್ ಕುಳ್ಳಿತ್ ಬರಂದಿಯೆ ನೇಮ. ತೀರ್ಥಕುಂಡ್‌ಲ್ ಪಾಕತಮ್ಮ ದೇವಿರ ಶಿಷ್ಯಂಗಳಾಯಿತುಳ್ಳೆ ಮೀನ್ ಗುಡ್ಡೆ ಗುಡ್ಡೆ ಕೂಡಿತಿಪ್ಪ. ಅದೊಂಗ್ ಕೂಡ್‌ನ ಭಕ್ತಾದಿಯ ಭಕ್ತಿಲ್ ಅಕ್ಕಿ ಕನ್ನಿಕೊಡ್ವದ್, ಅಕ್ಕಿ ತಿಂಬಕ್ಕಾಯಿತ್ ಗುಡ್ಡೆ ಗುಡ್ಡೆ ಮೀನ್ ತರತರವಾಯಿತ್ ಮೀನ್ ಕೂಡಿತಿಪ್ಪ. ನಿತ್ಯ ಪೂಜೆಲೂ ಪಟ್ಟಂಗ ತೀರ್ಥ ಕುಂಡ್‌ಲ್ ಕುಳಿಪಕ್ಕ ಮೀನ್‌ಕ್ ಅಕ್ಕಿ ಇಡ್ವೊ ಪದ್ಧತಿ ಉಂಡ್.

ಏಳುಕುಂಡ್ ತೀರ್ಥತ್ ಕುಳ್ಳಿತ್ತಾನ ಭಕ್ತಂಗ ದೇವಸ್ಥಾನಕ್ಕ ಪೋಯಿತ್ ಅಯಿಂಗ ಕಷ್ಟಕಾಲತ್ ಮಾಡ್ನ ಪರ್ಕೆಪಣ ಸಾಮಾನ ಬೊಳ್ಳಿರ ರೂಪತ್ಲೊ, ಪೊನ್ನೊರ ರೂಪತ್ಲೊ ಭಂಡಾರಕ್ಕೊ ಪದ್ಧತಿ ನಡ್ತುವಾ. ಅಯಿಂಗೈಂಗಕ್ ಬಂದೊದಗ್ನ ಕಷ್ಟನಷ್ಟಕ್ಕಾಯಿತ್ ನೆನತಂಡ ಪರ್ಕೆನ ಭಂಡಾರ ಇಡ್ಡ. ಈ ದೇವಿ ಮಾಲೋಂಗ ನೆನತಾನ ವದಗ್ ಚಿಟ್ಟೊಕೊಡ್ಡ ಪ್ರತೀತಿ ಉಂಡ್. ಮುಕ್ತ ಬೋಡ್ನೈಂಗಕ್ ಮುಕ್ತ ಫಲ ಕೊಡ್ಡದೊ ತಪ್ಪನದಲ್ಲ. ಇಲ್ಲಿ ಒರೇ ದಿನ ನಮ್ಮೆಂದಾಂಚೆಂಗ್ಯೊ ನುಪ್ಪದಾಯಿರತ್ತ್ಂಜಿ ಎಳ್ಳತ್ತಂಜಾಯಿರ ಎಂಭದಾಯಿರ ಪಣರೂಪತ್ಲೊ ಭಂಡಾರ ಬೂವ. ಭಂಡಾರ ಇಟ್ಟಿತ್ ತೀರ್ಥ ಪ್ರಸಾದ ಬೇಂಗುವೊ ಕಾಲತ್ಲೊ ಮಹಾಪೂಜೆ ಪೆರ್ತ್ ವಿಜ್ಯಂಭಣೆಲ್ ನಡ್ಡ. ಹಣ್ಣ್ ಕಾಯಿ ತೀರ್ಥಪ್ರಸಾದ ಬೇಂಗ್ನ ಪಿಂಞ ಕೂಡ್ನ ಭಕ್ತಂಗಕ್ ಅನ್ನಸಂತರ್ಪಣೆ ನಡ್ಡ. ಎಲ್ಲಾರೊ ಉಂಡಿತ್ ಪೋಪ ನೇಮ. ಇಲ್ಲಿ ನಾಗಂಡ ಸ್ಥಾನತ್ಲೊ ಪೂಜೆ ನಡ್ಡ. ಇಲ್ಲಿ ಓರ್ ಮಹಿಮೆಂದೆಣ್ಣಿಕ್ಕ, ಈ ದೇವಸ್ಥಾನತ್ರ ವರಾರತ್ ಪಂಡಂಜಿಯೇ ದಾರೊ ಇರ್ಲ್ ಬುದ್ಧವೊ ಪರಿಸ್ಥಿತಿಯಿಲ್ಲೆ. ಇದ್ ಪನ (ಬನಶಂಕರಿ) ದುರ್ಗೀಂದ್ ಪೆದ ಉಳ್ಳದಾಯಿತ್ತಿಂಜತ್. ಪೆರ್ತ್ ಕಠಿಣ. ಪಕ್ಕತ್ಲೊ ಕೇತ್ರಪ್ಪ ಸ್ಥಾನತ್ಲೊ ಎಡೆಬೆಪ್ಪ ಪದ್ಧತಿ ನಡ್ಡ.

ಪಿತ್ಯಾಂದ್ ಕಳಸ ಪೂಜೆ, ಅಂದಿಯೆತ ದಿನತ್ಲೊ ದೂರದೂರತ್ಂಜಿ ಭಕ್ತಂಗ ಬಂದಿತ್ ಭಂಡಾರ ಇಡ್ಚೊ ಪದ್ಧತಿ. ಅಂದ್ ಊರ್ಕಾರ ನಮ್ಮೆರಂದಿಯತ ಭಂಡಾರ ಲೆಕ್ಕ ಮಾಡ್ಚೊದೊ ಇಪ್ಪ. ಪುಂಡ್ ಪುಕಾರತ್ಲೊಪದೊ ಇಪ್ಪ. ವಾರಂಡೆಕೊಮ್ಮೆ ದೇವ ಪೊರ್ಟಕುಂದ್ ಸ್ಥಾನತ್ಲೊ ಊರ್ಕಾರ ಕೂಡಿತ್ ಪೂಜೆ ನೈವೇದ್ಯ ಕೈಚಿತ್ ಉಂಡಿತ್ ಬಪ್ಪ ನೇಮ ಉಂಡ್. ನಮ್ಮೆರ ಲೆಕ್ಕಪಕ್ಕ ನೋಟಿತ್ ಭಂಡಾರತ್ಲೊ ಪುನಃ ನೇಮ ಪೋಲೆ ಮುಕ್ಕಾಟಿ ಮನೆಕ್ ಕೊಂಡ ಪೋಯಿತ್ ಬೆಪ್ಪ. ಬುಡ್ ದಿನತ್ಲೊ ಬೋರೆ ಬೋರೆ ಪೂಜೆ ಕೈಪೊಚಿಡ್ಚೊ ಪದ್ಧತಿ ಉಂಡ್. ವಾರಾಂಡೆಕೊಮ್ಮೆ ನವರಾತ್ರಿ ಅವಧಿಲ್ ಒಯಿಂಬದ್ ದಿನ ಇರ್ಲ್ ನವರಾತ್ರಿ ಪೂಜೆನ ಊರ್ಕ್ಕಾರ ಕೂಡಿತ್ ಕೈಚಿತ್ ಬಪ್ಪ ಪದ್ಧತಿ ಉಂಡ್. ಮಾಮೂಲ್

ಪ್ರಕಾರ ನಡುವಾ.

ಇದ್ ಪೆರ್ತ್ ಕಾರ್ಣಿಕೆ ಉಳ್ಳ ದೇವಿ ಅಯಿತುಂಡ್. ಏಳ್ ಕುಂಡ್ ತೀರ್ಥ ಪೊಳೆ ಒಕ್ಕಿ ಪೋಯಿತ್ ನೆರೆ ಊರಾನ ಬೇಂಗೂರ್ಲ್ ಕಾವೇರಿ ಪೊಳೆಕ್ ಕೂಡಿತ್ ಸಂಗಮಗೊಳ್ಳುವ. ಈ ಏಳ್ ಕುಂಡ್ಲ್ ಇಪ್ಪ ಮೀನ್‌ನ ದಾರೂ ಪುಡ್ಡಿತ್ ತಿಂಬದಿಲ್ಲೆ. ಆಕಸ್ಮಿಕ ಪುಡ್ಡಿತ್ ತಿಂದದಾಚೇಂಗಿ ಅಯಿಂಡ ಸಂತಾನ ಮುತ್ತಿ ಪೋಪ. ತೀರ್ಥಕುಂಡ್‌ರ ಕೀದತ್ ಈಂಡ ಓರ್ ಹದ್ದ್ ಉಂಡ್. ಹದ್ದ್ ತಪ್ಪಿತ್ ಕೀದಕ್ ಪೋಯಿಟ ಮೀನರ ಕೋಲ ಮಾತಿತ್ತಿಪ್ಪ. ಹದ್ದ್‌ಂಜಿ ಕೀದಕ್ ದಾಟ್‌ನ ಮೀನ್‌ನ ತಿಂದತ್ತೇಂಗಿ ಕೆಟ್ಟಿಲ್ಲೆ. ಆಚೇಂಗಿ ಸಾಧಾರಣವಾಯಿತ್ ಮೀನ್ ಹದ್ದ್ ಮೀರಿತ್ ಪೋಪದ್ ಪೆರ್ತ್ ಅಪರೂಪ.

ಭಾಗಮಂಡಲ ರೋಡ್ ಚೇರಂಬಾಣೆಂಜಿ ಪಾಕಕ್ ಪೋಪಕ್ಕ ಸರಕಾರಿ ತಾರ್ ರಸ್ತೆ ಉಂಡ್. ದೇವಸ್ಥಾನಕ್ ಪೋಪಕ್ ಬಪ್ಪಾಂಗೂ ತೊಂದರೆ ಇಲ್ಲೆ. ಎಲ್ಲಾ ಅನುಕೂಲತೆ ಉಂಡ್. ತಾರ್ ರಸ್ತೆ ಪಾದಿಂಜಿ ಚಾಯಿ ಕೂಟೋಕುಂಡ್. ಬೆರಿಯ ಆಪ ನಿರೀಕ್ಷೆ ಉಂಡ್.

"ನಾನ್‌ಂದೇಣ್ಣವಾನ ತೇಕಿ ನಡ್ಕನಾ"

ನಾನ್ ನಾನ್‌ಂದೇಣ್ಣವಾನ ತೇಕಿ ನಡ್ಕನೆಂಗಾ|

ನಾನ್ ನಾಡದ್‌ಂದೇಣ್ಣವಾನ ತೇಕಿ ನಡ್ಕನೆಂಗಾ|

ನಂಗ ನಂಗಡಾಂದೇಣ್ಣವಾಂಗ್ ನೀರ್ ಬೂಕಿತೆಂಗ ಪೋಕನಾ

ಸೂರ್ಯಚಂದ್ರ, ಭೂಮಿ ಗಾಳಿ ನೀರ್‌ರೆಲ್ಲಾ ಫಲ ಬೇಂಗಿತ್ ಕಾರ್ಯ

ನೆನತಿತ್ ಬಾವನಾ ಎಂಗಾ|

ತಾಂಡವನೆಂದಂವೂಂದ್ ತೂಕಿ ನೋಟತ್ತೇ ತಾಂಗಿ ಭಾವನೆಂಗಾ|

ಸತ್ಯ ಧರ್ಮ, ನ್ಯಾಯ ನೀತಿ ನಿರ್ಕನಾ ಮುಂಬಲ್‌ಟ್ ಬಾವನಾ ಎಂಗಾ|

ಧಾನ್ ಧರ್ಮ ಮಾನ ಮರ್ಯಾದಿನ ಕೊಡ್‌ಚಿ ಬಾವನೆಂಗಾ|
 ಮೇಳತಾಳಾಂದ್ ಮಾಳನಡ್ತೆ ಕೇಳಿ ಕೀರ್ತಿಲ್ ಅಡ್ಕ ತೊಂದಾಯಿ
 ಬಾವವೆಂಗಾ|

ಬಾಳೆ ಮೂಳೆಂದ್ ಸೇಂದ್ ಕಳಿನ ಚುಟ್ಟ್ ಬಾವನೆಂಗಾ|
 ಪೋಲಿ ಪೂರ್ಕೀಂದ್ ನೆಂಜಿ ಕಳಿಕತೆ ಸಾಲ್ ಸಂತಾನತ್ತ್ ಕೊಡ್‌ಚಿ
 ನಡ್ಕನೆಂಗಾ|

ಸಾಲ ಸೋಲಾಂದೆಂಗ ಬೊತ್ತಿ ಕಳಿಕಂಡಾ ನೈಚಿನಾಟಾಮೆಲ್ ಗೆದ್ನ್ ನಡ್ಕ
 ನಂಗಾ|

ದಡ್ನ್ ಉಡ್ವನೆಂದೂ ತೇಕಿ ಕಳಿಕಂಡಾ ಸಂಸ್ಕೃತಿ ಕೊತ್ತಿತ್ ಪೊದ್‌ಂಜ
 ಬಾವನಾ ಎಂಗಾ |

ಕಕ್ಕುಡಿ ಪೊಗೆ ಬಲಿಕೆಂದೂ ಬಗ್ಗಿ ನಡ್ಕಂಡಾ ನಲ್ಲ ಊಣಿ ತೀನಿಕ್ಕೆಂದೂ ತಗ್ಗಿ
 ಬಾವಂಡೆಂಗಾ |

ಪೋಡಿ ಭಯಕ್ಕೆಂದೂ ನೆಟ್ಟಂಡಾ ಭಕ್ತಿ ಬಾವಕ್ಕೆಂದೂ ಬೊತ್ತಂಡ ಎಂಗಾ|
 ಕಾರ್ಯ ಭೀರ್ಯತ್ತೆಂದೂ ಮರ್ಕಂಡಾ ಮಾರಿ ಮಸಣಕ್ಕೆಂದೂ ಬೊತ್ತಿ
 ಕಳಿಕಂಡೆಂಗಾ|

ದೇವದೆಯ್ಯಳೆಂದೂ ಮರ್ಕಂಡಾ ಪೀಡೆ ಪಿಶಾಚಿನೆಂದೂ ತೊಕ್ಕಂಡೆಂಗಾ|
 ಜಾತಿ ಕೋತಿದೆಂದೂ ಮೇಂಗಿ ಕಳಿಕಂಡೆಂಗಾ ಜಾತಿಕ್ಕೆಡೆ ಬೆಚ್ಚಿತ್ ತರ್ಪ್
 ಬೆಕ್ಕಂಡಾ|

ಅನುಮಂಜ್ ಕಳಿಕಳಿ ಕಂಡಾ ಮನ ಮಂಜಿತ್ ಗುರಿ ಮಂಜ್
 ಕಳಿಕಳಿಕಂಡೆಂಗಾ|

"ಸತ್ಯಂ ಶಿವಂ ಸುಂದರಂ"

ಅಯ್ಯಪ್ಪನೂ ನಾಗನೂ ಕೊಡಗಲ್ ನೆಲೆ ಎಡ್ತದ್ ಯವ್ವ ಮಕ್ಕ ದೇವ ಪುಟ್ಟೊನ ಕಥೆ

ಮಳಿಯಾಳತ್ಲ ಕಣ್ಣಾನೂರ್ಂದೆಣ್ಣುವ ಬಾಂಗಾಡ್ ಬನತ್ಲ ಮಾಯತ್ ಪುಟ್ಟೊಚಿ. ಏಳ್ ಕೊಂಬುಳ್ಳ ಪೂವುಕಳಳಿ (ದೇವಕಳಳಿ) ಮರ ಪುಟ್ಟೊಚಿ. ಮಾಯತೇ ಬೊಳಂದತ್ ಮಾಯತ್ ಬೊಳಂದಲ್ಲಿ ಪತ್ತಿ ಇಲ್ಲತ ಕೊಂಬಾಚಿ. ಕೊಂಬಿಲ್ಲತ ಕೊತ್ತೂ ಆಚಿ. ಗೊತ್ತಿಲ್ಲತ ಮೋಡಾಚಿ ಮೋಡಿಲ್ಲತ ಪೂವಾಚಿ. ಎಲ್ಲಾ ಪೂವು ಬೀಂದತ್. ಕೂಟ್ಲಾ ತಲೆ ಪೂವು ಮೋಡ್ ಪೂವು ಬೀಂದಲೆ. ಇನ್ನನೆ ಇಪ್ಪ ಕಾಲತ್ ಬಾಂಗಾಡ್ ಬನತ್ಂಜಿ ಕಾಳಿಕಮ್ಮೆ ದೇವಿರ ವಾಯು ಕಾತಡಿಪಕ್ಕ ಏಳ್ ಕೊಂಬು ಪೂವು ಕಳಳಿಮರ ಗಾಳಿಕ್ ಅಲೆಪೊಜ್ಜತ್. ಪೂವು ಕಳಳಿ ಮರತ್ಂಜ ಮೋಡ್ ಪೂವು ಒಲಿಂಜತ್ ಮೋಡ್ ಪೂವು ಬುದ್ಲಲ್ಲಿ ಏಳ್ ಕೊಂಬ್ ಕೆಂಬುಳತ್ ಮೊಳ್ತತ್. ಅಂಜಿ ಕಾಲಕ್ ಅದೆ ಪುತ್ತಾಯಿತಿಂಜತ್. ಪತ್ತ್ ಕಾಲಕ್ ಬಲ್ಯ ಪುತ್ತಾಯಿತ್ ಬೊಳ್ಳಿತಿಂಜತ್.

ಓರ್ ನಲ್ಲೋರ್ ದಿನತ್ಲ ಕೆಂಬುತ್ಲ ವಡ್ಂದತ್. ಕೆಂಬುತ್ಲತರ ಒಳ್ಂಜಿ ಮಾಯತ ಪುಟ್ಟೊನ ಕೊಂಬ್ ಮೇಲೆ ಕೊಂಬಾಯಿ ಚುಳ್ಳಾ ಮೇಲೆ ಚುಳ್ಳಾಯಿ ಪೊಡ (ಕುರ್ಚಿ)ತ್ರ ಮಾದ್ರಿ ಮಂಡೆ ಆಯಿತ್ ಪೊರ ಪೋಲೆ ಕೆಮಿ ಆಯಿತ್ ತಾಳ ಪೋಲೆ ನಾವಾಯಿ, ತೂಡ್ ಪೋಲೆ ಕೈಯಾಯಿ ಕಂಬ್ ಪೋಲೆ ಕಾಲಾಯಿ, ಅಟ್ಟಿ ಪೋಲೆ ಬೆನ್ನಾಯಿ, ಬುಟ್ಟಿ ಪೋಲೆ ಬರಿ ಆಯಿ, ತೋಕ್ ಪೋಲೆ ಬಾಲಾಯಿ ಮಮ್ಮಾಯತ್ ಮಾನ್‌ಕುಣ್ಣಿ ಪುಟ್ಟೊಚಿ. ಬಾಯಿ ಇಲ್ಲತ ಮಾನ್ (ಮಿಗ ಕುಣ್ಣಿ ಪುಟ್ಟೊಚಿ) ಮಾಯತ್ ಬೊಳಂದತ್. ಮಾಯತ್ ಬೊಳಂದಿತ್ ನಾಲ್ ದಿಕ್ಕ್ ನೋಟಿತ್ ಮೇಚಿ ಫಲ ತೇಡ್ಚಿ. ಅಲ್ಲಿಂಜಿ ಪೂರ್ತಿತ್ ಕೊಡವ

ಮಾಲೆ ಪೊಮ್ಮಾಲೆ ಕೊಡಗಲ್ ಈರುಳ್ಳಿ ಬನತ್‌ಲ್ (ಬೊಳಂಜೆಕರಿಕ್ ಕೊಳಗದಾಳ್ ಪಕ್ಕತ್) ಆಬರಿಲ್ ಬೊಟ್ಟತ್ತ ಮಲೆ ಪಕ್ಕ ಮೇಚಿ ಫಲ ಕಂಡಿತ್ ಪಚ್ಚಿ (ದರ್ಬ್) ಪಿಲ್ಲನ್ ಮೇಂಜಿತ್ ಪೂರ್ಬತ್. ಬೊಳ್ಳೊಟೆರೆ ನೆಡಿಲ್ ಕಾರೋಟಿ ಪಡತ್ಲ ಪೀತಕೊಲ್ಲಿ ನೀರನ ನೀತಳ ಕುಡ್ಡಿತ್ ಬಾಂಗನ ನಳತ್ರಡಿ ತೂಂಗನ ಮರತ್ರಡಿಲ್ ಬುದ್ದಂಡ್ ಒರ್ವ ಇಂಜತ್. ಇನ್ನನೆ ಇಪ್ಪ ಕಾಲತ್ಲ ಕಾರುಳ್ಳಿ ಕರುಂಬಯ್ಯ ಮಚ್ಚಿ ಮನೆ ಕಟ್ಟಾಂಗಾಯಿತ್ ಚಾಂಡಾಳ ಪೊಲೆಯನ ಅಳ್ಳೆಚಿ ಕಾಕಿತ್ ಮರ ಕೆತ್ತುವೊ ಮತ್ತನಡ್ಡಿತ್ ಕೊಡ್ತತ್. ಮತ್ತ್ ಕೊಂಡಾ ಚಾಂಡಾಳ ಬೊಂಗ ಕಲ್ಲಾರ ಪೊಡಿಲ್ ಮತ್ತನ ಕೂಟಿತ್ ಈರುಳ್ಳಿ ಬನತ್ಲ ಬಲ್ಲಿಯ ಮರ ನೋಟಿತ್ ಕೆತ್ತಿತ್ ಜೂಕ್‌ಚಿ. ಮರ ಕೆತ್ತಿ ಬೂಕಣೆ ಚೆರಿಯ ಚೆರಿಯ ಮರ ಬೊಳಂದತ್. ದಂಡ್ ಕೂಡಿ ಬೂವಣೆ ವಾಟೆ ಬೊಳಂಜತ್. ಬೊಳಿ ಆಚಿ. ವಾಟೆಕಾಡ್ ಬಾಂಜತ್.

ಪಿಲ್ಲ ಎಲ್ಲಾ ವಣ್‌ಂಗ್‌ಚಿ. ಕೊಲ್ಲಿನೀರ್ ಆರ್‌ಚಿ. ಇದನ ಕಂಡಿತ್ ಬಾಯಿ ಇಲ್ಲತ ಮಾನ್ (ಮಿಗ) ಕುಂಞಿ ಉಟ್ಟಣ ಮಾರ್ಕಾಯಿತ್ ಅಲ್ಲಿಂಜಿ ಪೊರ್ಟಿತ್ ಸೂರ್ಯ ಪೋಯಿತ್ ತಾರ್ವಲ್ಲಿ ಮಳಿಯಾಳತ್ಲ ಕೇಳೊಂದೆಣ್ಣು ಪೊ ಊರ್ಲ್ ಬಾಂಗಾಡ್ ಬನತ್ಲ ನೀ ತಳಕುಡ್ಡಿತ್ ಬುದ್ದಂಡ್ ವರ್ರಕ ಕಾಳಿಕಾಮಲೆಂಜಿ ಮಾಯ ಕಾತ್ ಬೀರಣೆ ಕೋಲೆಯಂಡ ಕೇರಿಲ್ ಮಣ್ಣಿಲ್ಲತ ಮಾನಿಲ್ ಮಾಯತ್ ಪುಟ್ಟನ ಪುಳಿ ಮಾಂಗ ಮರತ್‌ಂಜಿ ಪೂಕಾತ್‌ಕ್ ವಲಂಜೋರ್ ಮಾಂಗ ಬುದ್ದ ಸದ್‌ಕ್ ಬಾಯಿ ಇಲ್ಲತ ಮಿಗ ಕುಂಞಿ ಪೂವರ್ಕ್ ನೆಟ್ಟಿತ್ ನಾಲ್ ದಿಕ್ ನೋಟಣೆ ಕಣ್ಣೊಂದು ಕಂಡಲೆ. ಇದನ ಕಥೆ ಮಾಯಾಂದ್ ಗ್ಯಾನ ಮಾಡಿತ್ ಬೇರಗೊಂಡಳ್ಳಣೆ ಕೂಡ ಕಾತ್ ಬೀಚ್‌ಚಿ. ಅಕ್ಕಣೆಕ್ ಮಾಂಗ ಪಣ್ಣಾರ ವಾಸನೆಪಾಂಜತ್. ಅದಂಜ ಮಿಗ ಕುಂಞಿ ವಾಸನೆ ಬಂದ ದಿಕ್‌ಕ್ ಪೋಕಣೆ ನಾಯ ಮಡಕೇರಿಲ್ ನಾಯಮಡ ಪೊಂಗಲೊ ನೀರ್‌ಕೇಂದ್ ಬಕ್ಕಣೆ ಮಾಂಗ ಮರತ್ರಡಿಲ್ ಮಿಗ ಕುಂಞಿನ ಕಂಡಿತ್ ಓಡಿ ಪಾರಿ ಪೋಯಿತ್ ಮಾಂಗ ಮರತ್ರಡಿಲ್ ಮಿಗ ಕುಂಞಿ ಉಂಡೇಂದ್ ಆಣಾಳ್‌ಕ್ ಎಣ್ಣೊಚಿ. ಕಣ್ಣೊ ಕಂಡ ಮಿಗ ಕುಂಞಿರ ಲಕ್ಷಣತ್ಲ ಎಣ್ಣೊಚಿ. ಮೇಲೆ ಚುಳ್ಳಿಯುಂಡ್ ಪೆಬ್ಬುಲಿರ

ಕುಂಞಿ ಅಲ್ಲ. ಕೊಂಬ್ ಮೇಲೆ ಕೊಂಬ್‌ಂದ್ ಕೆಂಗಡ್ ಕುಂಞಿ ಅಲ್ಲ. ನಾಯಮಡ ಪೊಂಗ ಪೊಳ್ಳೆ ನಾಯಿಯದ ಕುಂಞಿಯಕೂ ಕಡೆಕಟ್ಟಿಯಿಂಗಳೇ ನಿಂಗ ಎನ್ನಂಗ್ ಪುಟ್ಟಿಯೆಂದೆಣ್ಣ್ ಬಿ. ಈ ತಕ್ಕನ ಕೇಟಿತ್ ನಾಯಮಡ ಮಕ್ಕಳೋ ಅಟ್ಟತ್ ಬೆಚ್ಚಿತಿಂಬ ಆನೆ ಸೊಲ್ಲಾ ಬಿಲ್ಲನ ಪೊಗೆ ತಟ್ಟತೆದ್ದಿತ್ ಎಳ್ ತುಟ್ಟ ಉಕ್ಕಂಬ್, ಕೊಣಿಯಂಬ್ ಕೊಕ್ಕೆಯಂಬ್ ಕೊಯಲಂಬ್ ಅಂಚೆದ್ದ ಬಿಲ್ಲನ ಮುಟ್ಟಾ ಕಾಲ್‌ಲ್ ಬಗ್ಗೆ ಚಟ್ಟಿತ್ ಮಾನಿಕ್ ಓಡಿ ಪಾರಿ ಪೋಯಿತ್ ಮಾಂಗಿ ಮರತ್ರಡಿಲ್ ಪುತ್ತರ ಮರಲ್ ತೊಪ್ಪುರ ಒಳಿಲ್ ಈಯೆಂಗ ಒಟ್ಟಿತ್ ಈನ ಕಂಡ್ ಪೋರಾಂದ್ ಚೆನ್ನಂಗಾಳ್ ಬಾಲಂಗ ಚೊಕ್ಕೂಟ್‌ಚಿ. ಲಕ್ಕಣೆಕ್ ಮಿಗ ಕುಂಞಿ ಮುಂಗಡುವಪ್ಪಕ್ ಪಾಂಬತ್. ಬಿಲ್ಲ ನಿಂದ ಬಾಲಂಗ ಬಿಲ್ಲಕ್ ಅಂಬನ ಕೊಳ್ಳಿತ್ ಮಾರ್‌ಟ್ ಬಲ್ಲಿತ್ ಅಂಬ್ ಬುಟ್ಟಿತ್. ತಪ್ಪಿಪೋನ ಉಕ್ಕಂಬ್ ಮಿಗತ್ರ ಬಲ್ ಬರಿಕ್ (ಕೈಪಾರ್) ಕನ್ನಡಿ ಕೊತ್‌ಕ್ ಅಂಬ್ ಪೋಯಿ ಪಟ್ಟಿತ್. ಅಂಬ್ ಪೋಯಿ ಪಟ್ಟೆದ್ ಮಿಗ ಅಂದತ್. ಅದ್‌ನ ಕಂಡ ನಾಯಮ್ಮ ಕತ್ತಿಲ್ ಕೆತ್ತಿ ಕೊಲ್ಪೊಕ್ ಪೋಕಣೆ ಮಿಗ ಕುಂಞಿ ಎದ್ದ್ ಬುದ್ದ್ ಪೋಯಿತ್ ಎಳ್ ಸಮುದ್ರಕಪ್ಪರ ಮಧ್ಯತುಳ್ಳ ಸಮುದ್ರ ಕರಲ್ ಮಣ ಪಟ್ಟಿರ ಮೆದಲ್ ಪಾರೆ ಕಲ್ಲರ ಕೊಡಿಲ್ ಮಿಗ ಕುಂಞಿ ಬುದ್ದತ್. ಬಾಯಿ ಪೊಳಂದ್ ಚತ್ತತ್. ಚೋರೆ ಬುದ್ದಲ್ಲಿ ಪಾಮಂಜಿ ಕ್‌ಟ್‌ಚಿ. ಪಾಮಂಜಿರ ಮೀದತ್‌ಲ್ ಕೆಂಬುತ್ತ ಬೊಳಂದತ್. ಅಂಜಿ ಕಾಲ ಕಯ್ಯೋಕ ಅದೇ ಪುತ್ತಾಯಿ ಅದೆ ಆಲ್ ಮರ ಆಚಿ. ಪತ್ತಕಾಲಕ್ ಎಳ್ ಕೊಂಬು ವಡಂದತ್. ಆಲ್ ಮರತ್ರ ಕೇಕ್ ಪೋನ ಕೊಂಬಲ್ ಪಾಲ್ ಪೋನ ಕೊಂಬಲ್ ಕಾಟರೆ ಬೊಳಂದತ್. ಕಾಟರೆ ಒಳಲ್ ದೇವಮಾಯ ಮಮ್ಮಾಯ ದಂಡ್ ಚೋಟ್ ಚಂಗ್ ಕುಂಞಿಯ ಪುಟ್ಟ್‌ಚಿ. ಬೊಳ್ಳಚಂಗ್ ಚೋಂದ ಚಂಗ್ ಅಂಜಿ ಕಾಲಕ್ ಅರ ಚಂಗಾಯಿ ಬೊಳಂದತ್. ಪತ್ತ ಕಾಲಕ್ ಚಂಗ್‌ರ ಬೊಳ್ಳೆ ತೇಂದತ್.

ಇನ್ನನೆ ಇಪ್ಪ ಕಾಲತ್ಲ ಮಾಯಕಾತ್ ಬೀಜಣೆ ಕೊಂಬ್ ಕೊಂಬ್ ಅಲೆ ಅಲೆ ಪೊಜ್ಜತ್. ಕೊಂಬ್ ಕೊಂಬ್ ಮುಟ್ಟಣೆ ಚಂಗ್ ಒಂದಾಂಗೊಂದ್

ಮುಟ್ಟ್ವಾಚಿ. ಕುಡಿಕರೆ ಮಾದ್ರಿ ವಡ್ಂದತ್. ಚಂಗ್ ದಂಡ್ ವಡೆಯಣೆ ಚೋಂದ ಚಂಗ್‌ರೊಳ್‌ಲ್ ಕಾಂಞಾರಾಟಪ್ಪ ತಿರ್ದಂಬರತ್ತಪ್ಪ, ಬೆಂದ್ರೆಕೋಲಪ್ಪ ಇಗ್ಗುತ್ತಪ್ಪ, ಪಾಲೂರಪ್ಪ, ತಿರುನೆಲ್ಲಿ ಪೆಮ್ಮಯ್ಯ, ಪನ್ನಂಗಾಲತಮ್ಮ ಇನ್ನನೆ ಏಳ್ ದೇವತೆಯ ಪಿಂಞ ಏಳ್ ತಲೆ ನಾಗಣ್ಣ ಮಾಯತ್ ಪುಟ್ಟ್ವಾಚಿ. ಬೊಳ್ ಚಂಗ್‌ರೊಳ್‌ಂದ ಅಯ್ಯಪ್ಪನು ಅಯ್ಯಪ್ಪಂಡ ನಾಯಿಯಳೂ ಮಾಯತ್ ಪುಟ್ಟ್ವಾಚಿ. ಮಾಯತ್ ಬೊಳ್‌ಂದತ್.

ಅಯ್ಯಪ್ಪನೂ, ನಾಯಿಯಳೂ, ಏಳ್ ದೇವತೆಯ ಆಲ್ ಮರತ್ರ ಕೊಂಬ್‌ಲ್ ಕೊಂಬಣ್ಣ ಪಂದರ್‌ಂಡ್ ಚಪ್ಪಲೆಣ್ಣ ಪರ್ಚೆಂಡ್ ತಂಪ್‌ಲ್ ಬಾಳ್ವೊಕ್ಕ ಆಲ್ ಮರ ಪಣ್ಣಾಕ್ ಪಣ್ಣಾ ತಿಂಬ ಕಿರ್ಕೊಟ ಪಕ್ಕಿ ಅಲ್‌ಮರಕ್ ಪಾರಿಬಂದ್ ಅಳ್ತತ್. ಪಣ್ಣಾ ತಿಂದಂಡಿಪ್ಪಕ್ಕ ಏಳ್ ದೇವತೆಯಡ ಕೂಟ್‌ಲ್ ಪೆರಿಯಂವೊ ಪಕ್ಕಿಕ್ ಈ ತಕ್ಕ ಪರಂದತ್. ಪಕ್ಕಿಯೇ ಇಲ್ಲಿ ಮುಕ್ಕೋಡ ಮಕ್ಕಡ ನಾಥ ಪೊರ್ಮುಲೆ, ತೀಯ ಮಕ್ಕಡ ಕಳ್ಳ ನಾಥ ಪೊರ್ಮುಲೆ, ಅನ್ನನೆ ಪರಿಯಣೆ ಕಿರ್ಕೊಟ ಪಕ್ಕಿ ಅಲ್ಲಿಂಜಿ ಪಾರಿತ್ ಮುಟ್ಟಲಾಯಿ ಮಾಡಾಯಿ ಮಾಡಾಯಿ ಮಣೆಮಾಡ ಮಾಡಾಯಿ ಪರಂಬ್‌ಲ್ ಭೂಮಿಕ್ ಇಳ್ವಾಚಿ. ಇದ್‌ನ ಕಂಡಿತ್ ಏಳ್ ದೇವ ಸಂತೋಷಪಟ್ಟಿತ್ ಪಕ್ಕಿಕ್ ವರ ಕೊಡ್ತತ್. ಇಲ್ಲಿಕೆತ್ತಣೆಕ್ ಪಣ್ಣಾ ತಿಂಬ ಪಕ್ಕಿಯೇ ಇಂದ್‌ಂಬ ಕೆಂಬಕ್ಕಿ ಕಿರ್ಕೊಟಂದೆಣ್ಣಿತ್ ಪೆದ ಇರಿಬಂಡ್ ಆಕಾಶತ್ ಪಾರಿಯಂಡ್ ಭೂಮಿರ ಮೀದಲ್ ಮಜ್ಜಣ ಆಕಣೆ ಪಣ್ಣಾಫಲ ಬೇಂಗಿತ್ ಅಲ್ಲಿಂಜ ಬೈಟ್‌ಕೆತ್ತಣೆಕೋ ಕೋಳಿ ಕುಂಞಿ ಬೇಂಗಿಯಾಂದ್ ವರ ಕೊಡ್ತತ್.

ಎಲ್ಲಾಂಗೂ ಎಳಿಯಂವ ಅಣ್ಣಂಗಳ ನೋಟಿತ್ ಈ ತಕ್ಕ ಪಂದರ್‌ಲ್ಲಿ ನಂಗ ಇನ್ನನೆ ಇಂಜಕ್ಕ ಏದೋರ್ ಫಲವಿಲ್ಲೆ. ನಂಗಕ್ಕ ದೇವನೆಲೆ ಬೋಂಡು. ಚಾಂದ್ ಪೂವು ಬೇಂಗೋಂಡು. ಸ್ಥಾನ ನೆಲೆ ನೋಟನ. ಆ ತಕ್ಕನ ಕೇಟಿತ್ ಎಲ್ಲಾರೂ ಅಲ್ಲಿಂಜ ಪೊರ್ಟಿತ್ ಬಂದಂಡಿಪ್ಪ. ಒಟ್ಟೆಲ್ ಕಾಂಬ ರಾಟೆ ಊರ್ಲ್ ಅಲ್ಲಿ ಬಂದ್ ನಿಂದಿತ್ ನಾಲ್ ದಿಕ್ಕ ನೋಟನೆ ಜಾಗ ಚಾಯಿಕಂಡಿತ್ ಕಾಂಬ

ರಾಟಪ್ಪಂದ್ ಅಲ್ಲಿ ನೆಲೆಗೊಂಡತ್.

ಬಾಕಿ ಅಂಜಿ ಅಣ್ಣಂಗಳೂ, ಓರ್ ತಂಗೆಯೂ ಅಲ್ಲಿಂಜಿ ಪೊರ್ಟಿತ್ ತಿರ್ಚಂಬರ ಊರ್ಲ್ ಬಂದ್ ನಿಂದಿತ್ ಎಲ್ಲಾ ಜೋಡ್ ಒತ್ತಿತ್ ನೆಲೆ ನಿಪ್ಪ ಜಾಗ ಕಂಡ್ ತಿರುಚಂಬರತ್ತಪ್ಪಂದ್ ಅಲ್ಲಿ ಒಬ್ಬ ನೆಲೆ ನಿಂದತ್. ನಾಲಾಳ್ ಉಳ್ಳ ಅಣ್ಣಂಗಳೂ ತಂಗೆಯೂ ಪೊರ್ಟಿತ್ ನೆಲೆ ತೇಡಿ ಬಪ್ಪಕ್ಕ ಕಳಿಪರಂಬ್ ದೇಶತ್ ಅಲ್ಲಿಂಜಿಯೂ ಬಳ್ಳಿತ್ ಬೆಂದ್ರ ಕೋಲಪ್ಪಂದ್ ಅಲ್ಲಿ ನೆಲೆ ನಿಂದತ್. ಮೂಂದಾಳುಳ್ಳ ಅಣ್ಣಂ ತಂಗೆಯೂ ಅಲ್ಲಿಂಜಿ ಪೊರ್ಟಿತ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಇಕ್ಕ ಉಳ್ಳ ಇಗ್ಗತ್ತಪ್ಪಂಡ ಮಲ್ಮ ಕುಂದಲ್ ನಿಂದಿತ್ ನಾಲ್ ದಿಕ್ಕ ನೋಟಣೆ ಕೊಡವ ಮಾಲೆ ಪೊಮ್ಮಾಲೆ ಕೊಡಗನ್ ಕಣ್ಣಾರೆ ಕಂಡಿತ್ ಸಂತೋಷ ಆಚಿ. ಮೂಂದಾಳುಳ್ಳ ದೇವ ಒತ್ತಿತ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗಕ್ ಅಂಬ್ ಬುಟ್ಟಿತ್ ಸೋಲ್ ಗೆಲುವು ನೋಟಣೆ ಅಣ್ಣಂ ಬುಟ್ಟಿ ಅಂಬ್ ಪನ್ನಂಗಾಲ ಊರ್ಲ್ ಬುದ್ಧತ್. ಅಣ್ಣಂಗೆಲ್ಲಾ ಚೋತತ್. ತಂಗಮ್ಮ ಗೆದ್ದತ್. ನಾಲಾಳುಳ್ಳ ದೇವ ಅಲ್ಲಿಂಜಿ ಪೊರ್ಟಿತ್ ಇಕ್ಕುಳ್ಳ ಇಗ್ಗತ್ತಪ್ಪಂಡ ಮಲ್ಮತ್ ನೋಟಣೆ ಪರ್ದಂಡೊಕ್ಕಡ ಆಯಿರಣ್ಣ ಪುಂಡತ್ತ, ಅಂಜಿ ನೂರು ಕರ್ಪೆತ್ತ ಸಾಲ್ ಕೆಟ್ಟಿ ಮೇವಾನ ಕಂಡತ್. ಇದನ್ ಕಂಡಿತ್ ತಂಗೆ ಈ ತಕ್ಕ ಎಣ್ಣೆಚಿ. ಅಣ್ಣಂಗಳೇ ಕೇಳಿ, ಉಪ್ಪಿಲ್ಲತೆ ಉಂಬೆಂಗಿ ತಿತ್ ಇಲ್ಲತೆ ಕೂಳ್ ಬೆಪ್ಪಿ ಎಂದಣ್ಣೆ ಪರೆಯಣೆ ಅಣ್ಣಂ ಗ್ಯಾನ ಮಾಡ್ಚಿ. ತಿತ್ ಇಲ್ಲತೆ ಕೂಳ್ ಆಪ್ಪೆಂದ್ ನೆನತಂಡ್ ತಿತ್ ಇಲ್ಲತೆ ಕೂಳ್ ಬೆಯ್ಯೆಂದ್ ತಂಗಮ್ಮಂಗೆಣ್ಣೆಚಿ. ಎಂಗ ಉಪ್ಪಿಲ್ಲತೆ ಉಂಬಾಂದ್ ಒತ್ತತ್. ಒತ್ತಿತ್ ಪೊರ್ಟಿತ್. ಮಲ್ಮತಾಂಜಿ ಕೀದಕ್ಳಾಂಜಿತ್ ಅಣ್ಣಂಗೆಲ್ಲಾ ಪೋಯಿತ್ ಅಂಬಲ ಪೊಳೆಲ್ ಕುಳ್ಳಿ ತಳ್ಳಿ ಬಕ್ಕಣೆ ತಂಗಮ್ಮ ಪೋಯಿತ್ ಪರ್ದಂಡೊಕ್ಕಡ ಮನೆಂಜಿ ಸಣ್ಣಕ್ಕಿಕ್ಕಾಂದಿತ್ ಮೇಂಜಂಡಿಂಜ ಪಯ್ಯುನ ಕಂದಿತ್ ಕುತ್ತಿಕ್ ಪಾಲ್ ಬೂಕಿತ್ ಬೆಚ್ಚಿತ್ ಸಣ್ಣಕ್ಕಿನ ಇಟ್ಟಿತ್ ಮಣತ್ರೊಳ್ ಪೂತ್ ಮುಚ್ಚಿಚಿ. ತಂಗಮ್ಮ ಅಂಬಲ ಪೊಳೆಲ್ ಕುಳ್ಳಿತ್ ಬಕ್ಕಣೆ ತಿತ್ ಬೆದ್ ಕಾಚಕ್ ಮಣತ್ರೊಳ್ ಪೂತ್ ಬೆಂಪುಜಿತ್ ಉಕ್ಕುವ

ಇಂಜತ್ ಅದ್‌ನ ಕಂಡಿತ್ ತಂಗಮ್ಮ ಪೊಂದೆಳಿ ತೆಳ್ಳಿತ್ ಕೂಳ್ ಬಾಕಿ ಮರ್ಚತ್. ಎಲೆಕೊಂಡ್ ಬಪ್ಪಕ್ ತಂಗ ಎಣ್ಣಾನ ಕೇಟಿತ್ ಕೂಟ್‌ಲ್ ಪೆರಿಯಂವ ಇಗ್ಗು ತಪ್ಪ ಪರ್ದಂಡೊಕ್ಕಡ ಬಾಳೆ ತೋಟಿಕ್ ಎಲ್ಕಂಡಕ್ಕಾಯಿತ್ ಪೋಚಿ. ಬಾಳೆ ಎಲ್ಕಂಡ ಮುರಿಕಣೆ ಪರ್ದಂಡೊಕ್ಕಡ ಉಮ್ಮುವ್ವ ಎಣ್ಣುವ ಪೊಂಗ ಬಾಳೆಲ್ಕಂಡ ಮುರಿಪಕ್ ಕಯ್ಯಾಂದ್ ಬೆಲ್ಕಚಿ. ಆ ತಕ್ಕನ ಕೇಟಿತ್ ಇಗ್ಗುತ್ತಪ್ಪಂಗ ಚೆಡಿ ಬಂದಿತ್ ಈ ವಕ್ಕಡ ಮನೆಲ್ ಚಿಂಗ ಬಾಳೆ ನೇರಂಡಾಂದ್ ಶಾಪ ಇಟ್ಟಿತ್. ಶಾಪ ಇಟ್ಟಾನ ಕಂಡಿತ್ ಪೊಂಗ ಬೊತ್ತಿತ್ ಬೊಂಡಿತ್ ಪರ್ದಂಡೊಕ್ಕಡ ಪೆರಿಯಂವಂಗ್ ಈ ಸುದ್ದಿನ ಎಣ್ಣಾಚಿ. ಅದ್‌ನ ಅರ್ಜ ವಕ್ಕಡ ಪೆರಿಯಂವನ ಓಡಿ ಪಾರಿ ಪೋಯಿತ್ ಅಂಬಲ ಪೊಳೆಕರೆಲ್ ಮುತ್ತರಿ ಎಲೆ ಬೆಚ್ಚಂಡ್ ಉಂಬಕ್ಕಳ್ಳ ದೇವಳ ಕಂಡಿತ್ ಪಾದಕಡ್ಡ ಬುದ್ದಿತ್ ಬುದ್ದಿಕೆಟ್ಟಪೊಂಗ ಅರಿಯತ್ತೆಣ್ಣೀರ್. ಮಾಪ್ ಮಾಡೋಂಡೊಂದ್ ಬೋಡ್‌ಚಿ. ಪಾದಕ್ಕಡ್ಡ ಬೂವಣೆ ಕೂಟ್‌ಲ್ ತಲೆದೇವ ಚೆನ್ನಗ್ಯಾನ ಮಾಡಿತ್ ಈ ತಕ್ಕ ಪರ್ದತ್. ಮಾನಂವನೇ ಇಟ್ಟಿ ಶಾಪ ತಟ್ಟು ಆಚೇಂಗಿಕ್ಕ ನಾನಿಲ್ಲಿ ನೆಲೆ ಎಡ್ಡಿ ಇಲ್ಲಿ ನೆಲೆ ನಿಂದಕ್ಕ ನೀಡ ವಕ್ಕಡ ಮನಂಜಿ ನಿತ್ಯ ನೈವೇದ್ಯ ಬೆಪ್ಪಕ್ಕ ನೀಡ ಮನಂಜಿ ಸಣ್ಣಕ್ಕಿ ಕೊಡೊಂಡು. ನೀಡ ವಕ್ಕಡ ಮನೆಕ್ ಇಂದ್ ತೊಟ್ಟ ಮಿಂಞಾಕ್ ಪೊಲೆಂದಲೆ ಇಷ್ಟೆ. ಅನ್ನನ ಪರಿಯಣೆ ಪರ್ದಂಡ ಯಜಮಾನ ಸಂತೋಷಪೆಟ್ಟಿತ್ ಮನೆಕ್ ಪೋಚಿ.

ಮೊಂದಾಳುಳ್ಳ ಅಣ್ಣಂಗ ಕೂಳ್ ಮಿಂಞಾಲ್ ಅಳ್ತಂಡ್ ಆಕಾಶ ನೋಟಿಯೆಂಡ್ ಚೋಪ ಕಾಗಾಂದ್ ಗ್ಯಾನ ಮಾಡಿತ್ ತಂಗಮ್ಮನ ನೋಟಿತ್ ನೋಟ್ ತಂಗಮ್ಮ ಆದ್ರೆ ತಿಂಗತ್ ತಂದ್ರಡ ಅಲಿಮಳೆ ಪೊಯ್ಕೊಕೆ ಅಲಿ ಬೂಪೊ ಇನ್ನನೆಂದೆಣ್ಣಿತ್ ಕೂಳ್‌ನಡಿತ್ ಬಾನ ಕತ್ತಾಕನ್ನತ್. ಇದ್‌ನೆಲ್ಲಾ ಕೆರಿಡಿತ್ ತಂಗಮ್ಮ ಎಣ್ಣಾಚಿ, ಅಣ್ಣಂಗಲೇ ನಿಂಗ ಎಣ್ಣಾನದ್ ನೇರನ್ನೆ. ಅದೇ ತಿಂಗತ್ ಅಲಿಮಳೆ ಪೊಯ್ಕೊಕ ಕಾಳೆತಡ್ ಪೊಯ್ಕೊದ್ ನೇರ್ ಎಣ್ಣಿತ್ ಚೆಟ್ಟಿತ್ತೆಡ್ಡೆಂಡ್ ಮೊಂದಾಳುಳ್ಳ ಅಣ್ಣಂಗಕ್ ಬಡ್ಡತ್. ಅಡಿ ಕೇಟಂಡ ಅಣ್ಣಂಗಕ್ ಚೆಡಿ ಬಂದಿತ್ ಕೈ ಬಾಯಿ ಕತ್ತಿತ್ ಕೂಳುಂಡ ಬಾಯಿಕ್ ಎಲೆ ಭೋಗ ತಿಂದತ್. ಚೋಪ್‌ಂದ್

ಅಂಗೈಕ್ ತುಪ್ಪಚಿ. ತಂಗಮ್ಮಂಡ ಕೊಡಿಯಲಡ್ಕೆ ಎಲ್ಲಾಡಾಂಗುಂಜಿ ಚೋಂದಿತೆ ಇಂಜತ್. ಕೈಯಿಂಜ ತುಪ್ಪನ ಕೊಡಿಯಲಡ್ಕೆನ ಮಂಡೆ ಕೊಡಿಯ ಚಾಡ್ಚಿ. ಮೋಸಪೋನ ತಂಗಮ್ಮ ಅಂಗೈಲ್ ತುಪ್ಪಿತಿಂಜ ಕೊಡಿಯಲಡ್ಕೆನ ಬಾಯಿರೊಳ್‌ಲಾಟ್ಪಿಂಡತ್. ಬಾಯಿಕ್‌ಟಾನ ಕಂಡಿತ್ ಮೂಂದಾಳುಳ್ಳ ಅಣ್ಣಂಗ ತಿಂದಿತ್ ತುಪ್ಪನ ಕೊಡಿಯಲಡ್ಕೆನ ನೀನ್ ಬಾಯಿಕ್‌ಟಾನುಂಡ್ ಚಾತಿ ಕೆಟ್ಪ್ ಪೋಚಲಾಂದಣ್ಣಿ ಪರೆಯಣೆ ತಂಗ ಮಂಡೆ ಮಂಡೆ ಪೊಜ್ಜುಂಡ್ ಬುದ್ಧಿತ್ ತಂದರ್ತ್. ಗೋಳಾಡಿ ಮೊರ್ಟತ್. ಇದ್‌ನ ಕಂಡಿತ್ ಕೂಟ್‌ಲ್ ತಲೆದೇವ ಇಗ್ಗುತ್ತಪ್ಪ ದೇವ ಕೇಳ್ ತಂಗಮ್ಮ ನಿನ್ನ ಎಂಗ ಚದಿಚಿಲೆ. ನೀನಾಯಿತ್ ಕೆಟ್ಟಂಡಿಯ ದುಃಖ ಮಾಡಿತ್ ಏದೋರ್ ಗುಣವಿಲ್ಲೆ. ಆಚೇಂಗಿ ನಾನಿಲ್ಲೆಯ ನೆಲೆನಿಪ್ಪಿ. ನೋಟಾನಕ್ಕ ಕಾಂಬಲ್ಲ. ಕಾಕ್‌ನಕ ಕೇಪಲ್ಲಿ. ಪನ್ನಂಗಾಲ ಊರ್‌ಲ್ ನೀಡ್‌ಅಂಬ್ ಬುದ್ಧಲ್ಲಿ ಪನ್ನಂಗಾಲತಮ್ಮೆಂದ್ ನೀನಲ್ಲಿ ನೆಲೆಗೊಂಡ. ಕಾಲೋರಾಂಡೆಕೊಮ್ಮ ಮಾರಿಯೂರ್ ಪೋಕಲ್ ಚಾಂಡಾಳಪೋಲೆ ಮೋಂವನ ಪೈ ಪಟ್ಟಣ ನಿಂದಿತ್ ನಿನ್ನ ಎಡ್ತ ನಲಿಯಡ್.

ಆ ತಕ್ಕ ಕೇಪಕ ತಂಗಮ್ಮ ದೇವಿಕ್ ದುಃಖ ಆಯಿತ್ ಮಂಡೆ ಮಂಡೆ ಪೊಜ್ಜಿತ್ ಕಣ್ಣ್ ನೀರ್‌ಟ್ಟುಂಡ್ ತಾಂಡ ಅಣ್ಣಯ್ಯಂಡ ಕೂಡೆ ಚಾಂಡಾಳ ಪೊಲೆಯಂಡ ಮೈಯಿ ನಾಥ ಪೊಂದುಲೆಂದೆಣ್ಣ್‌ಚಿ. ಮೊರ್ಟತ್, ಆ ತಕ್ಕನ ಕೇಟಿತ್ ಇಗ್ಗುತ್ತಪ್ಪ ದೇವಯ್ಯ ನಿನ್ನ ಎಂಗ ಚದ್‌ಚಿಲೆ, ನೀನಾಯಿತೇ ಕೆಟ್ಟಿಯಾ. ಈಂಗ್ ಬೋರೆ ಓರ್ ಬಟ್ಟೆ ಕಾಂಬ್‌ಲೆಂದೆಣ್ಣ್‌ಚಿ. ಮೋಸ ಪೋನ ತಂಗ ಕಣ್ಣ್‌ದಂಡ್ ಮುಚ್ಚಿತ್ ಅಣ್ಣಂಗಳ ನೋಟಿತ್ ಪನ್ನಂಗಾಲ ಊರ್‌ಕ್ ಬೊಪ್ಪೋಳೆ ರೂಪ ಆಯಿತ್ ಪಾರಿಗೊಂಡ್ ಪೋಯಿತ್ ಕರ್ತಂಡೊಕ್ಕಡ ಬೇಲ್‌ಲ್ ಅಳ್ತತ್. ಇದ್‌ನ ಕಂಡಿತ್ ಕರ್ತಂಡ ಪಣಕಾರ ಚಾಂಡಾಳ ಪೊಲೆಯಂಗ ಪಾರಿತಳ್ಳ ಬೊಪ್ಪೋಳೆನ ಪುಡಿಪ್ಪಕ್ ಪೋಕಣೆ ದೇವ ಮಾಯ ಮಮ್ಮಾಯ ಚಾಂಡಾಳಂಗ್ ಪೊದ್‌ಚಿ. ಪೊದ್ಧಿತ್ ವಂದರ್ತ್. ಇದ್‌ನ ಕಂಡಿತ್ ಕೂಟ್‌ಲಿಂಜ ಪೊಲೆಮಕ್ಕ ಓಡಿ ಪಾರಿ ಬಕ್ಕಣೆ ದೇವ ಮಾಯ ಮಮ್ಮಾಯ ಆನ ಪೋನಾನೆಣ್ಣ್‌ಚಿ.

ಪನ್ನಂಗಾಲತಮ್ಮ ಅಂಬ್ ಬುಟ್ಟಲ್ಲಿ ಪನ್ನಂಗಾಲತ್ ನೆಲೆಗೊಂಡತ್. ಇಗ್ಗುತ್ತಪ್ಪ ಮಹಾದೇವ ಇಗ್ಗುತ್ತಪ್ಪ ಮಲ್ಮತ್ ನೆಲೆಗೊಂಡತ್. ನೆಲ್ಲಿಲ್, ಪೇರೂರ್ ನೆಲೆಗೊಂಡತ್.

ಪಾಲೂರಪ್ಪ ಕುಯ್ಯಂಗೇರಿ ನಾಡ್ ಪಾಲೂರ್ ನೆಲೆಗೊಂಡತ್. ಮೂಂದನೆ ತಮ್ಮಣ ತಿರುನೆಲ್ಲಿ ಕಂಡಿಲ್ ತಿರುನೆಲ್ಲಿ ಪೆಮ್ಮಯೆಂದ್ ನೆಲೆಗೊಂಡತ್.

ಆಲ್ ಮರ್ತ್ಂಜಿ ಪಾಕಡತ್ ತಾಂದಿತ್ (ಸಮುದ್ರ) ಅಯ್ಯಪ್ಪನೂ ನಾಯಿಯಳೂ ಏಳ್ ತಲೆ ನಾಗಣ್ಣನೂ ತಾಂದಿತ್ ಅಲೆರ ಕೂಡೆ ತೇಲಿತ್ ಮಣಪಟ್ಟಿಕ್ ಬಂದಿತ್ ಬುದ್ಧತ್. ಮಣಪಟ್ಟಿಕ್ ಪತ್ತಿತ್ ಅಯ್ಯಪ್ಪ ಬಿಲ್ಲ ಎದ್ದಿತ್ ಕಾಡ್ ಬೋಟೆ ಕೂಡ್ಚಿ. ನಾಯಿನ ಇಡಿ ಕೂಟ್ಚಿ. ಬಿಲ್ಲಕಾರ ಅಯ್ಯಪ್ಪ ಬೈಕೂಡ್ಂಜಿ ಓಡಿತ್ ಕೆಂಬುತ್ತ ಮರೆಲ್ ತೊಪ್ಪೊಳಿಲ್ ಒಳ್ಳತ್. ಬೋಟೆಕಾರ ನಾಯಿಯಳೂ ಬಿಲ್ಲಕುತ್ತಚಿ. ನಾಯಿ ಬಿಲ್ಲ ಕುತ್ತಣೆ ಬೊಳಳಿ ಬಿಲ್ಲ ಅಯ್ಯಪ್ಪ ಏಳುಳ್ಳ ನಾಯಿಯಳ ಕಾಕಿತ್ ನೋಟಣೆ ಕೂಟ್ಲ್ ತಲೆನಾಯಿನ ಕಣ್ಣೆಕೆಲ್ಲಿಯು ಕಂಡ್ಲೆ. ತೇಡಿಗೊಂಡ್ ಪೋಕಣೆ ಏಳ್ಜಡೆ ನಾಗನೂ ಮಂಜಕೇರೆ ಕುಂಬಿಯೂ ಮಹಾಬಿಜ್ಜೆ ಕಳಿಪಾನ ಕಂಡತ್. ಅಯ್ಯಪ್ಪಂಡ ಕೂಟ್ಲ್ ತಲೆನಾಯಿ ಎಣ್ಣಿ ಅದ್ವಾನ ಕಂಡಿತ್ ಪಾರಿತ್ ಪಾಂಬಡ ಪಕ್ಕ ಪೋಪಕ್ಕ ಏಳ್ಜಡೆ ನಾಗಣ್ಣ ಬೋಂಡ ಬೊಳ್ಳು ನೀಡ ಬಟ್ಟೆ ನೋಟಿಯ, ನೀಕ್ ಇದ್ ಸೆರಿಯಲ್ಲಂದ್ ಪತ್ತಾಕುರಿ ಸಾರ್ಚಿ. ಕೂಟ್ಲ್ ತಲೆನಾಯಿ ಎಣ್ಣಾನದ್ ಕೇಟ್ಲೆ. ತಲೆನಾಯಿ ಪಾರಿಬುದ್ದಿತ್ ಚತ್ತತ್. ಬಿಲ್ಲಕಾರ ಅಯ್ಯಪ್ಪ ನಾಯಿನ ತೇಡಿಯಂಡ್ ಬಪ್ಪಕ್ಕೆ ಕೂಟ್ಲ್ ತಲೆನಾಯಿ ಬಟ್ಟೆಕಡ್ಡ ಬುದ್ಧದ್ ಕಂಡಿತ್, ನಾಯಿರ ಮಂಡೆಕ್ ಏಳ್ಜಡೆ ನಾಗಣ್ಣ ಕೊರ್ಚದ್ ಗೊತ್ತಾಚಿ. ಅದ್ನ ಅಯ್ಯಪ್ಪ ಕಂಡಿತ್ ಚೆಡಿ ಬಂದಿತ್ ನಾಲ್ ದಿಕ್ಕು ನೋಟಣೆ ಏಳ್ಜಡೆ ನಾಗ ಏಣಿ ಅದ್ವಾನ ಕಂಡತ್.

ಅಯ್ಯಪ್ಪ ಏರ ಚೆಡಿ ಬಂದಿತ್ ಬಿಲ್ಲಕ್ ಅಂಬ್ನ ಕೊಳ್ಳೊಂಜಿ ಬಲ್ಲಿ ಬುಟ್ಟತ್. ನಾಗಣ್ಣಂಡ ಬಾಲಾರ ಕೊಡಿಕ್ ಅಂಬ್ ಪೋಯಿ ಪಟ್ಟತ್. ಕೊಲೆಕಾರ

ಅಯ್ಯಪ್ಪ ಚದಿಚದಂದ್ ನಾಗಣ್ಣ ಗ್ಯಾನ ಮಾಡಿತ್ ನಾಗಣ್ಣ ಬಾಂಗಾಡ್ ನಡುಂಜಿ ದೇಶ ಬುಟ್ತ್ ಪಾರ್ಚಿ. ಬೊಳ್ಳಿ ಬಿಲ್ಲ ಅಯ್ಯಪ್ಪನೂ ಅರೆನಾಯಿ ಯಳ ಕೂಟಿಯೆಂಡ್ ಕಣ್ಣೂರ್ ನಗರಕ್ ಬಂದಿತ್ತೆತ್ ಚಿ. ಅಲ್ಲಿ ಬಂದ್ ನಿಕ್ಕಣೆ ಮುಕ್ಕಣ್ಣ ಮಕ್ಕಡ ಮೀನ್ ನಾಥ ಪೊಂದ್ ಲೆ. ತೀಯ ಮಕ್ಕಡ ಬೊಳ್ಳೆಕಳ್ಳೆನಾ ತತ್ತ್ ಕ್ ಅಲ್ಲಿಂಜಿ ಪೊರ್ಟಿತ್ ಕೂಡಾಳಿ ನಗರಕ್ ಬಾತ್. ಅಲ್ಲಿ ನಿಪ್ಪಕ್ ನೆಲೆ ಕಂಡ್ ಲೆ, ಅಲ್ಲಿಂಜಿ ಪೊರ್ಟಿತ್ ಇಕೂರ್ ನಗರಕ್ ಬಂದಿತ್ ನೋಟಣೆ ನಿಪ್ಪಕ್ ನೆಲೆ ಇಲ್ಲತ್ತಾಚಿ. ಅಲ್ಲಿಂಜಿ ಪೊರ್ಟಿತ್ ಬೈತೂರಪ್ಪ ದೇವಡ ಕೇಕಿಯೆ ಕಂಡಿಲ್ ಬಂದಿತ್ ನಿಪ್ಪಕ್ ನೆಲೆ ಆಂಡೂಂದ್ ಕೇಟತ್. ಇಲ್ಲಿಂಜಿ ಕೇಕ್ ಕ್ ಪೋನಕ ಕೂಡವ ಮಾಲೆ ಪೊಮ್ಮಾಲೆ ಉಂಡ್ ಪೆಗ್ಗಲ್ ಕಂಡಿಲ್ ಪೆರ್ಮಾಳು ಸಾರ್ಥಾವುನ ಬೋಡ್ ನಕ ನಿಪ್ಪಕ್ ನೆಲೆ ತಕ್ಕೂಂಡೆಣ್ ಚಿ. ಅಲ್ಲಿಂಜಿ ಪೊರ್ಟಿತ್ ಪೆಗ್ಗಲ್ ಕಂಡಿಲ್ ಬಂದ್ ನಿಕ್ಕಣೆ ಪೆಗ್ಗಲ್ ಸಾರ್ಥಾವುಡ ನೆಲೆ ನಿಪ್ಪಕ್ ನೆಲೆ ಆಂಡೂಂದ್ ಕೇಟಿಲ್ಲಿ ಪೆಗ್ಗಲ್ ಸಾರ್ಥಾವು ಅಲ್ಲಿ ನೆಲೆ ಕೊಡ್ತಾ.

ಬೊಳ್ಳಿಬಿಲ್ಲ ಅಯ್ಯಪ್ಪ ಅಲ್ಲಿಂಜಿ ಪೊರ್ಟಿತ್ ಪೊಮ್ಮಾಲೆ ಕೊಡಗಲ್ ಕೇರಿಯಣ್ಣ ಪೋಯಿತ್ ಅಲ್ಲಿ ನೆಲೆಗೊಂಡತ್. ಕಾವೇರಿಲ್ ಕುಳ್ಳಿತ್ ಅಲ್ಲಿಯೂ ನೆಲೆಗೊಂಡಿತ್ ಇಗ್ಗುತ್ತಪ್ಪ ಪಾಲೂರಪ್ಪಂಡಿಲ್ಲಿಯೂ ನೆಲೆಗೊಂಡತ್.

ಇಪ್ಪರ್ ಅಯ್ಯಪ್ಪಂಡ ಬಾಣಶಂಜ ತಾಂಡ ಬಾಲ ತುಂಡ್ ಆನದ್ ಅಂಜಿತ್ ಅಲ್ಲಿಂಜಿ ಏಳೆಜಡೆ ನಾಗಣ್ಣ ಬಾಲೂರಿತ್ ನೆಲೆನಿಂದ್ ಬಾಂಗಡ್ ನಡುಂಜಿ ಕೇರಳಕ್ ಕೋಲೆಯಡ ಚಿಂಡುರ ಮೇಕಿಯೆ ತೊಡಿಯತ್ ಪಾರಿ ಬಂದ್ ಬುದ್ಧತ್. ಆ ತೋಟತ್ರೊಳ್ ಪಲ್ಡಿ ಮರತ್ರಡಿಲ್ (ಏಳೆ ಕೊಂಬ್ ಪುತ್ತರೊಳ್ ಕ್) ಕೂಡ್ ಚಿ. ಇನ್ನನೆ ಇಪ್ಪಕಾಲತ್ ಕೋಲೆಯಡ ಚಿಂಡುಡನುಪ್ಪತ್ತಾರ್ ಚೋಮಂಗಡ ಪೈಕಿ ಕೂಟಲ್ ತಲೆ ಚೋಮ ಮೇವಕ್ ಪೋನಲ್ಲಿ ಏಳೆ ಕೊಂಬ್ ಪುತ್ತನ ಕಂಡಿತ್ ಪುತ್ತನ ಗುರಿಕಲ್ತತ್. ಅಕ್ಕಣೆಕ್ ಏಳೆ ಜಡೆ ನಾಗಣ್ಣ ಪುತ್ತರೊಳ್ ವರ್ಕನೆಟ್ಟಿತ್ ಮೈದುಂಬ ಚೆಡಿ ಬಂದಿತ್ ಪುತ್ತರೊಳ್ ಬಾಲೂರಿ ತಲೆನಿಂದ್ ಕೋಲೆಯಡ ಚಿಂಡುರ ಕೂಟಲ್ ತಲೆ

ಚೋಮಂಡ ನೆತ್ತಿಕ್ ಕೊರ್ಚತ್. ನೆತ್ತಿಕ್ ಕೊರಿಕಣೆ ಚೋಮ ಕೊಡಿಕ್ ಫಾರಿತ್ ಚತ್ ಬುದ್ಧತ್. ಚಿಂಡುಡ ಅತ್ತ ಎಲ್ಲಾ ಕೊಟ್ಕೊಕ್ ಬಂದಿತುಂಡೇಂಗ್ಲೂ ತಲೆಚೋಮನೊಂದಾನ ಕಾಣತ್ತ ಚಿಂಡುಡ ಆಳ್ ಚೋಮನ ಕಾಂಬಾಲೇಂದ್ ತಾಂಡ ಯಜಮಾನಂಗಣ್ ಚಿ.

ಇದ್ನ ಕೇಟಿತ್ ಕೋಲೆಯಡ ಚಿಂಡು ಕಣಿಯನ ಕಾಕ್ ಚಿಡುವಕ್ ಆಳ್ಚಿತ್. ಅಚ್ಚುತ ಕಣಿಯೆ ಚೀಲ ಸಮೇತ ಚಿಂಡುಡ ಮನೆ ಪತ್ ಚಿ. ಅಚ್ಚುತ ಕಣಿಯೆ ರಾಶಿ ಬೆಚ್ಚಿತ್ ನೋಟುವಕ ಮೆಕಿಯ ತೊಡಿಯತ್ತುಳ್ಳ ಪಲ್ಲಿ ಮರತ್ತಡಿಲ್ ಪುತ್ನ ಗುರಿ ಕಳ್ಳಕ್ಕಾ ಏಳ್ ತಲೆ ನಾಗಣ್ಣ ಎತ್ನ ಕೊರ್ಚತ್ ಚೋಮ ಬುದ್ಧ ಚತ್ತೋಯಿತ್‌ಂದ್ ರಾಶಿಲ್ ತಿಂರ್ಚತ್. ಇದ್ನ ಕೇಟಿ ಕೋಲೆಯಡ ಚಿಂಡು ತಾನೆ ಪೋಯಿತ್ ನೋಟಣೆ ಚೋಮ ಚತ್ತಿತ್ ಬುದ್ಧದ್ ಕಂಡಿತ್ ತಿತ್ತ ಚಿಡಿ ಬಂದಿತ್ ಮಣ್ಣೊಡ್ಡಳ ಕೂಟಿತ್ ಪುತ್ನ ಕಳ್ಳತತ್. ಪುತ್ನ ಕಳ್ಳಪಕ್ಕಾ ಪುತ್ನರೊಳ್ ವರೊಂಬ ಏಳ್ ಜಡೆ ನಾಗಣ್ಣಂಗ್ ಪುತ್ನ ಕಳ್ಳಂದ್ ಸ್ವಪ್ನ ಬುದ್ಧತ್. ಗೇನ್ ಚಿಟ್ಟಿತ್ ನೋಟಣೆ ಪುತ್ನ ಕಳ್ಳದ್ ಗೊತ್ತಾಯಿತ್ ಏಳ್ ಜಡೆ ನಾಗಣ್ಣ ಪುತ್ನಂಜ ಮೊಳಿರೊಳಿಯ ತಪ್ಪಿಚಿಟ್ಟಿತ್ ಪೂರ್ಮ ಪೋಯಿರೊಂಬ ಬಾಲೂರಿ ತಲೆನಿಂದ್ ನಾಲ್ ದಿಕ್ಕ ನೋಟಿತ್ ಅಲ್ಲಿಂಜ ಎದ್ ಪಾರಿತ್ ಕಡಿಯತ್ತಾಡ್ ಕಡಂಗ್ನ ಸೋಮಗಿರಿ ಕುಂದ್ ಮೋಳ್ ಪಾರಕೆಲ್ಲರ ಸೆರಲ್ ಪೋಯಿ ಬುದ್ಧಂಡತ್. ಅನ್ನನೆ ಇಪ್ಪ ಕಾಲತ್ತ್ ಕುಂಬಿಯಾರ್ ತಿಂಗತ್ತ್ ನೆಲ್ಲಿಕ್ಕೆ ಚೆಡಿಂಜಿತ್ ದರ್ಬೆ ಪಿಲ್ಲಕ್ ತಿತ್ತ ಪುಡಿತ್ ಕುಂದ್ ಭೇವಕ್ಕ ಏಳ್ ಜಡೆ ನಾಗಣ್ಣ ತಿತ್ತರ ಶಾಖಿ ತಡ್ಡಕ್ ಕೈಯತ್ತೆ ತಲೆನೇಂದ್ ನಾಲ್ ದಿಕ್ಕ ನೋಟಿತ್ "ಬಯನಾಡ್ಕ್ ಪಾರಿತ್ ಕಲ್ಲೆ ಕರೆ ಅಪ್ಪಯ್ಯಂಡ ಕೋಟಿಕ್ ಅಡ್‌ಂಗ್ನ ಏಳ್ ಬಕ್ಕ ಚೆಂಬಕ್ಕಕ್ ಕೀದಲ್ ನೀಲಕೆರೆರೆ ಏರಿಲ್ ಚಿಂಗ ಬಾಳೆ ತೋಟಿತ್ ಮೇಕಿಯ ತೊಡಿಯತ್ ಚಿಂಗಬಾಳೆ ಮಟ್ಟತ್ತ ಪಾಚೇರಿ ಪಡ್‌ಂದಲ್ಲಿ ಬಂದಡ್‌ಂಗ್ ಚಿ.

ಇನ್ನನೆ ಇಪ್ಪ ಕಾಲತ್ತ್ ಕಲ್ಲೆ ಕರೆ ಕೋಟಿಲ್ ರಾಜ್ಯ ಆಳುವೊ ಕಲ್ಲೆ ಕರೆ ಅಪ್ಪಯ್ಯ ಅವಂಡ ತಂಗಮ್ಮ ಕಲ್ಲೆ ಕರೆ ಅಪ್ಪಯ್ಯಂಡ ಪೊಣ್ಣ್ ಮಾದೇವಿ ಕಲ್ಲೆ ಕರೆ

ಅಕ್ಕವ್ಯ ಇವು ಮುಂದಾಳ್ ಸಂತೋಷತ್ ಬಾವಕ್ಕ ವೈಕುಂಟನಗರತ್ ನಾರಾಯಣ ದೇವಯ್ಯ ಕಲ್ಲೆಕೆರೆಂದೆಣ್ಣುವೊ ರಾಜ್ಯತ್ ಮಹಾ ಸುಂದರಿ ಪೊಣ್ಣೊಂದ್ ಅಂಜಿತ್ ಅವಳ ಮಂಗಳ ಆಪಕ್ ತಕ್ಕಬಾಕ್ ತೇಪಂಗಾಯಿತ್ ನಲ್ಲೊರ್ ದಿನಪೊಲ್ತೆ ನೇರಕ್ ವೈಕುಂಟ ನಗರತ್ಂಜಿ ಪೊರ್ಟತ್. ಕಲ್ಲೆಕೆರೆ ಅಪ್ಪಯ್ಯಂಡ ಕೋಟೆರ ಹೆಬ್ಬಾಗಿಲಲ್ ಬಂದ್ ನಿಂದಿತ್ ಕಾವಲ್‌ಗಾರಂಗಣ್ಣಿತ್ ತಾನ್ ಬಂದಾನ ಅಪ್ಪಯ್ಯಂಗರಿಚೆಡೋಕ್ ಆಳ್ ಅಯಿಚತ್. ಈ ಸುದ್ದಿನ ಕೇಟ ಅಪ್ಪಯ್ಯ ನೆಲ್ಲಕ್ಕಿ ನಂದಾದೀಪ ಬೆಚ್ಚಿತ್ ಬೊಳ್ಳಿಚೆಂಬಲ್ ನೀರ್ ಬೆಚ್ಚಿತ್ ನಾರಾಯಣ ದೇವಡ ಪಕ್ಕ ಪೋಯಿತ್ ಅಡ್ಡ ಬುದ್ದಿತ್ ಕೈ ಪುಡ್‌ಚೆಂಡ್ ಕಾಕಿಯಂಡ್ ಬಂದಿತ್ ಬೊಳ್ಳಿಚೆಂಬುಲ್ ನೀರ್ ಎಡ್‌ತಿತ್ ನಾರಾಯಣ ದೇವಡ ಪಾದ ಕತ್ತಿತ್ ಕೈ ಪುಡ್‌ಚಿ ಕಾಕಿಯಂಡ್ ಪೋಯಿತ್ ಕಲ್ಲೆಕೆರೆ ಕೋಟೆರ ಏಳ್ ಮಾಡಿರ ಕೊಡಿಕ್ ಕಾಕಿಯೆ ಪೋಯಿತ್ ಪೊಂಗುರ್ಚಿಲ್ ಅಳ್ಳಚಿಟ್ಟಿತ್ ಪಾಲ್‌ಪಣ್ಣಾ ಬೆಚ್ಚಿತ್ ತಕ್ಕಾರ ಕೆಜ್ಜತ್. ಅಕ್ಕಣೆಕ್ ಕಲ್ಲೆಕೆರೆ ಅಪ್ಪಯ್ಯ ನಿತ್ಯ ಕೆಲಸಕ್ ಬೆಚ್ಚೆಂಡ ಪೊಣ್ಣಾಳ್ ಗುಡ್ಡತ್ಲಾ ನೀರ್ ಕಾಚಿತ್ ಅಪ್ಪಯ್ಯಂಗ್ ಬಂದಿತ್ ನೀರ್ ಕಾಂಚಿತ್‌ಂದೆಣ್ಣೆ ಕಲ್ಲೆಕೆರೆ ಅಪ್ಪಯ್ಯ ನಾರಾಯಣ ದೇವಡ ಕೈ ಪುಡಿಚೆಂಡ್ ಪೋಯಿತ್ ಗುಡ್ಡತ್ ಮಾಜಿನಾನ ಉತ್ತಿತ್ ಮಡಿಯಾನಾನ ಇಟ್ಟುಂಡ್ ಪಟ್ತ್ ಮುಂಡ್ ಉಡ್ಡಿತ್ ನಿಕ್ಕಣೆ ಅಪ್ಪಯ್ಯ ಬಯಿಂಬ ನಾರಾಯಣ ದೇವಡ ಕೈ ಪುಡಿಚಿತ್ ಕಾಕಿಯಂಡ್ ಬಂದಿತ್ ನಾರಾಯಣ ದೇವ ಜಪತಪ ತೇತಿತ್, ಉಂಡಿತ್ ಕುಡ್‌ಚಿತ್ ಎಲೆ ಭೋಗ ತಿಂದೆಡಳ್ಳತ್.

ನಾರಾಯಣ ದೇವ ಅಪ್ಪಯ್ಯ ಬಯಿಂಬಂಗ್ ತಾನ್ ಬಂದ ಕಾರಣಾಂದೆಣ್ಣಾಚೆಂಗಿ ನೀಡ ತಂಗಮ್ಮ ಕಲ್ಲೆಕೆರೆ ದೇವಿನ ನಾನ್ ಮಂಗಲಾಂಡೊಂದ್ ನೆನತ್ತಿಯ. ಆನಂಗುಂಡ್ ಕೇಪಕ್ಕಾಯಿತ್ ಇಲ್ಲಿಕ್ ಬಂದಂದೆಣ್ಣಾಚಿ. ಆ ತಕ್ಕನ ಕೇಟ ಕಲ್ಲೆಕೆರೆ ಅಪ್ಪಯ್ಯ ಸಂತೋಷಪಟ್ಟತ್. ಎಟ್ತ್ ದಿನತ್ಲಾ ಮಂಗಲ ಕುರ್ಚಿತ್ ದಿನ ನಿಶ್ಚಯ ಮಾಡ್‌ಚಿ. ನಾರಾಯಣ ದೇವ ಬಯ್ಯ ಪಿಂಜಿ ಪೋಚಿ. ಅನ್ನೆ ಇಪ್ಪಕ್ಕ ಕಲ್ಲೆಕೆರೆ ಅಪ್ಪಯ್ಯ ಗ್ಯಾನ ಮಾಡ್‌ಚಿ. ತಾಂಡ

ಒಂದುಳ್ಳ ತಂಗನ ವಿಜೃಂಭಣೆಲ್ ಮಂಗಲ ಕೈಕೊಂಡು. ಇದ್‌ಂಗಾಯಿತ್ ಎಲ್ಲಾ ಚೋಡು ಕೂಟೊಂಡು. ಇದ್‌ಂಗೆಲ್ಲ ಪೊನ್ನಾಪಣತ್ರ ಅವಶ್ಯ ಉಂಡ್‌ಂದ್ ಗ್ಯಾನ ಮಾಡಿತ್ ಮುತ್ ಪೊನ್ನಾಕೊಂಡ್ ಬಪ್ಪಕ್ ಎತ್ತಡ ಬೆನ್ನಲ್ ಅಕ್ಕಿ ಪೋರಿಯಂಡ್ ಮಲೆಯಾಳಕ್ ಪೋಚಿ.

ಪೊರ್ಡುವಾಂಗ್ ಮಿಂಞ ಅಪ್ಪಯ್ಯ ತಾಂಡ ತಂಗಕ್ ನಾನ್ ಪೋಯಿತ್ ಬಕ್ಕಣೆ ಏಣಿ ಪತ್ತತೆ ಎಚ್ಚಿಬಟ್ಟಿ ವಲಂಬತ್ತೆ, ಎಚ್ಚಿ ಚೀಪೆ ತ್‌ಂಡತೆ, ಚಾಣಕೂಟಿ ಎಡ್ಚತೆ, ನೆಲ್ ಬಟ್ಟಿ ಎಡ್ಚತೆ ಇನ್ನತಾನೆಲ್ಲಾ ಎಣ್ಣೆತ್ ಪೊರ್ಟತ್. ಪಿತ್ಯಾಂದ್ ಪೊಲುವಕ ಕಲ್ಲೆಕೆರೆ ಮಹಾದೇವಿ ಮೈಂಜಳಂದೆದ್ದಿತ್ ಕಾಲ್ ಮೂಡ್ ಕತ್ತುಪೊಕ್ ಕೆರೆಕ್ ಪೋಯಿತ್ ಕೆರೆರ ಅಂಡತ್ತುಳ್ಳ ಬಾಳೆತೋಟತ್‌ಂಜಿ ಕಾಲ್ ಕೈ ಉದ್ದುಪೋಕ್ ಚೇರಿ ತೊಪ್ಪಾ ಪರಿಪಕ್ಕ್ ಪೋಕಣೆ ಚೇರಿಪಡತ್ರ ಒಳ್‌ಂಜಿ ಪಾಂಬ್ ತುಯಿಂಚದ್ (ಬುಷ್ ಕೂಟುವೊ) ಕೇಟಿತ್, ಆ ಸದ್ದಾನ್ ಕೇಟಿತ್ ಕಲ್ಲೆಕೆರೆ ಮಹಾದೇವಿ ಬಯ್ಯಕ್ ನಿಂದತ್. ಅದ್‌ನ ಕಂಡಿತ್ ಏಳ್ ಜಡೆ ನಾಗಣ್ಣ ಕಲ್ಲೆ ಕರೆ ಮಾದೇವಿ ಬೊತ್ತಂಡ ಬೊರ್ಡಂಡ. ನೀಕ್ ದೋಷಕೆಯ್ಯವಲೇಂದೆಣ್ಣೆ ಕಲ್ಲೆಕೆರೆ ಮಹಾದೇವಿ ನೋಟಣೆ ಪಾಚೇರಿ ಜಗ್ಗಲ್ ಏಳ್ ಜಡೆ ನಾಗಣ್ಣನ ಕಂಡತ್. ಅಕ್ಕಣೆಕ್ ನಾಗಣ್ಣ ಎಣ್ಣೆ ಚಿ. ಪಾಲ್‌ಪಣ್ಣ ತಿಂಗತೆ ಪೆರ್ತ್ ಸಮಯ ಆಚಿ. ಆನಂಗುಂಡ್ ನೀನಿಕ್ಕ ನಾಕ್ ಪಾಲ್‌ಪಣ್ಣ ತರೋಂಡೂಂದ್ ಕೇಟಿತ್. ನಾಗಣ್ಣ ಪಾಂಬೊಂದೂ ಅಲ್ಲ. ಮಂಚೆ ಕೇರೆ ಪಾಂಬಾಯಿತ್ತಿಕ್ಕು. ಆನಂಗುಂಡ್ ನೀನ್ ಪಾಲ್ ಪಣ್ಣೊಂದು ಬೆಕ್ಕಂಡಂದೆಣ್ಣೆ ಚಿ. ಆ ತಕ್ಕನ ಕೇಟಿತ್. ನೀಲಕೊಡಿ ಮಾದೇವಿ ಮಮ್ಮಗರಿಯತೆ ಕುಳ್ಳಿ ತಳ್ಳಿ ಮಡಿ ಉಡ್ಡಿತ್ ಪಯ್ಯುರ ಪಾಲ್ ಕರಂದಿತ್ ಬಾಳೆಪಣ್ಣೊ ಪಾಲ್ ತಟ್ಟೆಲ್ ಎಡ್ಚ ಪೋಯಿತ್ ಏಳ್ ಜಡೆ ನಾಗಂಡ ಮಿಂಞತ್ ಬೆಚ್ಚತ್. ಇದ್‌ನ ಕಂಡ ನಾಗಣ್ಣ ಸಂತೋಷ ಪಟ್ಟಿತ್. ಪಾಚೇರಿ ಪಡತ್‌ಂಜಿ ಕೀದಕ್ಕಳ್‌ಂಜಲ್ ಕಲ್ಲೆಕೆರೆ ಮಾದೇವಿಕ್ ಬೆಮ್ಮಂಬಿನಿಂದಂದೆಣ್ಣೆತ್ ಪಾಲ್‌ಪಣ್ಣ ಬೇಂಗಿತ್ ಬಾಯಿಲಿಂಜ ಮೂಣಿಕ ಪರತ್ನ ತಟ್ಟೆಕೊಟ್ಟಿತ್. ಕಲ್ಲೆಕೆರೆ ದೇವಿ ಈ ಮೂಣಿಕ ಪರತ್ನ ಪೊನ್ನಾರ ತಾತಿ ಮಾಡಿತ್ ಆಂಡೊಳ್‌ಲ್ ಇಟ್ಟಿತ್ ಬೋಳೆಕ್ ಕೆಟ್ಟಿಯು. ಅಕ್ಕ

ನೀನ್ ಚತ್ತಲ್ಲಿಂಜಿಯೂ ಬದ್ಧಿತ್ ಬಪ್ಪಿಯಾಂದೆಣ್ಣೆತ್ ಆಶೀರ್ವಾದ ಮಾಡ್‌ಚಿ. ಆ ತಕ್ಕನ ಕೇಟಿತ್ ಕಲ್ಲಕೆರೆ ದೇವಿ ಸಂತೋಷಪಟ್ಟತ್. ತಟ್ಟನಗುಂಡ್ ಪೊನ್ನಾರ ತಾತಿ ಮಾಡ್‌ಚಿಟ್ಟತ್. ಆಂಡೊಳ್‌ಕ್ ಇಟ್ಟಿತ್ ಬೋಳೆಕ್ ಕೆಟ್ಟಿಯಂಡತ್. ಪಿತ್ತಂದೆತ್ತಾರ ದಿನ ಕಲ್ಲೆ ಕರೆ ಮಾದೇವಿ ಕನ್ನಿಪೊಲೆ ಕಂಡತ್.

ಈ ಸಂಗತಿನ ತಾಂಡ ಮಮ್ಮಂಡ ಕೂಡೆ ಎಣ್ಣೆಚಿ. ಅಕ್ಕ ಮಮ್ಮ ಎಣ್ಣೆಚಿ. ನೀನ್ ಕನ್ನಿ ಪೊಲೆ ಕಂಡದ್ ನೀಕೋರ್ ಆದಿಯಲ್ಲ. ಪೊಣ್ಣೆ ಜನಕ್ಕುಳ್ಳದ್. ಆಚೇಂಗಿಕ್ಕ ಮೂಂದ್ ಇರ್ಲ್ ಮೂಂದ್ ಪೊವುಲ್ ಮನೆ ಬುಟ್ಟ್ ಒಳಿಯಂಡೊಂದೆಣ್ಣೆಚಿ. ಆ ತಕ್ಕನ ಕೇಟಿತ್ ಕಲ್ಲಕೆರೆ ಮಾದೇವಿ ಕುಟ್ಟುವೊ ಕೊಟ್ಟಲ್ ಒಳಿಯಡಾಂದ್ ಕೇಟಿತ್. ಅಕ್ಕಣೆಕ್ ಅಕ್ಕವೊ ಎಣ್ಣೆಚಿ. ಕುಟ್ಟುವೊ ಕೊಟ್ಟಲ್ ಒಳೊಂಬಕ ಅಕ್ಕಿಕ್ ಪೊಲೆ ತಟ್ಟು, ಅಣ್ಣ ಚತ್ತೋಕೊಂದೆಣ್ಣೆಚಿ. ಅಕ್ಕ ಮಾದೇವಿ ಚೋಯ ಒಳಿಯುವೊ ಕೊಟ್ಟಲ್ ಮೂಂದೊಳಿಯಡಾಂದ್ ಕೇಟಿತ್. ಆ ತಕ್ಕನ ಕೇಟಿತ್ ಅಕ್ಕವೊ ಎಣ್ಣೆಚಿ. ಚೋಮ ಕೂಡುವೊ ಕೊಟ್ಟಲ್ ಒಳೊಂಬಕ್ಕ ಚೋಮಂಗ್ ಪೊಲೆ ತಟ್ಟಿತ್ ಚತ್ತೋಕೊಂದೆಣ್ಣೆಚಿ. ಅಂದಕ ಮಮ್ಮಾ ಊರ್ ಅಂಬಲತ್ ಮೂಂದೊಳಿಯಡಾಂದ್ ಕೇಟಿತ್. ಆ ತಕ್ಕನ ಕೇಟಿತ್ ಅಕ್ಕವೊ ಎಣ್ಣೆಚಿ, ಅಂಬಲತ್ ಮೂಂದೊಳ್‌ಂಬಕ್ಕ ಊರ್‌ಕ್ ಪೊಲೆತಟ್ಟು, ಊರ್‌ಕಾರ ಚತ್ತೋಕೊಂದೆಣ್ಣೆಚಿ. ಆ ತಕ್ಕನ ಕೇಟಿ ಮಾದೇವಿ ಕೇಟಿ ಜಾಗತ್ ಆಗಾಂದೆಣ್ಣುವಿರಾ. ಇಂಞಿಲ್ಲಿ ಮೂಂದೊಳಿಯೊವು ನಾನ್‌ಂದ್ ಮೊರ್ಟತ್. ಅಕ್ಕಣೆಕ್ ಅಕ್ಕವೊ ಎಣ್ಣೆಚಿ, ಊರ್‌ರ ನಡುಲ್ ಭದ್ರಕಾಳಿರ ಕೋಟಿತ್ ಬುದ್ಧಂಡಿಪ್ಪ ನೇರತ್ತೆ ನಡ್ಡಾದ್ರೆ ಕಯ್ಯೋಕ ಭದ್ರಕಾಳಿ ಸಾದಾಮೆ ಪತ್ತ್‌ಕೂಟ ಪಾತಾಳ ಎಲ್ಲೆಲ್ಲಿಯೋ ಸುತ್ತಿಯಂಡ್ ಬಂದಿತ್ ತಾಂಡ ಸ್ಥಾನ ಕೋಟಿತ್ ಬಂದಿತ್ ನೋಟಣೆ ಕಲ್ಲೆಕೆರೆ ಮಾದೇವಿನ ಕಂಡಿತ್ ಕಲ್ಲೆಕೆರೆ ಮಾದೇವಿ ಎನ್ನಂಗ್ ಇಲ್ಲಿಕ್ ಬಂದಿಯಾ? ನೀನಾಯಿತೇ ಬಂದಿಯಾ? ನಿನ್ನ ದಾರೇಂಗಿ ಅಯಿಚತಾಂದ್ ಕೇಕಣೆ ಕಲ್ಲೆಕೆರೆ ಮಾದೇವಿ ನಾನ್ ಕನ್ನಿಪೊಲೆ ಕಂಡಿಯೆ. ಮೂಂದ್ ಇರ್ಲ್ ಮೂಂದ್ ಪೋಲ್ ಮನೆ ಬುಟ್ಟ್ ಒಳಿಯೋಂಡು

ಅದ್‌ಂಗಾಯಿತ್ ನಾಡ ಅಣ್ಣಂಡ ಪೊಣ್ಣ್ ಕಲ್ಲಕೆರೆ ಅಕ್ಕವೊ ಇಲ್ಲಿಪ್ಪಕೆಣ್ಣ್ ಚಿ. ಅದ್‌ಂಗಾಯಿತ್ ನಾನಿಲ್ಲಿ ಒಳಿವಿಂದೆಣ್ಣೆ ಭದ್ರಕಾಳಿ ಸಾದಾಮೆ ಏಡ ಕೋಟತ್ ಪೊಲೆ ಬಂದ ಪೊಮ್ಮಕ್ಕ ಮೂಂದೊಳ್‌ಂಜಿತ್ ಪೋಪಲಾ. ಇದೇದೋರ್ ಪುದುಮೆಯೋಂದೆಣ್ಣ್ ಚಿ. ನೋಟ್ ಕುಂಞಿ ನೀನ್ ಒಳಿಯೋಂಗಿಯ. ಉ ಒಳಿಂಚಾ. ಉಪ್ಪ ತಿಂದಂವೊ ನೀರ್ ಕುಡಿಕ್ಕಡ್ ಕುಂಞಿ. ನೀನಿಲ್ಲಿ ಒಳ್‌ಂಜಿತ್ ಏಡ ಕೋಟತ್ ಅದ್ ಶುದ್ಧ ಮಾಡಿತ್ ಇಳ್‌ಂಜಿ ಪೋಯಾಂದೆಣ್ಣೆತ್ ಆಶೀರ್ವಾದ ಮಾಡಿತ್ ಕಣ್ಣ್ ಮರೆ ಆಚಿ. ಸಾದಾಮೆ ಎಣ್ಣೆನ ಪೋಲೆ ಕಲ್ಲಕೆರೆ ಮಾದೇವಿ ಮೂಂದೊಳ್‌ಂಜಿತ್ ಅದ್ ಶುದ್ಧ ಮಾಡಿತ್ ಪೋಟ್ ಪೋಚಿ. ಅಣ್ಣಂಡ ಪೊಣ್ಣ್ ಅಕ್ಕವ್ವನ ಕಂಡಿತ್ ಕೋಟತ್ ಮೂಂದೊಳ್‌ಂಜಿತ್ ಬಂದಿಯೆ. ನೀಲ ಕೆರೆಲ್ ಕುಳಿಕ್ಕಡಾಂದ್ ಕೇಕಣೆ ಪಾಪಿ ಕೆಟ್ಟವ್ವ ಅಕ್ಕವ್ವ ಮಾದೇವಿ ನೀನ್ ನೀಲ ಕೆರೆಲ್ ಕುಳಿಚಕ್ಕಾ ನೀರ್‌ಕ್ ಪೊಲೆ ತಟ್ಟಿತ್ ಅಣ್ಣಚಿತ್ ಪೋಕುಲಾಂದೆಣ್ಣ್ ಚಿ.

ಆ ತಕ್ಕನ ಕೇಟ ನೀಲ ಕೊಡಿ ಮಾದೇವಿ ಊರ್‌ರ ನಡುಲ್ ಅಚ್ಚಾನತ್ ಪಾಕೆರೆಲ್ ಕುಳಿಪೀಂದೆಣ್ಣ್ ಚಿ. ಅಕ್ಕಣೆಕ್ ಅಕ್ಕವೊ ಎಣ್ಣ್ ಚಿ, ಅಲ್ಲಿ ನೀನ್ ಕುಳಿಚಕ ಊರ್‌ಕ್ ಪೊಲೆ ತಟ್ಟು, ಊರ್‌ಕಾರಕ್ ಪೊಲೆ ತಟ್ಟು. ಅಲ್ಲಿಯೂ ಕುಳಿಪಕಯ್ಯಾಂದೆಣ್ಣ್ ಚಿ. ಆ ತಕ್ಕನ ಕೇಟಿತ್ ಕಲ್ಲಕೆರೆ ಮಾದೇವಿ ಏರ ದುಃಖ ಮಾಡಿತ್ ಇಣ್ಣಿಲ್ಲಿ ಕುಳಿಪ ನಾನ್‌ಂದ್ ಮೊರ್ಟತ್. ಅದ್‌ಕಂಡ ಅಕ್ಕವೊ ದುಃಖ ಬೋಂಡ ಮಾದೇವಿ ಬಾಂಗಾಡ್ ನಡುಲ್ ಚಿಂಬ್‌ಕಣತ್ತರ ಉಂಡ್. ಅಲ್ಲಿಕ್ ನೀಕ್ ಕುಳಿಕೋಲುಂದೆಣ್ಣ್ ಚಿ. ಅಕ್ಕಣೆಕ್ ಮಾದೇವಿ ಎಣ್ಣ್ ಚಿ. ಚಿಂಬ್ ಕಣತ್ತರೆ ನಾಕ್ ಗೊತ್ತಿಲೆ. ನಾನ್ ಎಲ್ಲಿಯೂ ಕಂಡಿಲ್ಲೆಂದೆಣ್ಣು ವಕ ಕಲ್ಲಕೆರೆ ಅಕ್ಕವೊ ನಾನ್ ಕಾಟಿ ತಟ್ಟಿ ದುಃಖ ಬೋಂಡ ಮಾದೇವೀಂದೆಣ್ಣೆತ್ ಮಾದೇವಿನ ಕಾಕಿಯಂಡ್ ಪೋಯಿತ್ ಬಾಂಗಾಡ್ ನಡುಲ್ ಪುಂಡತ್ರೇಣ ಕೆತ್ತಿತ್ ಕಣತ್ತರೊಳ್‌ಕೊಟ್ಟಿತ್ ತಾತಿತ್ ಮಾದೇವಿನ ಕುಳಿಪಕ್ಕಳ್ಳಚಿ.

ಕಣತ್ತಕ್ಕಳ್ಳಂಜ ಮಾದೇವಿ ಮೂಮು ಮುಂಗಿತ್ತೇವಣೆ ತಾಕ್‌ನ ಪುಂಡಡೇಣಿ ನೋಟಣೆ ಏಣಿನೋ ಅಕ್ಕವ್ವನೋ ಕಾಣತ್ತೆ ಏಂಗಿ ಕಾಕ್‌ಚಿ, ಮುಂಡ

ಪೊಜ್ಜಂಡ್ ಮೊರ್ಟತ್. ಕಾಕ್‌ನಕ್ಕೋ ಪರ್ತಲ್, ನೋಟ್‌ನಕ್ಕೋ ಕಂಡಲ್. ಅಕ್ಕಪೊ ನನ್ನ ಚದಿಚತ್‌ಂದ್ ಗ್ಯಾನ ಮಾಡಿತ್ ಮಂಡಪೊಜ್ಜಂಡ್ ಚೋರ್ತೆ ಮೊರ್ಡವಕ ಆ ಕಾಡಲ್ ವಾಸ ಇಂಜ ರಾಕ್ಸಸಿ ಪೊಂಗಡ ಧ್ವನಿ ಕೇಟಿತ್ ಸಂತೋಷ ಪಟ್ಟಂಡ್ ಬಾಯಿ ಬುಟ್ಟಂಡ್ ಓಡಿ ಪಾರಿ ಬಂದಿತ್ ಚೆಂಬ್ ಕಣತ್ರೊಳ್‌ಲ್ ನೋಟಣೆ ಕಲ್ಲಕೆರೆ ಮಾದೇವಿ ಮೊರ್ಡವಾನ ಕಂಡಿತ್ ಪಕ್ಕತ್ತಿಂಜ ಪುಂಡಡೇಣಿನ ಕಣತ್ರೊಳ್‌ಕ್ ತಾತ್‌ಚಿ. ಕಲ್ಲಕೆರೆ ಮಾದೇವಿ ಅದಾನ ಕಂಡಿತ್ ಏಣಿ ಪತ್ತಿತ್ ಕೊಡಿಕೆ ಬಾತ್. ಮಾದೇವಿ ಪಕ್ಕತ್ ಕಂಡ ರಾಕ್ಸಸಿ ನೀನೆಲ್ಲಿಂಜಿಲ್ಲಿಕ್ ಬಂದಿಯೇ ಪೊಂಗಳೆಂದ್ ಕೇಟತ್. ಅಕ್ಕಣಕ್ ಮಾದೇವಿ ನಡ್‌ಂದ ಕಥೆನೆಲ್ಲಾ ಎಣ್ಣೆಚಿ. ಇದಾನ ಕೇಟ ರಾಕ್ಸಸಿ ಸಂತೋಷ ಪಟ್ಟಿತ್ ನಿನ್ನ ಇಕ್ಕ ನಾನ್ ತಿಂಬೀಂದಣ್ಣೆಚಿ. ತಿಂಬಿಂದಣ್ಣೆತ್ ಪುಡಿಕಣೆ ಮಾದೇವಿ ರಾಕ್ಸಸಿಕ್ ಎಣ್ಣೆಚಿ. ನನ್ನ ನೀನ್ ತಿಂಬೇಂಗಿ ಏದೋರ್ ಕೊರವಿಲ್ಲೆ. ಆಚೆಂಗಿ ರಾಕ್ಸಸಿ ನಾಡೋರ್ ತಕ್ಕನ ಇಕ್ಕ ನಡ್ಡಿತ್ ತರೋಂಡು. ನಾಡ ಕೋಳಿಕೊರ ಮಂಡೆನ ತಿಂಗತೆ, ಕೋಯಿಬೆರತ್‌ನೋ, ಕೆಲತ್ನೊ ತಿಂಗತೆ, ಮೊಲೆ ದಂಡಾನೋ ತಿಂಗತೆ, ಬಾಕಿ ತಿಂಬೆಂಗಿ ನನ್ನಗುಂಡ್ ಅಡ್ಡಿಯಿಲ್ಲೆಂದಣ್ಣೆಯೆಂಡತ್. ಇನ್ನನೆ ಪಂದಿತ್ ರಾಕ್ಸಸಿನಗುಂಡ್ ಭೂಮಿನ ತೊಡ್‌ಚಿಟ್ಟತ್. ಕಲ್ಲಕೆರೆ ಮಾದೇವಿ ಭಾಷೆ ಎಡ್ತಂಡತ್. ಕಲ್ಲಕೆರೆ ಮಾದೇವಿನ ಎಣ್ಣೆನ ಪೋಲೆ ರಾಕ್ಸಸಿ ಜೋಗತಲಲೆ ತಿಂದಾಲೆ. ಕೋಯಿಬೆರ ಕೆಲತ್ನೊ ತಿಂದಾಲೆ. ಮೊಲೆನೋ, ಕೆಲತ್ನೋ ಮಂಡೆನೋ ತಿಂದಾಲೆ. ಬಾಕಿ ಎಲ್ಲಾನೋ ರಾಕ್ಸಸಿ ತಿಂದಿತ್ ಪೋಚಿ. ಇನ್ನನೆ ಇಪ್ಪ ನೇರತ್ ನಲ್ಲೋರ್ ನಾಳ್‌ಲ್ ಕಾಡ್ ಬೂಡಲ್ ವಾಸ ಇಪ್ಪ ಕಾಟಾಳಂಡ ಮಕ್ಕ ಕಾಡ್ ಬೋಟೆ ಮಾಡ್ಚೊಕ್ ಒತ್ತೋಮೆಗೊಂಡಿತ್ ಅಂಬ್ ಬಿಲ್ಲ್ ಕೈಲೆಡ್ತಂಡ್ ಬಾಂಗಾಡ್ ನಡುಲ್ ಬೋಟೆ ಕೂಡ್‌ಚಿ. ಕಣ್ಣೆಕ್ಕೊಂದೂ ಕಂಡಾಲೆ. ಜಾತಿರ ಜೂಡೂ ಕಂಡಾಲೆ. ಅನ್ನನೆ ಕಾಡ್‌ರೊಳ್‌ಲ್ ತಿರ್ಗಿಯಂಡಿಪ್ಪಕ್ಕ ಓರ್ ಕಾಳೆ ಮುಚ್ಚನ ಕಂಡಿತ್ ಕಾಟಾಳಂಡ ಮಕ್ಕ ಬಿಲ್ಲಕ್ಕಂಬ್‌ಕೊಳ್ಳಿತ್ ಮಾರ್‌ಟ್ಪ್ ಬಲ್ಲಿತ್ ಅಂಬ್ ತೊಡ್ ಬುಟ್ಟತ್. ಬುಟ್ಟಿ ಅಂಬ್ ಪೋಯಿತ್ ಚೆಂಬ್‌ಕಣತ್ತರೆರ ಪಕ್ಕ

ಬುದ್ಧತ್ವ. ಅಕ್ಕಣೆಕ್ ಕಾಟಾಳಂಡ ಮಕ್ಕ ಬುದ್ಧ ಅಂಬಾನ ಪೊರ್ಕೊಕ್ ತೇಡಿಯಂಡ್ ಪೋಕಣೆ ಬಾಂಗಾಡಾರ ನಡುಲ್ ಚೆಂಬ್ ಕಣತ್ತರೆನ ಕಂಡಿತ್ ಆಲೆ ಈಲೆ ನೋಟಣೆ ಆಕಣತ್ತರೆರ ವಿರಿಲ್ ಮನುಷ್ಯಂಡ ಮಂಡೆನ ಕಂಡತ್. ಅಲ್ಲತೆ ಕೋಯಿಬೆರತ್ತ, ಮೊಲೆನೊ, ಕೆಲತ್ತೊ ಎಲ್ಲಾನೊ ಕಂಡತ್. ಇದಾನ ಕಂಡಿತ್ ಕಾಟಾಳಂಡ ಚೆಪ್ಪಾಪಾನಿಮಂಡೆ ಚೆಂಬುದುಡಿಕ್ಕಾಕು, ಕೆಲಚೆಂಬುದುಡಿಕ್ ಕೇರ ಆಕು, ಮೊಲೆದಂಡಾಕೊಡ ದುಡಿಕ್ ಪೊದೆ ಆಕು, ಕೋಯಬೆರೆ ದಂಡೂ ಕೊಟ್ಟುವೊಕ್ ಕೋಲ್ ಆಕೊಂದಣ್ಣಿತ್ ಎಲ್ಲಾರೂ ಒತ್ತಿತ್ ಮಂಡೆ, ಕೆಲ, ಮೊಲೆ, ಪಿಂಞ ಬೆರತ್ತೊ ಎಲ್ಲಾನೋ ಎಡ್ತಂಡ್ ತಾಂಡ ಮನೆಕ್ ಕೊಂಡ್ ಪೋಯಿತ್ ವಣಕಿತ್ ದುಡಿ ಮಾಡಿತ್ ಕೊಕ್ಕೆಲ್ ತೂಕಚಿ. ಅಕ್ಕಣೆಕ್ ತಾನೇ ದುಡಿಕೊಟ್ಟಚಿ, ತಾನೇ ದುಡಿ ಪಾಡ್ಚಿ.

ಇನ್ನನೆ ಇಪ್ಪಕಾಲತ್ ಕಲ್ಲಕೆರೆ ಅಪ್ಪಯ್ಯ ತಂಗಮ್ಮಂಡ ಮಾಲೆ ಚೂಡಿ ಮಂಗಲಕ್ ಮುತ್ ಪೊನ್ನಾಕ್ ಮಲೆಯಾಳಕ್ ಪೋನಂವೊ ನುಪ್ಪತ್ತಾರ್ ಚೋಮಂಡ ಬೆನ್ನಲ್ ಮುತ್ ಪೋರಿಯಂಡ್ ಬಂದಿತ್ ಕಲ್ಲಕೆರಕ್ ಬಂದಿತ್ ಎತ್ತುವೊದು ತಾಂಡಕೊಂಡವ ಕಲ್ಲಕೆರೆ ಅಕ್ಕವೊ ಬೊಳ್ಳಿ ಚೆಂಬ್ ನೀರ್ ಕ್ಕಾಂದಿತ್ ವಡಿಯಂಡ ಮಿಂಞಲ್ ಬೆಚ್ಚತ್. ಇದ್ ಕಂಡ ಅಪ್ಪಯ್ಯ ತಾರಾಮಾರ ನೋಟಣೆ ತಾಂಡ ತಂಗೆ ಕಲ್ಲಕೆರೆ ದೇವಿನ ಎಲ್ಲಿಯೂ ಕಂಡಾಲೆ. ಅಪ್ಪಯ್ಯ ಬಯಿಂಬ ಬೆಚ್ಚ ನೀರ್ ಎದ್ದಿತ್ ಕಾಲ್ ಮೂಡ್ ಕತ್ತಿತ್ ತಾಂಡ ಪೊಣ್ಣಾರ ಕೂಡ ತಾಂಡ ತಂಗಮ್ಮ ಎಲ್ಲಿಯಾಂದ್ ಕೇಟತ್. ಅಕ್ಕಣೆಕ್ ಅಕ್ಕವೊ ಮಾಯಪಂದರ್ತ್. ನಿಂಗಡ ತಂಗೆ ಪೊಲೆ ಕಂಡಿತ್ ಕುಳಿಪಕಂದ್ ಭಾಂಗಾಡಾರ ನಡುಲ್ ಚೆಂಬ್ ಕಣತ್ತರೆಕ್ ಪೋನಲ್ಲಿ ಅಲ್ಲಿ ವಾಸ ಇಂಬ ರಾಕ್ರಾಸಿ ಮಾದೇವಿನ ತಿಂದತ್ಂದೆಣ್ಣೆಚಿ. ಆ ತಕ್ಕಾನ ಕೇಟಿತ್ ಕಲ್ಲಕೆರೆ ಅಪ್ಪಯ್ಯ ಶಿವಶೋಕ ಮಾಡಿತ್ ಏರ ದುಃಖ ಪಟ್ಟತ್ ಎಣ್ಣಿತ್ ಫಲವಿಲ್ಲೆಂದ್ ತಂಗಮ್ಮಂಡ ಪೆದಪೋಲೆ ಮಾದಕುಳ್ಳ ಸಾಮಾನ ಒಂದ್ ತೊಟ್ಟನೂರೋಳ ಕೊಂಡ್ ಕೂಟಚಿ. ಬೆಂದು ಚಂಗಾಂದಿಯಕೆಲ್ಲಾ ಪಾಲೆ ಅಯಿಚತ್. ಇನ್ನನೆ ಇಪ್ಪ ಕಾಲತ್ ಈ ಸುದ್ದಿನ ಅಂಜಿತ್ ಕಾಡ ಕಾಟಾಳಂಡ

ಮಕ್ಕ ತಾಂಡ ದುಡಿನೆಡ್ತಂಡ್ ಕಲ್ಲಕೆರೆ ಕೋಟಕ ಬಂದಿತೆತ್ತಣೆ ಕಲ್ಲಕೆರೆ ಅಪ್ಪಯ್ಯ ಬಯಿಂಬ ಪೊನ್ನಾರ ಕುರ್ಚಿಲ್ ಬೇರಗೊಂಡಳ್ತದ್ ಕಂಡತ್. ಇದಾನ ಕಂಡ ಕಾಟಾಳಂಡ ಮಕ್ಕ ಅಪ್ಪಯ್ಯ ಬಯಿಂಬಂಡ ಪಾದಕ್ ಅಡ್ಡ ಬುದ್ಧಿತ್ ತಾನ್ ಕ್ಷಾಂದ ದುಡಿನ ಎಡ್ತಂಡ್ ಓರ್ ಬರಿಲ್ ಅಳ್ತತ್. ಅಕ್ಕಣೆಕ್ಕೋರ್ ಕಥೆ ಮಾಯ ಅಲ್ಲಿ ನಡ್ಂದತ್. ಕಾಟಾಳಂಡ ಪಕ್ಕತ್ಲ್ ಬೆಚ್ಚಂಡ ದುಡಿ ತಾನೆ ಕೊಟ್ಟಿಯುಂಡ್ ತಾನೇ ಪಾಡ್ಲೋಕ್ ಸುರು ಆಚಿ. ಇನ್ನನೆ ಆಪಕ್ ಈಂಗ್ ಮಿಂಞ ಏಳ್ ಜಡೆ ನಾಗಣ್ಣ ಕಲ್ಲಕೆರೆ ದೇವಿಕ್ ಕೊಡ್ತ ಮಾಣಿಕ್ಕ ಪರತ್ರ ಶಕ್ತಿ (ಅವಡ ಬೋಳೆಲಿಂಬ) ದುಡಿಲಿಂಬತ್. ಇದಾನ ಕೇಟಳ್ತ ಅಪ್ಪಯ್ಯ ಇದೆನ್ನ ಆದಿಯಾಪ. ಅನ್ನನೆ ನೆನತಿತ್ ಬೇರಾಚಿಟ್ಟಿತ್ ಕೇಕಣೆ ಕಲ್ಲಕೆರೆ ಮಾದೇವಿ ಪುಟ್ಟಿತ್ ಬೊಳಂದಲ್ಲಿಂಬ ಪುಡಿಚಿತ್ ಬಾಯಿ ಅಲಂದ ರಾಕ್ರಾಸಿ ಕಲ್ಲಕೆರೆ ದೇವಿನ ತಿಂದಲ್ಲಿಕ್ಕೆತ್ತಣೆ ತಾನೇ ದುಡಿ ಕೊಟ್ಟಿತ್ ತಾನೇ ಪಾಡ್ಚಿ. ಇದಾನ ಕೇಟಳ್ತ ಕಲ್ಲಕೆರೆ ಅಪ್ಪಯ್ಯಂಗ್ ವಿಚಾರ ಗೊತ್ತಾಯಿತ್ ತಾಂಡ ಪೊಣ್ಣ್ ತಾಂಡ ತಂಗನೆ ಚದಾಚತೇಂದ್ ಗ್ಯಾನ ಮಾಡಿತ್ ಕಾಟಾಳಂಡ ಮಕ್ಕಡ ಚೆಂಬ್ ದುಡಿ ತಪ್ಪಿರಾಂದ್ ಕೇಟತ್. ಕಾಟಾಳಂಡ ಮಕ್ಕ ಎಣ್ಣಾಚಿ ಎಂಗಡ ಮಾದೊರೆ ಚೆಂಬ್ ದುಡಿ ನಿಂಗಕ್ ತಂದಕ ಎಂಗಡ ಕೂಳ್ ಮುಟ್ಟೊ. ಆನಂಗುಂಡ್ ತಪ್ಪಕ್ ಕಯ್ಯುಲೆಂದೆಣ್ಣಾಚಿ. ಅನ್ನನೆ ಎಣ್ಣಾನ ಕೇಟಿತ್ ಕಲ್ಲಕೆರೆ ಅಪ್ಪಯ್ಯ ನೆಲ್ಲಳ್ಳ ಪಾನಿಲ್ ಪೊನ್ನ ಅಳಂದ್ ಬೆಚ್ಚಿತ್ ಮೇದ ಮೊರತ್ಲ ಮುತ್ ಪೊನ್ನ ಬೆಚ್ಚಂಡ್ ಕಾಟಾಳಂಡ ಮಕ್ಕಕ್ ಕೊಡ್ತಿತ್ ಚೆಂಬ್ ದುಡಿ ಕೇಟಂಡತ್.

ಚೆಂಬ್ ದುಡಿನ ಎಡ್ತಿತ್ ಕೋಬಂಡ ಕೊಕ್ಕೆಲ್ ತೂಕ್ಚಿ. ಕಲ್ಲಕೆರೆ ಅಪ್ಪಯ್ಯ ದುಃಖಿತ್ಲ ನೆಲ್ಲಕ್ಕಿಲ್ ಅಳ್ತಿಪ್ಪ ನೇರತ್ಲ ಕೆಂಗಡ ಮಂಡೆ ಕೊಕ್ಕೆಂಜಿ ದುಡಿ ಕೇರ್ ತುಂಡಿತ್ ಬುದ್ಧತ್. ಕೇರ್ ತುಂಡಿತ್ ಬೂವಣೆ ದುಡಿ ದಂಡಾಚಿ (ವಡ್ಂದ್). ಅಕ್ಕಣೆಕ್ಕೋರ್ ಮಮ್ಮಾಯ ನಡ್ಂದತ್. ಏಳ್ಜಡೆ ನಾಗಂಡ ಮಾಣಿಕ ಪರ ಫಲತ್ನಗುಂಡ್ ಕಲ್ಲಕೆರೆ ಮಾದೇವಿ ಮಮ್ಮಾಯತ್ ಪುಟ್ಟಿತ್ ಅಣ್ಣಯ್ಯಂಡ ಪಕ್ಕತ್ ಬಾತ್. ಅಣ್ಣಯ್ಯಂಡ ಕಾಲ್ ಪುಡಿತ್ ಎದ್ದತ್. ಎದ್

ನಿಕ್ಕಣೆ ಕಲ್ಲಕೆರೆ ಅಪ್ಪಯ್ಯಂಗ್ ಭಾರೀ ಖುಷಿ ಕಲ್ಲಕೆರೆ ತಂಗನ ತಬ್ಬಿ ಪುಡಿಚಂಡತ್. ಕಲ್ಲಕೆರೆ ಮಾದೇವಿ ಆನ ಪೋನಾನೆಲ್ಲ ಅಣ್ಣಯ್ಯಂಡ ಕೂಡ ದುಃಖ ಮಾಡಿಯಂಡೆಣ್ಣಚಿ. ಇದನ ಕೇಟಪ್ಪಯ್ಯ ತಾಂಡ ಪೊಣ್ಣನ ಪಕ್ಕತ್ ಕಾಕಿತ್ ಈ ಕಥೆ ಎಲ್ಲಾ ನೇರಾಂದ್ ಕೇಟತ್. ಅಕ್ಕಣೆಕ್ ಅಕ್ಕವೊ ಬೊತ್ತಿತ್ ಆನ ಪೋನಾನೆಲ್ಲ ನೇರೇಂದ್ ಒತ್ತಂಡತ್. ಇದನ ಕಂಡ ಅಪ್ಪಯ್ಯ ಏರ ಚೆರು ಬಂದಿತ್ ತಾಂಡ ಪೊಂಗಡ ಕೈಪುಡಿಚೆಂಡ್ ನಾಡ್ ಪರಾಂಬಕ್ ಪೋಯಿತ್ ನಾಡ್ ಕಾರಳೆಲ್ಲಾ ಕಾಕಿಕೂಟತ್ ಅರೆಂಜಿ ಕತ್ತಿ ಎಡ್ತಂಡ್ ತಾಂಡ ಪೊಣ್ಣಕ್ ಈ ತಕ್ಕ ಪರಂದತ್. ನಾಡ ತಂಗನ ಚದಾಚಾಂಗ್ ನಿನ್ನ ಬೆಪ್ಪಕ್ಕಾಗಂದೆಣ್ಣಿತ್ ಕೈಲಿಂಜಿ ಕತ್ತಿಲ್ ಕಲ್ಲಕೆರೆ ಅಕ್ಕವ್ವನ ಮೊಲೆ ಕೆತ್ ಕೆತ್ತೊಂಜಿ ಪರಾಂಬಲ್ ಕಂಡ ತುಂಡ್ ಕನಿಚತ್. ಈನ ಕೊಂಡ್ ಪೋರಾಂದ್ ತಂಗೆರ ಮಾದಕ್ ಕೂಟನ ಸಾಮನತ್ಲ ಕಲ್ಲಕೆರೆ ಅಕ್ಕವ್ವಂಡ ಮಾದಕೈಚತ್. ಕಲ್ಲಕೆರೆ ಅಪ್ಪಯ್ಯ ತಾಂಡ ತಂಗೆರ ಮಂಗಲತ್ರ ಸೊಲ್ಲೋಲೆ ತಾಂಡ ಊರ್ ನಾಡ್ಕ್ ಬೆಂದೂ ಚಂಗಾದಿಯೆಕ್ ಅರಿಚಿಟ್ಟತ್. ನಿಶ್ಚಯ ಮಾಡನ ದಿನತ್ರಂದ್ ಕಲ್ಲಕೆರೆ ದೇವಿರ ಮುಹೂರ್ತ ಕೈಚಿತ್ ಪಾರಕಾತಂದಿಂಜಲ್ಲಿ ನಾರಾಯಣ ದೇವಯ್ಯ ತಾನುಳ್ಳಲ್ವಿ ಮುಹೂರ್ತ ಕೈಚಿತ್ ಕಲ್ಲಕೆರೆ ಕೋಟೆಕ್ ಮಂಗಲಾಡಿ ಬಂದಿತ್ ಆಡಿ ಪಾರಿಕೇರಿತ್, ಉಂಡಿತ್ ಕುಡ್ಡಿತ್ ನೆಲ್ಲಕ್ಕಿರ ನಡುಲ್ ದಂಪತಿ ಮುಹೂರ್ತ ಕೈಚಿತ್ ನಾರಾಯಣ ದೇವಯ್ಯ ಕಲ್ಲಕೆರೆ ದೇವಿರ ಕೈಪುಡಚತ್. ಮೇಲೆ ಲೋಕ ದೇಶಕ್ ಮಂಗಲಾಡಿ ಪೋಯಿತ್ ಚಂದೋಳತ್ ಬದ್ಕೆಚಿ.

ನಾಗಣ್ಣ ನೆಲೆ ಎಡ್ತ ವಿವರ

ಏಳು ತಲೆ ನಾಗಣ್ಣ ಪಾಚೇರಿ ಪಡತ್‌ಂಜಿ ಇಳಂಜಿತ್ ಬಾಲೂರಿ ತಲೆನಿಂದ್ ನಾಲ್ ದಿಕ್ಕ್ ನೋಟಣೆ ಎಲ್ಲಿಯೂ ನಿಪ್ಪಕ್ ನೆಲೆ ಕಂಡ್‌ಲೆ. ನಿಪ್ಪಚಿಟ್ಟಿವೊ ಜನಳೂ ಇಲ್ಲೆಂದ್ ಗೊತ್ತಾಯಿತ್ ಆ ದೇಶಕ್ ಏಣಿದೇಶ ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ದೇಶತ್ರ ಮುಂದಲೆ ತಿರುನೆಲ್ಲಿ ಕಂಡಿಲ್ ತಿರ್ನೆಲ್ಲಿ ಪೆಮ್ಮಯ್ಯ ನೆಲೆ ಎಡ್ತ ದೇವಸ್ಥಾನತ್ರ ನಡಿಯಕ್ ಮಾಯತ್ ನಾಗ ಪಾರಿಬಂದ್ ನಿಂದತ್. ತಾಂಡ ಕೂಟ್ ಪುಟ್ಟಾನ ದೇಬುವಡ ಕೂಡೆ ನಿಪ್ಪಕ್ ನೆಲೆತರೊಂಡೊಂದ್ ಕೇಟತ್. ತಿರುನೆಲ್ಲಿ ಪೆಮ್ಮಯ್ಯ ಬೇರ್ಚಿಟ್ಟಿತ್, ನೋಟಿತ್ ಏಳು ಜಡೆ ನಾಗಣ್ಣ ಈ ತಕ್ಕ್ ಪಂದರ್ತ್. ನಾಗರಾಜ ಕೇಳು ಜಾಗ ನೆಲೆತಪ್ಪಕ್ಕೆ ಎನ್ನಂಗುಂಡ್ ಆಪ್ಪೆ. ಆನಂಗುಂಡ್ ನೀನ್ ಇಲ್ಲಿಂಜ ಪಡರ್‌ಲ್ ಕುಯ್ಯಂಗೇರಿ ನಾಡ್‌ಲ್ ಪಾಲೂರಂದೆಣ್ಣಿವೊ ಊರ್ಲ ನೀಡ ಕೂಟ್ ದೇವಯ್ಯ ಪಾಲೂರಪ್ಪಂದೆಣ್ಣಿತ್ ಅಲ್ಲಿ ನೆಲೆಗೊಂಡಿತ್, ಅಲ್ಲಿ ಪೋಯಿತ್ ಕೇಟಕ್ಕ ನೀಕ್ ನಿಪ್ಪಕ್ ನೆಲೆ ತಕ್ಕೊಂದೆಣ್ಣಿ ಚಿ. ಆ ತಕ್ಕ್‌ನ ಕೇಟ ನಾಗಣ್ಣ ಸಂತೋಷಪಟ್ಟಿತ್ ಬಾಲೂರಿ ತಲೆನಿಂದ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್ ಕುಯ್ಯಂಗೇರಿ ನಾಡ್‌ರ ನಡುಲ್ ಪಾಲೂರಪ್ಪ ದೇವಡ ದೇವಾಲಯತ್ರ ಮಿಂಗಳಲ್ ಕೇಕ್ ಕಂಡಿಲ್ ನಿಂದಿತ್ ಪಾಲೂರಪ್ಪಂಡ ಕೂಡೆ ನಾಡ ಕೂಡೆ ಪುಟ್ಟಾನ ಪಾಲೂರಪ್ಪ ದೇವಯ್ಯ ನಿಪ್ಪಕ್ ನೆಲೆ ಬೋಂಡೊಂದ್ ಎಣ್ಣಿ ಚಿ. ನಿಪ್ಪಚಿಟ್ಟಿವೊ ಜನ ಬೋಂಡೊಂದ್ ಪರೆಯಣೆ ಪಾಲೂರಪ್ಪ ಎಣ್ಣಿ ಚಿ ನಾಗಣ್ಣ ದೇವಯ್ಯ ಇಲ್ಲಿಂಜಿ ನೋಟಾನಕ ಕಾಂಬಲ್ಲಿ ಇಗ್ಗುತ್ತಪ್ಪಂಡ ಕುಂದ್‌ಲ್ ಇಗ್ಗುತ್ತಪ್ಪಂದ್ ಪೆದಲಾಯಿ ಅಲ್ಲಿ ನೆಲೆ ಎಡ್ತಿತ್. ಅಲ್ಲಿ ಪೋಯಿ ಕೇಟಕ ನೀಕ್ ಸ್ಥಾನ ನೆಲೆ ತಪ್ಪಕ್

ಮದೀಂದೆಣ್ಣೆಚಿ. ಆ ತಕ್ಕನ ಕೇಟಿತ್ ಏಳ್ ಜಡೆ ನಾಗ ಸಂತೋಷ ಪಟ್ಟಿತ್. ಬಾಲಾರಿ ತಲೆನಿಂದ್ ಇಗ್ಗತ್ತಪ್ಪಂಡ ಕುಂದ್‌ಕ್ ಪಾರ್‌ಚಿ. ಕೇಕಿಯ ನಡಿಯತ್ ಅಡ್ಡ ಬುದ್ಧಿತ್ತದ್ದಿತ್ ಇಗ್ಗತ್ತಪ್ಪಂಡ ಕೂಡೆ ಎಣ್ಣೆಚಿ. ನಿಪ್ಪಕ್ ನೆಲೆ ತರೋಂಡೂಂದ್ ಕೇಟಿತ್. ಇಗ್ಗತ್ತಪ್ಪ ತಾಂಗ್ ನೆಲೆ ತಪ್ಪಕ್ ಆಪ್ಲೆ ನಾಗಣ್ಣ, ನೀನ್ ತಾವೂರ್ಲ್ ಕಾವೇರಿ ಮಹಾತಾಯಿ ನೀರಾಯಿ ಪರಂದಿತ್ ಅಲ್ಲಿ ಪೋಯಿತ್ ಕಾವೇರಮ್ಮೆನ ಕೇಟಕ ನೀಕ್ ನಿಪ್ಪಕ್ ನೆಲೆ ತಕ್ಕುಂದ್ ಎಣ್ಣೆಚಿ, ಆ ತಕ್ಕನ ಕೇಟಿತ್ ಏಳ್ ಜಡೆ ನಾಗಣ್ಣ ಸಂತೋಷ ಪಟ್ಟಿತ್. ಬಾಲಾರಿ ತಲೆ ನಿಂದ್ ಬ್ರಹ್ಮಗಿರಿ ಮೋಳ್‌ಕ್ ಪಾರಿತ್ ಬಂದಿತ್ ಕಾವೇರಮ್ಮೆ ತಾಯಿರ ಕುಂಡಿಕೆಲ್ ಮಿಂಚಿ ಕುಳ್ಳತ್ ಕಾವೇರಮ್ಮೆರ ಕೂಡೆ ಸ್ಥಾನ ನೆಲೆಕಟ್ಟಲೆ ಚಾಂದ್ ಪೂವು ಕೊಟ್ಟಲೆ. ನಿಪ್ಪಕ್ ನೆಲೆ ತರೋಂಡೂಂದ್ ಬೋಡಣೆ ಕಾವೇರಮ್ಮೆ ಈ ತಕ್ಕ ಪರಂದತ್

ಏಳ್ ಜಡೆ ನಾಗಣ್ಣ ಶಂಬುಶಿವ ದೇವಂಡ ಮಮ್ಮಾಯತವತಾರ ನಾಡೆಲ್ಲಾ ನೆಲೆಗೊಂಡಿತ್ ಪಾರ್ವತಿ ಅಮ್ಮೆ ದೇವಿರ ಮಮ್ಮಾಯತವತಾರ ಊರ್ ಊರ್‌ಲ್ ನೆಲೆ ಪುಡ್ಡಿತ್, ಬೊಳ್ಳಿ ಬಿಲ್ ಅಯ್ಯಪ್ಪಕೇರಿ ಎಣ್ಣೆ ನೆಲೆ ಪುಡ್ಡಿತ್, ನೀಕ್ ಎಲ್ಲಿ ನೆಲೆ ತಪ್ಪೆ? ಇನ್ನನೆ ಎಣ್ಣಣೆ ಏಳ್ ಜಡೆ ನಾಗಣ್ಣ 'ಏರ ದುಃಖ ಪಟ್ಟಿತ್, ಕಾವೇರಮ್ಮೆರ ಕೂಡೆ ಇನ್ನನೆ ಎಣ್ಣೆಚಿ. ಪಾಕಡತ್ ಪುಟ್ಟನ ಏಡ ಕೂಟ್ ದೇಬುವೆ ಸ್ಥಾನ ನೆಲೆ ಪುಡ್ಡೆಂಡ್ ಚಾಂದ್ ಪೂವು ಬೇಂಗಿಯೆಂಡ್ ಸಂತೋಷತ್ ಬಾಪಲಾ. ನಾಕೋರ್ ನೆಲೆ ಕೊಟ್ಟಲೆ ಮಹಾತಾಯಿ ಆಚೇಂಗಿ ಇಕ್ಕ ನಾಕ್ ನೆಲೆ ತಂದಕ್ಕ ಮಾಲೋ ಮನುಷ್ಯಂಗೋ ಅತ್ತ ಕಡ್ಡಿಯಕೂ ಪಾಂಬೂ ತೇಳ್ ತೋಂಡೊಲೆಂದೆಣ್ಣೆತ್ ಕಾವೇರಮ್ಮೆನ ಬೋಡೆಚಿ. ಅಕ್ಕ ಕಾವೇರಮ್ಮೆ ನೀನ್ ಪೊಮ್ಮಾಲೆ ಕೊಡಗಲ್ ಓಣಿಕ್ಕೋರ್ ನಾಥಂದ್ ಓಣಿಯಣ್ಣ ಸ್ಥಾನ ನೆಲೆ ಪುಡ್ಡಿದೆಣ್ಣೆತ್ ಆಶೀರ್ವಾದ ಮಾಡೆಚಿ. ಆ ತಕ್ಕನ ಕೇಟಿತ್ ಏಳ್ ಜಡೆ ನಾಗಣ್ಣ ಕಾವೇರಮ್ಮೆ ದೇವಿರ ಪಾದಕ್ಕಡ್ಡೆ ಬುದ್ಧಿತ್ ಏರ ಸಂತೋಷ ಪಟ್ಟಿತ್. ಕೂಡವ ಮಾಲೆ ಪೊಮ್ಮಾಲೆ ಕೊಡಗಲ್ ಓಣಿಕ್ ಓರ್ ನಾಥಂದ್ ಪುಡ್ಡತ್. ಇಲ್ಲಿಕ್ ನಾಗಂಡ ನೆಲೆ ತಂದತ್ತ. ಕೊಡಗಲ್ ಈ ಮಾದ್ರಿ ನಾಗಣ್ಣ ನೆಲೆ ನಿಂದ ಕಥೆ.

ಶ್ರೀ ಮೂಲ ಕಾವೇರಮ್ಮೆ

ಪಂಡ್ ಕೃತಯುಗತ್ಲ ಕಶ್ಯಪ ಮಹಾಮುನಿಕ್ ದೇವ ಕನ್ನಿ ಅದಿತಿ, ನೀಲಕೊಡಿತಿಂದೆಣ್ಣುವೊ ಪೊಮ್ಮಕ್ಕ ಇಂಜತ್. ಅವು ಸಂತೋಷತ್ಲ ಬಾವಕ್ಕ ಮೂಂದ್ಕಾಲ ಕೈಯೋಕ ದಂಡಾಳೂ ಕನ್ನಿ ಪೊಲೆ ಕಂಡತ್. ಆ ಪೊಲೆ ಕುಳ್ಳಿತ್ ವುಕ್ಕ ಪೊಲೆ ನಿಂದತ್. ಅಕ್ಕ ತಂಗೆಯ ದಂಡಾಳೂ ದುಂಬ್ನ ಕುಳಮಕರ್ತಿಯಳಾಚಿ. ಇನ್ನನೆ ಇಪ್ಪಕ ನಲ್ಲೋರ್ ದಿನತ್ಲ ಕಶ್ಯಪ್ಪಂಡ ಅದಿತಿಂದೆಣ್ಣುವೊ ಪೊಣ್ಣ್ ದೇವಳ ಪೆತ್ತತ್. ದಂಡನೆ ಪೊಣ್ಣ್ ದಿತಿ ರಾಕರ್ರಸಿಯಳ ಪೆತ್ತತ್. ರಾಕ್ರಸಿಯೊಳೂ ದೇವಳೂ ಗ್ಯಾನ ಮಾಡ್ತಿ-ಚಾವದೂ ಪರ್ಪದೂ ಇಪ್ಪಕ್ಕಾಗಂದ್. ಇದ್ಂಗೆನ್ನ ಪರಿಹಾರಾಂದ್ ಕಂಡ್ ಪುಡಿಕೊಂಡೊಂದ್ ನೆನತತ್. ಅಕ್ಕಣೆಕ್ ಈ ವಿಷಯ ನಾರಾಯಣ ದೇವಂಗ್ ಗೊತ್ತಾಯಿತ್ ದೇವತೆಯಳೋ ರಾಕ್ರಸಿಯಳೋ ಕಾಕಿಕೂಟೋಂಚಿ ಈ ತಕ್ಕ ಪಂದರ್ತ್. ಜಂಬೂ ದ್ವೀಪತ್ರೊಳ್ ಭೂಮಿಕ್ಕೆಲ್ಲಾ ಎತ್ತರತ್ತುಳ್ಳ ಮೇರು ಪರ್ವತ (ಕುಂದ್)ತ್ಲ ಪೊರ್ಚಿತ್ ಪಾಲ್ ಸಮುದ್ರತ್ ತಾತಿತ್ ವಾಸುಕೀಂದೆಣ್ಣುವೊ ಪಾಂಬ್ನ ಕೊಂಡ್ ಬಂದಿತ್ ಮೇರ್ ಕುಂದ್ಕ್ ಮೂಂದ್ ಸುತ್ತ್ ಸುತ್ತಿತ್ ದೇವತೆಯಳೂ, ರಾಕ್ರಸಿಯಳೂ ದಂಡ್ ಬರಿಲ್ ನಿಂದಿತ್ ಪಾಲ್ ಸಮುದ್ರತ್ಲ ಕಡ್ಂದಕ ಅಮೃತ ಪುಟ್ಟುವಾ. ಅಮೃತತ್ಲ ನಿಂಗ ಕುಡಿಚಕ್ಕ ನಿಂಗಕ್ ಪುಟ್ಟುವೊದು ಚಾವದೂ ಇಲ್ಲತೆ ಚಿರಂಜೀವಿಯಾಯಿತ್ತಿಪ್ಪಿರಾಂದೆಣ್ಣಿತ್ ನಾರಾಯಣ ದೇವ ಆಶೀರ್ವಾದ ಮಾಡಿತ್ ಕಣ್ಣ್ ಮರೆ ಆಚಿ. ಆ ತಕ್ಕನ ಕೇಟಿತ್ ರಾಕ್ರಸಿಯಕೂ ದೇವತೆಯಕೂ ಭಾರೀ ಸಂತೋಷ ಆಯಿತ್ ನಾರಾಯಣ ದೇವ ಎಣ್ಣ್ನ ಪೊಲೆ ಮೇರು ಕುಂದ್ ಪೊರ್ಚೆಂಡ್ ಬಂದಿತ್ ಪಾಲ್ ಸಮುದ್ರತ್ಲ ತಾತಿತ್ ವಾಸುಕೀಂದೆಣ್ಣುವೊ ಪಾಂಬ್ನ ಮೇರು ಕುಂದ್ಕ್ ಮೂಂದ್ ಸುತ್ತ್ ಸುತ್ತಿತ್

ಪಾಂಚಾರ ಮಂಡೆ ಬರಿಕ್ ದೇವತೆಯ ನಿಂದಿತ್ ಬಾಲಬರಿಕ್ ರಾಕ್ರಾಸಿಯ ನಿಂದಿತ್ ದಂಡ್ ಕಡೆಯೂ ಒತ್ತಿತ್ ಪಾಲ್ ಸಮುದ್ರತ್ ಕಡ್ಂದತ್.

ಕಡ್ಂದಂಡಿಂಜೆನ್ನೆಕ್ಕೆ ಹಾಲ ಹಲಾಂದೆಣ್ಣುವೊ ವಿಷ ಪೂರ್ತ್ ಬಾತ್. ಭೂಮಂಡಲತ್ತುಳ್ಳ ಜೀವರಾಶಿಯಕ್ಕೆಲ್ಲಾ ಉಟ್ಟಣ ಮರ್ಕ ಉಂಡಾಚಿ. ಇದ್ನೆಲ್ಲಾ ನೋಟಿಯಂಡಿಂಜ ಪಾರ್ವತಿ ಪರಮೇಶ್ವರ ಪಾಕಡ ಕಡಿಯೊಲ್ಲಿಕ್ ಬಂದಿತ್ ವಿಷ ಬಟ್ಟತ್ ಪರಮೇಶ್ವರ ಕುಡ್ಡಿರ್. ವಿಷತ್ ಕುಡಿಕಣೆ ಪಾರ್ವತಿ ದೇವಿ ಈಶ್ವರಂಡ ತೊಂಡೆನ ಅಮುಕಿ ಪುಡ್ಡಂಡತ್. ಕುಡ್ಡ ಹಾಲ ಹಲ ವಿಷ ತೊಂಡಲ್ ನಿಂದ್ ಪೋಚಿ. ಅಲ್ಲಿಂಜಿಪ್ಪರ ಈಶ್ವರಂಗ್ ವಿಷಕಂಠಂದ್ ಪೆದ ಬಾತ್. ವಿಷಾಂದೆಣ್ಣುವ ನಂಜಿನ ಕುಡ್ಡಂಗ್ ನಂಜುಂಡೇಶ್ವರಂದ್ ಪೆದ ಬಾತ್. ಕುಡಿಚ ವಿಷತ್ರ ತೀಕ್ಚತ್ ಈಶ್ವರಂಡ ತಡಿಯೆಲ್ಲಾ ನೀಲರಂಗ್ಕ್ ಮಂಜೋಚಿ. ಆನಗುಂಡ್ ಈಶ್ವರಂಗ್ ನೀಲಕಂಠಂದ್ ಪೆದಬಾತ್.

ಇಚ್ಚೆಕ್ಲಾ ಅಕಣೆ ರಾಕ್ರಾಸಿಯಳೂ ದೇವತೆಯಳೂ ಪಾಕಡ ಕಡಂದತ್. ಅಕ್ಕಣೆಕ್ ಮಮ್ಮಾಯ ಪಾಕಡತೊಳ್ಳಂಜ ಲಕ್ಷ್ಮಿದೇವಿ ಪುಟ್ಟಿತ್ ಬಾತ್. ಇದ್ನೆಲ್ಲಾ ಕಂಡಿತ್ ರಾಕ್ರಾಸಿಯಡ ಮೂಪ ಬಲಿ ಚಕ್ರವರ್ತಿ ಲಕ್ಷ್ಮಿದೇವಿನ ತಾನ್ ಮಂಗಲ ಕೈಗೊಂಡುಂದ್ ಎಣ್ಣಾಚಿ. ಇದ್ನೆಲ್ಲಾ ನೋಟಾನ ಮಹಾವಿಷ್ಣು ಬಂದಿತ್ ರಾಕ್ಷಸಂಗಡ ಮೂಪ ಬಲಿಚಕ್ರವರ್ತಿರ ಕೂಡ ನೆಲ್ಲ ತಕ್ ಪಂದರ್ತ್. ಲಕ್ಷ್ಮಿದೇವಿ ಮಹಾತಾಯೀ ತಾನ್ ವಿಷ್ಣುಕ್ ಪೊಣ್ಣಾಯಿತ್ತಿರೊಂಡೂ, ರಾಕ್ಷಸ ಕುಲಕ್ ಮಂಗಲ ಆಪಕಯ್ಯಾಂದೆಣ್ಣಾಚಿ. ಅದ್ಂಗೆ ಒತ್ತಿತ್ ಬಲಿಚಕ್ರವರ್ತಿಯೂ ದೇವತೆಯಳೂ ಕೂಡಿತ್ ಪಾಲ್ ಸಮುದ್ರತ್ ಕಲ್ಕಚಿ. ಅಕ್ಕಣೆಕ್ ಸುರೇಂದ್ರೆಣ್ಣುವೊದ್ ಪುಟ್ಚಿ. ಅದ್ನ ರಾಕ್ಷಸಂಗ ಬಲಿಚೆಂಡತ್. ಪುನಃ ಪಾಕಡತ್ ಕಡ್ಂದತ್. ಅಕ್ಕಣೆಕ್ ಏಳ್ ದೇವ ಕನ್ನಿಯ ಪುಟ್ಟಿತ್ ಬಂದಿತ್ ಇಂದ್ರಲೋಕಕ್ ಪೋಚಿ. ಪುನಃ ಪಾಕಡಕಡಿಯಣೆ ಕಲ್ಪವೃಕ್ಷ, ಕಾಮಧೇನು, ಐರಾವತ, ಪುರುಷಮೃಗ, ಉಚ್ಚಿಸ್ತ ವಸುಂದೆಣ್ಣುವೊ ಕುದುರೆ, ಚಂದ್ರ ಇವೆಲ್ಲಾ

ಪುಟ್ಟಿತ್ ದೇವಲೋಕಕ್ ಸೇರ್ಚಿ. ಪುನಃ ಪಾಕಡ ಕಡಿಯಣೆ ಧನುವಂತ್ರಿ ಪುಟ್ಟಿಚಿ.

ಅಮೃತಕುಂಬಕ್ಕೆಲೆಡ್ತಂಡ್ ಸಮುದ್ರತೊಂಬಿ ಧನುವಂತರಿ ಪೊರ ಬುದ್ಧತ್. ಇದ್ನ ಕಂಡ ರಾಕ್ರಾಸಿಯ ನಾಕ್ ನಾಕ್ಂದೆಣ್ಣಿಯಂಡ್ ದೇವತೆಯಡ ಕೂಡ ಪೇಚಿ ಕೂಟ್ಕ್ ಬುದ್ಧತ್. ದೇವತೆಯಡ ಕೈಯಿಂಜ ಅಮೃತ ಕುಂಬತ್ ಬಲ್ವಿತ್ ಬಲಿಚಕ್ರವರ್ತಿ ಎಡ್ತಂಡ್ ಅಲ್ಲಿಂಜಿ ಪೊರ್ಟಿತ್. ಇದ್ನಲ್ಲಾ ನೋಟಿಯಂಡಿಂಜ ಮಾಹಾವಿಷ್ಟು ತಾಂಡ ಆಣಿರೂಪ ಬುಟ್ಟಿತ್ ಮೋಹನಿರ ರೂಪ ಆಯಿ ಪೊಣ್ಣಾಯಿತ್ ನಿಂದತ್. ಇದ್ನ ನೋಟಿಯಂಡಿಂಜ ಲಕ್ಷ್ಮೀದೇವಿ ಪಾರ್ವತಿ ದೇವಿರ ಮಮ್ಮಾಯತವತಾರ ಲೋಪಾಮುದ್ರೆ ದೇವಿನ ಕೂಟ್ಕ್ - ತೊಣಿ ಆಯೆಂಡ್ ಲಕ್ಷ್ಮೀದೇವಿಯಾ ಲೋಪಾಮುದ್ರೆ ದೇವಿ ದಂಡಾಳ್ ರಾಕ್ರಾಸಿಯಡಲ್ಲಿಕ್ ಪೋಕಣೆ ದೇವಿಯಡ ಚಾಯಿ ಕಂಡಿತ್ ನಾಕ್ ನಾಕ್ಂದೆಣ್ಣಿತ್ ಪೇಚಿಕೂಟ ಬುದ್ಧಲ್ಲಿ ಮಾಯಾಕಾರ ವಿಷ್ಟರ ಮಮ್ಮಾಯತ್ ಮೋಹಿನಿ ರಾಕ್ರಾಸಿಯಡ ಕೈಯಿಂಜ ಅಮೃತ ಪಾತ್ರತ್ ಕೇಟಂಡ್ ರಾಕ್ರಾಸಿಯಕೆಣ್ಣಿಚಿ. ದೇವತೆಯಕೂ ಎಣ್ಣಿಚಿ. ನಿಂಗಲ್ಲಾರೂ ಸಾಲಾಯಿತ್ ಅಮೃತ ಕುಡಿಪಕ್ ಅಳೆರಿ. ನಾನ್ ಅಮೃತ ಬೊಳ್ಂಬುವೀಂದ್ ಎಣ್ಣಿಚಿ. ಮೋಹಿನಿ ಪಿಂಞ ನಿಂಗಡ ಚಕ್ರವರ್ತಿ ಬಲಿನ ಮಂಗಲಾಪೀಂದೆಣ್ಣಿಚಿ. ಈ ತಕ್ಕನ ಕೇಟಿತ್ ರಾಕ್ರಾಸಿಯಳೂ ದೇವತೆಯಳೂ ಅಮೃತ ಕುಡಿಪಂಗಾಯಿತ್ ಸಾಲ್ ಕೆಟ್ಟಿತ್ತಲ್ತತ್. ಅಕ್ಕಣೆಕ್ ದೇವತೆಯ ನಂಗ ಬೋರೆ ಅಳ್ಬಂದೆಣ್ಣಿಚಿ. ಇದ್ನ ಕೇಟ ಮೋಹಿನಿ (ವಿಷ್ಟು) ದೇವತೆಯಕ್ಕೆಣ್ಣಿಚಿ ಚಿಂಡ್ ಪೊರ್ಡುಲೆಂಗಿ ನಿಂಗ ದೂರ ಪೋಯಿತ್ತಳ್ಳೋಳಿಂದೆಣ್ಣಿಚಿ. ಅನ್ನೆ ದೇವತೆಯ ಎಲ್ಲ ಪೋಯಿತ್ ಸಾಲ್ಕೆಟ್ಟಿ ಅಮೃತ ಕುಡಿಪಂಗಾಯಿತ್ ಅಲ್ತತ್. ಇತ್ತಟಿ ರಾಕ್ರಾಸಿಯಡ ಮಧ್ಯತ್ ಸುರಕೇತೊಂದೆಣ್ಣಿವೊ ರಾಕ್ರಾಸಿಕ್ ಸಂಶಯ ಬಂದಿತ್ ದೇವತೆಯಡ ರೂಪ ತಾಳಿತ್ ದೇವತೆಯಡ ಮಧ್ಯತ್ ಪೋಯಿತ್ ಅಲ್ತತ್. ಇದ್ ದೇವತೆಯಕ್ ಗೊತ್ತಾಯಿಲೆ. ಮಾಯಾಕಾರ ಮೋಹಿನಿ ರಾಕ್ರಾಸಿಯಕ್ ಸುರನ ಬೊಳ್ಳಂಜಿ, ಅಮೃತತಾನ ದೇವತೆಯಕ್ಕೆಲ್ಲಾರ್ಕೂ ಬೊಳ್ಳಿಂಡ್ ಪೋಪಕ ದೇವತೆಯಡ

ಮಧ್ಯತ್ನ ಅಲ್ಲ ಸುರಕೇತು ರಾಕ್ರಾಸಿಯಡ ಬಾಯಿಕ್ ಅಮೃತತ್‌ನ ಬೂಕ್‌ಚಿ.

ಇದ್‌ನ ಕಂಡಿತ್ ಮಾಯಾಕಾರ ವಿಷ್ಣು ತಾಂಡ ಕೈಲ್ಲಿಂಜ ಚಕ್ರಾಯುಧತ್ನ ಬುಟ್ಟಿತ್ ಸುರಕೇತು ರಾಕ್ರಾಸಿರ ಚೆಂಡ್‌ಮಂಡೆ ತುಂಡೆಣ್ಣಿತ್ ಆಕಾಶಕ್ ಪಾರ್‌ಚಿ. ಅದೇ ಮರ್ಮಕ್ ಸೂರ್ಯ ಚಂದ್ರಂಗೂ ವಾರಾಂಡೆಕ್ಕೋರ್ ಮಗ್ರಾಹಣ ಪುಡ್ಡಿತ್ ಮರೆ ಆಪ. ಸೂರ್ಯಂಗ್ ರಾಹು ಮರೆ ಆಚೇಂಗಿ ಅದ್‌ಂಗ್ ರಾಹು ಗ್ರಣಾಂದೆಣ್ಣುವಾ. ಕೇತು ಮರೆ ಆಚೇಂಗಿ ಕೇತು ಗ್ರಹಣಾಂದ್ ಎಣ್ಣುವ. ಕಲ್ಲಾಯಿತ್ ವರ ಮೋಹಿನಿ ಅಮೃತತ್ನ ದೇವತೆಯಕ್ ಬೊಳ್‌ಂಬಿತ್ ಸಹ್ಯ ಮಲ್ಕಂದೆಣ್ಣುವೊ ಊರ್ಲ್ ಕಲ್ಲಾಯಿತ್ ಮರ್‌ಂಜತ್. ಆ ಕಲ್ಲ್‌ರ ನಡುಕ್ಕಾಲೆ ನುಗ್ಗಿತ್ ಪೊರ್ಟಕ ಕೆಜ್ಜ ಪಾಪ ಪೋಪ. ಮೇಲೆ ಪಾಪ ಪೊದ್ದುಲೇಂದೆಣ್ಣುವಾ. ಅನ್ನತ ನೆಲೆರೂಪ ಲಕ್ಷ್ಮಿ ದೇವಿ ಮಹಾತಾಯಿ ಲೋಪಾಮುದ್ರೆನ ಕೂಟಿಯಂಡ್ ಪೋಯಿತ್ ನಾಲ್‌ಮಂಡೆ ಬ್ರಹ್ಮಂಗ್ ದತ್ತ್ ಮೋವಳಾಯಿತ್ ನೀನ್ ಚಾಕಿಯಾಂದೆಣ್ಣಿತ್ ಕೊಡ್ತತ್. ಬ್ರಹ್ಮಂಗ್ ಕುಶಿಯಾಯಿತ್ ಲೋಪಾಮುದ್ರೆನ ಕೊಂಡ್ ಪೋಯಿತ್ ಚಾಕ್‌ಚಿ.

ಇನ್ನನೆ ಇಪ್ಪ ಕಾಲತ್ ಭಾರತತ್ರೋಳ್‌ಲ್ (ಜನಭೂದ್ವೀಪ) ಕವೇರಂದೆಣ್ಣುಪೋರ್ ಮುನಿ ತಾನೂ ತಾಂಡ ಪೊಂಗಳೂ ಜಂಬೂ ದ್ವೀಪತ್ತುಳ್ಳ ಪುಣ್ಯಕ್ಷೇತ್ರತ್ನ ಸುತ್ತಿಯಂಡ್ ಬಂದಿತ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್‌ರೊಳ್‌ಲ್ ಸೈಯಾದ್ರಿ (ಬ್ರಹ್ಮಗಿರಿ) ಬೆಟ್ಟತ್ರೋಳ್‌ಕ್ ಬಂದಿತ್ ನಿಂದಿತ್ ಉಕ್ತಂಬ್‌ನ ಕಿರಿಯ ನಟ್ಟಿತ್ ಉಕ್ತಂಬ್‌ರ ತುದಿಲ್ ಪದ್ಮಾಸನ ಇಟ್ಟಿತ್ ಅಳ್ಳಿತ್ ನಾಲ್ ಮಂಡೆ ಬ್ರಹ್ಮನ ಮನಸ್ಸೊರೊಳ್‌ಲ್ ನೆನತ್ತಂಡ್ ಮಕ್ಕ ಫಲ ಬೋಂಡೊಂದ್ ಬ್ರಹ್ಮ ಬೋಡಿಯಂಡ್ ಉಪ್ಪ ಕೂಳ್‌ನ ತೊಂದಿತ್ ಪಟ್ಟಣಿ ನಿಂದಂಡ್ ಬೆದ್, ಮಳೆ, ಕಾತ್, ನಾಯಿ, ಕರಡಿ, ಪಾಂಬ್, ಚೇಳ್, ಕೂಳಿ ಮಾರಿ ಅಂಜಿತೆ, ಇರ್ಲ್ ಪೊವುಲ್‌ಕ್ಕೂ ಅಂಜತೆ ಉಗ್ರ ತಪಸ್ಸ ಕಿಯೋಕ ತಪಸ್ಸರ ಮಹಿಮೆಲ್ ಆ ಕುಂದ್ ಇಡಿಯಾ ತನ್ನಷ್ಟಕ್ಕೆ ತಿತ್ತ್ ಪುಟ್ಟಿತ್ ಬೇವಾನ ಕಂಡಿತ್ ಓಡಿ ಪಾರಿಪೋಯಿತ್ ನಾಲ್ ಮಂಡೆ ಬ್ರಹ್ಮಂಗ್ ಈನ ಅರಿಚಿಟ್ಟಿತ್. ಈ ಸುದ್ದಿನ

ಕೇಟ ಬ್ರಹ್ಮ ದೇವಾನ್ವೇಷತೆಯಳೇ ನಿಂಗ ಬೊತ್ತಂಡಾಂದೆಣ್ಣೊಚಿ. ನಿಂಗ ಬ್ರಹ್ಮ ಲೋಕ ಬುಟ್ಟಿತ್ ದೇವತೆಯಳ ಕೂಟಿಯಂಡ್ ಬ್ರಹ್ಮ ದೇವ ಕವೇರ ಮುನಿ ತಪಸ್ಸು ಮಾಡಿಯಂಡಿಂಜ ಕುಂದ್‌ರ ಮೋಳ್‌ಕ್ ಬಂದಿತ್ ಕವೇರಂಡ ಸುತ್ತು ಎಲ್ಲ ಎದ್ದಾ ಕತ್ತುವೊ ತಿತ್ತನ ಬ್ರಹ್ಮದೇವ ತಾಂಡ ಕಮಂಡಲತಾರ ನೀರ್‌ನ ತಳ್ಳಿತ್ ತಿತ್ತನ ಕೆಡ್ಡಿತ್ ಕವೇರನ ತಕ್ಕ ಪರಿಚಿಟ್ಟಿತ್. ಮುನಿರಾಯ ನೀನ್ ಎನ್ನತ್ತಾಂಡ ಕಾರಣತ್ ಇನ್ನನೆ ಉಗ್ರ ತಪಕೆಚ್ಚಿಯಾ? ನೀಕ್ ಬಂದ ಕಷ್ಟ ಎನ್ನತದೊಂದ್ ಕೇಪಕ್ಕ, ಈ ತಕ್ಕ ಕೇಟ ಕವೇರ ಮುನಿ ಕಣ್ಣ ಬುಟ್ಟಿತ್ ನೋಟಣೆ ಸಾಕ್ಷಾತ್ ಬ್ರಹ್ಮ ದೇವ ತಾಂಡ ಎದ್‌ಪುಲ್‌ ನಿಂದಾನ ಕಂಡಿತ್ ಸಂತೋಷಪಟ್ಟಿತ್. ಬ್ರಹ್ಮ ದೇವಂಡ ಪಾದಕ್ಕ ಅಡ್ಡ ಬುದ್ಧಿತ್ ತಾಂಗ್ ಮಕ್ಕ ಫಲ ಬೋಂಡೂಂದ್ ಬೋಡ್‌ಚಿ. ಆ ತಕ್ಕನ ಕೇಪಕ್ಕ ಬ್ರಹ್ಮ ದೇವ ಎಣ್ಣೊಚಿ, ನೋಟ್ ಮುನಿರಾಯ ಪಂಡಿಯ ಜನ್ಮತ್ ಕೆಜ್ಜ ಪಾಪಕ್ಕಾಯಿತ್ ಈ ಜನ್ಮತ್ ನೀಕ್ ಮಕ್ಕ ಫಲ ಕೊಟ್ಟಿಲೆ. ಆಚೇಂಗಿ ನೀನ್ ಕೆಜ್ಜ ಉಗ್ರ ತಪಸ್ಸುನ ಮೆಚ್ಚಿತ್ ಲಕ್ಷ್ಮಿದೇವಿ ದತ್ತಮೋವಾಂದೆಣ್ಣಿತ್ ನಾಕ್ ತಂದ ಕುಂಞಿನಗುಂಡ್ ನೀಕ್ ಮೋಕ್ಷ ಕೊಟ್ಟವಾ. ಅಲ್ಲತೆ, ಈ ಕುಂಞಿನಗುಂಡ್ ಮಿಂಞಿಕ್ ಲೋಕೋಪಕಾರ ಆಪನ್ನತ ಲಕ್ಷ್ಮಣ ಉಂಡೊಂದೆಣ್ಣಿತ್ ಲೋಪಮುದ್ರೆ ಕನ್ನಿನ ಕವೇರಂಡ ಕೈಕ್ ಕೊಡ್ತತ್. ಕವೇರ ಮುನಿ ಸಂತೋಷತ್ ಬ್ರಹ್ಮ ದೇವಂಡ ಕಯಿಂಜ ಲೋಪಾಮುದ್ರೆ ಕುಂಞಿನ ಕೇಟಂಡತ್. ಇದಾನ ಕಂಡಿತ್ ಬ್ರಹ್ಮ ದೇವೊ ದೇವತೆಯಳ ಕೂಟಿಯಂಡ್ ಮರೆ ಆಚಿ.

ಅಲ್ಲಿಂಜಪ್ಪರ ಕವೇರ ಮುನಿರಾಯ ಭೂಮಿ ದೇವಿಂದೆಣ್ಣಿತ್ ಆಶೀರ್ವಾದ ಮಾಡ್‌ಚಿ. ಆ ತಕ್ಕನ ಕೇಟಿತ್ ಲೋಪಾಮುದ್ರೆ ದೇವಿ ತಾಂಡ ಚಾಕಪ್ಪ ಕವೇರಂಗಣ್ಣೊಚಿ- ಅಪ್ಪಯ್ಯ ನಾಡ ತಕ್ಕನ ಕೇಳ್. ಇಂದಾಕಣೆಕ್ ನಾನ್ ಸ್ವರ್ಗತ್ ಲೋಪಾಮುದ್ರೆಂದೆಣ್ಣಿತ್ ನಾಲ್ ಮಂಡ ಬ್ರಹ್ಮಂಗ್ ದತ್ತ ಮೋವ ಆಯಿತ್ತಿಂಜ. ಆಚೇಂಗಿ ಇಂಞಿ ಮಿಂಞಿಕ್ ಕಾವೇರಮ್ಮ ದೇವೀಂದ್ ನೀಡ ಮೋವಳಾಯಿತ್ ಭೂಮಿರ ಮೀದ ನಾನ್ ಪೆದ ಎಡ್‌ಂಡ್ ಈ ಭೂಮಿಲ್ ಮಾಲೋಂಗಡ ಕೆಜ್ಜ

ಪಾಪ ಪೋಪುಲೆ, ನೀರಾಯಿತ್ ಒಕ್ಕಿತ್ ಕೋಕಿಯ ಕಡೆಕ್ (ಬಂಗಾಳಕೊಲ್ಲಿ) ಸೇರುವೀಂದೆಣ್ಣೆಚಿ. ತಾಂಡ ದತ್ತ ಮೋವ ಎಣ್ಣೆನ ತಕ್ಕನ ಕೇಟಿತ್ ಕವೇರ ಮಹಾಮುನಿಕ್ಕೂ ತಾಂಡ ಪೊಂಗಕ್ಕೂ ಪೆರ್ತ್ ಸಂತೋಷ ಆಚಿ. ಕಾಲ ಕೈಂಚ್ ಪೋಪಕ್ಕ ಕವೇರ ಮುನಿಯೂ ಕವೇರಂಡ ಪೊಂಗಳೂ ಚತ್ತ್ ಸ್ವರ್ಗ ಸೇರಾಚಿ.

ಇದಾನ ಕಂಡ ಕಾವೇರಮ್ಮ ಮಹಾತಾಯಿ ತಾಂಡ ಅಪ್ಪವ್ವಂಗೂ ಉತ್ತರಕ್ರಿಯೆ (ಪಿಂಡ) ನಡ್ಡಿತ್ ಮೋಕ್ಷಕ್ ಬಟ್ಟೆ ಕಾಟಾಚಿ. ಅಲ್ಲಿಂಜಿಪ್ಪರ ಕಾವೇರಮ್ಮ ಮಹಾತಾಯಿ ಬ್ರಹ್ಮಗಿರಿ ಮೋಳ್‌ಲ್ ಋಷಿಯಡ ಮಧ್ಯತ್ ಬ್ರಹ್ಮ ದೇವನ ಮನಸ್ಸಲ್ ನೆನತ್ತಂಡ್ ಜಪತಪ ಮಾಡಿಯಂಡಿಂಜತ್. ಇನ್ನನೆ ಇಪ್ಪಕ, ಶಂಭು ಶಿವಂಡ ಅವತಾರಿ ತಪೋಜ್ಞಾನಿ ಮಹರ್ಷಿ ಅಗಸ್ತ್ಯೇ ಮುನಿ ಜಂಬೂ ದ್ವೀಪತ್ನ ಸುತ್ತಿ ಸುತ್ತಿಯಂಡ್ ಬಪ್ಪಕ್ಕಾ ಹಿಮಾಲಯ ಪರ್ವತ (ಕುಂದ್) ಬೊಳಿಯಾನ ತಪೋ ಮಹಿಮೆಲ್ ಕಂಡಿತ್ ನಾನ್ ದಕ್ಷಿಣ ದೇಶಕ್ ಪೋಯಿತ್ ಬಯ್ಯಕ್ ಬಕ್ಕಣೆ ನೀನ್ ಬೊಳಂದಚ್ಚಕ್ಕೇ ಎತ್ತರ ಅಲ್ಲತೆ, ಇಂಞಿ ಮೇಲೆ ಬೊಳಿಯೊಕಯ್ಯಂದೆಣ್ಣೆತ್ ಹಿಮಾಲಯ ಪರ್ವತಕ್ಕ ಋಷಿ ಆಚ್ಚೆ ಮಾಡ್‌ಚಿ. ಅಲ್ಲಿಂಜ ಪೂರ್ತಿ ಅಗಸ್ತ್ಯಮುನಿ ಪುಣ್ಯಕ್ಷೇತ್ರ ಸಂಚಾರ ಮಾಡಿಯಂಡ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್‌ರ ಒಳ್‌ಲ್ ಬ್ರಹ್ಮಗಿರಿರ ಮೋಳ್‌ಕ್ ಬಕ್ಕಣೆ ಕಾವೇರಮ್ಮ ಕನ್ನಿನ ಕಣ್ಣ್ ಕಂಡಿತ್ ಕೊದಿ ಆಯಿತ್ ದೇವ ಕನ್ನಿರ ಮಿಂಞಲ್ ತಾನ್ ಪೋಯಿತ್ ನಿಂದಿತ್ ಪೊಣ್ಣೆ ಇಲ್ಲತೆ ಬಾಳ್ ಬದ್ಡಿತ್ ಫಲವಿಲ್ಲ. ಆನಗುಂಡ್ ನೀನ್ ಮನಸ್ ಮಾಡಿತ್ ನಾಡ ಬಾಕೆ ಕೊಡೊಂಡೊಂದ್ ಕಾವೇರಮ್ಮ ಮಹಾತಾಯಿನ ಅಗಸ್ತ್ಯ ಮುನಿ ಕೇಟಂಡತ್. ಆ ತಕ್ಕನ ಕೇಟಿತ್ ಕಾವೇರಿಯಮ್ಮ ಮಹಾತಾಯಿನ ಕೊತ್ತೋರ್ ಒಡೆಯನೆಂದ್ ಮನಸ್ಸಲ್ ಗ್ಯಾನ ಮಾಡಿತ್ ಆಕೋ ಪೋಕೊಂದ್ ಒತ್ತಿತ್ ತಕ್ಕ ಬಾಕ್ ತೇತಿತ್ ಪಂಡೆಯತ ನಡ್ ಪೋಲೆ ಮಾಲೆಚೂಡಿ ಮಂಗಲ ಶಾಸ್ತ್ರ ಪೋಲೆ ಕೆಜ್ಜಿತ್ ವಡಿಯ ಪೊಣ್ಣೊ ದಂಡಾಳೂ ಸಂತೋಷತ್ ಇಂಜತ್.

ಇನ್ನನೆ ಇಪ್ಪಕ ಕಾವೇರಮ್ಮ ಮಹಾತಾಯಿ ತಾಂಡ ವಡಿಯನ ನೋಟಿತ್

ನನ್ನ ನೀನ್ ಬುಟ್ಟಿತ್ ಪೋಯಿತ್ ಚದಿಪಕಯ್ಯೆ, ಅನ್ನನೆ ನೀನ್ ಚದಿಚಕ್ಕ ನನ್ನ ನಾನ್ ಚದಿಚಿತ್ ನೀರಾಯಿತ್ ಒಕ್ಕುವೀಂದ್ ಅಗಸ್ತ್ಯ ಮಹರ್ಷಿಕ್ ಎಣ್ಣೆಚಿ. ಕಾವೇರಮ್ಮೆ ಎಣ್ಣೆನ ತಕ್ಕಕ್ ಅಗಸ್ತ್ಯ ಮುನಿ ಆಕೂಂದೆಣ್ಣೆತ್ ಒತ್ತಿತ್ ಕೈಮುಟ್ಟಿತ್ ಆಣೆ ಭಾಷೆ ಕೊಡ್ತತ್. ಇನ್ನನೆ ಇಪ್ಪಕ್ಕಾ ಓರ್ ದಿನ ಅಗಸ್ತ್ಯ ಮುನಿ ಕರೆಲ್ ಕುಳ್ಳಿತ್ ಜಪತಪ ಕೆಜ್ಜಿತ್ ಬರೊಂಡೊಂದ್ ಗ್ಯಾನ ಮಾಡಿತ್ ಕಾವೇರಮ್ಮೆನ ತಪೋ ಮಹಿಮೆಲ್ ತಾಂಡ ಕಮಂಡಲತ್ರಾಳಕ್ ಕೂಟಿತ್ ಮುಚ್ಚಿ ಮರೆ ಮಾಡಿತ್ ಪಕ್ಕಲ್ಲಿಂಜ ಶಿಷ್ಯಂಗಳ ಕಾಕಿತ್ ಮಂಡಲತ್ ಶಿಷ್ಯಂಡ ಕೈಕ್ ಕೊಡ್ಪಂಜಿ ನಾನಿಕ್ಕ ಕನಿಕೆಲ್ ಕುಳ್ಳಿತ್ ಬಕ್ಕಣೆ ಮಂಡಲತ್ ಪುಡಿಚೋಳಿ. ನೆಲಕ್ಕ ಮುಟ್ಟ್ಪಚಿಡತಿ, ಕಮಂಡಲತ್ ಎಡ್ತಂಡ್ ಮಲ ಮೂತ್ರ ಮಾಡೋಕ್ ಪೋಗತ್ತೀಂದೆಣ್ಣೆತ್ ತಾಂಡ ಶಿಷ್ಯಂಗಳ್ ಅಗಸ್ತ್ಯ ಮಹಾಮುನಿ ಆಜ್ಞೆ ಮಾಡಿತ್ ಕಮಂಡಲತ್ ಶಿಷ್ಯಂಡ ಕೈಕ್ ಕೊಡ್ತಿತ್ ಅಗಸ್ತ್ಯೇ ಮುನಿ ಅಲ್ಲಿಂಜಿ ಪೋರ್ತಿತ್ ಕನಿಕೆಲ್ ಕುಳ್ಳಿತ್ ಜಪತಪಕ್ ಅಳ್ತತ್. ಅಕ್ಕಣೆಕ್ ಕಾವೇರಮ್ಮೆ ತಾಯಿಕ್ ಪೊಂಗಲಸತ್ರೊಳ್ ಎನ್ನ ಕೂಟಿತ್ ನಾಕೊಂದು ಎಣ್ಣೆ ತೆ ದೂರ ಪೋಚೀಂದ್ ಗ್ಯಾನ ಮಾಡಿತ್ ಕಾವೇರಮ್ಮೆಕ್ ಚಿಡಿ ಬಂದಿತ್ ಅವಡ ಮಮ್ಮಾಯತ್ ಕಮಂಡಲ ಪಾತ್ರ ಎಡ್ತಂಡಿಂಜ ಶಿಷ್ಯ ಮೊಟ್ಟ್ ಪಟ್ಟಿತ್ ಬುದ್ಧತ್. ಅದ್ನ ಕಂಡ ಕಾವೇರಮ್ಮೆ ಲೋಕೋಪಕಾರಿಯಾಯಿತ್ ಪರ್ಯೋಕ್ ನಾಕ್ ಇದ್ ಸರಿಯಾನ ನೇರಾಂದ್ ಗ್ಯಾನ ಮಾಡಿತ್ ಕುಂಡಿಗಕ್ ಪಾರಿತ್ ಬೂವೊಂಜಿ ಪೋಣ್ ರೂಪ ಬುಟ್ಟಿತ್ ನೀರಾಯಿತ್ ಪಂಜತ್. ಇದ್ನೆಲ್ಲಾ ಕಂಡ ಶಿಷ್ಯಂಗಳ್ ಪೋಡಿಯಾಯಿತ್ ಇದೆನ್ನತ ಕಥೆ ಮಾಯನಡ್ಂದ್ ಪೋನದ್ಂದ್ ಗ್ಯಾನ ಮಾಡಿತ್ ಶಿಷ್ಯಂಗಳೆಲ್ಲಾ ಕಾಕಿ ಕೂಟೊಂಜಿ ಒಕ್ಕೊ ನೀರ್ನ ತಡ್ಪಕ್ಕಾ ನೋಟೊಚಿ. ಅದ್ನಕಂಡ ಕಾವೇರಮ್ಮೆ ಅವಡ ಮಮ್ಮಾಯತ್ ಗುಪ್ತಗಾಮಿನಿಯಾಯಿ ಒಕ್ಕುವಕ್ ಕೂಡೊಚಿ.

ಇದ್ನಕಂಡ ಶಿಷ್ಯಂಗಳ್ ಬೊತ್ತಿತ್ ಬೊಂಡಿತ್, ಓಡಿಪಾರಿ ಪೋಯಿತ್ ಅಗಸ್ತ್ಯೇ ಮುನಿಕ್ ಈ ಸುದ್ದಿನ ಎಣ್ಣೆಚಿ. ಈ ಸುದ್ದಿನ ಕೇಟ ಅಗಸ್ತ್ಯೇ ಮುನಿ ಎರ ದುಃಖ ಮಾಡಿತ್ ಓಡಿಪಾರಿ ಬಪ್ಪಂಜಿ ಪ್ರೇತಾರಣ್ಯಕ್ ಕೊಡಿಕಾಲೆ

ಓಡಿಯಂಡಿಂಜ (ಪಾಂಡುಮಲೆ ತಾವುಲ್) ಕಾವೇರಮ್ಮ ದೇವಿನ ಅಗಸ್ತ್ಯೇ ಮುನಿ ಬಲ್ಲಿಯ ಮೀನ್ ರೂಪತಾಳಿತ್ ಪೊಳೆಕ್ಕಡ್ಡ ಬುದ್ದಂಡ್ ಕಾವೇರಮ್ಮನ ತಡ್ಡತ್. ಕಾವೇರಮ್ಮ ದೇವಿಕ್ ತಪ್ಪಾಚಿಟ್ಟಿತ್ ಕಡ್ಡಕ್ ಎದೂ ಬಟ್ಟಿ ಕಾಣತೆ ಮನನೊಂದಿತ್ ಬ್ರಹ್ಮ, ವಿಷ್ಣು, ಮಹೇಶ್ವರ, ಸುಬ್ರಮಣ್ಯ ಮಹಾಗಣಪತಿನ ಮನಸ್ಸಲ್ ಗ್ಯಾನ ಮಾಡಿತ್ ಲೋಕ ಜನಕ್ ಲೋಕೋಪಕಾರ ಮಾಡ್ಪೊಕ್ಕಾಯಿತ್ ಜಲರೂಪಿ ಒಕ್ಕಿ ಪೋಪ ನನ್ನ ನಾಡ ಒಡಿಯೆ ಅಗಸ್ತ್ಯ ಮುನಿ ವಾಗ್ದಾನಕ್ ತಪ್ಪಿತ್ ಇಕ್ಕ ತಡ್ ತಿತ್, ನಾನ್ ಪೋಪಾಂಗ್ ಭಂಗ ತಂದಿತೊಡ್ಡಿತ್. ನಾನ್ ಸುರ ಲೋಕತ್ಲ ಪುಟ್ಟಿತ್ ನರ ಲೋಕತ್ಲ ನರಾಳೋಕ್ ನಾಕ್ ಇಕ್ಕ ಗತಿ ಆಚಿ. ಈ ನರಕತ್ರ ಕೈಯಿಂಜ ನನ್ನ ಕರೆಕ್ ಕೇತೋಂಡೂಂದ್ ತ್ರಿಮೂರ್ತಿಯಕ್ ಮೊರೆ ಇಟ್ಟಿತ್. ಕಾವೇರಮ್ಮ ಇಟ್ಟಿ ಮೊರೆ ತ್ರಿಮೂರ್ತಿಯ ಅರ್ಜಿತ್ ಬ್ರಹ್ಮ, ವಿಷ್ಣು, ಮಹೇಶ್ವರ, ಸುಬ್ರಮಣ್ಯ ಪಿಂಞ ಮಹಾಗಣಪತಿ ಎಲ್ಲಾರೂ ಕಾವೇರಮ್ಮನ ತಡೆಗೊಂಡ ಜಾಗಕ್ ಇಳಾಂಜಿತ್ ಪಟ್ಟಿಂಗಡ ವೇಷತ್ಲ ಪೊಳೆಕರೆಲ್ ಬಂದ್ ನಿಂದಿತ್ ಕಾಡ್ಪೊಳ ಖುಷಿನೋ ಬೋಡ್ಪೊಳ ಕನ್ನಿನೋ ಸಮಾಧಾನ ಪಡ್ಡಿತ್ ಸತ್ಯಮಿತ್ಯತ್ಯ ನಂಗ ಅರಿಯುವ, ತಪ್ಪಾನನ ನಂಗ ತಿದ್ದುವಾ, ನಡುವಾಪಾನ ನಂಗ ತಿದ್ದಿತ್ ತಪ್ಪ. ನಿಂಗ ದಂಡಾಳೂ ಕರೆ ಪತ್ತಿತ್ ಬಂದಿತ್ ನಂಗ ಮಿಂಞಲ್ ನಡ್ಂದ ಕಥೆನೆಲ್ಲಾನೋ ನಿಂಗ ಎಣ್ಣೋಳಿಂದೆಣ್ಣಿ ಕಾವೇರಮ್ಮಯೂ, ಅಗಸ್ತ್ಯನೂ ಕರೆಪತ್ತಿತ್ ಬಂದಿತ್ ತ್ರಿಮೂರ್ತಿಯಕ್ ಕೈತೊತ್ತಂಡ್ ಮಂಗಲಕೈಂಜಲ್ಲಿಂಜ ಅಂದಲ್ಲಿಕೆತ್ತಣೆ ಜಲ ಕನ್ನಿ ಕಾವೇರಿ ದೇವಡ ಮಿಂಞಲ್ ವಿವರತ್ತೊಡ್ ಎಣ್ಣಾಚಿ. ಅಕ್ಕಣೆಕ್ ಅಗಸ್ತ್ಯೇ ಮುನಿ ತಪ್ಪಾ ಒಂದಾಂಗೂ ಒಕ್ಕತ್ತ ತಕ್ಕ ಪಂದ್ಲಿ ಮೂಂದ್ ಇರ್ಲ್ ಪೊಲ್ಂದತ್. ಈ ಸುದ್ದಿನ ಕೇಟಿತ್ ಆ ನಾಡ್ ಕೊಡ್ಪ ಎಲ್ಲಾ ಆ ಜಾಗಕ್ ಬಂದಿತ್ ದೇವಮ್ಮಾಡ ಮಿಂಞಲ್ ನಿಂದಿತ್ ದೇವೋಮ್ಮಕ್ ಅಡ್ಡ ಬುದ್ಧಿತ್ ಎದ್ದಿತ್ ಓರ್ ಭಾಗತ್ಲ ಅವು ನಿಂದತ್. ಅಗಸ್ತ್ಯಮುನಿಕೂ ಕಾವೇರಮ್ಮಕೂ ಪೇಚಿ ಕೂಟ ಬುದ್ದಾನ ಸಭೆ ಒಪ್ಪನ್ನಕ್ಕೆ ತ್ರಿಮೂರ್ತಿಯ ಕಂಡ ನ್ಯಾಯ ಪಂದ್ಲಿ ಅಗಸ್ತ್ಯ ಮುನಿ ಎಣ್ಣಾಚಿ, ನಾಡ ಪೊಂಗಳ ಚಾಕುವಾಂಗೂ,

ಪೊಲ್ಲುವಾಂಗೂ, ಬಪ್ಪ ರೀತಿ ಬೆಪ್ಪಾಂಗೂ, ಪೋರತ್ತಾನ ಕೇಪಾಂಗೂ ಮೀರನಕ್ಕ ದಂಡನಕ್ಕೂ ಆಣ್ಣ್ ಕಲ್ಲತ ಅಧಿಕಾರ ಪೊಣ್ಣ್ ಕೆಂದೂ ಇಲ್ಲೆ. ಪೊಣ್ಣ್ ಮೀರಿ ನಡ್ಂದಕ್ಕಾ ಅವಡ ಬೆನ್ನಲಂಬ್ ಪೊಳಿಕ್ಕೊಲು. ಅದ್ನೆಲ್ಲಾ ಕೇಪ ಅಧಿಕಾರ ಒಬ್ಬಕೂ ಇಲ್ಲೆಂದ್ ಪಂದರ್ತ್.

ದೇವ ಮಕ್ಕ ದಿಗ್ಲಾಯಿ ಪಂದರ್ನ ಕೇಟತ್ ಮುಂಗೋಪತ್ ಅಲ್ಲಿತ್ತಿಂಜ ಕೊಡವ ಎದ್ ನಿಂದಿತ್ ಕೈತೊತ್ತಿತ್ ಮೊಯ್ತಿ ಅಡ್ಡಿತ್ ಪಂದರ್ತ್. ತಪೋಚ್ಚಾನಿ ಮಹರ್ಷಿಯೇ ದೇವಳ ಅರಿಯತೆ ಏಕಾ ಏಗಿ ಪರಿಯೋದ್ ಮಹರ್ಷಿಕ್ ತರವಲ್ಲ. ಮಹಾ ತಾಯಿರ ತಪ್ಪಾಂದ್ ಏದ್ ತರತ್ತೂ ಕಾಂಬ್ಲೆ. ಕಾವೇರಮ್ಮೆಕ್ ಕೊಡ್ತ ಭಾಷೆಕ್ ತಪ್ಪಿತ್ ನಿಂಗ ನಡ್ಕಕ್ಕಾಗಿಂಜಿಲೆ. ಆನಗುಂಡ್ ನಿಂಗ ಕಾವೇರಮ್ಮರ ಸುದ್ದಿಕ್ ಪೋಂಡ. ಲೋಕೋ ಜನ ಉದ್ಧಾರಕ್ ಜಲೂವಾಯಿ ಒಕ್ಕಿ ಪೋಪ ತಾಯಿನ ನಿಂಗ ಬುಟ್ಟೀಂದ್ ಪಂದರ್ತ್. ಆ ತಕ್ಕನ ಕೇಟತ್ ಅಗಸ್ತ್ಯಮುನಿಕ್ ತಿತ್ತ್ ಚೊಡಿ ಬಂದಿತ್ ಕೊಡವಳ ನೋಟಿತ್ ನಿಂಗ ನಲ್ಲದ್ ಪಂದಿರಾ. ಕ್ಷತ್ರಿಯಡ ಮಧತ್ವ ನಾಕ್ ನಿಂಗ ಕಾಟಿರ. ಇಂಞ್ ಮಿಂಞ್ ಕ್ಷತ್ರಿಯ ವೀರ ಕುಗ್ಗಡ್. ಇಂದ್ಲಿಂಜಪ್ಪರ ಒಗ್ಗಟ್ಟ್ ಪೊಳಂಜಿತ್ ಮತ್ಸರ ಬೊಳಂದಿತ್ ಒಬ್ಬಂಗೊಬ್ಬ ನಿಪ್ಪುರತ್ತಿರಿ. ಇಂಞ್ ಮಿಂಞ್ ಅರ ಸ್ಥಾನನಂದೆಣ್ಣುಪೊ ಅಹಂಭಾವ ಬಡತ್ತನಕ್ಕಳಿಯಡ್. ಬಿತ್ತನದ್ ಬಾಳಾತ್ತಾಯೋಡ್. ಈ ದೇಶಕ್ಕ ಶತ್ರು ಶತ್ರುವ ನುಗ್ಗಡ್ಂದೆಣ್ಣಿತ್ ಅಗಸ್ತ್ಯ ಮುನಿ ಕೊಡವಕ್ ನೆಲೆ ಮುಟ್ಟಿತ್ ಶಾಪ ಇಟ್ಟಿತ್. ಶಾಪ ಇಟ್ಟಾನ ಕೇಟತ್ ಕಾವೇರಮ್ಮ ಮಹಾತಾಯಿ ಚಂದ್ರಕಲ ಅರಸುವೊಕ್ ಶತ್ರುದೇಶ ನುಗ್ಗನಲ್ಲಿ ನಿಂಗ ಉಳ್ಳ ಜಾಗ ಬುಟ್ಟ್ ಕೂಡ ಬೋಂಡ. ಪರ ರಾಜಂಗಡ ಬೀಗ ಇಟ್ಟತೆಂಗೂ ಬೀಗತ್ತಕ್ಕೆ ನಿಂಗಡ ಕೈಲಿರಡ್. ತೊರ್ಪೆಂಗಿನೂ, ಕೊಟೊಂಗಿನೂ ನಿಂಗಕ್ಕದ್ ಕೂಡ್ನದ್. ನಿಂಗ ಒತ್ತಂಡ ಪ್ರಕಾರ ಅಧಿಕಾರ ನಡ್ಡಡ್. ಇಲ್ಲಿಕೆತ್ತಣೆಕ್ ನಿಂಗ ಅದೆ ಸ್ಥಾನತ್ಲ ಇಂಜಿರಾ. ಇಂದೆಂಜಿ ಮಿಂಞ್ ದೇವಮುನಿ ಅಗಸ್ತ್ಯಂಡ ಬಾಯಿಂಜಿ ಬುದ್ಧನೆಕ್ಕೆ ಮನಸ್ಥಾನಾಂದ್ ಪೆದಲಾಡ್. ಇಂದ್ತೊಟ್ಟ್

ಮಿಂಗಳ್ ಬಿತ್ತನಾನ ಪೊರ್ಚಿತ್ ನಟ್ಟಿತ್ ಬೊಳ್ಳಿತ್ ಉಂಡೋಳಿ. ನಿಂಗ ಒತ್ತಿತ್ ವಧಿಪಕ್ಕೆ ಪೋತಿ. ನಿಂಗಡ ಕ್ಷತ್ರಿಯ ಧರ್ಮತ್ ಬುಟ್ಟಿತ್ ಪೆತ್ತ ಮಕ್ಕಳ ಪಾಳಾಕತೀಂದೆಣ್ಣಿತ್ ಕಾವೇರಮ್ಮ ಮಹಾತಾಯಿ ಅಗಸ್ತ್ಯಮುನಿ ಇಟ್ಟಿ ಶಾಪಕ್ಕ್ ಮರುಶಾಪ ಕೊಡ್ತತ್.

ಇದೊನೆಲ್ಲಾ ನೋಟಿಯೆಂಡ್ ನಿಂದಿತ್ತಿಂಜ ತ್ರಿಮೂರ್ತಿಯ ಪುಳಿ ಅಂಬಟೆಕ್ಕಾಯಿತ್ ಆರ್ ತಿಂಗಕೂಟೆನ್ನಂಗ್ (ಎಣ್ಣೆಚೇಂಗಿ ಪುಳಿ ಅಂಬಟೆ ಪಾರ ಉಂಡಾ ಕೋಕ್ ಕಾತ್ ನಿಪ್ಪನ್ನಂಗ್) ಅರ್ಥಕ್ಕೊತ್ತಿತ್ ನಂಗ ನ್ಯಾಯ ಪರಿಯುವಾ. "ಒತ್ತವಂಗ್ ಒರ್ ಮಂದ್, ಒತ್ತಲೇಂಗಿ ಫಲಮಂದ್ಂದೆಣ್ಣಿವೊ ಪಳಂಜೊಲ್ ಪೋಲೆ ನಂಗಪರಿಯುವಾನ ಒತ್ತೋಳಿಂದೆಣ್ಣೆಚಿ. ಕಂಡದಂಗ ಪಂದರ್ಕ ಕೊಡವಂಗ್ ಪೊಣ್ಣ್ ಇರಾ. ಮಹ ಋಷಿರ ಪೊಣ್ಣಾನ ಎಂಗ ತಪ್ಪೆಚಿಟ್ಟಿಕ್ಕೆ ಲೋಕ ಅಪವಾದ ಬಕ್ಕುಲಾ. ಆನಗುಂಡ್ ಎಂಗ ಕಾವೇರಮ್ಮ ದೇವಿನ ದಂಡ್ ಭಾಗ ಮಾಡಿತ್ ಜೀವಕಲೆ ಕೂಟಿತ್ ಮಿಂಗಳ್ ಅವೆಕ್ ಇಂಜ ಪೆದ ಲೋಪಾಮುದ್ರೆಂದೆಣ್ಣಿತ್ ಎಡ ಭಾಗತ್ ಇಟ್ಟಿತ್ ಅಗಸ್ತ್ಯಯ ಮುನಿಕ್ ಪೊಣ್ಣಾಯಿತ್ ಬುಟ್ಟ್ ಕೊಡ್ತತ್. ಕವೇರ ಮುನಿರ ಮೋವಳಾನ ಕಾವೇರಿಂದಿಂಜ ಪೆದತ್ ಬಲೆ ಭಾಗಕ್ ಇಟ್ಟಿತ್. ಬ್ರಹ್ಮಗಿರಿನ ಬ್ರಹ್ಮಕುಂಡಿಕೆರ ಒಳಂಜ ಜನ್ಮ ಎಡ್ ತೀರ್ಥ ಅಲ್ಲಿಂಜ ಪೊರ್ಚಿತ್ ಅಡ್ಡ ಬುದ್ಧ ಭೂಮಿಕ್ ನೋಳ ಬುದ್ಡ ಒಕ್ಕಿತ್ ಪಾಕಡಕ್ ಸೇರಿಯಾಂದೆಣ್ಣೆಚಿ. ಅಲ್ಲತೆ ಇಂದಂಜ ಮಿಂಗಳ್ ಕಲ್ಲೂ ಪಿಲ್ಲೂ ಇಕ್ಕಣೆ ನೀನ್ ಕನ್ನಿಯಾಯಿತ್ ಇರ್. ತನು ಬುಟ್ಟಿತ್ ನೀರಾನ ನೀಡ ತೀರ್ಥತ್ ಈ ಮೂಲೋಕತ್ತುಳ್ಳ ಮೂಲೋಂಗ ಭಕ್ತಿಲ್ ನೀ ಕುಳಿಚಕ್ಕ ನೀನ್ ಮುಕ್ತಿ ಕೊಡ್ತಾಂದೆಣ್ಣಿತ್ ಆಶೀರ್ವಾದ ಮಾಡ್ಚಿ. ತ್ರಿಮೂರ್ತಿಯ ಅಗಸ್ತ್ಯನ ನೋಟಿತ್ ಲೋಪಾಮುದ್ರೆ ಪೊಂಗಳ ನೀನ್ ಕೂಟಿಯೆಂಡ್ ಪೋಯಿತ್ ಕಾವೇರಮ್ಮ ತೀರ್ಥ ಆಯಿಪುಟ್ಟ್ನ ಕುಂಡಿಕೆರ ಕರಲ್ ಲೋಪಾಮುದ್ರೆ ಅಗಸ್ತ್ಯಂದೆಣ್ಣಿತ್ ಅಲ್ಲಿ ನೆಲೆಗೊಂಡೊಳಿ. ಅಗಸ್ತ್ಯ ಮುನಿರ ಶಿಷ್ಯಂಗ ತ್ರಿಮೂರ್ತಿಯಳ ನೋಟಿತ್ ಕಾವೇರಮ್ಮ ದೇವಿರ ಅಮ್ಮಾಂದೆಣ್ಣಿವೊ ಪೆದತ್

ಇಂದೆಂಜಿ ಎಡ್ತಂಡ್ ಈ ಕೊಡವ ಮಾಲೆ ಪೊಮ್ಮಾಲೆ ದೇಶತ್ ಅಮ್ಮನೂ ಕೊಡವನೂ ಆಯಿ ಕೂಡಿಯಾಡಿನಲೊಂಚೊಳಿಂದಣ್ಣೆತ್ ಆಶೀರ್ವಾದ ಮಾಡ್ಚಿ. ತ್ರಿಮೂರ್ತಿಯ ಅಗಸ್ತ್ಯನ ನೋಟಿತ್ ಲೋಪಾಮುದ್ರೆ ಪೊಂಗಳ ನೀನ್ ಕೂಟಿಯೆಂಡ್ ಪೋಯಿತ್ ಕಾವೇರಮ್ಮ ತೀರ್ಥಾಯಿ ಪುಟ್ವಾನ ಕುಂಡಿಕೆರ ಕರೆಲ್ ಲೋಪಾಮುದ್ರೆ ಅಗಸ್ತ್ಯಂದೆಣ್ಣೆತ್ ಅಲ್ಲಿ ನೆಲೆಗೊಂಡೊಳಿ.

ಕಾವೇರಮ್ಮ ದೇವಿನ ದಂಡ್ ಭಾಗ ಮಾಡ್ನ ಆ ನೆಲ ಬಳ್ಳಾಪ್ ತ್ರಿಮೂರ್ತಿಯ ಭಾಗಮಂಡಲಾಂದ್ ಪೆದ ಇಟ್ಟು ಜಲಕನ್ನಿರ ಮೊರೆ ಕೇಟಿತ್ ಪಟ್ಟಿಂಗಡ ವೇಷ ಆಯಿತ್ ಬಂದಿತ್ ತ್ರಿಮೂರ್ತಿಯ ನ್ಯಾಯಕೂಟಿ ತೇತಂಡ್ ಗುರ್ತಕ್ಕಾಯಿತ್ ಮಾಲೋಂಗ ಅರಿಯೋಂಗಾಯಿತ್ ಇಲ್ಲಿ ನಂಗ ನೆಲೆ ನಿಪ್ಪ ಈ ಭಗಂಡ ಕ್ಷೇತ್ರಂದೆಣ್ಣುವೊದ್ ತ್ರಿಮೂರ್ತಿಯಡ ಕ್ಷೇತ್ರ ಆಡ್ಂದೆಣ್ಣೆತ್ ಮಹೇಶ್ವರ, ಭಗಂಡೇಶ್ವರನಾಯಿತೂ, ಮಹಾ ವಿಷ್ಣು ವಿಷ್ಣುವಾಯಿತೂ, ಸುಬ್ರಮಣ್ಯ ಮಹಾಗಣಪತಿಯೂ ದೇವಲೋಕ ದೇವೋಮ ಅಲ್ಲಿ ನೆಲೆಗೊಂಡತ್. ಇನ್ನನೆ ಭಗಂಡೇಶ್ವರ ದೇವಸ್ಥಾನಾಂದಾಚಿ. ತ್ರಿಮೂರ್ತಿಯಡ ಕ್ಷೇತ್ರಂದಾಚಿ.

ನಲ್ಲೋರ್ ದಿನತ್ಲ ಅಗಸ್ತ್ಯೇ ಮುನಿರಾಯ ತಾಂಡ ಕಮಂಡಲತ್ತುಲ್ಲ ತೀರ್ಥೋಡೆ ಬ್ರಹ್ಮಗಿರಿ ಮೋಳಲ್ ಬೆಚ್ಚಿತ್, ಚಿನ್ನ ದೂರ ಪೋಯಿತ್ ಬಯ್ಯಕ್ ಬಕ್ಕಣೆ ಬ್ರಹ್ಮದೇವ ಕಾಕೆ ರೂಪತ್ಲ ಬಂದಿತ್ ಕಮಂಡಲತ್ರ ತೀರ್ಥತ್ಲ ಮರ್ಚಿತ್ತಿಂಜತ್. ಇದ್ನ ಕಂಡ ಅಗಸ್ತ್ಯ ಮುನಿಕ್ ತಿತ್ ಚೆಡಿ ಬಂದಿತ್, ಸುತ್ತಮುತ್ತ ನೋಟಿ ಕಳಿಕಣೆ ನಾಲ್ ಮಂಡೆ ಬ್ರಹ್ಮ ಶಾಪ ಇಟ್ಟೋದೊಂದ್ ಬೊತ್ತಿತ್ ಕೂಡನ್ನೆ ಅಗಸ್ತ್ಯ ಮುನಿರ ಮುಂಬರತ್ ಪ್ರತ್ಯೇಕ ಆಯಿತ್ ಚೆಡಿ ಮಾಡ್ತೊತೆ ಮಹರ್ಷಿ, ನೀಕ್ ಬೋಂಡ್ಯಾನ ವರತ್ಲ ಬೋಡಿಯಾಂದೆಣ್ಣೆತ್ ಚೆಡಿನ ತಣ್ಣೆತ್ ಆ ತಕ್ಕಾನ ಕೇಟಿತ್ ಅಗಸ್ತ್ಯ ಮುನಿರಾಯಂಗ್ ಸಂತೋಷ ಆಯಿತ್ ಬ್ರಹ್ಮ ದೇವಪೊಂಗಲಸ ಪಾತ್ರತ್ಲ ಇಂಜ ತೀರ್ಥತ್ಲ ಕಾಕೆ ಚೆಲ್ಲಿತ್. ಆನಗುಂಡ್ ತೀರ್ಥ ಕುಂಡಲ್ ಏಳೊಕೋಟಿ ತೀರ್ಥ ಪುಟ್ಟೋನ್ನೆಕೆ ನಾಕ್ ವರ ತಾಂದೆಣ್ಣೆತ್ ಬೋಡ್ಚಿ. ಬ್ರಹ್ಮ ದೇವತಥಾಸ್ತೊಂದೆಣ್ಣೆತ್ ಕಣ್ಣಕ್ ಮರೆ ಆಚಿ. ಇದ್ನ

ಕಂಡಿತ್ ಅಗಸ್ತ್ಯೆ ಮುನಿಕ್ ಸಂತೋಷ ಆಯಿತ್ ಸ್ವರ್ಗ ಪಾತಾಳ, ಮೃತ್ಯುಲೋಕ ಈ ಲೋಕತ್ತುಳ್ಳ ತೀರ್ಥ ಎಲ್ಲಾ ಬಾರೀಂದ್ ಕೈ ಎಡ್ತ್ ಕಾಕ್‌ಚಿ. ಇದಾನ ಕೇಟಿ ತೀರ್ಥಪೊಳೆ ಎಲ್ಲಾ ಅಗಸ್ತ್ಯೆ ಮುನಿರ ಮಿಂಞಾಲ್ ಬಂದಿತ್ ನಿಂದಿತ್ ಎನ್ನತ ಅಪ್ಪಣ್ಣೇಂದ್ ಕೇಟಿತ್. ಇದಾನ ಕಂಡ ಅಗಸ್ತ್ಯೆ ಮುನಿ ಇನ್ನನೆ ಅಪ್ಪಣೆ ಮಾಡ್‌ಚಿ. ಏಳ್‌ಕೋಟಿ ತೀರ್ಥ ಕಾಲೋರಾಂಡೆಕೋರಮ್ಮ ಶಿವಂಡ ನೆತ್ತಿ ಕಣ್ಣ್ ಸೂರ್ಯ ತುಲಾರಾಶಿಕ್ ಎತ್ತುವೊಕ ನಂಗೆಲ್ಲಾರೂ ಬಂದಿತ್ ಅಂದಿಯತ್ರ ದಿನ ಮಾಲೋಂಗ ಈ ಕುಂಡಿಕೆರ ತೀರ್ಥಕುಳಿನ ಮಿಂಞಾ ಕುಳಿಚಕ್ಕ ಎಳೆಳ್ ಜನ್ಮತ್ಲ ಕೆಜ್ಜ ಪಾಪತ್ತ್ ನಿಂಗೆಲ್ಲಾರೂ ನೀಕೊಂಡು, ಮೇಲೆ ಪಾಪ ಪೊದ್ದುವಕಯ್ಯ, ಮಾಲೋಂಗಕ್ ಪೊದ್ದಾನ ಶನಿದೇವೊ ದೂರ ನೀಗಿ ನಿಕ್ಕೊಂಡು. ಅಲ್ಲತೆ, ಮಕ್ಕ ಇಲ್ಲತ ಪಾಪಿ ಮಕ್ಕಕ್ ಮಕ್ಕ ಫಲಕಾಟೊಂಡು. ಅಲ್ಲತೆ ತೀರ್ಥ ಮಹಿಮೆಲ್ ಕಣ್ಣಿಲ್ಲತ ಮಾಲೋಂಗಕ್ ನೋಟಿ ನಡಪಕ್ ಕಣ್ಣಿಲ್ಲತ ಕೊಡೊಂಡು. ಪೊಣ್ಣಿಲ್ಲತ ಬಾಲಂಗ್ ಕನ್ನಿ ಭಟ್ಟ್ ಕಟ್ಟೊಂಡು. ಕಾಲಿಲ್ಲತ ಕುಂಟ ಮಾಲೋಂಗ್ ತೇಕಿ ನಡಪಕ್ ಕಾಲ್ ಫಲ ಕೊಡಾಕಂಡು, ಕೈ ಇಲ್ಲತ ಮೋಟಂಗ್ ಬೀಜಿ ನಡಪಕ್ ಕೈ ಫಲ ಕಾಟೊಂಡು. ಮನಸ್ಸಲ್ ನೆನತ್ತದ್ ಅಕ್ಕ ಅಲ್ಲಿ ಕಾಟೊಂಡು. ಏಳ್‌ಕೋಟಿ ತೀರ್ಥತ್ರ ಅನ್ನತ ನೆಲೆ ಉಂಡಾಂಡೊಂದಣ್ಣಿತ್ ಅಗಸ್ತ್ಯೆ ಮುನಿ ಏಳ್‌ಕೋಟಿ ತೀರ್ಥಕ್ ಅಪ್ಪಣೆ ಮಾಡ್‌ಚಿ. ಅಗಸ್ತ್ಯೆ ಮುನಿ ಅಪ್ಪಣೆ ಮಾಡ್‌ನಾನ ಕೇಟಿತ್ ಏಳ್‌ಕೋಟಿ ತೀರ್ಥ ಪೊಳೆ ಪೊಲೆ ಎಲ್ಲಾ ಆ ದಿನ ನಂಗ ಬಪ್ಪಾಂದೆಣ್ಣಿತ್ ಅಗಸ್ತ್ಯೆ ಮುನಿನಗುಂಡ್ ಅಪ್ಪಣೆ ಪಡ್ತಿತ್ ಕಣ್ಣಿಕ್ ಮರೆ ಆಯಂಡತ್. ಅಗಸ್ತ್ಯೆ ಮುನಿ ಏಳ್‌ಕೋಟಿ ತೀರ್ಥಕ್ ತೀರ್ಮಾನ ಕೊಡ್ತ ಪೋಲೆ ಕಾವೇರಮ್ಮೆಯೂ ತಾಂಡ ಪೊಣ್ಣ್ ರೂಪ ಬುಟ್ಟಿತ್ ತೀರ್ಥಾಯಿತ್ ಗುಂಡಿಗಕ್ ಪಾರಿ ಬುದ್ಧಿತ್ ಉಕ್ಕಿ ಉಕ್ಕಿ ಪಂಜತ್, ಅಂದ್‌ತೊಟ್ಟ್ ಇಂದೋಳಕಾಲೋರಾಂಡೆಕೊಮೆ ಬ್ರಹ್ಮ ಕುಂಡಿಗೇರೊಳ್‌ಂಜ ಏಳ್‌ಕೋಟಿ ತೀರ್ಥ ಕನ್ಯಾರ್ ಪೋಕ್ಲ ತೊಲಿಯಾರ್ ಎದ್ವಾಕ್ ಕಾವೇರಿ ಸಂಕ್ರಮಣತ್ರಂದ್ ಏಳ್‌ಕೋಟಿ ತೀರ್ಥ ಒಕ್ಕಂಗೂಡಿ ಕುಂಡಿಗೇರೊಳ್‌ಂಜಿ ಪೊರಂದುಳ್ಳುವಾ. ಇದ್‌ಂಡ ಸೋಲೋಲೆ ಫಲವಾಯಿತ್

ಏಳೇಳು ಜನ್ಮತ್ ಮಾಲೋಂಗ ಕೆಜ್ಜ ಪಾಪ ದೂರ ನೀಂಗಿ ಪೋಪಾಂದಲ್ಲತೆ ಬೋಡಾನದ್ ಒದಗಿ ಬಪ್ಪ.

ತ್ರೀಮೂರ್ತಿಯಡದೂ ಕೊಡವ ಮಾಲೋಂಗಡದು ಮೋಪ್ ಕೂಟ ತೀಂದೋಲೆ ಕಾವೇರಮ್ಮ ತಾಂಡ ಪಾದಿ ತಡಿನ ಲೋಪಾಮುದ್ರೆ ಪದಲೋಲೆ ಅಗಸ್ತ್ಯೆ ಮಹಾ ಮುನಿರ ಕೂಡೆ ಪೋಯಂಡತ್ಂದೆಲ್ಲ ಒಯಿಂಜ ಪಾದಿ ತಡಿ ನೀರಾಯಿತ್, ಪೊಳೆರೂಪತ್ಲ ಲೋಕಪಾವನೆಯಾಯಿತ್ ಒಕ್ಕುವೊಕ್ ತೊಡ್ಂಗೆಚಿ.

ಇನ್ನನೆ ಇಪ್ಪಕ್ಕ ಭಗಂಡಂಡ ಕ್ಷೇತ್ರತ್ ತ್ರಿವೇಣಿ ಸಂಗಮತ್ಲ ಮಾಲೋಂಗ ಮುಂಗಿತ್ ಕುಳಿಚಕ್ಕ ಕೆಜ್ಜ ಪಾಪ ಪೋಪಾಂದ್ ವಾಡಿಕೆ ಉಳ್ಳಾಂಗ್, ಈಂಗೋರ್ ಹಿನ್ನೆಲೆ ಕಥೆ ಉಂಡ್. ಪಂಡ್ ಕಾಲತ್ಲಲ್ ಸುಯೆಜ್ಜಂದೆಣ್ಣುವೊ ಖುಷಿ ಭಾರತತ್ರೋಳುಳ್ಳ ಪುಣ್ಯ ಕ್ಷೇತ್ರ ಸುತ್ತಿಯಂಡ್ ಬಂದಿತ್ ಕೊಡವ ಮಾಲೆ ಪೂಮಾಲೆ ಕೊಡಗಲ್ ಸುಯೆಜ್ಜ ಮಲ್ಕಂದೆಣ್ಣುವೊ ಊರ್ಲ್ ಮಕ್ಕಫಲ ಬೋಂಡೂಂದ್ ನಾರಾಯಣ ದೇವನ ಮನಸಾರೊಳಲ್ ನೆನತ್ತಂಡ್ ಉಗ್ರತಪಕೆಜ್ಜತ್. ನಾರಾಯಣ ದೇವಯ್ಯೆ ಇದ್ನ ಅರ್ಜಿತ್ ಸುಯೆಜ್ಜಂಡ ಮಿಂಗಳಲ್ ಪ್ರತ್ಯಕ್ಷ ಆಯಿತ್ ಸುಯೆಜ್ಜ ಮಹರ್ಷಿ ನೀನ್ ಎನ್ನುತ್ತಾಂಡ ಮೊಳಿಯೋಲೆ ಇನ್ನನೆ ಉಗ್ರತಪಕೆಜ್ಜಿಯಾಂದ್ ಕೇಪಕ, ಸುಯೆಜ್ಜ ಮಹರ್ಷಿ ಕಣ್ಣ್ಬುಟ್ ನೋಟೋಕ ನಾರಾಯಣ ದೇವಯ್ಯ ತಾಂಡ ಎದ್ದಲ್ ನಿಂದಾನ ಕಂಡಿತ್ ಪಾದಕ್ಕಡ್ಡ ಬುದ್ದತ್. ತಾಂಗ್ ಮಕ್ಕಫಲ ಬೋಂಡೂಂದ್ ಬೋಡ್ಚಿ. ಇದ್ನ ಕೇಟಿ ನಾರಾಯಣ ದೇವಯ್ಯ ಒಳ್ಳಲ್ ಗ್ಯಾವ ಮಾಡಿತ್ ತನ್ನಗುಂಡ್ ಮಮ್ಮಯಾತ್ ಪುಟ್ಟ್ನ ಸುಜ್ಯೋತಿ ದೇವಕನ್ನಿನ ಸುಯೆಜ್ಜ ಮಹರ್ಷಿರ ತಪಸ್ಸ ಮೆಚ್ಚಿತ್ ಕೈ ನೋಟಿ ಕೊಡ್ತತ್. ಸುಯೆಜ್ಜ ಮಹರ್ಷಿ ಕನ್ನಿನ ಕೈಕ್ ಕೇಟಂಡ್ ನಾರಾಯಣ ದೇವಂಡ ಕೂಡೆ ನಾಕ್ ತಪಸ್ಸ ಮಾಡೋಕ್ ಸತ್ಯ ಉಳ್ಳಾ ಜಾಗ ಏದೋಂದ್ ಕೇಟತ್. ಅಕ್ಕ ನಾರಾಯಣ ದೇವ ಎಣ್ಣಿಚಿ. ಸುಯೆಜ್ಜ ಮಹರ್ಷಿ

ನೀನ್ ಸುಜ್ಯೋತಿನ ಕೂಟಿಯಂಡ್ ಇಲ್ಲಿಂಜಿ ಪೋರ್ಟ್ ಅಗ್ನಿಕುಂದ್ ಮಂಜಿತ್ ಬ್ರಾಹ್ಮಾದ್ರಿರ ಬರಿಲುಳ್ಳ ಗಜಾದ್ರಿರ ಮೋಳಾಕ್ ಪೋಯಿ ನಿಂದಾಂದೆಣ್ಣೊಚಿ. ಅಲ್ಲತ್ತೆ ಆ ಜಾಗತ್ ದೇವ ಕನ್ನಿಯ ತಪಸ್ಸು ಮಾಡಿಯೆಂಡ್ ಉಂಡ್. ಅವಡ ಕೂಡೆ ಸುಜ್ಯೋತಿನ ಬುಡ್ ನೀನ್ ಅಲ್ಲಿ ತಪಸ್ಸು ಮಾಡಿಯೆಂಡಿರ್. ಇಂಞಿ ಚೆನ್ನಂಗ್ ಕಾಲತ್ರೋಳಾಲ್ ದೇವ ಕನ್ನಿಯ ನೀರಾಯಿ ಪರಿಯುವಾ. ಅದೇ ಸಮಯತ್ ಸುಜ್ಯೋತಿ ಕುಮಾರಿಯೂ ನೀರಾಯಿತ್ ಪರಿಯುವಾ ದಂಡು ಕೂಡೆ ಕೂಡಿತ್ ಪಾಕಡಕ್ ಸೇರುವಾ.

ಇನ್ನನೆ ಪಂದಿತ್ ನಾರಾಯಣ ದೇವಯ್ಯ ಆಶೀರ್ವಾದ ಮಾಡಿತ್ ಕಣ್ಣಾಕ್ ಮರೆ ಆಚಿ. ಈ ತಕ್ಕನ ಸುಯೆಜ್ಜ ಮಹರ್ಷಿ ಸುಜ್ಯೋತಿ ಕೂಟಿಯಂಡ್ ಗಜಾದ್ರಿಕ್ ಪೋಯಿತ್ ಚೆನ್ನಂಗ್ ಕಾಲ ತಪಸ್ಸು ಮಾಡಿಯೆಂಡಿಂಜತ್. ಸ್ವರ್ಗ ಸೇರ್ಚಿ. ಇತ್ತಟ್ಟಿ ಸುಜ್ಯೋತಿ ಕುಮಾರಿಯು ದೇವ ಕನ್ನಿ ಯಕ್ಷಿಣಿಯೂ ಕೂಳ್ ನೀರ್ ಬುಟ್ಟಿತ್ ನೀರಾಯಿ ಪರಿಯುವೀಂದ್ ಅಯಿರಾರ್ ಕಾಲ ತಪಸ್ಸು ಕೆಜ್ಜತ್. ಈ ಸುದ್ದಿನ ಅಂಜಿತ್ ದೇವಲೋಕ ಇಂದ್ರನ್ ಗಾಜದ್ರಿಕ್ ಬಂದಿತ್ ಸುಜ್ಯೋತಿನ ಕಂಡಿತ್ ಕೊದಿ ಆಯಿತ್ ನನ್ನ ಮಂಗಲ ಅಂಡೊಂದ್ ಕೇಟಂಡಲ್ಲಿಕ್ ದೇವಕನ್ನಿ ಸುಜ್ಯೋತಿ ಆಕು ಪೋಕೊಂದ್ ಒತ್ತಿತ್ ಇಂದ್ರಂಡ ಬಾಕೆ ಕೂಡಿತ್ ಚೆನ್ನಂಗ್ ಕಾಲಕತ್ತಣೆಕ್ ಇಂದ್ರಂಡ ಕೂಡೆ ಇಂಜಿತ್ ಒರ್ ದಿನ ದೇವಲೋಕ ಬುಟ್ಟಿತ್ ಯಕ್ಷಿಣ ಉಳ್ಳ ಜಾಗ ಗಜಾದ್ರಿಕ್ ಬಂದಿತ್ ಸುಜ್ಯೋತಿ ಯಕ್ಷಿಣಿರ ಕೂಡೆ ನಂಗ ಇನ್ನನೆ ಇಂಜಕ್ಕ ಫಲವಿಲ್ಲೆ. ನಲ್ಲದೊಂದೂ ಕಾಟ್ಪುಲೆ. ದೇವೇಂದ್ರಂಗ್ ಪೊಣ್ಣಾಯಿತ್ ಇಪ್ಪಕ್ ನಾಕ್ ಮನಸ್ಸಿಲ್ಲೆ. ಆನಗುಂಡ್ ನಂಗ ದಂಡಾಳು ಒಕ್ಕಂಗೂಡಿ ನೀರಾಯಿ ಪರಿಯನಾ. ನೀರಾಯಿ ಪಂಜಕ್ಕೊ ಲೋಕೋಪಕಾರ ಕಾಪ. ನೀನ್ ಇಂದಾಕಣೆಕ್ ಯಕ್ಷಿಣಿ. ಇಂದೊಂಜ ಮಿಂಞಾಕ್ ನೀನ್ ಕನ್ನಿಕೇಂದ್ ಪೆದಗುಂಡ್ ನಂಗ ದಂಡಾಳೂ ಕೂಡಿತ್ ಕಾವೇರಮ್ಮರ ಕೂಡೆ ಪೊಳೆಯಾಯಿತ್ ಪಾಕಡಕ್ಕ ಸೇರಂಗಾಂದ್ ತಕ್ಕ ಪಂದಿತ್ ಒಪ್ಪಿಚಿಟ್ಟಿತ್ ಸುಜ್ಯೋತಿ ಕನಿಕೇಂದ್ ಪೊಳೆಯಾಯಿ ತೊಕ್ಕೊಚಿ. ಈ ಸುದ್ದಿನ ಅಂಜಿತ್ ದೇವಲೋಕ ಇಂದ್ರ ಗಜಾದ್ರಿಕ್

ಬಂದಿತ್ ಸುಜ್ಯೋತಿನ ಕಂಡಿತ್ ನೀನ್ ನನ್ನ ಮಿನ್‌ಂಜಿತ್ (ಮೀರಿತ್) ನೀರಾಯಿತ್ ಒಕ್ಕಿಯಾ ಆನಗುಂಡ್ ನೀಡ ನೀರ್ ಬತ್ತಿತ್ ಕಡೆಕೆತ್ತಣೆ ಕಾಯೋಡ್‌ಂದ್ ಶಾಪ ಇಟ್ಟತ್. ಇದ್‌ನ ಕೇಟಿತ್ ಸುಜ್ಯೋತಿ ಮಂಡೆ ಮಂಡೆ ಪೊಜ್ಜುಂಡ್ ಏರ ದುಃಖ ಮಾಡಿ ವೊರ್ಟಿತ್. ಇದ್‌ನ ಕಂಡ ಇಂದ್ರ ನೋಟ್ ಸುಜ್ಯೋತಿ, ನಾನ್‌ಟ್ಟಿ ಶಾಪ ತಟ್ಟುವಾ. ಅಚೀಂಗಿನೂ ನೀಕಿಕ್ಕ ಮರುಶಾಪ ತಪ್ಪಿ ನೀರ್ ಇಂಜಿತೂ ಇಲ್ಲತೆಯೂ ಕನಿಕೆರ ಕೂಡೆ ಒಕ್ಕಿ ಪೋಯಿತ್ ಭಗಂಡ ಕ್ಷೇತ್ರತ್ ಕಾವೇರಿನ ಕೂಡಿತ್ ಒಕ್ಕಿತ್ ಪಾಕಡಕ್ ಸೇರಿಯೋಳಿಂದ್ ಎಣ್ಣೆತ್ ಅಶೀರ್ವಾದ ಮಾಡಿತ್ ಮರೆ ಆಚಿ. ಇದ್‌ನ ಕಂಡ ಸುಜ್ಯೋತಿ ಸಂತೋಷಗೊಂಡಿತ್ ಕನಿಕೆರ ಕೂಡ ಭಗಂಡ ಕ್ಷೇತ್ರ ಕುಕ್ಕಿಡುಕ್ಕಿ ಪೋಕಣೆ ಕಾವೇರಮ್ಮೆ ಜಲರೂಪಿಯಾಯಿ ಒಕ್ಕಿ ಬಪ್ಪಾನ ಕಂಡಿತ್ ಸಂತೋಷ ಆಯಿತ್ ಕಾವೇರಮ್ಮೆನ ನೂರಾರ್ ಪೆದಲೆಣ್ಣೆ ತುದ್‌ಚಿತ್ ನೀಕಕೂಡೆ ನಂಗ ದಂಡಾಳೂ ಒಕ್ಕಿಯುಂಡ್ ಬಪ್ಪಂದೆಣ್ಣೆತ್ ಪಾದಕ್ಕಡ್ಡೆ ಬುದ್ಧತ್.

ಕೊಡವತಿಯಡ ಪೊಡಿಯ ನೆರಿ ಬಯ್ಯಕ್ ಬಂದಿಯೆ ಎನ್ನನೆ? ಕಾರಣ ಎನ್ನೊ?

ಸ್ವಾಂದ ಪುರಾಣತ್ಲ ಕೂಡಿತ್ತುಳ್ಳ ಕಾವೇರಿ ಪುರಾಣತ್ಲ ಎಣ್ಣಾವೊ ಮಾದ್ರಿಲ್ ಮತ್ಸ್ಯ ದೇಶತ್ರ ರಾಜನಾನ ಸಿದ್ಧಾರ್ಥಂಡ ಎಳಿಯ ಮೋಂವೊ ಚಂದ್ರವರ್ಮ ದಕ್ಷಿಣ ದೇಶತ್ರ ಎಲ್ಲಾ ಯಾತ್ರಾ ಸ್ಥಳ (ಪುಣ್ಯಸ್ಥಳ)ತ್ಲ ತಿರ್‌ಗಿಯಂಡ್ ಬಂದಿತ್ ಕಡೆಕ್ ಕಾವೇರಮ್ಮೆ ಪುಟ್ಟುವೊ ಬ್ರಹ್ಮಗಿರಿಕ್ ಬಂದಿತ್ ಪಾರ್ವತಿ ದೇವಿನ ಮನಸ್ಸೆಲ್ ನೆನತಂಡ್ ತಪಸ್ಸು ಮಾಡ್ಲೊಕ್ಕೆ ಪಾರ್ವತಿ ಅಂವಂಗ್ ಪ್ರತ್ಯಕ್ಷ ಆಯಿತ್ ಚಂದ್ರವರ್ಮಂಗ್ ಒರ್ ಕುದುರೆನೋ, ಒರ್ ಚಂದ್ರಾಯುಧಾಂದೆಣ್ಣುವೊ ಕತ್ತಿನೋ, ಒರ್ ಸೈನ್ಯತೋ ಅವಡ ಮಮ್ಮಾಯ ಶಕ್ತಿಲ್ ಕೊಡಪಂಜಿ, ಈ ದೇಶತ್ರೊಳ್ ಉಳ್ಳ ಮ್ಲೇಂಜಂಗಳ (ಕೆಟ್ಟಿ ಚೋರೆ) ಮಾಲೋಂಗಳ ಯುದ್ಧ ಮಾಡಿತ್ ಈ ದೇಶತಂಜ ಅಯಿಂಗಳ ದಾತಿತ್ ಇಲ್ಲಿ ನೀನ್ ರಾಜ್ಯಭಾರ ಮಾಡೊಂಡು ಎಂದೆಣ್ಣೆತ್ ಪಾರ್ವತಿ ದೇವಿಚಂದ್ರ ವರ್ಮಂಗ್ ವರ ಕೊಡ್ತತ್. ಅಕ್ಕ ಚಂದ್ರವರ್ಮ ತಾಂಡ ಪಟ್ಟಕ್ಕೋರ್ ರಾಣಿ ಬೋಂಡೊಂದ್ ಕೇಪಕ, ಪಾರ್ವತಿ ದೇವಿ ತಾಂಡ ಶಕ್ತಿಂಜಿ (ಮಮ್ಮಾಯತ್) ಸೃಷ್ಟಿ ಮಾಡ್‌ನ ಒರ್ ಕನ್ನಿಕೆನ ಚಂದ್ರ ವರ್ಮಂಗ್ ಕೊಡ್ತತ್. ಈ ದೇವಕನ್ನಿಕೆನಗುಂಡ್ ಪನ್ನಂದ್ ಮಕ್ಕ ರಾಜ ಕುಮಾರಂಗ ಪುಟ್ಟಿತ್ ಆಳ್‌ಕ್ಕಾಳ ತೇಂದಲ್ಲಿ ಈ ಪನ್ನಂದ್ ಮಕ್ಕಕ್ ವಿದರ್ಭ ದೇಶತ್ರ ರಾಜಂಡ ನೂರ್ ರಾಜ ಕುಮಾರಿಯಳ ಮಂಗಳ ಕೈಚಿತ್ ಈಯಂಗಕ್ ನೂರ್ ಮಕ್ಕ ಪುಟ್ಟಿತ್ ಈಯಂಗಡ ಸಂತಾನ ದೇಶತ್ಲೆಲ್ಲಾ ಕೈಕೆಡ್ತಂಡ್ ಕುಂದ್ ಬೆಟ್ಟಿ, ತಗ್ಗ್ ಇನ್ನತ್ತಾನೆಲ್ಲಾ ತಾಂಡ ಒಯ್ತಲ್ ಮಾಂದಿತ್ ಸಮತಟ್ಟಾಯಿತ್ ಭೂಮಿ ಮಾಡಿತ್ ವ್ಯವಸಾಯ ಮಾಡೋಕ್ (ಆರಂಭಕ್) ಎಡೆಮಾಡ್‌ಚಿ. ಈ ಕೊಡವ್ತಮಾಲೆ ಪೊಮ್ಮಾಲೆ ಕೊಡಗ್‌ಲುಳ್ಳ ಇಡೀ ಕೊಡಗ್

ದೇಶತ್ರೋಳುಳ್ಳಂತ ಎಲ್ಲಾ ಕೋವು ಬೇಲ್ ಕೊಡವಡ ಮೂಲ ಪುರುಷ ಚಂದ್ರ ವರ್ಷಂಡ ಪುಕ್ಕಡ ಪುಕ್ಕ (ನೂರಾಜನ) ಕೂಡಿತ್ ಬೇಲೆ ಕೋವುನ ಉಂಡಾಕ್ ನಾನಗುಂಡ್ ಇಂದ್ ಎಂಗ ಕೊಡವ ಜನಾಂಗ ನೈಚಿತ್ತುಂಬಕ್ಕ ಬೇಲುಂಡಾಯಿ. ಆನಗುಂಡ್ ಈ ನೆಲಕ್ (ಕೊಡಗ್) ಕ್ರೋಡಾ ದೇಶಾಂದೂ, ಮತ್ಯ ದೇಶತ್ರ ಸಂತತಿಯ ಈ ದೇಶತ್ರ ಅಳೆನಾನಗುಂಡ್ ಈ ದೇಶಕ್ ಮತ್ಯ ದೇಶಂದೂ ಮಿಂಚ್ ಇದ್ ಎಂಗ್ ಪೆದ ಇಂಜತ್.

ಕಾವೇರಮ್ಮ ಪಾರ್ವತಿರ ಅವತಾರಾಂದ್ ಚಂದ್ರವರ್ಷ ಪಾರ್ವತಿನ ಗುಂಡ್ ಅರ್ಚಿತಿಂಜತ್. ಈ ಕಥೆನ ಚಂದ್ರ ವರ್ಷನ್ ತಾಂಡ ಪುಕ್ಕಕ್ ಅರಿಚಿಟ್ಟಿತ್. ತಾಂಡ ಪೆರಿಯ ಮೋಂವ ದೇವ ಕಾತಂಗ್ ಪಟ್ಟಿಕೆಟ್ಟಿತ್ ರಾಜ್ಯಭಾರತ್ ಅಂವಂಗ್ ವಹಿಸಿ ಕೊಡಿತ್ ಚಂದ್ರವರ್ಷ ತಪಸ್ಸ್ ಮಾಡೋಂಗಾಯಿತ್ ಕಾಡ್ಕ್ ಪೋಚಿ. ತೊಲಿಯಾರ್ ಸಂಕ್ರಮಣಕ್ ದಂಡ್ ದಿನಕ್ ಮಿಂಚ್ ಚಂದ್ರವರ್ಷಂಡ ಪೆರಿಯ ಮೋಂವ ದೇವ ಕಾಂತಂಗ್ ಸ್ಪಷ್ಟತ್ ಪಾರ್ವತಿ ದೇವಿನ ಕಂಡಿತ್ ಪಾರ್ವತಿ ದೇವಿ ದೇವ ಕಾಂತಂಗ್ ತಾಂಡ ಮೋವಂಡ ವಂಶತ್ ಪುಟ್ಟಿನ ಎಲ್ಲಾ ಪ್ರಜೆಯ (ಸಂಸಾರ) ಬಲಮುರಿಕ್ ಪೋಯಿತ್ ನಾನಾ ಬಪ್ಪಾನ ಕಾತೊಂಡೊಂದೆಣ್ಣಿತ್ ಮಾಯ ಆಚಿ. ಅದೇ ಪೋಲೆ ದೇವ ಕಾಂತನ್ ತಾಂಡ ತಮ್ಮಂಗಣಗಳ ಪ್ರಜೆಯಳ, ಸ್ವಜನಗಳ ಕೂಟಿಯುಂಡ್ ಕನ್ನಾರ್ ಪೋಕ್ಲ್ ಚಂಗ್ರಾಂದಿ ನಾಳಲ್ ಬ್ರಹ್ಮಗುಂಡಿಗರೆ ಒಳ್ಂಜಿ ಜಲ ಕನ್ನಿಯಾಯಿತ್ ಒಕ್ಕಿ ಬಪ್ಪ ಪುಹಾತಾಯಿನ ಬಲಮುರಿಲ್ ಕಾತಳ್ತಂಡಿಕ್ಕಣೆ ಪೂಮಂಜಿ ಪೋಲೆಚಿಕ್ಕ ಕೊಡಿ ಬಾಳೆಲ್ಲಂಡತ್ ಕಣ್ಣಂದಿರಿ ಚೋತಿ ಬೆಚ್ಚಿತ್ ನಡು ಪೋಲೆ ತೆಲಿಯುಂಡ್ ಬಪ್ಪಾನ ದೂರತೆಂಜಿಯೇ ದೇವ ಕಾಂತನೂ ಅಯಿಂಡ ಸಂಸಾರೋ ಕಂಡಿತ್ ಆಣೂ ಪೋಣ್ಣಿ ಎಲ್ಲಾರೂ ಪೋಳೆ ನೀರಕ್ ಇಳಿಂಜತ್. ಕಣ್ಣಂದಿರಿಕ್ ಎಲ್ಲಾರೂ ಕೈತೊತ್ತಿತ್ ಮುಂಬಿ ಕುಳಿಪಕ್ ಒಕ್ಕುವೊ ನೀರ ತಡೆ ಉಂಡಾಯಿತ್ ಜಲ ಕನ್ನಿರ ಬಲ್ತೆಂಜಿ ಎಡ್ಡ ಬರಿಕ್ ಒಕ್ಕಿಚಿ (ಸುಳಿ ಉಂಡಾಚಿ). ಎಡ್ಡಕ್ ಒಕ್ಕಣೆ ಕಾವೇರಮ್ಮರ ಮುಮ್ಮಾಯಿತ ಮಹಿಮೆಲ್

ಮಿಂಗಳಾತ್ ಕುಳಿಪಂಜಿ ಪೊಂಗಡ ಮಿಂಗಳ್ಕಿಂಜ ಪೊಡಿಯ ನೆರಿ ಬೆಂಬರಕ್ ನೆರಿ ನಂದತ್. ಅಕ್ಕಣೆಕ್ ಕಾವೇರಮ್ಮ ತಾಂಡ ನಿಜ ರೂಪ ಕಾಟಿತ್ ಈ ತಕ್ಕ ಪರಂದತ್. ಇಂಗಳ್ ಮಿಂಗಳ್ ಮುಂಬರತ್ಲ ಪೊಡಿಯ ನೆರಿ ಕೂಟಿತ್ ಬೆಂಬರಕ್ ತಿಕ್ಕೋಳಿಂದೆಣ್ಣೆಚಿ. ಪಲಮುಂದಿದಿಂಜ ಪೆದ ಬಲಮುರೀಂದ್ ಪೆದ ಪೋಡೇಂದ್ ಕಾವೇರಮ್ಮ ಎಣ್ಣೆಚಿ. ಅಲ್ಲತ ಕೆಂದೆಂಗ ಕೊಲೆ ಪೋಲೆ ಅಣ್ಣ ಪೊಣ್ಣ ಪೆರ್ತಿತ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಕೊಡವಡ ವಕ್ಕತ್ಲ ವಕ್ಕ ಕೂಡಿ ನೇರಡ್. ಇಂದ್ ನಿಂಗ ಕಂಡ ಕಣ್ಣಂದಿರಿನ ಎಂದೆಕೂ ನಿಂಗ ಮರ್ಕತ್ತಿಂದೆಣ್ಣೆತ್ತೆ ಕಾವೇರಮ್ಮ ಮಹಾತಾಯಿ ಕೊಡವಕ್ಕೂ ಕೊಡವತಿಯಕ್ಕೂ ಆಶೀರ್ವಾದ ಮಾಡಿತ್ ಬಕ್ಕಿ ಬಕ್ಕಿ ಪೋಯಿತ್ ಕನಿಕೆ ಸುಚ್ಚೋತಿರ ಕೂಡ ಪಾಕಡಕ್ ಸೇರಚಿ.

ಸ್ಕಂದ ಪುರಾಣತ್ರ ಆಧಾರತ್ಲ ಅಂದಿಂಜಿ ಕ್ರೋಡ ದೇಶವೇ ಇಂದುಳ್ಳ ಕೊಡಗಂದೂ, ಕೊಡವಡ ಗುರುಚಂದ್ರವರ್ಪಂದೂ, ಪಾರ್ವತಿ ದೇವಿರ ಸಂಸಾರವೇ ನಂಗ ಕೊಡವಾಂದೂ, ಬಲಾಂಬೇರಿಲ್ ಕೊಡವತಿ ಪೊಮ್ಮಕ್ಕಡ ಪೊಡಿಯತ್ರ ಮಿಂಗಳ್ಕಿಂಜ ನೆರಿನ ಬಯ್ಯಕ್ ಬೆಚ್ಚೋಳಿಂದ್ ಆಶೀರ್ವಾದ ಮಾಡ್ನಾನ ಗುಂಡೇ ಕೊಡವತಿಯಡ ಪೊಡಿಯ ನೆರಿ ಬಯ್ಯಕ್ಕಾಯೆಂದೂ ಎಣ್ಣುವ.

ಕೇತ್ರಪ್ಪ ದೇವಡ ಮಹಿಮೆ (ಬೇಂಗೂರ್)

ಬೇಂಗ್‌ನಾಡ್‌ರೊಳಲ್ ತಕ್ಕನಾಪ ವಕ್ಕ ಕಲ್ಲಮಾಡಂಡ ವಕ್ಕಡ ಮನೆಲ್ ಪಂಡ್ ಕಾಲತ್ಲ ಅಳೊಬ್ಬ ಪೆದಲಿಂಜ ಕಲ್ಮಾಡಂಡ ಅಯ್ಯಣ್ಣ.

ತಾಂಡ ಅವ್ವ ಸಂತೋಷತ್ಲ ಬಾವಕ್ಕ ಒಂದಾಂಡೊ ಕೊರವು ಇಂಜಿಲೆ. ಇನ್ನನೆ ಇಪ್ಪಕಾಲತ್ಲ ಒರ್ ದಿನ ಅವಂಗೋರ್ ಚೆರಿಯ ಕೊರವು ಕಂಡೆನ್ನೆಕ್ಕಾಚಿ. ಅದೆನ್ನತ್ತಂದೆಣ್ಣಾಚೆಲಾಗಿ ಎಲ್ಲಾ ನಾಡ್ ಕಾಲ್ ಬಾಲಂಗ ಮಲೆಯಾಳಕ್ ಚೋಮಂಡ ಬೆನ್ನಲ್ ಅಕ್ಕಿ ಪೋರಿಯೆ ಪೋಯಿತ್ ಅಲ್ಲಿ ಮಾರಾಟ ಮಾಡಿತ್ ಪೊನ್ನ ಪಣ ಕೊಂಡ್ ಬಪ್ಪ. ಅನ್ನನೆ ಇಪ್ಪಕ್ಕ ನಾನೊ ನಾಡ ನಾಡ್‌ಕಾರಳೊ ಮಲೆಯಾಳಕ್ ಅಕ್ಕಿ ಪೋರಾಟ ಪೊಂಡೊಂದ್ ಗ್ಯಾನ ಮಾಡಿತ್ ಬೇಂಗೂರ್ ಉಯ್ಯಮಾನಿ ಮಂದಕ್ಕ ಈ ಸುದ್ದಿ ನಾಡ್‌ಕಾರಕ್ ಅರ್ಪಿತ್ ಚೋಮ ಪೋರಿ ಪೋಪಾಂಗ್ ನಾಳ್ ನಕ್ಷತ್ರ ನೋಟಿತ್ ಪೋರಾಟ ಕುರ್ಚಿತ್. ನಾಡ್‌ಕಾರೆಲ್ಲ ಒತ್ತಿತ್ ಪಿರ್ಜಿತ್. ಅಯ್ಯಣ್ಣ ಮನೆಕ್ ಬಂದಿತ್ ತಾಂಡ ಅವ್ವಂಡ ಕೂಡ ಈ ಸುದ್ದಿನ ಎಣ್ಣೆಚಿ. ಈ ಸುದ್ದಿನ ಕೇಟಿತ್ ಅಯ್ಯಣ್ಣಂಡ ಪೆತ್ತವ್ವೊ ಚಾಂಡಾಳ ಪೊಲ್ತಿಯಳ ಆಳ್ ಅಯಿಚಿ ಕಾಕಿತ್ ಎಳರೆರ ಚಿತ್ತಾರಿರೊಳ್‌ಂಜಿ ಬಟ್ಟಿ ಬಟ್ಟಿ ನೆಲ್ಲಾನ ಕೋತಿ ಕೋತಿ ಬೆಚ್ಚಿತ್ ಚಾಂಡಾಳ ಪೊಲ್ತಿಯ ಪಾಡಿ ಪಾಡಿ ಕುಟ್ಟಿತ್, ಮಯಿಚಿತ್ ಬಟ್ಟಿ ಬಟ್ಟಿ ಅಕ್ಕಿನ ಮಂಡೆ ಮಂಡೆಲ್ ಬೆಚ್ಚಂಡ್ ಪಟ್ಟಿಲ್ ನಿಂದಿತ್ ಅಯ್ಯಣ್ಣಂಡ ಪೆತ್ತವ್ವನ ಅಬ್ಬೇಂದ್ ಕಾಕ್‌ಚಿ. ಅಕ್ಕಣೆಕ್ ಪೆತ್ತವ್ವ ಬಂದಿತ್ ಪೊಲ್ತಿಯಂಡ ಮಂಡೆಂಜಿ ಅಕ್ಕಿ ಬಟ್ಟಿನ ಕೇಟಂಡ್ ಪೋಯಿತ್ ಅಟ್ಟಿತ್ಲ ಗುದ್ದಿ ಬೆಚ್ಚಿತ್ ಅಯಿಂಗಕ್ ಊಟ ಪಿಂಞ ಸಂಬಳ (ಕೊಚ್ಚಿ) ಕೊಡ್ತಿತ್ ಬುಟ್ಟಿತ್.

ಪಿತ್ತೆಂದಿಯತ್ರ ದಿನ ಅಯ್ಯಣ್ಣ ಬೆಚ್ಚ ಅಕ್ಕಿ ಚಾಂಡಾಲ ಪೊಲಿಯ

ಅಚ್ಚಿಕೊಚ್ಚಿ ಚಾಂಡಾಳನ ಅಯಿಚಿತ್ ಕಾಕಿತ್ ಅಯ್ಯಂಡ ಪೆತ್ತವ್ವೊ ಚೋಮ ಪೋರಿ ಪೋಪಾಂಗ್ ಅಚ್ಚಿ ಕುಟ್ಟಿ ಚಾಂಡಾಳ ಮಲೆಯಾಳಕ್ ಚೋಮ ಪೋರಿ ಪೋಪಾಂಗ್ ಎಲ್ಲಾ ಜೋಡೂ ಕೂಟೊಂಡು. ನುಪ್ಪತ್ತಾರ್ ಚೋಮಂಗಳ ಬೆನ್ನ ಮೇಲ್ ಕತ್ತಿತ್ ಮೇಕೊಂಡು. ಒಟ್ಟಿ ಕೂಪದಿ ಕೆಟ್ಟೋಕ್ ಕೂವಲೆಯೂ ಬೋಂಡೂಲಾಂದೆಣ್ಣೆತ್ ಅಪ್ಪಣೆ ಮಾಡ್ಚಿ. ಇದ್ನ ಕೇಟ ಅಚ್ಚುಕುಟ್ಟಿ ಚಾಂಡಾಳ ಚೋಮ ಪೋರಿ ಪೋಪಾಂಗ್ ಎಲ್ಲಾ ಕೋಪ್ ಕೂಟ್ಚಿ. ವಾರಂದೀರಂಡ್ ಎಣ್ಣಣೆ ಚೋಮ ಪೋರಿ ಪೋಪಾಂಡ ದಿನ ಬಂದ್ ಎತ್ಚಿ. ಅಯ್ಯಣ್ಣಂಡ ಪೆತ್ತವ್ವೊ ಪೊಲ್ಚೆಕೆದ್ದಿತ್ ಬಟ್ಟೆಕುಳ್ಳ ಕೂಪದಿ ಎಲ್ಲಾ ಕೆಟ್ಟಿತ್ ಕೊರವು ಎಲ್ಲಾ ತೀತಿತ್, ಅಕ್ಕಣೆಕ್ ಅಯ್ಯಣ್ಣ ಬುದ್ದಂಡಲ್ಲಿಂಜಿ ಎದ್ದಿತ್ ಕುಳ್ಳಿ ತಳ್ಳಿ ಬಂದಿತ್ ಉಂಡಿತ್ ಕುಡ್ಡಿತ್ ಕೆಟ್ಟಿ ಸುತ್ ಆಳಾಯಿ ನಿಂದತ್. ಅಕ್ಕಣೆ ಚಾಂಡಾಳ ಪೊಲೆ ಮಕ್ಕ ನುಪ್ಪತ್ತಾರ್ ಚೋಮಂಗಳ ಆಟಿಯ ಬಂದಿತ್ ಅಯಿಂಗಳ್ಳ ಅಲಂಕಾರ ಮಾಡ್ಚಿ. ಎತ್ತಡ ಬೆನ್ನಕ್ ಕೌಂದಿರ ಮೀದ ಪಟ್ಟೊಲ್ಲಿ ಪೊದ್ಂಜಿತ್ ಚೋಮಂಡ ಕೊಂಬಕ್ ಚೌರಿ ಬೆಚ್ಚಿತ್ತಟ್ಟಿತ್ ಚೋಮಂಗಳ ಅಲಂಕಾರ ಕೆಜ್ಜತ್. ಅಕ್ಕಣೆಕ್ ಅಯ್ಯಣ್ಣಂಡ ಪೆತ್ತವ್ವೊ ಅಟ್ಟತ್ ಬೆಚ್ಚಿತಿಂಜ ಗುದ್ ಬಟ್ಟಿ ಅಕ್ಕಿನ ನೆಲ್ಲಕ್ಕಿಕ್ ಕ್ಕಾಂದಿತ್ ನಂದಾದೀಪ ಮಿಂಗಳ್ ಅಕ್ಕಿ ಅಳಪ ಪಾನಿಲ್ ಅಕ್ಕಿ ಅಳಂದಿತ್ ಪೋರಾಕೆಟ್ ಕೆಟ್ಚಿ. ಅಕ್ಕಣೆಕ್ ಅಯ್ಯಣ್ಣ ಬೊಳ್ಳಿಚೆಂಬ್ ನೀರಾಯಿ ನೆಲ್ಲಕ್ಕಿ ನಂದಾದೀಪತ್ ಮಿಂಗಳ್ ನಿಂದಿತ್ ಬೊಳ್ಳಿಚೆಂಬ್ ನೀರಾನ ಮಂಡ ಮೀದ ಬೆಚ್ಚಿತ್ ಈ ಊರ್ ತಲೆ ದೇವನಾಡ್ ಕಡ್ಬಾಲಪ್ಪನೋ ಅಯಿಂಡ ಮಮ್ಮಂಜ್ ಮಹಾಗುರುನೋ ಮನಸ್ಸಲ್ ಸೆನತ್ತಿ ಇಂದ್ ನಾನ್ ಮಲೆಯಾಳಕ್ ಚೋಮ ಬರಿ ಪೋಪಿನೋ ನಾನ್ ಪೋಯಿತ್ ಬಪ್ಪಲ್ಲಿ ಕೆತ್ತಣೆ ಏದೋರ್ ತಟ್ಪಮುಟ್ ಬರತನ್ನಕ್ಕೆ ದೇವಡ ದೃಷ್ಟಿ ಎಂಗಕ್ ಬೇಲಿಯಾಯಿತಿಂಜತ್. ಈ ಕಾಯತ್ ನಡ್ಡಿತ್ ತರೊಂಡೊಂದ್ ನಂಗ ಬೈಪಿಂಜಿ ಬಂದ ಪಿಂಗಳ ನಾಡ್ಕಡ್ಬಾಲಪ್ಪಂಗ್ ಮಹಾಪೂಜೆ ಕೈಚೋವಿ. ಎಂಗಡ ಮಹಾಗುರುಕ್ ಮೀದಿ ನೀರ್ ಬೆಚ್ಚೋವಿಂದೆಣ್ಣೆ ಪಟ್ಟೋಪರ್ಕೆ ಕೆಜ್ಜಿತ್ ತಾಂಡ ಪೆತ್ತವ್ವಂಡ ಕಾಲ

ಪುಡ್ಡಿತ್ ತೊತ್ತಿತ್ ನೆಲ್ಲಕ್ಕಿರ ನಡೂಂಜಿ ಪೋರ್ ಎಲ್ಲಾನ ಎದ್ದಿತ್ ಚಾಂಡಾಳಂಡ ಕೈಕ್ ಕೊಡ್ತತ್. ಚಾಂಡಾಳ ಪೊಲೆ ಮಕ್ಕ ನುಪ್ಪತ್ತಾರ್ ಚೋಮಂಗಡ ಬೆನ್ನೆಕ್ ಪೋರ್‌ಟ್ ಮುರ್ಕಿತ್ ಚೋಮಂಗಡ ಪೋರಾಟ ಪೋರ್ಟಿತ್.

ಅರೆಯಂಡವಾಡೆಕ್ಕಾಲೆ ಬಂದಿತ್ ಕ್ಕಾಗ್ಗ ಮಾಟಂದೆಣ್ಣುವೊ ಏಳ್ ಮೂಲೆ ಆಕತ್ ನಾಡ್‌ಕ್ಕಾರಡ ಚೋಮಂಗಲ್ಲಾ ಬಂದಿತ್ ಕೂಡಿತ್ ಅಲ್ಲಿಂಜಿ ಚೋಮಂಗಡ ಪೋರಾಟ ಪೋರ್ಟಿತ್ ಕಾರ್‌ಕುಂದಕ್ಕಾಯಿತ್ ಪೆರುವು ಊರ್‌ಕ್ ಪೋಯಿತ್ ಎತ್ತಣೆ ನೇರ ಮಜ್ಜಣ ಆಚಿ. ಚೋಮಂಗಳ ಅಲ್ಲಿ ನಿಪ್ಪಚಿಟ್ಟಿತ್ ಎತ್ತಡ ಬೆನ್ನೆಂಜಿ ಕಂಬಿ ಪೋರ್‌ನ ಇಳ್ಳಿತ್ ಚೋಮಂಗಳ ಮೇವಕ್ ಬುಟ್ಟಿತ್. ಬೇಂಗ್‌ನಾಡ್ ಬಾಲಂಗಲ್ಲಾ ಕೂಪದಿ ಉಂಡಿತ್ ಒಪ್ಪಾರತ್ ಅಳ್ಳತ್.

ಅಂದಿಮುಂದಿ ನೇರಕ್ ಚಾಂಡಾಳ ಪೊಲೆ ಮಕ್ಕ ಚೋಮಂಗಳೆಲ್ಲಾ ಆಟಯೆ ಬಂದಿತ್ ಗೂಟಕ್ ಕಟ್ಟಿಚಿ. ಬೈಟ್ ಎಲ್ಲಾರೂ ಕೆಟ್ಟಂಗೂಳ್ ಉಂಡಿತ್ ಅಂದ್ ಅಲ್ಲಿಯೊಂದ್ ಒಳ್‌ಂಜಿತ್ ಪಿತ್ಯ ಪೊಲ್ಲೆಕ್ ಅಲ್ಲಿಂಜಿ ಪೋರ್ಟಿತ್. ಪೊನ್ನೋಲತಂಡ ವಾಡೆಂಜಿ ಮದೆನಾಡ್‌ಕ್ಕಾಯಿತ್ ಕಡಂದಿತ್. ಕೊಯಿನಾಡ್ ಊರ್‌ಕ್ಕಾಲೆ ಪೋಯಿತ್ ಸಂಪಾಚೆಕ್ಕಾಯಿತ್ ತುಳ್‌ನಾಡ್‌ಲ್ ನೀಲಿತ್ತೋರ ಕಂಡಿಕ್ಕೆತ್ತುವೊಕ್ಕ ಅಂದಿಮುಂದಿ ನೇರಾಚಿ. ಅಲ್ಲಿ ಬಂದ್ ಒಳ್‌ಂಜಿತ್ ಪಿತ್ಯ ಪೊಲ್ಲೆಕ್ ಅಲ್ಲಿಂಜಿ ಪೋರ್ಟಿತ್ ಮಟ್ಟಲಾಡಿ ಮಾಡಾಯಿತ್ ಪೋಯೆಂಡಿಪ್ಪಕ್ಕ ಚೀಪ್‌ತಾಡಿ ಮಮ್ಮದೆ ಮಾಡಿಕೊಡಿಲ್ ಜೂಕ್‌ಂಗಟ್ಟಲ್ ಪೂವರ್ಕ್ ವರೋಕ ಗಂಟೆ ಮಣೆ ಒಲಿ ಕೇಟಿತ್ ವರ್ಕ್ ನೆಟ್ಟಿತ್ತದ್ದಿತ್ ಕನ್ನಡಿಕ್ಕಾಲೆ ನೋಟ್ಟಿಕ್ ಬೇಂಗ್‌ನಾಡ್‌ಕಾರಡ ಎತ್ತ ಪೋರಾಟ ಪೋಪಾನ ಕಂಡಿತ್ ಮಾಡಿ ಇಳ್‌ಂಜಿ ಬಂದಿತ್ ಕೂಟ್‌ಲ್ ಪೆರಿಯಂವ ಅಯ್ಯಣ್ಣ ಬೈಂಬಂಡ ಕೂಡೆ ನಿಂಗ ಏದ್ ನಾಡ್‌ಂಜಿ ಬಂದಿರಾ? ಎತ್ತಡ ಬೆನ್ನೆಲ್ ಎನ್ನತ ಪೋರಿಯೆಂಡ್ ಪೋಪಂದ್ ಕೇಪಕ ಅಯ್ಯಣ್ಣ ಬಯಿಂಬ ನಂಗ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್‌ಲ್ ಬೇಂಗ್‌ನಾಡ್‌ಕ್ಕಾರ. ಬೇಂಗೂರ್‌ಂದೆಣ್ಣುವೊ ಊರ್‌ಂಜಿ ಎತ್ತಡ ಬೆನ್ನೆಲ್ ಸಣ್ಣಕ್ಕಿ ಪೋರಿಯೆಂಡ್ ಈ ನಾಡ್ ನಾಗರಕ್ಕಿ ಬಾತ್‌ಂದೆಣ್ಣಿಚಿ. ಚೀಪ್‌ತಾಡಿ

ಮಾಪಳೆ ಸಂತೋಷ ಆಯಿತ್ ಅಯ್ಯಣ್ಣಂಡ ಕೂಡ ಒಂದ್ ಕೇಳಿಮೊಲಿಯಾರೇ-
ಅಕ್ಕಿನ ನಾಕ್ ಮಾರಾಟ ಮಾಡಿ. ಅದ್‌ಂಗ್ ಬದಲೆಕ್ ನಾನ್ ಪೊನ್ನ ಪಣ
ತಪ್ಪಿಂಂದ್ ತಕ್ಕ್ ಬಾಕ್ ತೇತಿತ್ ಎಲ್ಲಾ ಚೋಮಂಗಡ ಬೆನ್ನಲಿಂಜ ಅಕ್ಕಿನ
ಮಮ್ಮದೆಕ್ ಕೊಡ್ತತ್. ಮಮ್ಮದೆ ಅಕ್ಕಿರ ಕ್ರಯ ಪೊನ್ನ ಅಳಂದಿತ್ ಇಟ್ಟತ್.

ಇದ್‌ನ ಕಂಡ ಬೇಂಗ್‌ನಾಡ್‌ಕ್ಕಾರ ಅಯಿಂಡ್‌ಂಡ ಪಾಲೆಕ್ ಕ್‌ಟ್ವೆನ
ಪೊಂಬಣತ್ ಬೀರಾಳಿಲ್ ಕೆಟ್ಟತ್ ಚೋಮಂಗಳ ಆಟಯೆಂಡ್ ಪೋಯಿತ್
ಮಾಡಾಯ ಪರ್ಬಲ್ ಮೇವಕ್ ಬುಟ್ಟತ್. ಅಕ್ಕಣೆಕ್ ಅಯ್ಯಣ್ಣ ಬೈಯಿಂಬಂಗ್
ಕುಡಿಪಕ್ಕಾಯಿತ್ ಕೊಂಗಿರ ಬೋಟೊಂದೆಣ್ಣುವಾಂಗ್ ನೀರ್ ಕೊಂಡ್
ಬಪ್ಪಕೆಣ್ಣಚಿ. ಬೋಟು ಚೆಂಬುಕಲ ಎಡ್ತೆಂಡ್ ನೀರ್‌ಕೇಂದ್ ಮಾಡಾಯ
ಪೊಳೆಕ್ ಪೋಕಣೆ ಪೊಳೆರ ನಡುಲ್ ದೇವಮಾಯ ಮಮ್ಮಾಯ ತೇಲಿ ಕಳಿಪದ್
ಕಂಡಿತ್ ಬೋಟು ಓಡಿ ಪಾರಿ ಬಂದಿತ್ ಅಯ್ಯಣ್ಣ ಬೈಯಿಂಬಂಗ್ ಈ ಸುದ್ದಿನ
ಎಣ್ಣಚಿ. ಇದ್‌ನ ಕೇಟ ಅಯ್ಯಣ್ಣ ನಾಡ್‌ಕಾರ ಚೆನ್ನಂಗ್ ಬಾಲಂಗಳ ಪೊನ್ನಪಟ
ಕ್‌ಟ್ವೆಕ್ಕೆ ಪಾರ ನಿಪ್ಪಚಿಡೋಂಜಿ ಚೆನ್ನಂಗ್ ನಾಡ್‌ಕಾರಳ ಕೂಟಿಯೆಂಡ್
ಮಾಡಾಯ ಪೊಳೆಕ್ ಪೋಕಣೆ, ಪೊಳೆರ ನಡುಲ್ ದೇವಮಾಯ ತೇಲಿಕಳಿಪಾನ
ಕಂಡತ್. ಇದ್‌ನ ಕಂಡ ನಾಡ್‌ಕಾರ ಪೊಳೆಕ್ಕಾಳಂಜಿತ್ ಮೀಂದ್ವನ್ನೆಕ್ಕೆ ದಂಡ್
ಕೈಲೂ ಬಯ್ಯಕ್ ಬಲಿಚತ್. ಅಕ್ಕಣೆಕ್ ತಟ್ಟಂಡ ಅಪ್ಪಚ್ಚಿ ಎಣ್ಣವವು ಪಕ್ಕ
ಪೋಯಿತ್ ಪುಡಿತ್ತೆಡ್ತವಕ್ ನೋಟಣೆ ತಪ್ಪಿಪೋಚಿ. ಇದ್‌ನ ಕಂಡ ಅರೆಯಂಡ
ವಕ್ಕಡ ಚಾತೊಂದೆಣ್ಣವವು ಕೂಡ ಪೋಯಿತ್ ಪುಡಿಪಕ್ ನೋಟಣೆ ಕ್‌ಟ್ವೆಲೆ.
ಇದ್‌ನ ನೋಟಿಯಂಡಿಂಜ ಅಯ್ಯಣ್ಣ ಬಯಿಂಬ ಪಕ್ಕ ಪೋಯಿತ್
ಪುಡಿಪಕ್ಕೇಂದ್ ನೋಟಣೆ ಕೈಕ್ ಕ್‌ಟ್ವಿತ್ತಾಚಿ. ಕಡೆಕ್ ಬೇಂಗೂರ್ ತೋಟೆರ
ಬುದ್ಧಿ ನಲ್ಲ ಪಾಲೆ ಬಟ್ಟೆ ಉತ್ತಿತ್ ಮುಂಗೈ ಕುಳಚಿತ್ ಮುಂಡೆಲಿಂಜ
ಮುಂಡಾಸಾನ ಉತ್ತಿತ್ ಕುಕ್ಕಿತ್ ನೆಲ್ಲಿತ್ ಅಂಗೈಲ್ ಪುಡಿಕ್ಕಣೆ ದೇವ ಮಾಯ
ಮಮ್ಮಾಯ ಅವಂಡ ಕೈರ ಬಟ್ಟೆರೊಳ್‌ಲ ಅಳ್ತತ್. ಅಯ್ಯಣ್ಣ ಬೋದ ತಪ್ಪಿತ್
ಬುದ್ಧತ್. ಇದ್‌ನ ಕಂಡಿತ್ ಬೋಟುಪೊ ಚೆಂಬುಕಲತ್ ನೀರ್ ಕೋತಿತ್

ಅಯ್ಯಣ್ಣಂಗ್ ತಳಿಕ್ಕಣೆ ಅಯಣ್ಣ ಬೈಯಿಂಬ ಬುದ್ದಲ್ಲಿಂಜ ಎದ್ದಿತ್ ಅನುವಾದ ಕೊಡ್ತತ್. ಬೇಂಗ್ನಾಡ್ಕಾರಳೇ ನಿಂಗ ಬೊತ್ತುವೊ ಬೊಂಡುರ್ವೊ ಬೊಂಡಲಾ. ನಾನೇ ಕೇತ್ರಪ್ಪ. ನಿಂಗ್ ಊರ್ಕಾರ ಬಾಲಂಗಳ ಕಂಡಿತ್ ಕೊದಿ ಆಯಿತ್ ನಾನಾ ಇಲ್ಲಿಕ್ ಬಂದಿಯೆ. ನಿಂಗಡ ಊರ್ಕಾರ ನಡುಲ್ ನಾನಾ ಸ್ಥಾನ ನೆಲೆ ನಿಪ್ಪಿಂಡೆಣಣಿತ್ ಅನುವಾದ ಮಾಡ್ಚಿ.

ಬೇಂಗ್ನಾಡ್ ಬಾಲಂಗಳೂ ದೇವ ಪೊದ್ದನ ಅಯ್ಯಣ್ಣನೂ ಅಲ್ಲಿಂಜಿ ಪೊರ್ತಿತ್ ಮಾಡಾಯಿ ಪೇಟೆಕ್ಕಾಲೆ ನೀಲಿ ತೋರ ಕಂಡಿತ್ ಬಕ್ಕಣೆ ದೇವ ಬಂದಂಡುಳ್ಳ ಸುದ್ದಿನಂಜಿತ್ ಪತ್ತ್ ಕೂಟ್ ಪಾತಾಳ ಬಟ್ಟೆ ಕಾತತ್ತಳ್ಳಿತಿಂಜತ್. ಕೇತ್ರಪ್ಪನ ಕಾಂಬದು ಪತ್ತ್ಕೂಟ ಪಾತಾಳ ಬಟ್ಟೆಕ್ಕಡ್ಡ ನಿಂದಿತ್ ಕೇತ್ರಪ್ಪನ ತಡ್ಡಿತ್ ನಿಂಗಡ ಕೂಟ್ಕೊತೊಣೆ ಆಯಿತ್ ನಂಗಳೂ ಕೂಡೆ ಬಪ್ಪಾಂದ್ ಅಡ್ಡ ಬುದ್ದ ಬೋಡ್ಚಿ. ಇದ್ನ ಕಂಡ ಕೇತ್ರಪ್ಪದೇವ ಪತ್ತ್ಕೂಟ ಪಾತಾಳತ್ತ್ ಕೂಡೆ ಕೂಟಿಯಂಡ್ ಅಲ್ಲಿಂಜಿ ಕಡ್ಂದಿತ್ ಪೇಟೆಕ್ ಬಕ್ಕಣೆ ಪೂದತ್ತ ದೇವ ಬಟ್ಟೆಕಾತತ್ತಂಡಿಂಜತ್. ಕೇತ್ರಪ್ಪನ ಕಾಂಬದು ಸಂತೋಷ ಆಯಿತ್ ನಾನು ನಿಂಗಡ ಕೂಡೆ ಬಪ್ಪಿಂಡ್ ಪಾದಕ್ಕಡ್ಡ ಬುದ್ದತ್. ಕೇತ್ರಪ್ಪ ಪೂದನ ಕೂಟಿಯೆಂಡ್ ಅಲ್ಲಿಂಜಿ ಕಡ್ಂದಿತ್ ಸಂಪಾಜೆಲ್ ಬಾಚಿಗದ್ದೆಂದೆಣ್ಣು ವೊ ಬೇಲ್ಲ್ ತಿರೊಳಕ್ಕಾರ ಅಯ್ಯಣ್ಣ ಶಿವಪೂಜೆ ಮಾಡಿತ್, ಅಲ್ಲಿಂಜಿ ಕಡ್ಂದಿತ್ ಮದೆನಾಡ್ಲ್ ಪಾಡಿಚೆಂದೆಣ್ಣುವ ಜಾಗಕೆತ್ತಣೆ ತಿರಳಕಾರ ಅಯ್ಯಣ್ಣಂಗ್ ಕುಡಿಪಕ್ಕಾಯಿತ್ ಕೂಟ್ಲಿಂಜ ಬಾಲಂಗಳ ನೀರ್ ತೇಡಿ ಪೋನ್ನೆಂಗ ಪರ್ತ್ ನೇರಕೆತ್ತಣೆ ಬಕ್ಕತಿಂಜತ್. ಅವದಿಲ್ಲತೆ ತಿರೊಳಕಾರ ಅಯ್ಯಣ್ಣ ಬೊರ್ಚಲ್ಲೇ ತಾಂಡ ಕೂಟ್ಲಿಂಜ ಬಾಲಂಗಳ್ ದೇವ ಮಾಯ ಮಮ್ಮಾಯಕ್ಣ್ಣ ವರ್ಕ್ಪಬ್ಬಿಚಿಟ್ಟಿತ್. ತಾರಾಮಾರ ನೋಟಣೆ ಕೆಟ್ಟನ ಪನರ ಕುಡಿಕೆಲ್ ಬೊಳ್ಳೆಕ್ಕಳ್ಳ ಮಂಜಿ ತೊಂರ್ಪಂಡುಳ್ಳಾನ ಕಂಡತ್. ದೇವ ಕೊದಿ ಬೆಚ್ಚಿತ್ ತಿರೊಳಕಾರ ಅಯ್ಯಣ್ಣ ಬಾಲನ್ ಪನೆಕ್ ಪತ್ತಿತ್ ಬೊಳ್ಳೆಕ್ಕಳ್ಳ ಎದ್ದಿತ್ ಕುಡಿಚತ್.

ಬೊಳ್ಳೆಕ್ಕಳ್ಳ ಕುಡ್ಡಿತ್ ಪನೆಂಜಿ ಏಣಿಕುತ್ತ ಇಳಿಯಣೆ ಕಣ್ಣ್ ವರ್ಕ್ಪಲಿಂಜ

ಬಾಲಂಗಕ್ ಕಣ್ಣ್ ವರ್ಕ್ ಬುಟ್ಟತ್ . ನಾಲ್ ದಿಕ್ಕ ನೋಟಣೆ ತಿರೋಳಕಾರ ಬಾಲನ ಕಣ್ಣ್ ಕೆಲ್ಲಿಯೂ ಕಂಡಾಲೆ. ಇಂವ ಎಲ್ಲಿಕ್ ಪೋಚೀಂದ್ ಮರಿಯ ನೋಟಣೆ ತಿರೋಳಕಾರ ಅಯ್ಯಣ್ಣ ಏಣಿ ಕುತ್ತ ಇಳಿಯೊಂಜಾನ ಕಂಡತ್. ಇದ್ ನ ಕಂಡ ಊರೋನ್ ಏರ ದುಃಖ ಮಾಡಿತ್ ಕೇತ್ರಪ್ಪ ದೇವಯ್ಯ ಎಂಗಳ ವಧಿಚಿರಾ. ಚಾಂದ್ ಪೂವ್ ಬುಟ್ಟಿತ್ ಬೊಳ್ಳೆಕಳ್ಳು ಕುಡ್ಡಿರಾಂದೆಣ್ಣೆ ಕೇತ್ರಪ್ಪದೇವ ಮೈ ಅಳ್ಳ ಬಂದ ಅಯ್ಯಣ್ಣ ಬೈಯಿಂಬನ್ ಬೇಂಗ್ ನಾಡ್ ಬಾಲರೇ ಇಂದಾಕಣೆಕ್ ನಾಕ್ ಚಾಂದ್ ಪೂವು ಇಂಜತ್. ಇಂದ್ ಅಂಜಿ ಮಿಂಞಾಕ್ ನಾಕ್ ಬೊಳ್ಳೆಕಳ್ಳು ಆಡ್. ಪೂವೊಂಗೋಳಿ ತಂದೋಳಿಂದೆಣ್ಣೆತ್ ಅನುವಾದ ಮಾಡ್ ಚಿ. ಅಕ್ಕಣೆಕ್ ನೀರ್ ತೇಡಿಯಂಡ್ ಪೋನ ಬಾಲಂಗ ನೀರ್ ಎಡ್ಡ ಬಂದಿತ್ ಈ ಸುದ್ದಿನಂಜಿತ್ ಏರ ದುಃಖ ಮಾಡ್ ಚಿ. ಅಕ್ಕಣೆಕ್ ಅದ್ ನ ಕಂಡ ಕೇತ್ರಪ್ಪ ದುಃಖ ಬೋಂಡಾಂದ್ ಬಾಲಂಗಕ್ ಎಣ್ಣೆತ್ ಮದೆನಾಡ್ ಅಂಜಿ ಬಿಲ್ ಬಾಣ ಬುಟ್ಟಿತ್. ಬಿಲ್ ಅಂಜಿ ತಪ್ಪಿ ಪೋನ ಬಾಣ ಕುಯಿನಾಲ್ ಮಲೆಲ್ ಬುದ್ಧತ್. ಅಕ್ಕಣೆಕ್ ದೇವಬುಟ್ಟಿ ಬಾಣಪೋಯಿ ಬುದ್ಧ ಸದ್ ದ್ ಆ ಊರಾರ ಪಾಳೆಗಾರ ಚರ್ಮಣ ಬೈಯಿಂಬ ದಂಡ್ ದಾಳಿ ಕೂಡಿತ್ ಏದ್ ಕಳ್ಳಪಡೆ ಬಂದಿಯೋಂದ್ ನೋಟಣೆ ಬೇಂಗ್ ನಾಡ್ ಕಾರಳೂ ಕೇತ್ರಪ್ಪ ದೇವಳೂ ಅಂಬ್ ಪೋನ ಬಟ್ಟೆಲ್ ಅಂಬ್ ತೇಡಿಯಂಡ್ ಬಪ್ಪಾನ ಕಂಡಿತ್ ಚರ್ಮಣ ಬೊತ್ತಿತ್ ಬೊಂಡಿತ್ ಕೇತ್ರಪ್ಪ ದೇವಡ ಪಾದಕ್ಕಡ್ಡ ಬುದ್ಧತ್. ಕೇತ್ರಪ್ಪ ದೇವಯ್ಯ ನಿಂಗ ಬಂದಂಡುಳ್ಳದ್ ನಾಕ್ ಗೊತ್ತಾಯಿಲೆ. ಕಳ್ಳಪಡೆ ಬಂದಿತ್ ಅಂದ್ ನಾನ್ ಗ್ಯಾನ ಮಾಡಿಯೆಂಡ್ ನಾನ್ ಇಕ್ಕ ದಂಡ್ ಧಾಳಿಯಾಯಿತ್ ಬಂದದಾಚಿ. ಆನಗುಂಡ್ ನಾನ್ ಮಾಡ್ ನ ತಪ್ಪನ ತಪ್ಪಕ್ಕೋಪ್ ಮಾಡೋಂಡೂಂದ್ ಬೋಡ್ ಚಿ.

ಅಕ್ಕ ಕೇತ್ರಪ್ಪ ದೇವಯ್ಯ ತಪ್ಪಕ್ಕೋಪ್ ಮಾಡೋಲು ನಾಕ್ ನಿಪ್ಪಕ್ ನೆಲೆ ತರೋಂಡ್ ಅಂದ್ ಕೇಟತ್. ಅದ್ ಅಂಗ್ ಚರ್ಮಣ ಆಕೂ ಪೋಕೂಂದ್ ಒತ್ತತ್. ಅಲ್ಲಿಂಜಿ ಕೇತ್ರಪ್ಪ ದೇವಯ್ಯ ಅಂಬ್ ತೇಡಿ ನೋಟಣೆ ಕುಯಿನಾಳ್ ಮಲೆಲ್ ಬಟ್ಟೋತೆ ನೆಲತ್ ಅಂಬ್ ಪೋಯಿ ಬುದ್ಧಿಂಜಾನ ಕಂಡಿತ್

ಮಂದಮಾನಿ ಮಾಡಿತ್ ಮಂದಕ್ ಬಲಭಾಗ ಪೂದತ್ತಂಗ್ ನಿಪ್ಪಕ್ ನೆಲೆ ಕೊಡ್ತತ್. ಆ ಕೊರುನ ತೇತಿತ್ ಚರ್ಮಣಂಡ ಕೂಡೆ ಬೇಂಗ್‌ನಾಡ್‌ಲ್ ನಾನ್ ಪೋಯಿತ್ ನಿಪ್ಪಲ್ಲಿ ದಂಡ್‌ಕಾಲಕ್ಕೋರಮು ನಾಡ ಪೆದಲೋಲೆ ಆರಾಟ ಕಳಿಯಾಟ ನಮ್ಮೆ ನಾಳ್ ನಡ್ತುವಾ. ಇದೊಂಡ ಮೊಳಿಯೋಲೆ ಬೇಂಗೂರ್ ಬಾಲಂಗ ಮಲೆ ಇಳ್‌ಂಜಿತ್ ಕಲಿಯ ಬೂಕಿತ್ ಇಲ್ಲಿಕ್ ಬಪ್ಪಕ್ಕಾ ನೀನ್ ಕಲಿಯ ಕೇತೋಂಡೊಂದೆಣ್ಣೆತ್ ಪರಿಯಣೆ ಚರ್ಮಣ ಆಕೂಂದೆಣ್ಣೆತ್ ಒತ್ತತ್. ಕೇತ್ರಪ್ಪ ದೇವಯ್ಯ ಬೇಂಗೂರ್ ಬಾಲಂಗಳೂ ನೇರಡಾಣೆ ವೊಟ್ಪಕಾಲೆ ಬೆಟ್ಟತ್ತೂರ್‌ಕ್ಕಾಯಿತ್ ತಾಂದಿಕೂಟ ಮೊಟ್ಟೆನ ನೋಳತ್ ಕಡಂದ್ ಬಪ್ಪಕ್ಕ ಕೊಡವ ಮಾಲೆ ಪೊಮ್ಮಾಲೆ ಮದೆಕ್ಕಾಲೇ ದೇವಬಪ್ಪ ಸುದ್ದಿಕ್ ಪೆರುವೊ ಊರ್‌ನೂ ಬಟ್ಟೆ ಕಾತ್ ಅಲ್ಲಿತಿಯೆತ್. ಚೆನ್ನ ನೇರ ಕಯ್ಯುವಕ ಊರ್‌ರ ನಡುಕ್ ದೇವ ಬಂದಿತ್ತತ್ತಣೆ ಪೆರುವೊ ಊರೋನ ಬೇಂಗ್‌ನಾಡ್ ಬಾಲರ ಕೊದ್‌ಚಿತ್ ಅಯಿಂಡ ಕೂಡೆ ನಾನ್‌ಬಂದಿಯೆ, ನಾನ್ ಅಯಿಂಗಡ ಮಧ್ಯತ್ಲೆ ನೆಲೆ ನಿಪ್ಪಿ, ಆಚೆಂಗಿನೂ ಊರ್‌ನೇ ನಿಂಗಡ ಕೊದಿಕ್ಕಾಯಿತ್ ಪತ್ತ್‌ಕೂಟ ಪಾತಾಳತ್ ಇಲ್ಲಿ ನೆಲೆ ನಿಪ್ಪಿಚಿಡಿ, ನಾಡ ಪೆದಪೋಲೆ ವಾರಾಂಡೆಕ್ಕೋರಮ್ಮ ಅಗ್ಗಿ ಬಾಯಿ ಸಾದಾಮೆ (ಚೌಂಡಿಯಮ್ಮ)ಕ್ ಮೇಲೇರಿ ಕೂಟೋಳಿ. ದಂಡ್ ಕಾಲಕ್ಕೋರಮ್ಮ ನಾಡ ಪೆದಪೋಲೆ ಆರಾಟ್ ಕಲಿಯಾಟ್ ನಡ್ತಿಯೋಳಿಂದೆಣ್ಣೆತ್ ಆಶೀರ್ವಾದ ಮಾಡಿತ್, ಅಯ್ಯಂಡ ಓಮವೊ ಚಾಣಕ್ಕಾಂದಿತ್ ಆಕಕ್ ಚಾಣ ಇಟ್ಟತ್. ಬೆಮ್ಮಂಜಿ ನೋಟಣೆ ದೇವ ಮಾಯ ಬಪ್ಪಾನ ಕಂಡಿತ್, ಬೊತ್ತಿತ್, ಓಡಿ ಪಾರಿ ಪೋಯಿತ್ ಆಕತ್ರ ಕೈ ತೋಡ್‌ಲ್ ಕಾಲ್ ಮೂಡ್ ಕತ್ತಣೆ ಓಮವೊ ಕುಮಾರಿಕ್ ಮೈ ಅಳ್ಳ ಬಂದಿತ್ ಪೂಂಗೋಲ ನಲ್‌ಂಜಂಡ್ ದೇವಯ್ಯನ ಕೂಟಿಯೆಂಡ್ ಬಂದಿತ್ ಚೌಂಡಿಕಾಡ್‌ಂದೆಣ್ಣೆವಲ್ಲಿಕ್ಕೆತ್ತುವಕ್ಕ ಅಗ್ಗಿ ಬಾಯಿ ಸಾದಾಮೆ (ಚೌಂಡಿಯಮ್ಮ) ಕೇತ್ರಪ್ಪ ದೇವಡ ಮಿಂಗಳ್ ಬಂದಿತ್ ಅಡ್ಡ ಬುದ್ದಿತ್ ಕೇತ್ರಪ್ಪ ದೇವಯ್ಯ ದೇವ ನೆಲೆ ಇಲ್ಲತೆ ಪನ್ನೆರಂಡ್ ಕಾಲಾಚಿ. ಆನಗುಂಡ್ ನಾನ್ ಇಲ್ಲಿ ಇಪ್ಪುಲೆ. ನಿಂಗ ಪೋಪ ಚಾಗಕ್ ನಾನೂ ಕೂಡೆ ಬಪ್ಪಿಂದೆಣ್ಣೆ ಕೇತ್ರಪ್ಪ ದೇವಯ್ಯ ಸಾದಾಮೆನ ಕೈ

ಪುಡಿ ಕಾಕಿಯಂಡ್ ಕಲ್ಲು ತೋಡ್ ದಾಟಿತ್ ಕ್ಕೊ ಮುಟ್ಟು ಬೇಲ್ ರ ಏಳ್ ಪೂಲೆ ಆಕತ್ ನೀಲತ್ತೇ ಕಡ್ಂದಿತ್ ಕ್ಕೊ ಮುಟ್ಟು ಮಕ್ಕಿರ ಯಾಕ ಮುಟ್ಟು ಮೀದಲ್ ಮೈ ಅಳ್ಳತ್ತಿಂಜ ವಾಮವ್ವೊ ಕಾಲ್ ಮೂಡ್ ಕತ್ತಿತ್ ಬಟ್ಟೆ ಕಾಟಿಯ ಪೋಯಿತ್ ಬೇಂಗೂರ್ ಅರೆಯಂಡ ವಾಡಲ್ ಉಯ್ಯಮಾನಿ ಮಂದಲ್ ಮೈ ಅಳ್ಳತ್ತಿಂಜ ಓಮವ್ವೊ ಏಳ್ ಸುತ್ತ ಆಡಣೆ ಕೇತ್ರಪ್ಪ ದೇವಯ್ಯ ಅರೆಯಂಡ ವಾಡಲ್ ಬಟ್ಟೊತ್ತ ನೆಲತ್ ತಾಂದ್ ಕುತ್ತಿ ನಿಂದಿತ್, ಇದ್ನ ಕಂಡಿತ್ ಮೈ ಅಳ್ಳತ್ತಿಂಜ ಓಮವ್ವೊ ಏಳ್ ಸುತ್ತಾಡ್ಚಿ.

ಅಲ್ಲಿಂಜಿ ಕೇತ್ರಪ್ಪ ದೇವಯ್ಯ ನಾಡ್ಕಾರ ಬಾಲಂಗ ಅರ್ಪತರೆ ಇಟ್ಟಂಡ್ ಆಡಿಪಾಡಿ ಪೋಯಿತ್ ತಟ್ಟಂಡೊಕ್ಕಡ ಮನೆರೊಳ್ ಲ್ ಪೋಯಿತ್ ಕೂಡ್ಚಿ. ಬೇಂಗ್ನಾಡ್ ಬಾಲಂಗಕ್ ಈ ತಕ್ಕ ಪಂದರ್ತ್. ಏಡ ಕೋಟ್ರ ಬಲ್ಲೆ ಬರಿಲ್ ಅಗ್ಗಿ ಬಾಯಿ ಸಾದಾಮೆ (ಚೊಂಡಿಯಮ್ಮ) ನಿಪ್ಪಕ್ ಕೋಟ ಪಣ ತೇತಿತ್ ಕಾಲೋರಾಂಡೆಕ್ಕೊರಮ ಮೇಲೇರಿ ನಡ್ತಿಯೋಳಿಂದ್ ಮುತ್ತಪ್ಪಣೆಕೆಜ್ಜಿತ್ ಕೇತ್ರಪ್ಪ ದೇವಯ್ಯ ಬೇಂಗೂರ್ ತಟ್ಟಂಡೊಕ್ಕಡ ಮನೆಲ್ ಅಲ್ಲಿ ನೆಲೆ ನಿಂದತ್. ನಾಡ್ಕಾರ ಬಾಲಂಗ ಬೈ ಪಿಂಜಿತ್ ಪೋಚಿ. ಅಂದ್ತೊಟ್ಟ್ ಇಂದೋಳ ದಂಡ್ ಕಾಲಕ್ಕೊಮ್ಮೆ ಕೇತ್ರಪಂಡದೂ ಕೆಟ್ಟ್ ಕೋಲ ನಡ್ತುವೊ ನೇಮ ನಡ್ಂದಂಡುಂಡ್.

ಕಲಿಯಾಟ ಪೊನ್ನಪ್ಪ (ಅಜ್ಜಪಂಡ)ಂಡ ಮಹಿಮೆ

ಪಂಡ್ ಕಾಲತ್ ನಾಲ್ ನಾಡ್‌ಕ್ ಅಡ್‌ಂಗ್‌ನ ಕುಂಜಿಲ ಗ್ರಾಮತ್ ಕಲಿಯಾಟಂಡ ವಕ್ಕತ್ ಕುಟ್ಟಿಯ್ಯಂದೆಣ್ಣವೊ ಬೈಯಿಂಬ ಪ್ರಾಯಕ್ ಬಂದಿತ್ ಮಂಗಲತ್ರ ಸೋಲೆಲೆ ಪೊಣ್ಣ್ ತೇಡಿಕ್ಕಳಿಪಕ್ಕ ಬೇತ್ ಗ್ರಾಮತ್ ಕುಟ್ಟಿಂಚೆಟ್ಟಿರ ವಕ್ಕಡ ಮನೆಲ್ ಮೈನೆಂದ್ ಪೊಣ್ಣುಂಡ್‌ಂದ್ ಕುಟ್ಟಿಯ್ಯ ಬೈಯಿಂಬ ಪೋಯಿತ್ ಕುಟ್ಟಿಂಚೆಟ್ಟಿರ ಚೀಯವೊ ಕನ್ನಿನ ತಕ್ಕ ಬಾಕ್ ಪಂದಿತ್ ಮಂಗಲ ಕೈಂಚೆಂಡ್ ಕುಟ್ಟಿಯ್ಯ ದಂಪತಿಯ ಸಂತೋಷತ್ ಬಾವಕ್ಕಪತ್ ಕಾಲ ಕೈಂಜಕ್ಕಲೂ ಮಕ್ಕ ಫಲ ಕಂಡ್‌ಲೆ. ಇದ್‌ಂಡ ಮೊಳಿಯಾಲೆ ಕುಟ್ಟಿಯ್ಯ ದಂಪತಿಯ ಓರ್ ನಲ್ಲ ದಿನತ್ಲ ಪಚ್ಚೆ ನೀರ್ ಕುಳ್ಳಿತ್ ಪಾಲ್‌ಂಬಯ್ಯಾಡಾಯಿತ್ ಇಗ್ಗುತ್ತಪ್ಪ ದೇವಸ್ಥಾನಕ್ ಪೋಯಿತ್ ಮಹಾಪೂಜೆ ಕೈಂಜಲ್ಲಿ ಕುಟಿಯ್ಯ ದಂಪತಿಯ ದೇವಳ ಬೋಡ್‌ಚಿ. ಮಹಾಗುರು ಇಗ್ಗುತ್ತಪ್ಪಾ ಎಂಗ ದಂಡ್ ಕುಂಞಿಯ ಮಂಗಲ ಕೈಚಿತ್ ಪತ್ ಕಾಲ ಪತ್ತಾಚೆಂಗ್ಗೂ ಮಕ್ಕಫಲ ಕಂಡ್‌ಲೆ. ಆನಗುಂಡ್ ಇಗ್ಗುತ್ತಪ್ಪ ನೀಡ ದಯತ್ತೂ ಆಶೀರ್ವಾದತ್ತೂ ನಾಕೋರ್ ಕುಂಞಿರ ಫಲ ತರೊಂಡೂಂದ್ ದಂಪತಿಯ ದಂಡಾಳೂ ಇಗ್ಗುತ್ತಪ್ಪನ ಅಡ್ಡ ಬುದ್ಧಿತ್ ಮನ ಪೂರ್ವಕವಾಯಿತ್ ಬೋಡಿಯಂಡತ್. ಅಂದ್‌ತೊಟ್ಟಂಜ ಕುಟ್ಟಿಯ್ಯಂಡ ಪೊಂಗ ಚೀಯವೊ ಪ್ರತಿದಿನ ಪಚ್ಚೆನೀರ್‌ಲ್ ಕುಳ್ಳಿತ್ ದಿನಕ್ಕೋರ್ ಕೂಳ್ ಉಂಡಂಡ್ ಪಟ್ಟಣಿ ನಿಂದಂಡ್ ಇಗ್ಗುತ್ತಪ್ಪನ ಮನಸ್ಸಲ್ ಧ್ಯಾನ ಮಾಡಿಯಂಡ್ ವೃತತ್ಲ ಇಂಜಂಡ್ ನಾಪತ್ತೆಟ್ ದಿನಕೆತ್ತಣೆ ವೃತಗೊಂಡಿಪ್ಪಕ್ಕ ಓರ್ ದಿನ ಬೈಟ್ ನಡ್ವಾದ್ರೆ ನೇರಕ್ ಚೀಯವೊ ಪೊಂಗಡ ಸ್ವಪ್ನತ್ಲ ಇಗ್ಗುತ್ತಪ್ಪ ಬಂದಿತ್ ದುಃಖ ಬೋಂಡ ಪೊಂಗಳೆ, ನೀಕ್ ಆಂಗೂಂಞಿ ಫಲ ತಪ್ಪೀಂದೆಣ್ಣಿತ್ ಕಣ್ಣಕ್ ಮಾಯ

ಆನನ್ನಕ್ಕಾಚಿ. ಚೀಯವ್ವೊ ಪೊಂಗ ಪೂವರ್ಕ್ ನೆಟ್ಟಿತ್ ವರ್ಕ್ ತೆಳ್‌ಂಗಿತ್ ತಾನ್ ಕಂಡ ಸ್ವಪ್ನತ್ ತಾಂಡ ವಡಿಯಂಡ ಕೂಡ ಎಣ್ಣೆತ್ ದಂಪತಿಯ ದಂಡಾಳು ಸಂತೋಷ ಪಟ್ಟಿಂಡತ್. ಇನ್ನನೆ ಇಪ್ಪಕ್ಕ ಒರ್ ದಿನ ಪೊಲಾಕ ನೇರತ್ ಚೀಯವ್ವೊ ಪೊಂಗ ಆನೆಕೊಂಬ್ ಚೀಪ್‌ಲ್ ಜೋಗತಲೆ ಚೀಪಿಯಂಡಿಪ್ಪ ನೇರತ್ಲ ತಿಂಗ ಪೊಲೆ ಕಂಡತ್. ಆ ಪೊಲೆ ಕುಳ್ಳಿತ್ ಮೇಲೆ ಪೊಲೆ ಕಂಡ್‌ಲೆ. ಮಕ್ಕ ಪೊಲೆ ನಿಂದತ್.

ಪೊಲೆ ನಿಂದಲಿಂಜ ತಿಂಗ ಪತ್ ತೇರಣೆಕೂ ಚೀಯವ್ವೊ ಪೊಂಗ ಇಗ್ಗತ್ತಪ್ಪನ ಮನಪೂರ್ವಕ ನೆನತಂಡಿಂಜತ್. ಇನ್ನನೆ ಇಪ್ಪಕ್ಕ ತಿಂಗಪತ್ ದುಂಬಾನಲ್ಲಿ ಒರ್ ದಿನ ಬೊಳ್ಳಾಚಿ ಸೂರ್ಯಂಡ ಉದಯಕ್ ಚೀಯವ್ವೊ ಪೊಂಗ ಆಂಗುಂಚಿಕ್ ಜನ್ಮ ಕೊಡತ್ (ಪೆತ್ತತ್). ಕುಂಚಿ ಪುಟ್ಟನ ನೇರತ್ ನೆರತ್ ಬೆಚ್ಚ ತೊಂಕಂಜಿ ತನ್ನಷ್ಟಕ್ಕೆ ಬೊಡಿ ಪೊಟ್ಟಾಚಿ. ಆಣೆಲ್ ನೇತತ ಒಡಿಕತ್ತಿ ಅತ್ತಿತ್ತೂ ತೂಂಗಿ ಕಳಿಚತ್. ಪಟ್ಟಿಲ್ ಕಾಟ್ವನ ಪಟ್ಟಿತಿ ಪಯ್ಯು ಮಂಡಕನ ಪೆತ್ತತ್. ಕೂಟ್‌ಲ್ ಕೊಕ್ಕಚಿ ಎಮ್ಮೆ ಕೋಣಾಣ್ಣನ ಪೆತ್ತತ್. ಓಡಿಪೋಯಿತ್ತಿಂಜ ಮನೆರ ಆಳ್ ತಾನೇ ಬಂದ್ ಕೂಡ್‌ಚಿ. ಇನ್ನನೆ ಭಾಗ್ಯತೇಲೆ ಪುಟ್ಟಾಚಿ ಕುಂಚಿ. ಪಂಡಂಜ ಪದ್ಧತಿ ಪೊಲೆ ಪನ್ನೆರಂಡ್ ದಿನತ್ ಕುಂಚಿಕ್ ಪೊನ್ನಪ್ಪಂದ್ ತೊಟ್ಟ್ ಪೆದ ಇಟ್ಟಿತ್. ಚೀಯವ್ವೊ ದಂತಿಯ ಇಗ್ಗತ್ತಪ್ಪಂಡ ಸೇವಲೂ ದಯತ್ತೂ ಅಶೀರ್ವಾದತ್ತೂ ಪುಟ್ಟನ ಕುಂಚಿ ದಿನಕ್ಕೋರ್ ತರತ್ಲ ಬೊಳಂದತ್. ಕಾಲ ಪತ್ ಕಯ್ಯೋಕ ಆಳ್‌ಕ್ಕಾಳ್ ತೇಂದಿತ್ ಪೊನ್ನಪ್ಪ ಬೈಯಿಂಬ ವಯಿಸ್‌ಕ್ ಮೀರನ ಆಳಾಚಿ. ಊರ್‌ನಾಡ್‌ಲ್ ತನ್ನೋರಡಿ ಮಕ್ಕಡ ಕೂಡ ಕೂಡಿತ್ ಆಡ್ವಾಲೂ ಓಡ್ವಾಲೂ, ಪೊಳೆ ನೀರಕಳಂಜಲ್ಲಿ ಕೈಮೀಂದ ಮಲ ಮೀಂದತ್. ನೀರ ಕುಂಡ್‌ಲ್ ಮುಂಬುವಾಲೂ ಫಾರಂಜಳೆ ಪಾರ್ವಲೂ, ಚೆಂಡಾಟ, ಮಕ್ಕ ತಾರ್‌ಳಿಲೂ, ನಾಟಿಬೆಲ್ ಆಕತ್ ಓಡ್ವಾತ್ತೂ ಪೊನ್ನಪ್ಪನೇ ಮುಂಬಲಿಪ್ಪಂಜತ್. ಇದಲ್ಲತೆ ಪೊನ್ನಪ್ಪ ಮಂತ್ರ ತಂತ್ರ ಪಡ್ಡಿತ್ ಪತ್‌ಕೂಟ್ ಪಾತಾಳ ಮೂರ್ತಿಯಳ ತಾಂಡ ಕೂಟಾಳಾಯಿತ್ ಮಾಡಿಯಂಡಿಂಜತ್. ಇದಲ್ಲತೆ,

ಪೊನ್ನಪ್ಪ ಊರ್ ನಾಡಲ್ ನ್ಯಾಯಕೂಟ್ ಬುದ್ಧಕ ಪೊನ್ನಪ್ಪ ಬೈಯಿಂಬ ತಾನೂ ಪೋಯಿತ್ ಕೂಡಿತ್ ಬುದ್ಧ ನ್ಯಾಯ ತೇತಿತ್ ಮೇಲೆ ನ್ಯಾಯ ಇಡ್ಬೊಂಜತ್. ಇನ್ನನೆ ಪೊನ್ನಪ್ಪಂಡ ಕೇಳಿ ಕೀರ್ತಿ ಊರ್ ನಾಡ್ ದೇಶತ್ಲ ದುಂಬಿತ್ ಎಲ್ಲಾ ನಾಡ್ ಕಾರಳೂ ಕಲಿಯಾಟಂಡ ಪೊನ್ನಪ್ಪಂಡ ಕೇಳಿನ ಅನ್ನತ್ತ ಧೀರ ಶೂರನಾಯಿತಿಂಜತ್. ಪೊನ್ನಪ್ಪ ಇನ್ನನೆ ಇಪ್ಪಕ್ಕ ಒನ್ನಾಂದ್ ನೇರ ಮಜ್ಜಣಾಪಕ ಕೆಲ ಬೈಚಿತ್ ತಾಂಡ ಮನೆಕ್ ಬಂದಂಡಿಪ್ಪಕ ಬಟ್ಟೆಲ್ ಒರ್ ಪ್ಯಕ್ತಿನ ಎದ್ ಪಾಂಜತ್. ಪೊನ್ನಪ್ಪ ಆ ಪ್ಯಕ್ತರ ಆರಂಬೇರ ಅರಿಯೋಂಗಾಯಿತ್ ಅವನ ಕೇಟತ್. ದಾರ್ ನೀನ್, ಎತ್ತಟ್ಟಿ ಪೋರ್ತಿಯಾ? ಏದ್ ಊರ್ ನಾಡ್? ನೀಡ ಪೆದ ಎನ್ನಂದ್ ಕೇಪಕ್ಕಾ ಆ ಪ್ಯಕ್ತಿ ಎಣ್ಣೆಚಿ. ನಾಡ ಪೆದ ಕಾಟಳ ಬೊಳ್ಳು. ಮಳಿಯಾಳತ್ತ ಅರಂಗುತ್ತೂರ್ಂದ್ ನಾಡ ಊರ್ ಪೆದ. ಅಲ್ಲಿಂಚಿ ನಾನ್ ಬಂದಂಡುಳ್ಳ. ಅಪ್ಪಂಡ ಕೂಡೆ ಪಟ್ಟಪಣಿಕ್ ಪೋಯಿಲ್ಲೆಂದ್ ಬಾಯಲ್ಲತ ಬೈಗುಳ ಬಜ್ಜತ್, ಕೈ ಎಡ್ ಪೊಜ್ಜತ್. ನಾನ್ ಉಂಡಂಡಿಂಜ ಕೂಳ್ಳನ ಪಟ್ಟಕೆಡ್ ಕನಚತ್. ಇದ್ನ ಕಂಡಿತ್ ನಾಕ್ ಪರ್ತ್ ಬೇಜರಾಚಿ. ಮೈದುಂಬ ಚೆಡಿಯೂ ಬಾತ್. ನಾನ್ ಇಲ್ಲಿ ಇಪ್ಪಾಲೆಂದ್ ಗ್ಯಾನ ಮಾಡಿತ್ ಆ ಊರ್ನ ಒಯಿಚಿತ್ ಈ ದೇಶಕ್ ಬಂದಿಯೆ. ಚಾವೆಂಗಿನೂ ಬಾವೆಂಗಿನೂ ಕಾವೇರಮ್ಮರ ಪೆದತ್ತಡಿ ನಾಕ್ ಗತಿ. ಇನ್ನನೆ ಪಂದಿತ್ ಮೊರ್ತಿತ್.

ಇದ್ನ ಕಂಡಿತ್ ಪೊನ್ನಪ್ಪ ಅಂಪಂಡ ಮೇಲೆ ಕರುಣೆ ಪುಟ್ಟಿತ್. ಈ ತಕ್ಕ ಪಂದಿತ್. ಕಾಟಾಳ ಬೊಳ್ಳು ನೀನ್ ಬೊತ್ತಂಡ, ನೀಕ್ ನಾನ್ ಸಹಾಯಕ್ ಉಳ್ಳ. ನಾಡ ಅಪ್ಪಯ್ಯ ಇಗ್ಗುತ್ತಪ್ಪನ ಬೊಡಿತ್ ನನ್ನ ಪಡ್ಂದತ್. ಇಕ್ಕಣಿಕ್ ನಾಡ ಅಪ್ಪಂಗ್ ನಾನೋರ್ ಕುಂಚಿ. ಇಂದ್ತೊಟ್ಟಿ ಮಿಂಚಾಕ್ ನಾಡ ಅಪ್ಪಂಗ್ ದಂಡ್ ಕುಂಚಿಯಾಂದ್ ಗ್ಯಾನ ಮಾಡಿಯಂಡಿಯೆ. ನನ್ನ ನೀನ್ ಚದಿಕಂಡ. ನಿನ್ನ ನಾನ್ ಚದಿಪ್ಪೆಂದೆಣ್ಣಿತ್ ದಂಡಾಳೂ ಭೂಮಿನ ತೊಟ್ಟಿತ್ ಆಣೆ ಭಾಪೆ ಇಟ್ಟಿತ್. ಕಾಟಾಳ ಬೊಳ್ಳುರ ಕಣ್ಣಿನೀರ್ ತೇಟ್ಚಿ. ಪೊನ್ನಪ್ಪ ಕಾಟಾಳನ ಮನೆಕ್ ಕಾಕಿಯಪೋಯಿತ್ ತಾಂಡ ಅಪ್ಪಂಗ್ ಪರಿಚಯ ಮಾಡಿತ್ ನೋಟವ್ವಾ,

ಇಕ್ಕಣೆಕ್ ನಾನು ನೀಕೋರ್ ಕುಂಞಿ. ಇಂದಾಂಜ ನೀಕ್ ದಂಡ್
 ಕುಂಞಿಯಾಂದ್ ಗ್ಯಾನ ಪಾಡಿಯಾಂದ್ ಎಣ್ಣೆಚಿ. ಕೆಲ ಪೈಪಾ.
 ಕೂಳ್‌ಡಾಂದೆಣ್ಣೆಚಿ. ಪೊನ್ನಪ್ಪಂಡ ಪೆತ್ತಪ್ಪೊ ಪೊನ್ನಪ್ಪಂಗೂ ಕಾಟಾಳ
 ಬೊಳ್ಳುಕೂ ಕೂಳ್ ಇಟ್ಪ ಕೊಡ್ತತ್. ಕೂಳ್ ಉಂಬ ನೇರತ್ ಕಾಟಾಳ ಬೊಳ್ಳು
 ಪೊನ್ನಪ್ಪಂಗಣ್ಣೆಚಿ. ನೋಟ್ ನಾಯನ್ನಾರರೇ ನಿಂಗ ಚೆನ್ನಂಗ್
 ಬೆಮ್ಮಂಚೊಳಿಂದೆಣ್ಣೆತ್, ತಾನ್ ಉಂಬಂಜ ಕೂಳ್‌ನ ಮಂತ್ರ ಜಪಿಚಿಚ್ಚಿತ್
 ಕೂಳ್‌ನ ಕಾಡರ್ಚಿ ಮಾಡಿರ್. ಪೊನ್ನಪ್ಪ ತಿರಿತ್ ನೋಟಣೆ ಎಲ್ಕಂಡತ್ತಿಂಜ
 ಕೂಳ್‌ಲ್ಲ ಕಾಡರ್ಚಿಯಾಯಿತ್ ಕಂಡತ್. ಪೊನ್ನಪ್ಪ ಬೈಯಿಂಬಂಗ್ ಇಂಪೊ
 ನಾಕೊತ್ತೋರ್ ಕೂಟಾಳಾಂದ್ ಭಾರೀ ಖುಷಿ ಆಚಿ. ಅನ್ನನೆ ಪೊನ್ನಪ್ಪ
 ಕಾಟಾಳಂಗಣ್ಣೆಚಿ ನೀನ್ ಚೆನ್ನಂಗ್ ಬೆಮ್ಮಂಜ. ನಾನು ಪಡ್‌ಚದೋರ್ ವಿದ್ಯ
 ಕಾಟುವಿಂದೆಣ್ಣೆಚಿ. ಅನ್ನನೆ ಕಾಟಾಳ ಬೆಮ್ಮರಿಯಣೆ ಪೊನ್ನಪ್ಪನ ತಾನ್ ಉಂಬಂಜ
 ಕೂಳ್‌ನ ಮಹಾಂಜಪ್ಪೆಯ ಪೂವಾಯಿತ್ ಮಾಡಿರ್. ಇನ್ನನೆ ದಂಡಾಳೂ
 ಅಂದಿಯೆತ ದಿನ ಖುಷಿಲಿಂಜತ್. ಪಿತ್ಯೆ ದಿನ ಕೊಟ್ಪಂಜ ನುಪ್ಪತ್ತಾರ್ ಎತ್ತಳ
 ಮೇವಕ್ ಆಟಿಯ ಪೋಯಿತ್ ಬಾಣೆಲ್ ಬುಡುವೊಂಜಿ ಪೊನ್ನಪ್ಪನೂ ಪೊನ್ನಪ್ಪಂಡ
 ಕೂಟಾಳೂ ಪುಂಡತಟ್ಟಿರ ಬಿಲ್ಲಾಯಿ ಪಕ್ಲಿ ಬೋಟಿಕೆಂದ್ ಕಾಡಕ್ ಸುಗ್ಗಚಿ.
 ಚಿರಿ ಪಣ್ಣಾಕ್ ಪಕ್ಲಿ ಬಪ್ಪಾನ ಕಂಡಿತ್ ಬಳ್ಳಿ ಅಳ್ತತ್. ಪೊನ್ನಪ್ಪನೂ ಕಾಟಾಳ
 ಬೊಳ್ಳು ತಟ್ಪ ಬಿಲ್ಲ ಬುಟ್ಟಿತ್ ಕನಿಕೋರ್ ಪಕ್ಲಿ ಬೂಕ್‌ಚಿ. ಪಕ್ಲಿ ಎಣ್ಣೆ
 ಎಡ್ ನೋಟೋಕ ದಂಡಾಳರದೂ ಸರಿ ಸಮಕ್ ಇಂಜತ್. ಮನತ್ರೊಳಿಯ
 ನಾಕೊತ್ತೋರ್ ಚಂಗಾದೀಂದ್ ಭಾರೀ ಖುಷಿ ಆಚಿ. ಇನ್ನನೆ ಇಪ್ಪಕ ಬಾಣೆಲ್
 ಮೇಂಜಂಡಿಂಜ ಚೋಮಂಗಲ್ಲಾ ಪೋಯಿತ್ ಕಲಿಯಾಟಂಡ ಏಳು ಮೂಲೆ
 ಆಕಕ್‌ಳಾಂಜತ್. ಬೊಳ್‌ನ್ನೆಲ್ಲಾ ತಿಂದಿತ್ ನಾಶ ಮಾಡ್‌ಚಿ. ಪೊನ್ನಪ್ಪಂಡ ಅಪ್ಪ
 ಕುಟ್ಟಿಯು ಇದಾನ ಕಂಡಿತ್ ತಿತ್ ಪೋಲೆ ಚೆಡಿ ಬಂದಿತ್ ಬೊಳ್‌ ತಿಂಬಂಜ
 ಅತ್ತಳೆಲ್ಲಾ ಆಟಿ ಕೂಟಿತ್ ಮನೆಕ್ ಬಪ್ಪಂಜಿ ಪೊಣ್ಣಾರ ಕೂಡ ಪೊನ್ನಪ್ಪ ಬಾತೆಂಗಿ
 ಕೂಳ್ ಕೊಡ್ತಕಯ್ಯ. ಕೂಳ್ ಕೊಡ್ತತೆಂಗಿ ನೀಡ ಕೈನ ಕೆತ್ತಿವಿಂದೆಣ್ಣೆತ್ ಚೆಡಿ

ಮೇರೆ ಕುಡ್ಡಿತ್ ಬುದ್ಧಂಡ್ ವರೋಕ್ ಕೂಡ್ಚಿ.

ಇದೇ ನೇರಕ್ ಪೊನ್ನಪ್ಪನು, ಪೊನ್ನಪ್ಪಂಡ ಕೂಟಾಳು ಉಂಬಕ್ ಬಾತ್. ಕೆಲ ಪೈಪ ಅವಯ್ಯ ಕೂಳ್ ಇಡ್ಂದೆಣ್ಣ್ಚಿ. ಅಕ್ಕ ಅವ್ವೊ ಎಣ್ಣ್ಚಿ, ನಿಂಗ ದಂಡಾಳು ಎಲ್ಲಿಕ್ ಪೋಯಿತಿಂಜಿರಾ? ಅತ್ತ ಬೇಲ್ಕಕ್ಕಳ್ಂಜಿತ್ ಬೊಳೆನ್ನೆಲ್ಲಾ ನಾಶ ಮಾಡಿತ್. ಅಪ್ಪಯ್ಯ ನೀಡ ಮೇಲೆ ಭಾರೀ ಚೆಡಿಲುಂಡ್. ಪೊನ್ನಪ್ಪಂಗ್ ಕೂಳ್ ಕೊಡ್ತ ಕ ನೀಡ ಕೈನ ಕೆತ್ತಿರುವೀಂದೆಣ್ಣಿತ್ ಎನ್ನ ಮಾಡಡ್ ಕುಂಞೋಂದ್ ಕೇಟಿತ್. ಅಕ್ಕ ಪೊನ್ನಪ್ಪ ಎಣ್ಣ್ಚಿ, ನಾಡ ತಪ್ಪಾಚಿ ಅವಯ್ಯ. ಇಂಞಿ ಎಣ್ಣಿತ್ ಸುಖಿವಿಲ್ಲೆ. ಕೆಲ ಪೈಪ ಕೂಳ್ಡ್ಂದೆಣ್ಣ್ಚಿ. ಪೊನ್ನಪ್ಪಂಡ ಪೆತ್ತಪ್ಪೊ ದಂಡಾಳ್ಕ ಕೂಳ್ ಇಟ್ಕೊಡ್ತತ್. ಅದೇ ನೇರಕ್ ಕುಟ್ಟಯ್ಯ ವರ್ಕ್ ಎದ್ದಿತ್ ಬಪ್ಪಕ ದಂಡಾಳೂ ಕೂಳ್ ಉಂಬಿಂಜಾನ ಕಂಡಿತ್ ಬಾಯಿಕ್ ಬಂದನ್ನೆಕೆ ಬಜ್ಜಂಡ್ ಮೂಲೆಲ್ ತಾಕಿ ಬೆಚ್ಚಿತಿಂಜ ಪುಂಡ ತಟ್ಟೆ ಬಿಲ್ಲೊನ ಮುಟ್ಟೂರಿತ್ ಚೊಟಿ ಪೊಳ್ಳಿತ್ ಪಟ್ಟಿಕೆಡ್ ಕನಚತ್. ಇದಾನ ಕಂಡಿತ್ ಪೊನ್ನಪ್ಪಂಗ್ ಮೈದುಂಬ ಚೆಡಿ ಬಂದಿತ್, ತಾನ್ ಉಂಬಿಂಜ ಕೂಳ್ ತಳಿಯತ್ತ ನೆಲ್ಲಕ್ಕಿಕ್ ಎಂಜಿತ್ ಆಯುಧ ಪೊಳಿಂಜದ್ ಬೋರೆಯಲ್ಲ, ಆಯುಷ್ಯ ಪೊಂರ್ಜದ್ ಬೋರೆ ಅಲ್ಲಾಂದ್ ಗ್ಯಾನ ಮಾಡಿತ್ ಪೊನ್ನಪ್ಪ ತಾಂಡ ಅವ್ವಂಗಣ್ಣ್ಚಿ. ನಾನ್ ಈ ಊರ್ ಇಪ್ಪದಿಲ್ಲೆ. ಮರ್ಚಿ ಇಲ್ಲಿಕ್ ನಾನ್ ಬಪ್ಪಾಲೆಂದೆಣ್ಣ್ಚಿ. ಈ ತಕ್ಕಾನ ಕೇಟಿತ್ ಪೊನ್ನಪ್ಪಂಡ ಪೆತ್ತವ್ವ ಚೀಯವ್ವ ಕಣ್ಣ್ ನೀರ್ ಇಟ್ಟುಂಡ್ ಪೋಗತ್ತ ಕುಂಞೋಂದ್ ಮೊರ್ಟಿತ್. ಇದಾನ ಕಂಡ ಪೊನ್ನಪ್ಪ ನನ್ನ ತಡ್ಕಂಡ ಅವ್ವಯ್ಯ, ನಾಡ ಅಪ್ಪ ಇನ್ನನ ಮಾಡಂಡಿಂಜಿಲೆ. ನಾಡ ಆಯುಧ ಪೊಳಚದ್ ಬೋರೆಯಲ್ಲ, ನಾಡ ಆಯುಷ್ಯ ಪೊಂರ್ಜದ್ ಬೋರೆ ಅಲ್ಲಾಂದ್ ಎಣ್ಣ್ಚಿ. ಅಕ್ಕ ಪೊನ್ನಪ್ಪಂಡ ಪೆತ್ತವ್ವ ಎಣ್ಣ್ಚಿ, ಪುಂಡ ಬಿಲ್ಲೊ ಪೋನಕ್ಕ ನೀಕ್ ನಾನ್ ಬೊಳ್ಳಿ ಬಿಲ್ ಮಾಡಿತ್ ತಪ್ಪಿ ಕುಂಞಿ. ನೀನ್ ಚೆಡಿ ಮಾಡ್ತೊತೆ. ಊರ್ಬುಟ್ಟ್ ಪೋಕತ್ತೇಂದ್ ಮೊರ್ಟಿತ್. ಆ ತಕ್ಕಾನ ಕೇಳತ್ತ ಪೊನ್ನಪ್ಪ ಪೂರ್ತ್ ನಿಂದತ್ ಅಕ್ಕ ಪೊನ್ನಪ್ಪಂಡ ಪೆತ್ತವ್ವ ತಾಂಡ ಕುಂಞಿನ ತಬ್ಬಿಯೆಂಡ್ ಇಂದ್ ಪೋನಕ್ಕ ಎಕ್ಕ ಬಪ್ಪಿಯಾಂದ್ ಕೇಟಿತ್. ಅಕ್ಕ ಪೊನ್ನಪ್ಪ.

ಎಣ್ಣೆಚಿ, ಕರ್ತ ಕಾಕೆ ಬೊಳ್ಳಕ ಬಪ್ಪೀಂದ್ ಎಣ್ಣೆಚಿ. ವಡ್ಂದ ತೆಂಗೆ ಮುರಿಕೂಡುವಕ ಬಪ್ಪೀಂದ್ ಎಣ್ಣೆಚಿ. ಪುಕ್ಕನ ನೆಲ್ಲೆ ಮೊಳ್ಳೆ ಬಪ್ಪಕ , ಪೂಂಗಳಿಕ್ ಕೊಂಬ್ ಪುಟ್ಟುವಕ ಬಪ್ಪೀಂದ್ ಎಣ್ಣೆಚಿ.

ಈ ತಕ್ಕ ಪರಿಯುವಾನ ಕೇಟಿತ್ ಪೊನ್ನಪಂಡ ಪೆತ್ತವ್ವ ಕಣ್ಣೋರ್ ಇಟ್ಟುಂಡ್ ಯೇರ ದುಃಖ ಮಾಡ್ಚಿ. ಕಲಿಯಾಟಂಡ ಪೊನ್ನಪ್ಪ ಅಂದ್ ಮನೆ ಬುಟ್ಟ್ ಪೊರ್ಟಂವೊ ಮರ್ಚಿ ಮನೆ ಕಂಡ್ಲೆ. ಪೊನ್ನಪ್ಪನೂ ಪೊನ್ನಪ್ಪಂಡ ಚಂಜಾದಿ ಮನೆ ಬುಟ್ಟ್ ಪೊರ್ಟವು ಕುಂಜಿಲ ಊರೋನ ಆಳೈಚಿ ಕಾಕಿತ್ ನಡ್ಂದ ಕಥೆನ ಎಣ್ಣೆಚಿ. ಅಕ್ಕಣೆಕ್ ಊರ್ಕಾರ ಬಾಲಂಗ ಇಚ್ಚಕ್ ಚೆರಿಯ ವಿಷಯಕ್ ಊರ್ ಬುಟ್ಟ್ ಪೋಂಡ. ಪೊನ್ನಪ್ಪಂಡ ಪುಂಡ ಬಿಲ್ಲ ಪೋಚೆಂಗಿ ಎಂಗೆ ಬೊಳ್ಳಿ ಬಿಲ್ಲ ಮಾಡಿತ್ ತಪ್ಪ. ನೀನ್ ಊರ್ ಬುಡತ್ತೆಂದೆಣ್ಣೆತ್ ಪೊನ್ನಪ್ಪನ ತಡ್ತತ್. ಆ ತಡಲ್ ನಿಂದ್ಲೆ. ಅಲ್ಲಿಂಜ ಪೊರ್ಟಿತ್ ಕಾಳಿಮಾನಿ ಮಂದ್ಲೆ ಅಲ್ಲಿ ಬಂದಳ್ಳಿತ್ ನಾಲ್ಕೇರಿ ಊರೋನ ಆಳೈಚಿ ಕಾಕಿತ್ ಮನೆ ಬುಟ್ಟು ಸುದ್ದಿನ ಊರ್ ಮಿಂಗಳಲ್ ಎಣ್ಣೆಚಿ. ಇದ್ನ ಅರ್ಜ ಊರ್ಕಾರ ನೀನ್ ಚೆಡಿ ಮಾಡತೆ ಪೊನ್ನಪ್ಪ ನಂಗ ಊರಲ್ಲ ಕೂಡಿತ್ ಪೊನ್ನಾರ ಬಿಲ್ಲ ಮಾಡಿತ್ ತಪ್ಪ. ಅಂತೂ ನೀನ್ ಪೋಕತೆಂದೆಣ್ಣೆತ್ ತಡ್ತತ್. ಪೊನ್ನಪ್ಪ ಆ ತಕ್ಕನ ಕೇಳತ್ತೆ ಅಲ್ಲಿಂಜಿ ಪೊರ್ಟಿತ್ ಪಾಡಿ ಇಗ್ಗುತ್ತಪ್ಪಂಡ ತಿರ್ಕೆಕ್ ಬಂದಿತ್ ಇಗ್ಗುತ್ತಪ್ಪನ ತೊತ್ತಿತ್ ಚಾಂದ್ ಪೂವು ಬೇಂಗಿತ್ ಅಲ್ಲಿಂಜ ಪೊರ್ಟವು ನೆಲಜಿಲ್ ತಚ್ಚೊಟ್ಟಾಣಿ ಮಂದ್ಲೆ ಪೋಯಿ ಅಳ್ಳಿತ್ ನೆಲಜಿ ನೂರೊಕ್ಕಳ ಆಳೈಚಿ ಕಾಕಿತ್ ತಾಂಡ ಮನೆಲ್ ನಡ್ಂದ ಕಥೆನ ಊರ್ಡ ಮಿಂಗಳಲ್ ಎಣ್ಣೆಚಿ. ಇದ್ನ ಅರ್ಜ ಊರ್ಕಾರ ಬಾಲಂಗ ಪೋಂಡಾಂದ್ ತಡ್ತತ್. ಅಲ್ಲಿಂಜ ಪೊರ್ಟಿತ್ ನೆಲಜಿ ಇಗ್ಗುತ್ತಪ್ಪನ ತೊತ್ತಿತ್ ಪೇರೂರ್ ಮುನ್ನೂರೊಕ್ಕಳ ಕಾಕಿ ಕೂಟಿತ್ ತಾನ್ ಪೊರ್ಟ ಕಥೆನ ಎಣ್ಣೆಚಿ. ಪೇರೂರ್ ಮುನ್ನೂರೊಕ್ಕ ಆಳಣ್ಣ ತಡ್ತತ್. ಅಲ್ಲಿಂಜ ಪೊರ್ಟವು ಪೊನ್ನಪ್ಪನೂ ಪೊನ್ನಪ್ಪಂಡ ಚಂಜಾದಿಯು ಪುಲಿಕೋಟೆಲ್ ತಂಡರೆ ಪೊಳೆ ಕುಳ್ಳಿತ್ ಅಲ್ಲಿಂಜ ಪೊರ್ಟವು ತಾವುನಾಡ್ಲೆ ಪಾಂಡತ್ತಂದೆಣ್ಣೆವೊ ಊರ್ ಕೂಮೆಕಟ್ಟೆಲ್

ಒಳ್ಳೆಂಜತ್. ಆ ಊರೊಡ ಬಾಲಂಗ ಈಯಂಗಳ ಕಂಡಿತ್ ಏದ್ ಊರೊಕಾರ? ನಾಡೇದ್? ವಕ್ಕ ಪೆದ ಅಳಪೆದತ್ಲೆಲ್ಲಾ ಕೇಟತ್. ಪೊನ್ನಪ್ಪ ಬೈಯಿಂಬ ತಾಂಡ ಪರಿಚಯತ್ ಅಯಿಂಡ ಕೂಡೆ ಎಣ್ಣೆಚಿ. ಓರೋರ ಮೊಳಿಯಾಲೆ ಆ ನಾಡ್‌ನ ಒಯಿಚಿತ್ ಕಾವೇರಪ್ಪರ ಪಾದತ್ಲೆ ಬೂಪೊಕ್ ಈ ನಾಡ್‌ಕ್ ಬಾತೆಂಗಾಂದೆಣ್ಣೆಚಿ. ಈ ಸುದ್ದಿನಂಜ್ ತಾವುನಾಡ್ ಬಾಲಂಗ ಆ ನಾಡ್‌ರ ಬಾಲಂಗ, ಆ ನಾಡ್‌ರ ಪಾಳೆಗಾರ ಕರ್ಣಯ್ಯ ಬಾವುಕ್ ಪೋಯಿತ್ ಎಣ್ಣೆಚಿ. ಇದ್‌ನಂಜ್ ಕರ್ಣಯ್ಯ ಬಾವು ಅಯಿಂಗಳ ಕಾಂಗೊಂಡೊಂದ್ ಕಾಕಿಯ ಬಪ್ಪಕ್ ಆಳ್ ಅಯೆಚತ್. ಅಕ್ಕ ಬಂದ ಆಳ್‌ರ ಕೂಡೆ ಪೊನ್ನಪ್ಪ ಬೈಯಿಂಬ ಕಾಂಬಪು ಇಲ್ಲಿ ಬಂದಿತ್ ಕಾಂಗೋಲು. ಅಲ್ಲಿಕ್ ನಾನ್ ಬಪ್ಪಲೆಂದೆಣ್ಣೆಚಿ.

ಇದ್‌ನ ಅಂಜ್ ಕರ್ಣಬಾವು ಇಂವ ಸಾಮಾನ್ಯ ಜನ ಅಲ್ಲಾಂದ್ ಗ್ಯಾನ ಮಾಡಿತೋ ಪೊನ್ನರ ಕಟ್ಟಿ ಬಳೆ ಕೊಡ್‌ಪಂಜಿ ಈ ಬಳೆನ ಆ ಬೆಂದುಪೊಕ್ ಕೊಡ್ತಿತ್ ಕಾಕಿಯೆ ಬಾರೀಂದೆಣ್ಣೆತ್ ಆಳ್ ಅಯೆಚತ್. ಕಟ್ಟಿ ಬಳೆ ಎಡ್ತೆ ಬಂದ ಆಳ ಪೊನ್ನಪ್ಪಂಗ್ ಕಾಟಿತ್ ಕರ್ಣಬಾವು ಎಣ್ಣೆನ ಸುದ್ದಿನ ಪೊನ್ನಪ್ಪಂಗ್ ಎಣ್ಣೆಚಿ. ಆಚೆಂಗಿ ಪೊನ್ನಪ್ಪ ಆ ಬಳೆನ ಕೇಟಂಡಾಲೆ. ನಾಕ್ ಈ ಬಳೆ ಬೋಂಡಲಾ. ಪಟ್ಟಿ ಚತ್ತ ಮುಂಡೆಕ್ ಮೆಚ್ಚಿತ್ ಕೊಡ್‌ಕಡ್‌ಂದೆಣ್ಣೆಚಿ. ಈ ಸುದ್ದಿನ ಕರ್ಣಬಾವುರ ಕೂಡೆ ಆಳ್ ಪೋಯಿತ್ ಎಣ್ಣೆಚಿ. ಇದ್‌ನ ಅಂಜ್ ಕರ್ಣಬಾವು ತಾವುನಾಡ್ ಬಾಲಂಗಳೆಲ್ಲಾ ಕಾಕಿ ಕೂಟಿತ್ ಇಂದ್ ಇರ್ಲೊಕೂರ್ ಪಡೆ ಕೂಡೊಂಡು. ನಾಲ್‌ನಾಡ್ ಕಲಿಯಾಟಂಡ ಪೊನ್ನಪ್ಪ ಸಾಮಾನ್ಯ ಜನ ಅಲ್ಲ. ಎಂಗಳ ಚದಿಪಕ್ಕಾಯಿತ್ ಆ ನಾಡ್‌ನ ಒಯಿಚಿತ್ ಈ ನಾಡ್‌ಕ್ ಬಂದಿತ್. ಆನಗುಂಡ್ ಎಂಗೆ ಕತ್ತಿ, ತೋಕ್ ಕೈಲಾಯಿ ತೂಡ್, ತಿರಿ ಎಡ್ತಂಡ್ ಇಂದ್ ಇರ್ಲೊ ಕೂರ್ ಪಡೆ ಕೂಡೊಂಡೊಂದ್ ಅಪ್ಪಣೆ ಮಾಡ್‌ಚಿ. ಅನ್ನನೆ ಎಣ್ಣೆತ್ ಕರ್ಣಬಾವು ಗೂಡಾಚಾರಂಗಳ ಅಯಿಚತ್. ಇನ್ನನೆ ಇಪ್ಪಕ ಪೊನ್ನಪ್ಪನೂ ಕಾಟಾಳ ಬೊಳ್ತು ಕೂಮೆ ಕಟ್ಟೆಂಜಿ ಪೊರ್ಟಿತ್ ಕೋರಂಗಾಲ ಊರ್ಲ್ ಊರೊರ ನಡುಲ್ ಬೋಕಂಡಾಣೆ ಮಂದಲ್ ಚಪ್ಪೆ ಮರತ್ರಡಿ ಪೋಯ್ಲಿ ಅಳ್ತತ್.

ಇನ್ನನೆ ಇಪ್ಪಕ ಪೊನ್ನಪ್ಪನೂ ತಾಂಡ ಕೂಟಾಳೂ ಚಪ್ಪೆಯ ಮರತ್ತಡಿ ಪಾದಿ ಇರ್ಟಿತ್ (ನಡ್ವಾದ್ರೆರ ಪೂರ್ವಕ್ ಕೂಡ್‌ಚಿ. ಇನ್ನನೆ ಇಪ್ಪಕ ಗೂಡಾಚಾರಂಗಳುಂಡ್ ಕರ್ಣೆಂಬಾವು ಈ ಸುದ್ದಿನ ಅರ್ಜಿತ್ ಕರ್ಣೆಂಬಾವು ಅಯಿಚ ಕೂರ್ ಪಡೆಕ್ಕಾರ ಚೋಕಂಡಾಣೆ ಮಂದ್‌ಕ್ ಸುತ್ತ್ ಕೈತಿರಿ ತೂಡಾಯಿ ಬಿಲ್ಲ್ ನಿಂದತ್. ನಡ್ವಾದ್ರೆ ನೇರಕ್ ಪೊನ್ನಪ್ಪ ಬೈಂಬಂಗ್ ಪೂರ್ವಕ್ ನೆಟ್ಟಿತ್ ಸುತ್ತಮುತ್ತ ನೋಟಣೆ ಕೈ ತಿರಿ ಬೊಳಿ ಕಂಡತ್. ಕಾಟಾಳ ಬೊಳ್ಳುನ ತಟ್ಟಿತ್ ವರ್ಕ್ ಎಪ್ಪಚಿ. ಕಾಟಾಳಬೊಳ್ಳು ನೋಟಣೆ ಕೈತಿರಿ ಬೊಳ್ಳು ಕಂಡಿತ್ ಕಾಟಾಳಂಗ್ ಗೊತ್ತಾಚಿ. ಇದಲ್ಲಾ ತಾವು ಕರ್ಣೆಂಬಾವು ಕೆಜ್ಜ ಪಣೆಂದ್ ಗ್ಯಾನ ಮಾಡಿತ್ ಪೊನ್ನಪ್ಪೆಂಡ ಕೂಡೆ ಎಣ್ಣೆಚಿ. ನಿಂಗಡ ಮಂಡೆ ತುಣಿ ಗೆಜ್ಜೆತಂಡೂ ತಾರೀಂದ್ ಕೇಟಂಡ್ ಮಂದ್‌ರ ನಡುಲ್ ತಂಡ್‌ನ ಊರೋಂಜಿ ಪಾನಿ ಮಂಡೆಕೆಟ್ಟ್‌ನ ಆಂಡ ಮೇಲೆ ಬೆಪ್ಪಂಜಿ ಪೊನ್ನಪ್ಪನೂ ಕಾಟಾಳನೂ ಕಾಡ್‌ರ ಒಳಿಯ ಸುಗ್ಗೀರ್ತ್.

ಇನ್ನನೆ ಇಪ್ಪಕ ತಾವು ಕರ್ಣಿಯಂಡ ಕಳ್ಳ ಪಡೆಮಂದ್‌ರ ನಡುಲ್ ಕಾಂಬಂಜ ಪಾನಿ ಕೆಟ್ಟಿಕ್ ಸಾಲ್ ಸಾಲ್ ಬೊಡಿ ಬೆಚ್ಚಿತ್. ಪೊನ್ನಪ್ಪನೂ ಪೊನ್ನಪ್ಪೆಂಡ ಕೂಟಾಳಾರ ಪಕ್ಕ ಪೋಪಕ್ ಕಳ್ಳ ಪಡೆಯಾಳಿಯಕ್ ಪೋಡಿ ಇಂಜತ್. ಎನ್ನಂಗಣ್ಣೆಚೇಂಗಿ ಅವು ದಂಡಾಳ್ ಮಂತ್ರ ತಂತ್ರ ಪಡ್ಡಿತ್ ಪತ್ತಾ ಕೂಟ್ ಮೂರ್ತಿಯಳ ಕೈಲಡ್ಡಿಯಂಡಾನಗುಂಡ್ ಕಳ್ಳ ಪಡೆ ಪೋಡಿ ಕಳಿಪಂಜತ್. ಇನ್ನನೆ ಇಪ್ಪಕ ಪೊಲ್‌ಂದ ಪಿಂಞ ಪಕ್ಕ ಪೋಯಿ ನೋಟೋಕ್ ಮಂಡೆ ತುಣಿಕ್ ಚಿಲ್ಲ್ ಮದ್‌ದ ಪಟ್ಟಿತಿಂಜತ್. ಚಾಣ ಕೆಟ್ಟಿ ಕಳ್ಳ ಪಡೆ ಕರ್ಣೆಂಬಾವುಕ್ ಈ ಸುದ್ದಿನ ಅರ್ಪಿಚಿ. ಕರ್ಣೆಂಬಾವು ನಾಲ್ ದಿಕ್ಕಕ್ಕೂ ಗೂಡಾಚಾರಂಗಳ ಅಯಿಚತ್. ಚಂಗಾಂದಿಯೂ ಪಾಲೇರಿಕ್ ಪೋಪಂಜಿ ಅಂದ್ ಬಾವಂಜ ಕೊಡಗ್ ರಾಜಂಡ ಕೂಡೆ ಈ ಸುದ್ದಿನ ಎಣ್ಣೆಚಿ. ಕರ್ಣೆಂಬಾವುರ ಮೇಲೆ ಮಿಂಞಂಜಿಯೆ ಪಗೆ ಇಂಜ ಕೊಡಗ್ ರಾಜನ್ ಅಂಬಿನೂರ್ ಅರಮನೆ ಪಾಲೆಯಳ ಕಾಕಿ ಕೂಟೋಂಜ ಕುಟ್ಟಿ ಪಾಲೆ ಮಾಯಿಲನ ದಂಡ್ (ಸೇನೆಕ್) ದಳವಾಯಿತ್ ಮಾಡೊಂಜಿ

ಪೊನ್ನಪ್ಪಂಗೂ ಪೊಂಬುಡಿರ ಒಡಿಕತ್ತಿ, ಕುತ್ತುವೊಕ್ ಗೆಜ್ಜೆತಂಡ್, ಬೊಡಿ ಬೆಪ್ಪಕ್ ತೋಕ್ ಕೊಡ್‌ಪಂಜಿ ಪೊನ್ನಪ್ಪಂಡ ಮುಂದಾಳ್‌ತನತ್ತವು ಕಣೆಂಡ ಪಡೆ ಪೋಪಕ್ ಕೊಡಗ್ ರಾಜ ಅಯಿಚತ್. ಪಾಲೇರಿಂಜ ಪೊರ್ಟಿ ಸೈನ್ಯ ಕಗ್ಗೋಡ್‌ಕ್ಕಾಯಿತ್ ಮೂರ್ನಾಡ್ ಕಡೆಂದಿತ್ ಮುತ್ತಾಮುಡಿ ಪೊಳೆಲ್ ಕೈ ಬಾಯಿ ವಲಂಬಿತ್ ಕೆಟ್ಟಂಗೊಳ್ ಉಂಡಿತ್ ಅಲ್ಲಿಂಜಿ ಪೊರ್ಟಿವು ಬಲೆಂಬೇರಿಲ್ ಕಾವೇರಿ ಪೊಳೆಲ್ ಕುಳ್ಳಿತ್ ಪೊನ್ನಪ್ಪ ಬೈಂಬ ಕುಟ್ಟಿ ಪಾಲೆ ಮಾಯಿಲಂಗ್ ಎಣ್ಣೆಚಿ. ಅಂಜೂರಾಳ್ ಪಡೆಯಾಳಿಯಳ ಕಾಕಿಯಂಡ್ ಪೋಯಿತ್ ಕುಯ್ಯಂಗೇರಿ ನಾಡಲ್ ಪಾಲೂರ್ ಹರಿಶ್ಚಂದ್ರ ಎಂಗಳ ಕಾತಂಡಿರಿ. ನಂಗ ದಂಡಾಳೂ ಕುಟ್ಟಂಚೆಟ್ಟಿರ ನಾಡ ಮಾವಿನರ ಮನೆಕ್ ಪೋಯಿತ್ ಅಲ್ಲಿ ಒಳ್‌ಂಜಿತ್ ಇಂದ್ ಇದ್ ಪೊಲ್ವೆಕ್ ನಿಂಗಡ ಕೂಟಕ್ ಬಂದಿತ್ ಕೂಡುವಾಂದ್ ಪೊನ್ನಪ್ಪ ಅಪ್ಪಣೆ ಮಾಡ್‌ಚಿ. ಅಪ್ಪಣೆ ಪಡ್‌ಂದ ಕುಟ್ಟಿ ಪಾಲೆ ಮಾಯಿಲ ಅಂಜಾರ್ ಪಡೆಯಾಳಿಯಳ ಕೂಟಿಯಂಡ್ ಪಾಲೂರ್ ಹರಿಶ್ಚಂದ್ರಕ್ ಪೊರ್ಟಿತ್.

ಇನ್ನನೆ ಇಪ್ಪಕ್ಕ ತಾವುನಾಡ್ ಪಾಳೇಗಾರ ಕಣೆಂಬಾವು ತಾನ್ ಅಯಿಚ ಗೂಢಾಚಾರಂಗಳಂಗುಂಡ್ ಪೊನ್ನಪ್ಪಂಡ ಪೋಕರ ಜಾಡ್‌ನ ಅಂಜಂಡ್ ಪೊನ್ನಪ್ಪನ ಚದಿಪಕ್ ಸೂತ್ರ (ಕೆಣಿ) ಕಂಡ್ ಪುಡಿಚೆಂಡಂಜಿಚತ್. ಪೊನ್ನಪ್ಪ ಏದ್ ಬಟ್ಟೆಕ್ಕಾಲೆ ಬಪ್ಪಾಂದಂಜಂಡ್ ಚದಿಪಾಂಗಾಯಿತ್ ಪನ್ನೆರಂಡಚ್ಚಿ ಪೊನ್ನರ ಏಳ್ ತೊರೆ ಪೊಮ್ಮಾಲೆನ ಗೂಢಾಚಾರಂಡ ಕೈಲ್ ಕೊಡ್‌ಪಂಜಿ ಕೀ ಕಂಡ ಮುದುಕಿಕ್ ಕೊಡ್‌ತಿತ್ ಕಾಚಿಂಗಳ್ಳಿಕ್ ಕರ್ತ ಉಮ್ಮತ್‌ರ ರಸ ಕೂಟಿತ್ ಪೊನ್ನಪ್ಪಂಗೂ ಪೊನ್ನಪ್ಪಂಡ ಚಂಗಾದಿಕೂ ಕಳ್ಳ ಕುಡಿಪಕ್ ಕೊಡ್ಲೊಂಡೊಂದ್ ಗೂಢಾಚಾರಂಡ ಕೂಡೆ ಎಣ್ಣೆತಯಿಚತ್. ಗೂಢಾಚಾರಂಗ ಕುದುರೆರೆ ಬೆನ್ನಲ್ ಪೋಯಿತ್ ತಾವು ಕಣೆಂಬಾವು ಎಣ್ಣೆನ ಸುದ್ದಿನ ಕೀಕಂಡ ಮುದುಕಿಕ್ ಎಣ್ಣೊಂಜಿ ಪನ್ನೆರಂಡಚ್ಚಿ ಪೊನ್ನರ ಏಳ್ ತೊರೆ ಪೊಮ್ಮಾಲೆನ

ಮುದುಕಿಕ್ ಕೊಡ್ತತ್. ಮುದುಕಿಕ್ ಪೊಮ್ಮಾಲೆ ಕ್ಕಟ್ಟುವೊದು ಭಾರೀ ಕುಷಿ ಆಚಿ. ಪೊನ್ನಪ್ಪ ಬಕ್ಕಣೆ ಎಲ್ಲಾ ತಯಾರ್ ಮಾಡಿತ್ ಬೆಚ್ಚಂಡತ್. ಇನ್ನನೆ ಇಪ್ಪಕ ಪೊನ್ನಪ್ಪನೂ ಪೊನ್ನಪ್ಪಂಡ ಚಂಗಾದಿಯೂ ಕೀ ಕಂಡ ಮನೆರ ಬರಿಕಾಯಿತ್ ಕಡ್ಪಕ, ಮುದುಕಿ ಪಾರಕಾತಿತ್ ಪೊನ್ನಪ್ಪನ ಕಾಂಬದೂ ಮಮ್ಮಾಯ ಪಂದರ್ಪತ್. ಉಯಿ.... ಕುಂಞಿ ನೀನ್ ಊರ್ ಬುಟ್ಟ್ ಪೋನಾನ ಅಂಜಿತ್ ನಾನ್ ಕೂಳ್ ನೀರ್ ಬುಟ್ಟಿತ್ ಪೆರ್ತ್ ದುಃಖಿತ್ ಇಂಜ. ಇಂದ್ ಬಕ್ಕೂ, ನಾಳೆ ಬಕ್ಕೂಂದ್ ಗ್ಯಾನ ಮಾಡಿಯೆಂಡಿಂಜ. ನೀನ್ ಇನ್ನನೆ ಮಾಡೊಕ್ಕಾಗಿಂಜಿಲೆ. ನಾಡ ಕುಂಞಿ ಬೋರೆ ಅಲ್ಲ, ನೀನ್ ಬೋರೆ ಅಲ್ಲ. ನಾಡ ಕೆಲ ಉಂಜಿ ಪೋಚಿ. ನೀನ್ ಮನೆ ಬುಟ್ಟದ್ ಕೇಟಿತ್ ಅಂದೆಂಜಿ ಇಲ್ಲಿಕೆತ್ತಣೆ ಪೆರ್ತ್ ಬೇಚಾರತಿಂಜ. ಉಂಡಿತ್ ಕುಡ್ಡಿತ್ ಪೋಲುಂದ್ ಬಾಂದೆಣ್ಣಿತ್ ಕೈಪುಡಿಚೆಂಡ್ ಮನೆಕ್ ಕಾಕಿಯಪೋಯಿತ್ ಚೆಂಬ್ ನೀರ್ ಬೆಚ್ಚತ್. ಈ ಕಪಟತ್ನರಿಯತ ಪೊನ್ನಪ್ಪನೂ ಪೊನ್ನಪ್ಪಂಡ ಚಂಗಾದಿಯೂ ಕೀಕಂಡ ಮನೆಲ್ ಕಾಲ್ ಮೂಡ್ ಕತ್ತಿತ್ ಉಂಬಕ್ ಅಲ್ಲತ್. ಕೀಕಂಡ ಮುದುಕಿ ಅವು ದಂಡ್ ಬಾಲಂಗಕ್ ಕೂಳ್ ಇಟ್ಟ್ ಕೊಡ್ಡಿತ್ ವಣ್ಣ್ ಮೀನ್ ಕರಿ ಇಟ್ಟ್ ಕೊಡ್ತತ್. ಕರ್ತ ಉಮ್ಮತಂಡ ರಸ ಕೂಟ್ನ ಕಾಚಿಂಗಳ್ಳು ಬೂಕಿ ಕೊಡ್ತತ್. ಕಳ್ಳ ಚೆನ್ನ ಉಕ್ಕೋಚಿ. ಕುಂಞಿ ಬಲ್ಲೋರ್ ಚಾಯಿ ಇಲ್ಲೆಂದ್ ಮಮ್ಮಾಯ ಪಂದರ್ಪತ್. ಅದ್ ಕೇಟ ಪೊನ್ನಪ್ಪ ಸಾರವಿಲ್ಲೆ ತಾಯವ್ವಾಂದೆಣ್ಣಿಂಡ್ ಪೊನ್ನಪ್ಪನೂ ಪೊನ್ನಪ್ಪಂಡ ಚಂಗಾದಿಯೂ ತೊಂಬೆ ಮೀಂದ ಕಳ್ಳ ಕುಡಿಚತ್. ಇನ್ನನೆ ಇಪ್ಪಕ ಕರ್ಣೆಂಬಾವುರ ಗೂಢಾಚಾರಿಯ ಮನೆರ ಕ್ಕಡಿಕೆರ ಬರಿಲ್ ಒತ್ತಿ ನಿಂದಿತಿಂಜತ್. ಮುದುಕಿನ ಕೈ ಸನ್ನೆ ಮಾಡಿತ್ ಕಾಕಿತ್ ಎನ್ನಾಚಿಂಂದ್ ಕೇಟತ್. ಮುದುಕಿ ಗೂಢಾಚಾರಂಗ್ ಮದ್ಚಿ ಬಂದ ಆನೆಕ್ ಚಂಗೋಲೆ ತಳ್ತಯೆ ಕೈ ಪುಡಿಗೊಂಡೋಳಿಂದೆಣ್ಣಿ ಚಿ.

ಇನ್ನನೆ ಇಪ್ಪಕ ಪೊನ್ನಪ್ಪನೂ ಕಾಟೋಳ ಬೊಳ್ಳು ಉಂಡಿತ್ ಕುಡ್ಡಿತ್

ಕೀಕಂಡ ಮನೆಂಜಿ ಜೂಂಗಿ ಜೂಂಗಿ ಪೊರ್ಟಿವು ಕುಟ್ಟಂಚೆಟ್ಟಿರ ಓಣಿಕ್ ಎತ್ತುವೊಕ ಕರ್ತ ಉಮ್ಮತ್ತ ಕೂಟ್‌ನ ಕಕ್ಕುಡಿನಂಗುಂಡ್ ತಾರಾಮಾರ ಮಂಡೆಕ್ ಪತ್ತಿತ್ ಬಾಯಿಕ್ ಬಂದನ್ನೆಕೆ ಬಚ್ಚೆಂಡ್ ಓಣಿ ಮರಿಯೊಕ ಈ ಕೂತ್‌ನ ಕೇಟಿತ್ ಕುಟ್ಟಂಚೆಟ್ಟಿರ ಚೋಮವ್ವನೂ ಚೋಮವ್ವಂಡ ಮೋವ ಉಮ್ಮಕ್ಕನೂ ಓಡಿ ಬಂದಿತ್ ನೋಟಣೆ ಪೊನ್ನಪ್ಪನೂ ಅವಂಡ ಚಂಗಾದಿಯೂ ಓಣಿಲ್ ತೌಡಿ ಕಳಿಪಾನ ಕಂಡಿತ್ ಪೊನ್ನಪ್ಪನೂ ಕಾಟೋಳ ಬೊಳ್ತುನೂದಂಡಾಳೂ ಕೂಡಿ ತಬ್ಬಿಯೆಂಡ್ ತಾಂಗಿಯಂಡ್ ಪೋಯಿತ್ ಕನ್ನಿ ಮೂಲೆ ಕೋಂಬರೆಲ್ ಜೂಕ್‌ಕಟ್ಟ್ ಮೀದಲ್ ಪೊನ್ನಪ್ಪನ ಬುದ್ಧವೊಕ್ ಆಕಿತ್ ಕಾಟೋಳ ಬೊಳ್ತುನ ಮೆಯಿಪ ಕೊಟ್ಟಲ್ ಬುದ್ಧೋವಕ್ ಮಾಡ್‌ಚಿ. ಅದೇ ನೇರಕ್ ಚೋಮವ್ವಂಗ್ ತಿಂಗ ಪೊಲೆ ಬಂದಿತ್ ಮನೆ ಬುಟ್ಟ್ ನೀಂಗಿತ್ ಕುಳಿಪ ಗುಡ್ಡತ್ ಕೂಡ್‌ಚಿ.

ಪೊನ್ನಪ್ಪನೂ ಕಾಟೋಳ ಬೊಳ್ತು ಕಳ್ಳ ಚೊಕ್ಕಲ್ ಬೋದಕೆಟ್ಟ್ ವರುವೊಕ್ ಕೂಡ್‌ಚಿ. ಇನ್ನನೆ ಇಪ್ಪಕ ತಾವು ಕರ್ಣೆಂಬಾವುರ ಗೂಢಾಚಾರಿಯ ಕಳ್ಳ ಪಡೆಕ್ ಅರೀಪ್ ಕೊಡ್ತತ್. ಬಾಳೆತೋಟಕ್ ತೂಡ್ ಬೊಳಿ ಕಂಡಿತ್ ಕಳ್ಳ ಪಡೆ ಬಂದಿತ್‌ಂದ್ ಗೊತ್ತಾಯಿತ್ ಗುಡ್ಡತ್‌ಂಬ ಚೋಮವ್ವ ಇರ್ಟಿತ್ ತೌಡಿಯೆಂಡ್ ತೌಡಿಯಂಡ್ ಮನೆಕ್ ಪೋಯಿತ್ ಕೊಡಿಕೆರೊಳಿಯ ಉಮ್ಮಕ್ಕನ ಕಾಕಿತ್ ಪೊನ್ನಪ್ಪನ ಕಾಕ್ ಕಳ್ಳಪಡೆ ಬಂದಿತ್. ಇದೆಲ್ಲಾ ತಾವು ಕರ್ಣೆಂಬಾವುರ ಕೇಣೆಂದ್ ಕಾಂಬ ಪೊನ್ನಪ್ಪನ ಚದಿಪಕ್ಕ ಮಾಡ್‌ನ ತಂತ್ರಾಂದೆಣ್ಣ್ ಚಿ. ಇದ್‌ನ ಕೇಟ ಉಮ್ಮಕ್ಕ ಬೊತ್ತಿತ್ ಪೊನ್ನಪ್ಪನ ಕಾಕ್‌ಚಿ. ತಟ್ಟಿತ್ ಕುಲ್ಕಿತ್ ಎನ್ನ ಮಾಡ್‌ಚೆಂಗೂ ಪೊನ್ನಪ್ಪ ಎದ್ದಾಲೆ. ಕೀ ಕಂಡಚ್ಚಿ ಮುಂಡೆರ ಕರ್ತ ಉಮ್ಮತ್ತ ಕೂಟ್‌ನ ಕಕ್ಕುಡಿನಂಗುಂಡ್ ಬೋಧ ಕೆಟ್ಟ್ ವರ್ವೊಂಜತ್. ಆಚೆಂಗಿಯೂ ಉಮ್ಮಕ್ಕ ಎನ್ನೆಲ್ಲೊ ಮಾಡಿತ್ ಪೊನ್ನಪ್ಪನ ಎಪ್ಪಿತ್ ಈ ಸುದ್ದಿನ ಎಣ್ಣ್ ಚಿ. ಪೊನ್ನಪ್ಪಂಗ್ ಅಕ್ಕ ಗೊತ್ತಾ ಚಿ. ಇದೆಲ್ಲಾ ಕೀ ಕಂಡ ಅಜ್ಜಿ ಮುಂಡೆರ ಕಕ್ಕುಡಿರ ದೋಪಾಂದಂರ್ಚಿತ್ ಮದ್ದ್

ತಿಂದ ಮದ್ದಾನೆರ ಮಾದ್ರಿ ಎದ್ದಾ ನಿಪ್ಪಂಜಿ ಕೊಕ್ಕೆಲ್ ತೂಕಿತ್ತಿಂಜ ಕೌಂದಿನ ಬೆನ್ನಾನ್ ಕೆಟ್ಟಿತ್ ಉತ್ತಿಬೆಚ್ಚ ತೊಡಂಜಾನ ಅರೆಕೆಟ್ಟಾ ಕಟ್ಟಿತ್ ಪೊಂಬುಡಿರ ಒಡಿಕತ್ತಿನ ತೊಡ್ಜಚ್ಚೆರ ಒಳಕೆಟ್ಟಾ ಕಟ್ಟಿತ್ ರಾಜ ಕೊಡ್ತ ತೋಕ್ ಕೈಲಾಯೆ ಕಯ್ಯಾಲೆಕ್ ಕಡ್ಂದತ್. ಕಯ್ಯಾಲೆಕ್ ಕಡ್ಕಣೆ ಬಾಳೆ ತೋಟತ್ಂಜಿ ಬೊಡಿ ಪೊಟ್ಟಾಚ್ಚಿ. ಅಕ್ಕಣೆಕ್ ಪೊನ್ನಪ್ಪ ಕೂಡೆ ಬೊಡಿ ಬೆಚ್ಚತ್. ಅಕ್ಕಣೆಕ್ ಕಳ್ಳ ಪಡೆ ಬಾಳೆ ತೋಟತ್ಂಜ ಪಟ್ಟಿಕ್ ಬುದ್ದತ್. ಇದ್ನ ಕಂಡಿತ್ ಪೊನ್ನಪ್ಪ ತೊಡ್ಂಜಂಜ ಒಡಿಕತ್ತಿ ಎಡ್ಪಂಜಿ ಕಯ್ಯಾಲೆಂಜಿ ಪಟ್ಟಿಕ್ ಕೊಪ್ಪಾಚ್ಚ ಪಾರ್ಚಿ. ಪಾರ್ನ ಪಾರಲ್ಲ್ ಕಲ್ಲಾರ ಕಂಬಿ ಪಾತಿಕ್ ಕಾಲಾಚಿ. ಪೊನ್ನಪ್ಪಂಡ ಓರ್ ಕಾಲಕ್ ಊನ ಬಂದ್ತ್. ಆಚಿಂಗಿ ಪೊನ್ನಪ್ಪ ಬೊತ್ತಾಲೆ. ಮಂತ್ರ ಜಪಿಚಿಟ್ಟಿತ್ ಬಾಳೆ ಬೇಂಗ್ನೆನ್ನೆ ಕೆ ಪೊನ್ನಪ್ಪ ಬೈಂಬ ಕಳ್ಳ ಪಡೆ ಬಾಲಂಗಳ ಬೇಂಗಿ ಬೇಂಗಿ (ತರ್ಚಿ ತರ್ಚಿ) ಇಟ್ಟಿತ್. ಈನಗುಂಡ್ ಕಳ್ಳಪಡೆ ಪೊನ್ನಪ್ಪಂಡ ರಭಸಕ್ ಬಯ್ಯಕ್ ತೆಂಗ್ಚಿ. ಈಂಡಡೆಯ ಬಾಳೆ ತೋಟತ್ ನಿಂದಿತ್ತಿಂಜ ಬಿಲ್ಲೊ ಅಂಬ್ಕಾರಡ ಪೈಕಿ ಚೋನಂಗಡ ಪಡೆಯೂ ಇಂಜತ್. ಅಯಿಂಗಡ ಪೈಕಿ ಒಬ್ಬ ಚೋಡ್ ಅಂಬ್ನ ಬಿಲ್ಲೊಕ್ ಕೊಳ್ಳಿತ್ ಬಾಳೆ ತೋಟತ್ತೊಳ್ಲೆ ಒಳಚಂಡ್ ಮೊರ್ಟಾ ಬಲ್ಲಿತ್ ಪೊನ್ನಪ್ಪಂಗ್ ಅಂಬ್ ತೊಡ್ ಬುಟ್ಟಿತ್. ಬೈಟ್ ನೇರ ಅನಾನಗುಂಡ್ ಈ ಚಧಿ ಪೊನ್ನಪ್ಪಂಗ್ ಗೊತ್ತಾಯಿಲೆ. ಬುಟ್ಟಿ ಈ ದಂಡ್ ಅಂಬ್ ಪಡ್ಚದೂ ಪೊನ್ನಪ್ಪಂಡ ಪಾದಿ ಬಲ ಕುಂದಿ ಪೋಚಿ. ಅಕ್ಕಣೆಕ್ ಪೊನ್ನಪ್ಪ ಮಂತ್ರ ಜಪಿಸಣೆ ಪತ್ತ್ಕೂಟ ಪಾತಾಳ ಬಂದ್ತ್. ಇದ್ ಕಾಂಬದು ತಾವುನಾಡ್ ಕರ್ಣಯ್ಯಂಡ ಕಳ್ಳ ಪಡೆ ಬೊತ್ತಿತ್ ಬೊಂಡಿತ್ ಎಲ್ಲಾರೂ ಓಡಿರ್ತ್ತ. ಓಡೊಕ್ ಚೆನ್ನಂಗೇ ಜನ ಬಾಕಿ ಇಂಜತ್. ಬಾಕಿ ಉಳ್ಳೆನ ಪೊನ್ನಪ್ಪ ಕೆತ್ತಿತ್ ಶೂರ್ ಕೆಜ್ಜಿತ್ತಿಂಜತ್.

ಈಂಡಡೆಯೂ ಪೊನ್ನಪ್ಪಂಗ್ ಅಂಬ್ ಬುಟ್ಟಿ ನೊಂಬಲ ಕಾಲಕ್ ಊನ ಬಂದ ನೊಂಬಲ ಚೋರಾಯೆಂಡಿಂಜತ್. ಇನ್ನೆ ಇಪ್ಪಕ ಪೊನ್ನಪ್ಪಂಡ

ಪಚ್ಚಡತ್ತ್ ಪೋಣ್ಣ್ (ಚೂಳೆ) ಉಮ್ಮಕ್ಕ ಇದಾನೆಲ್ಲಾ ಕಾಡಿಕೆರೊಳಿಯ ನೋಟಿಯೆಂಡಿಪ್ಪಕ ಕಂಡಿತ್ ಬೊತ್ತಿಯೆಂಡಿಂಜತ್. ಪೊನ್ನಪ್ಪಂಡ ಮಾಂವಿ ಚೋಮವ್ವ ಗುಡ್ಡತಿಂಜವ ಬೊತ್ತಿತ್ ಬಾಳೆ ತೋಟತ್ಲ್ ಇರ್ಟತ್ತ್ ತೌಡಿಯೆಂಡ್ ಪೋಯಿತ್ ಕುಟ್ಟಂಚೆಟ್ಟಿರ ಆಲ್ಮರತ್ರಡಿಲ್ ತಾಂಗಿ ಅಳಾತಂಡ್ ಮಕ್ಕಿ ಸಾಸ್ತಾವು ದೇವಳ ಮನಸ್ಸಲ್ ಗ್ಯಾನ ಮಾಡಿಯೆಂಡ್ ಇರ್ ಪೊಲ್ಚಿ. ಇನ್ನನೆ ಇಪ್ಪಕ ಪೊಲ್ಂದ ಬೊಳಿಕ್ ಪೊನ್ನಪ್ಪಂಡ ಮಾಂವಿ ಚೋಂದವ್ವ, ಅವಡ ಮೋವ ಉಮ್ಮಕ್ಕನೊ ಪೊನ್ನಪ್ಪನ ತೇಡಿ ಕಳಿಕಣೆ ಕುಟ್ಟಂಚೆಟ್ಟಿರ ವಾಡಲ್ ನೆಕುವರ್ ಶಬ್ಬ ಕೇಟಿತ್ ಚೋಂದವ್ವನೂ, ಉಮ್ಮಕ್ಕನೂ ಓಡಿ ಪೋಯಿತ್ ನೋಟಣೆ ಪೊನ್ನಪ್ಪ ತಾಳ ಮೇಳ ಕಳಿಪಾನ ಕಂಡಿತ್ ಕೀಕಂಡ ಅಜ್ಜಿ ಮುಂಡೆಕ್ ಶಾಪ ಇಟ್ಟಂಡ್ ಪೊನ್ನಪ್ಪಂಗ್ ಮದ್ದ್ ಮರ ಮಾಡಿತ್ ಪಟ್ಟಿ ಅಂಬ್ನ ಬಲ್ಲಿತ್ ಸೇವೆ ಕೆಯ್ಯಣೆ ಕುಟ್ಟೊವೊ ಕೊಟ್ಟಲ್ ಬೋಧ ತಪ್ಪಿ ಒರೊಂಜ ಪೊನ್ನಪ್ಪಂಡ ಕೂಟಾಳ್ ಕಾಟೋಳ ಬೊಳ್ತುಕ್ ವರ್ಕ್ ನೆಟ್ಟಿತ್ ನೋಟಣೆ ಕುಟ್ಟಂಚೆಟ್ಟಿರ ಪಟ್ಟಿಲ್ ತಾವು ಕರ್ಣಯ್ಯಂಡ ಕಳ್ಳಪಡೆರ ಸೂರೆ ತಾರಮಾರ ಬುದ್ಧಿತಿಂಜತ್.

ಇದಾನ ಕಂಡಿತ್ ಕಾಟೋಳ ಬೊಳ್ತುವಾಂಡ ಭಜಾರಿ ಪೊನ್ನಪ್ಪನ ತೇಡಿ ಕಳಿಕಣೆ ಸಾಲೋಡಲ್ ಅಂಜಿತ್ ಏರ ದುಃಖಿತ್ ಮೊರ್ಟಂಡ್ ಓಡಿ ಪಾರಿ ಪೋಯಿತ್ ಪೊನ್ನಪ್ಪನ ತಬ್ಬಿಯೆಂಡ್ ಮೊರ್ಟತ್. ನಿಂಗಕ್ ಕಷ್ಟ ಬಂದ ಕಾಲತ್ ನಾಕ್ ಏತೊಕಯ್ಯತಾನಾಂಗ್ ನಾನ್ ಈ ಲೋಕತ್ ಇಂಜಿತ್ ಸುಖಿ ಇಲ್ಲೆ. ಇದೆಲ್ಲಾ ಕೇತರೆನ ತಾವು ಕರ್ಣಯ್ಯನೂ ಕೀಕಂಡ ಅಜ್ಜಿ ಮುಂಡೆಯು ಕೆಜ್ಜ ಚಡಿ. ಕೀಕಂಡ ಅಜ್ಜಿ ಮುಂಡೆರ ಮನೆರ ಬಾಯಿಕಂಡಿಕ್ ಕಾರೆಮುಳ್ಳಾ ಅಡ್ಕೊಂಡು (ಕಪ್ಪಲೆಪಡಿ) ಅಯಿಂಡ ಮನೆಲ್ ಇಂದ್ ತೊಟ್ಟ್ ಮಿಂಗಳಾಕ್ ಒಂದಲ್ಲತೆ ದಂಡಾಂಡಾಂದ್ ಮಕ್ಕಿ ಸಾಸ್ತಾವುನ ಮನಸ್ಸಲ್ ತೊತ್ತಿತ್ ಪೊನ್ನಪ್ಪನೂ ಕಾಟೋಳ ಬೊಳ್ತು ನೆಲಪೊಜ್ಜಿ ಶಾಪ ಇಟ್ಟಿತ್.

ಪೊನ್ನಪ್ಪನ ಕುಟ್ಟಂಚೆಟ್ಟಿರ ಸಾಲೋಡೆಂಜಿ ಎಲ್ಲಾರೂ ಕೈಪುಡ್ಡಿತ್ ಕೊಂಡ್

ಬಂದಿತ್ ಕುಟ್ಟಂಚೆಟ್ಟಿರ ಮಚ್ಚಿ ಮನೆರೊಳ್‌ಲಾ ಜೂಕ್‌ಂಗಟ್ಟಲೆ ಬುದ್ಧವೊಕ್ ಮಾಡ್‌ಚಿ. ಅಂದ್‌ಂಜ ಪನ್ನರಂಡ್ ದಿನಕ್ಕೆತ್ತಣೆ ಪೊನ್ನಪ್ಪಂಗೆ ಮದ್ದಾ ಮರ ಮಾಡ್‌ಚಿ. ಏದು ಮದ್ದಾಲೂ ಗುಣ ಕಂಡ್‌ಲೆ. ಪನ್ನರಂಡನೇ ದಿನ ಪೊನ್ನಪ್ಪ. ಈ ಲೋಕ ಬುಟ್ಟತ್. ಕಾಟೋಳ ಬೊಳ್ಳು ಈ ದುಃಖತ್ ನಾಡ ಚಂಗಾದಿ ಇಲ್ಲತ ಪಿಂಞ ನಾನಿಂಜಿತ್ ಸುಖ ಇಲ್ಲೆಂದ್ ಗ್ಯಾನ ಮಾಡಿತ್ ಮಲಾರ ಬುದ್ಧಂಡ್ ಬಿಲ್ಲ್‌ಕ್ ಅಂಬ್‌ನ ಕೆಣ್ಣಿತ್ ಬಿಲ್ಲ್‌ನ ಕಾಲ್‌ಕ್ ಕೆಣ್ಣಿತ್ ಮಾರ್‌ಟ್ ಬಲ್ಚಿತ್ ಅಂಬ್ ಬುಟ್ಟಂಡ್ ಚತ್ತತ್. ಇನ್ನನೆ ಇಪ್ಪಕ ಪಾಲೂರ್ ಹರಿಶ್ಚಂದ್ರತ್ ಕಾತಳ್ಳ ಕುಟ್ಟಪಾಲೆ ಮಾಯಿಲೆ ಅಞ್ಞಾರ್ ಅಳಪಡೆಯಳ ಪಾಲೇರಿಕ್ ಅಯಿಂಜಿ ಪೊನ್ನಪ್ಪನೂ ಕಾಟೋಳ ಬೊಳ್ಳು ಚತ್ತ ದುಃಖತ್ ದೇಶಾಂತರ ಪೋಯಿತ್ ಕಾಳ್‌ಕಾಟ್ ಬೊಳ್ಳು ಎಣ್ಣುವಂವಂಡ ಅತ್ತ ನೋಟುವಕ್ ಕೂಡಿಯೆಂಡತ್. ಇನ್ನನೆ ಇಪ್ಪಕ ಪೊನ್ನಪ್ಪಂಡೂ ಕಾಟಾಳ ಬೊಳ್ಳುರ ದಂಡ್ ಕೂಳಿಯಳೂ ಪತ್ತ್‌ಕೂಟ ಪಾತಾಳ ಮೂರ್ತಿಯಡ ಕಯಿಲಾಯೆಂಡ್ ನಾಡ್ ನಾಡ್ ಸುತ್ತಿಯೆಂಡ್ ಮಾಲೋಂಗಳ ತೊಟ್ಟಂಡ್ ಉಪದ್ರ ಕೊಡ್ಡಕ್ ಸುರು ಆಯೆಂಡತ್. ಎಲ್ಲಿ ನೋಟ್ ಚಿಟ್ಟಕ್ಕೊ ಪೊನ್ನಪ್ಪಂಡ ಕೂಳಿ ತೊಟ್ಟಂಡತ್‌ಂದೆಣ್ಣು ವೊಕ್ಕಾಯೆಂಡತ್.

ನಾಡ್‌ಕೂ, ಊರ್‌ಕೂ ಇದ್‌ನಂಗುಂಡ್ ಭಾರೀ ಕಷ್ಟ ಪಡೋಕ್ಕಾಚಿ. ಇದ್‌ನ ಇನ್ನನೆ ಬುಟ್ಟಕ ಆಯಿಲೆಂದೆಣ್ಣಿತ್ ನಾಡ್‌ಕ್ಕಾರೆಲ್ಲ ಕೂಡಿತ್ ಓರ್ ತೀರ್ಮಾನಕ್ ಬಪ್ಪಂಜಿ ಮಲಯಾಳತ್ ಕಾಳ್‌ಕಾಟ್‌ಂಜಿ ತಂತ್ರಿಯಪ್ಪಂಗಳ ಕಾಕಿತ್ ಈ ವಿಷಯ ಎಣ್ಣೊಂಜಿ ತಂತ್ರಿಯಪ್ಪನೂ, ನಾಡ್‌ಕಾರಳೂ ಓರ್ ಒಪ್ಪಚಾರಕ್ ಬಾತ್. ಪೊನ್ನಪ್ಪನೂ ಪೊನ್ನಪ್ಪಂಡ ಚಂಜಾದಿ ಕಾಟೋಳ ಬೊಳ್ಳುನೋ ತಂತ್ರಿಯ ಅಡ್ಕಿತ್ತಪ್ಪನ್ನೆಕೆಯೂ ನಾಡ್‌ಕಾರೆಲ್ಲಾ ಕೂಡಿತ್ ತಂತ್ರಿಯಪ್ಪಂಗೆ ತಮ್ಮಾನ್ ರೂಪತ್ ನೂರಚ್ಚಿರ ಪೊನ್ನ ಕೊಡ್‌ಪನ್ನೆಕೆಯೂ ತೀರ್ಮಾನಕ್ ಬಾತ್. ಅಂದ್‌ಂಜಿ ತಂತ್ರಿಯಪ್ಪ ಏಳು ದಿನಕ್ಕೆತ್ತಣೆ ಪೈಪಟ್ಟಣಿ ನಿಂದಿತ್ ಮಂತ್ರ ತಂತ್ರ ಮಾಡಿತ್ ಪೊನ್ನಪ್ಪನೂ ಪೊನ್ನಪ್ಪಂಡ ಚಂಜಾದಿ ಕಾಟೋಳ ಬೊಳ್ಳುನೋ

ಚಂಗ್‌ರೊಳ್‌ಲ ಕೂಟಿತ್ ನಾಡ್‌ಕಾರಳಂಗುಂಡ್ ನೂರಚ್ಚಿ ಪೊನ್ನಾ ಪಡ್‌ಂದಂಡ್ ಮಲೆಯಾಳಕ್ಕ ಪೋಯಿತ್ ಕಾಳೆಕಾಟ್ ಪಂಬ್‌ಲ್ ಪಾರಕಲ್ ರಡಿಲ್ ತಂತ್ರಿಯಪ್ಪ ಚಂಗ್‌ನ ಪೂತಿತ್ ಪಿಂಚಿ ಪೋಯೆಂಡತ್.

ಇನ್ನನೆ ಇಪ್ಪ ಕಾಲತ್ ಒನ್ನಾಂದ್ ಕುಟ್ಟಪಾಲೆ ಮಾಯಿಲ ಕಾಳೆಕಾಟ್ ಬೊಳ್ತುರ ಅತ್ತಳಾಟಿ ಬಂದಿತ್ ಪೊನ್ನಪ್ಪನೋ ಕಾಟೋಳ ಬೊಳ್ತುನೋ ಅಡ್ಚಿ ಬೆಚ್ಚಿ ಚಂಗ್‌ನ ಪೂತ್ ಬೆಚ್ಚಿ ಪಾರಕಲ್ ರ ಮೇಲೆ ಅಳ್ತಂಡತ್. ಅತ್ತಳ ಮೇಪಕ್ ಬುಟ್ಟಿತ್, ಅಕ್ಕಣೆಕ್ ಪಾರರಡಿಂಜಿ ದಂಡ್ ಬಾಲಂಗ್ ತಕ್ಕ ಪರವೊದ್ ಕೇಟಿತ್. ಕುಟ್ಟಪಾಲೆ ನೂಯಿಲಂಗ್ ಇದೆನ್ನತ್ತೋರ್ ವಿಶೇಷ ನೋಟನಾಂದ್ ಪಾರಕೋಲ್ ಕೊಂಡ ಬಪ್ಪಂಜಿ ಪಾರೆನ ಮರ್ಚಿತ್‌ಡುವೊಕ ಚಂಗ್ ಒಡ್‌ಂದೋಚಿ. ಚಂಗ್‌ರೊಳ್‌ಂಜಿ ಪೊನ್ನಪ್ಪನೂ ಕಾಟಾಳ ಬೊಳ್ತು ದಂಡಾಳು ಪೂರ ಬುದ್ಧಿತ್ ಕುಟ್ಟಿ ಪಾಲೆ ಮಾಯಿಲನ ಮಾಯ ಮಾಡಿತ್. ಮೂಂದಾಳುಳ್ಳ ಬಂಬಂಗ ಅಲ್ಲಿಂಜಿ ಪೊರ್ತಿತ್ ಬೇಶಲ್ ಮಕ್ಕಿ ಸಾರ್ಥಾವುಡಲ್ಲಿಕ್ ಬಂದಿತ್ ಕೇಕಿಯ ನಡಿಯತ್ ನಿಂದಿತ್ ಪೊನ್ನಪ್ಪ ಬಯಿಂಬ ಮಕ್ಕಿ ಸಾಸ್ತಾವೇ ಕೀಕಂಡ ಅಜ್ಜಿ ಮುಂಡೆ ತಾವು ಕರ್ಣಿಯುಂಡೆ ವಿಳ ತೊರೆ ಪೊಮ್ಮಾಲೆಕ್ ಆಸೆ ಪಟ್ಟಿತ್ ನನ್ನೋ ನಾಡ ಕೂಟಾಳೊ ಚದಿಚತ್. ನೀಡ ನೇರೆ ನೆಲೆ ಈ ಮುಂಡೆರ ಮನೆಕ್ ಮುಳ್ಳಕಪ್ಪಲೆ ತಾರೋಂಡೂಂದ್ ತಾಕೋಂಡ್‌ಂದ್ ಶಾಪ ಇಟ್ಟಿತ್ ದೇವಳ ಬೋಡ್‌ಚಿ. ಮಕ್ಕಿ ಸಾರ್ಥವೇ ನೀಡ ಭಾಗತ್ ನಾಕೂ ನಾಡ ಚಂಜಾದಿಯಕ್ಕೂ ಪತ್‌ಕೂಟ ಪಾತಾಳತ್ ನೆಲೆ ತರೋಂಡೂಂದ್ ಬೋಡ್‌ಚಿ. ಬೋಡಿತ್ ನೀಡ ಬಲ ಭಾಗತ್ ನೀಕೋರ್ ತೋಣಿಯಾಯಿತಿಪ್ಪಾಂದೆಣ್ಣೆಚಿ.

ಇದ್ ಕಂಡ ಮಕ್ಕಿ ಸಾರ್ಥವು ಪೊನ್ನಪ್ಪ ನೀನ್ ಎಡೆ ಬಲಭಾಗತ್ ನೆಲೆ ಎಡ್ತೆ. ನೀಡ ಚಂಜಾದಿಯಳ ನೀನ್ ಅಲ್ಲಿ ಕೂಟಿಯು. ಪತ್‌ಕೂಟ ಪಾತಾಳ ನೀಡ ಕೂಡೆ ಇರಡ್. ಪೊಮ್ಮಾಲೆ ಕೊಡವುಲ್ ಮನುಷ್ಯಂಗ್ ಮಂಡೆ ಮೇಲೆ ನೊಂದಿತ್ ನೀಕ್ ಪಟ್ಟೋಪರಕೆ ಕೆಜ್ಜಕ ನೀನ್ ತಟ್ಟಿ ಪೊದ ನೀಕಿಯುಂಡ್ ಮೀದಿ ನೀರ್ ಬೇಂಗಿಯು. ಊರ್‌ನಗುಂಡ್ ಮೀದಿ ನೀರ್ ಎಡ್‌ತಂಡ್ ನಲ್ಲ ಗುಣ ಕಾಟಿಯು.

ಕಾಲೋರಾಂಡಕ್ಕೋರಮ ನಾಡ ಪೆದಪೋಲೆ ಈ ಊರ್ ಮಾಲೊಂಗ ಮಾಲೆ ಜೋಡಿ ಜೋಡ್ ಚೋಮ ಪೋರಾಟ ಆರಾಟ ಬೊಳ್ಳಾಟ್ ನಡ್ತುವ. ಪಿತ್ಯ ದಿನತ್‌ಲ್ ಈ ಊರ್ ಮಾಲೊಂಗ ನೀಕ್ ಬೊಳ್ಳಾಟ್ ಕೈಪ.

ಇಂದಾಕಣೆಕ್ ನೀಕ್ ಪೊನ್ನಪ್ಪಂದ್ ಪೆದ ಇಂಜತ್. ಇಂದ್ ತೊಟ್ತ್ ಮಿಂಞಾಕ್ ಕಲಿಯಾಟಂಡ ಅಜ್ಜಪಂದ್ ನಾನ್ ಇಟ್ಟ ಪೆದ. ಇನ್ನನೆ ಮಕ್ಕಿ ಸಾರ್ಥವು ಪಂದಿತ್ ಆಶೀರ್ವಾದ ಮಾಡ್‌ಚಿ. ಅಂದ್ ತೊಟ್ತ್ ಇಂದೋಳ ಕಲಿಯಾಟಜ್ಜಪ್ಪ ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಮಾನವೊ ಮನುಷ್ಯಂಗ್ ಕಷ್ಟ ಬಂದ ಕಾಲತ್ ಕಲಿಯಾಟಜ್ಜಪ್ಪಂಗ್ ಪೊಂಗಲಿಯ ಕೈಪಾಂದ್ ಪಟ್ಟೋ ಪರ್ಕೆಯೊ ಮಾಡೋದುಂಡ್. ಅನ್ನನೆ ಅಜ್ಜಪ್ಪ ನಲ್ಲ ಗುಣ ಮಾಡೋದು ಉಂಡ್. ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಕುಪ್ಪಿ ಕಳ್ಳ ಕೂವೊ ಕೋಳಿ ಬೇಂಗಿಯಂಡ್ ತಂದೂರಿ ಬೊಳೆಯಾಡಿಯಂಡ್ ಅಂದೂ ಇಂದೂ ಉಂಡ್. ಕೀಕಂಡ ಅಚ್ಚಿ ಮುಂಡೆಯೊ ಇಂದ್ ಇಲ್ಲೆ. ಕೊಡಗಲ್ ಕಲಿಯಾಟಜ್ಜಪ್ಪಂಡ ಕೇಳಿ ಕೀರ್ತಿ ಕೊಡಗ್ ಮಾತ್ರವಲ್ಲ, ಕೇರಳತ್ಲ ತುಳು ನಾಡಲ್ ಕೂಡಾ ಉಂಡ್. ಪರ ಊರ್ ಕೂಡ ಅಜ್ಜಪಪ ತೆರಕಟ್ಟುವೊದು ಉಂಡ್. ಇಕ್ಕಲೂ ಅಜ್ಜಪ್ಪಂಡ ಕೂಡೆ ಕಾಟೋಳ ಬೊಳ್ಳೊ ಪತ್ ಕೂಟ ಮೂರ್ತಿಯಳೂ ಉಂಡ್‌ಂದೆಣ್ಣುವೊ ವಾಡಿಕೆ.

ಕಾಕೋಟಿಚ್ಚನೂ, ಅಕ್ಕವ್ವ (ಅಚ್ಚಯ್ಯನೂ ಅಕ್ಕವ್ವ) ಕಾಲಭೈರವ ಈಯಂಗಡ ಕಥೆ (ಕಾಕೋಟ್ ಪರಂಬು)

ಪಂಡ್ ಪಂಡ್ ಕಾಲತ್ ಏಳ್ ಸಮುದ್ರಕ್ಕಪ್ಪರ, ಏಳ್ ಸಮುದ್ರಕ್ಕಪ್ಪರ ಪಾಲ ಸಮುದ್ರತ್ರ ಮಧ್ಯತ್ ಕೊಂಬತರೆ ಪೊಯ್ಯಣೆ ಪಾರೆಕಲ್ಲಾರ ಮೀದಲ್ ಬೊಮ್ಮಣತಡ್‌ಂಜತ್. ಸಮುದ್ರತ್ ಕಾಳೆ ತೆರೆ ಪೊಯ್ಯಕ್ಕಾ ಬೊಮ್ಮಣತ್ರ ಮೀದಲ್ ಪೊಮ್ಮಣ ತಡ್‌ಂದತ್. ಕುಂಞಿ ತೆರೆ ಪೊಯ್ಯೊಕ ಪ್ರಮಾಣತ್ರ ಮೀದ ನೆಯ್ಯಿ ಮಣ ತಡ್‌ಂದತ್. ನೆಯ್ಯಿ ಮಣತ್ರ ಮೀದಲ್ ಪಾಮಂಜಿ ಕೆಟ್ಟ್‌ಚಿ. ಪಾಮಂಜಿರ ಮೀದಲ್ ಏಳ್ ಕೊಂಬುಳ ಪುತ್ತ್ ಬೊಳಂದತ್. ಮಮ್ಮಾಯತ್ ಪುಟ್ಟ್‌ನ ಈ ಪುತ್ತ್ ಕಾಲ ಅನ್ನನೆ ಪೋಯೆಂಡಿಚೆನ್ನೆಕೆ ಅಂಜಿ ಕಾಲ ಕಯ್ಯೊಕ್ಕ ಆ ಪುತ್ತ್‌ರೊಳ್‌ಂಜಿ ಓರ್ ಆಲ್ ಕುಂಞಿ ಪುಟ್ಟ್‌ಚಿ. ಮಾಯತ್ ಪುಟ್ಟ್‌ನ ಆಲ್ ಕುಂಞಿ ಅಂಜಿ ಕಾಲಕ್ ಅದ್ ಅರೆ ಆಳಾಚಿ. ಪತ್ತ್ ಕಾಲ ಕಯ್ಯೊಕ ಬಲ್ಯ ಮರ ಆಯಿತ್ ಏಳ್ ಕೊಂಬ್ ವಡ್‌ಂದತ್. ಚಿತ್ತಾಲ್ ಮರತ್ರ ಮೊರ್ಡ್‌ಲ್ ಪುತ್ತ್‌ರ ಮಾಳಿರ ಒಳ್‌ಂಜಿ ಕಾಯಿ ಕೆಟ್ಟ್‌ಚಿ. ಕಾಯಿ ಎಲ್ಲಾ ಬೊಳ್‌ಂದಿತ್ ಪಣ್ಣಾಚಿ. ತಿತ್ತ್ ಬೆದ್ ಕಾಯಣೆ ಓರ್ ಪಣ್ಣಾ ಒಳ್‌ಂಗ್‌ಚಿ. ಅದೇ ಸಮಯತ್ ಕಾಳಿರ ಮಲೆಂಜಿ ಕಾಳಿಕ್ಕಮ್ಮ ದೇವಿರ ವಾಯು ಕಾತ್ ಬೀಜೊಕ್ಕಾ ಚಿತ್ತಾಲ್ ಮರತ್ರ ಕೊಂಬ್ ಅಲೆ ಪೊಜ್ಜತ್. ಅಕ್ಕಣೆಕ್ ವಣ್‌ಂಗ್‌ನ ಪಾತೊರೆ ವಡ್‌ಂದತ್. ಅಕ್ಕಣೆಕ್ಕೋರ್ ಮಮ್ಮಾಯ ನಡ್‌ಂದತ್.

ಅಣ್ಣ ತಂಗೆಯಾಂದೆಣ್ಣಿತ್ ದಂಡ್ ದೇವತೆಯ ತೊರೆರೊಳ್‌ಂಜಿ ಪುಟ್ಟಿ ಪೊರಂದುಳ್ಳಾಚಿ. ಆಣಾಯಿ ಪುಟ್ಟ್‌ನದ್ ಅಚ್ಚಯ್ಯೆಂದ್ ಪೆದಗೊಂಡತ್. ಪೊಣ್ಣಾಯಿ ಪುಟ್ಟ್‌ನಾಂಗ್ ಅಕ್ಕವೋಂದ್ ಪೆದ ಇಂಜತ್. ಅಣ್ಣನೂ ತಂಗೆಯೂ

ಚಿತ್ತಾಲ್ ಕೊಂಬಾಲ್ ಇನ್ನನೆ ಇಪ್ಪಕ ಅಕ್ಕವ್ವ ದೇವಿ ಅಣ್ಣಯ್ಯನ ನೋಟಿತ್ ಅಣ್ಣಯ್ಯ ಎಲ್ಲೆಲ್ಲಿಯೂ ನೋಟಾಚಿಂಗಿಯೂ ಭೂಮಿ ನೆಲ ಒಂದೂ ಕಾಂಬಾಲೆ. ನಂಗ ಎನ್ನನೆ ಬದ್ಧವೊಂದೆಣ್ಣಿತ್ ತಂಗ ಕೇಪಕ ಅಕ್ಕವ್ವೊಂಡ ಅಣ್ಣಯ್ಯ ಅಚ್ಚಯ್ಯ ಎಣ್ಣೆಚಿ. ತಂಗಮ್ಮ ನೀನ್ ಬೊತ್ತುವೊದೊಂದು ಬೋಂಡ, ಪಣ್ಣಾ ಫಲ ನಾನ್ ತಪ್ಪಿ. ನಿನ್ನ ನಾನ್ ನೆಲಕ್ ಇಳಾಪುವಿ. ದೇವನೆಲೆ ಕಾಟ್ಲೊಪೊಕ್ ನಾನ್ ಮಾಡ್ಪಿ. ನೀಕ್ ನಾನ್ ಅಣ್ಣಂಗ್ ಅಣ್ಣನಾಯಿತುಳ್ಳ, ಅಪ್ಪಂಗ್ ಅಪ್ಪನಾಯಿತುಳ್ಳಂದೆಣ್ಣಿತ್ ಆನೆ ಧೈರ್ಯ ಪಂದರ್ತ್ ಅನ್ನನೆ ಇಪ್ಪಕ ಚಿತ್ತಾಲ್ ಮರತ್ಲ ಆಲ್ ಪಣ್ಣಾನದ್ ಕಂಡಿತ್ ಕಾರ್ಕೊಟ ಪಕ್ಕಿ ಮೇಚಿ ಫಲ ತೇಡಿಯಂಡ್ ಬಾನ ಸುತ್ತಿ ಬಪ್ಪಕ ಚಿತ್ತಾಲ್ ಮರತ್ಲ ಆಲ್ ಪಣ್ಣಾನ ಕಂಡಿತ್ ಆಲ್ ಮರಕ್ ಬಂದ್ ಅಳ್ತತ್ ಆಲ್ ಪಣ್ಣಾ ತಿಂದಂಡಿಪ್ಪ ನೇರಕ್ ಅಚ್ಚಯ್ಯ ದೇವ ಕಾರ್ಕೊಟ ಪಕ್ಕಿ ನಾಕೋರ್ ಸಹಾಯ ಮಾಡೋಂಡು ನೀಕ್ ವರ ತಪ್ಪಿ. ನೀನ್ ಮಾಡಂಡಿಯ ಎಂತಂದೆಣ್ಣೆಚಿಂಗಿ ನನ್ನೋ ನಾಡ ತಂಗ ಅಕ್ಕವ್ವೊ ದೇವಿನೋ ಎಡ್ತಂಡ್ ಪೋಯಿತ್ ಏಳ್ ಸಮುದ್ರಕ್ಕಪ್ಪರ ಭೂಮಿಕ್ಕಪ್ಪರ ಭೂಕಿ ಇಳ್ಳೊಂಡು. ಇನ್ನನೆ ಎಣ್ಣಣಿ ಕಿರ್ಕೊಟ ಪಕ್ಕಿ ಅಚ್ಚಯ್ಯ ದೇವಳ ಬೆನ್ನಾಲ್ ಬೆಚ್ಚಂಡ್ ಅಕ್ಕವ್ವ ದೇವಿನ ಕೊಕ್ಕೆಲ್ ಕೊತ್ತಿಯಂಡ್ ಪಾರಿತ್ ಏಳ್ ಸಮುದ್ರ ಕಡ್ಂದಿತ್ ಮಲೆಯಾಳತ್ರ ಕಣ್ಣೂರು ಸಮುದ್ರತ್ರ ಪರ್ಬಲ್ ಅಯಿರೆಣ್ಣಿ ಪುಂಡತ್ತ ಮೇಂಚೆಂಡಿಪ್ಪಕ್ಕಾ ಮುನ್ನೂರೆಣ್ಣಿ ಅತ್ತಕಾರ ಮಕ್ಕ ಬಾಣೆಲ್ ದುಂಬ ಕೂಡಿಯೆಂಡ್ ಚೆಂಡ್ಕಳಿ, ಬುಗುರಿ ಕಳಿ, ತಾರ್ಕಳಿ, ಗೋಲಿ ಕಳಿದೆಣ್ಣಿಯೆಂಡ್ ಫಲ ಫಲತ್ ರತ್ರ ಕಳಿಕಳಿಚೆಂಡಿಕ್ಕಣೆ ಅತ್ತಳ ಪಿರ್ಪಾಕ್ ಅಂದಿ ಮುಂದಿ ನೇರ ಆನಲ್ಲಿ ಮಕ್ಕ ಎಲ್ಲಾ ಕೂಡಿತ್ ಅತ್ತಳ ಆಟಿಕೂಟಣೆ ದೇವ ಮಾಯ ಮಮ್ಮಾಯ ಅಮ್ಮಂಡಿರ ಮಕ್ಕಕ್ ಮೈ ಪೊದ್ಡಿತ್ ಪಂದರ್ತ್. ಚಾಂಡಾಳ ಮಕ್ಕಕ್ ಕಾರ್ಯಪ್ಪ ದೇವ ವರಂದತ್, ಬಾಣೆಲ್ ಉಳ್ಳ ಅತ್ತ ಎಲ್ಲಾ ಬಾಯಿ ಬುಟ್ಟ್ ಅಂದರ್ಂಡ್ ಬಾಣೆ ಬುಟ್ಟ್ ಕಡ್ಂದಾಲೆ. ದೇವ ಮಾಯ ಪೊದ್ಡನ ಮಕ್ಕ ಒಬ್ಬಂಗೊಬ್ಬಂಗ ಅನುವಾದ ಕೊಡ್ತೊಜತ್. ಅಕ್ಕಣೆಕ್ ಅಮ್ಮಂಡಿರ ವಕ್ಕಡ ಅಪ್ಪಣ್ಣ ಬೈಂಬನ್ ಅತ್ತಕಾರ ಮಕ್ಕ ಅತ್ತಳಾಟಿಯೆಂಡ್

ಬಂದ್‌ಲೆಂದೆಣ್ಣೆತ್ ಗ್ಯಾನ ಮಾಡಿಯೆಂಡ್ ಅಳ್ತಿಯೆಜತ್. ಅಕ್ಕಣೆಕ್ ಅಪ್ಪಚ್ಚೆಂಡ ಪೂವಣ್ಣ ಕಾಕೋಟ್ ಪರಾಂಬಾರ ಬಟ್ಟೆಕಾಲೆ ಬಪ್ಪಕ ಈ ಮಕ್ಕೆಲ್ಲಾ ದೇವ ಪೊದ್ದಿತ್ ಕಳಿಪಾನ ಕಂಡಿತ್ ಓಡಿ ಪಾರಿ ಪೋಯಿತ್ ಅಮ್ಮಂಡಿರ ಐಪ್ಪಣ್ಣಂಗ್ ತಾನ್ ಕಥೆನ ಎಣ್ಣೆಚಿ. ಇದಾನ ಅಂಜ್ ಐಪಣ್ಣ ಕೂಡನ್ನೆ ಓಡಿ ಬಂದ್ ನೋಟಣೆ ದೇವಮಾಯ ಮಮ್ಮಾಯ ಪೊದ್ದಾನ ಅತ್ತಕಾರ ಮಕ್ಕ ಅತ್ತಳಾಟಿ ಬೂಪೊ ತೆರಿಯೊ ಎದ್ದ ನಿಂದಿತ್ ತುಳ್ಳುವಾನ ಕಂಡಿತ್ ಐಪಣ್ಣ ಬೈಂಬ ಮಕ್ಕಡ ಪಕ್ಕ ಬಂದಿತ್ ನಿಪ್ಪಂಜಿ ಎನ್ನತ ಮಮ್ಮಾಯಾಂದರಿಯುಲೆ. ಎನ್ನತದುಂಡೆಂಗ್ಯ ನಾಳೆ ಬಂದಿತ್ ನಾನ್ ಊರನೆಲ್ಲಾ ಕೂಟಿತ್ ಕೇಟಿತ್ತರಿಯುವಿ. ಇಕ್ಕಕ್ ಮಕ್ಕಡ ಮೇಲ್‌ಂಜಿ ಬುಟ್ಟ್ ನೀಂಗೋಂಡೂಂದ್ ಅಡ್ಡ ಬುದ್ಡ ಬೋಡಣೆ ಅತ್ತಕಾರ ಮಕ್ಕಡ ಮೇಲ್‌ಕ್ ಪೊದ್ದಾನ ಮಮ್ಮಾಯ ಮೈಬುಟ್ಟ್ ನೀಂಗ್‌ಚಿ. ಅಲ್ಲಿಂಜಿ ಅತ್ತಕಾರ ಮಕ್ಕ ಆಟಿಯೆಂಡ್ ಐಪಣ್ಣಂಡ ಕೂಡೆ ತಂಗಡ ಮನೆಕ್ ಪೋಯೆಂಡತ್.

ಪಿತ್ಯದಿನ ಅತ್ತಕಾರ ಮಕ್ಕೆಲ್ಲಾ ಅತ್ತಳ ಆಟಿಯೆ ಬಂದಿತ್ ಕಾಕೋಟ್ ಪರಾಂಬಲ್ ಬುಡಣೆ ಅಲ್ಲಿ ಕಾತಂಡಿಂಜ ಅಚ್ಚಯ್ಯ ದೇವ ಅತ್ತಕಾರ ಮಕ್ಕಕ್ ಮೈ ಪೊದ್ದಿತ್ ಪಂದರ್ತ್. ಇದಾನ ಕಂಡಿತ್ ಅಮ್ಮಂಡಿರ ಐಪ್ಪಣ್ಣ ಊರನೆಲ್ಲಾ ಕಾಕಿ ಕೂಟಿತ್ ಮಕ್ಕಡ ಮಿಂಘಲ್ ಅಡ್ಡ ಬುದ್ಡಿತ್ ಬೋಡಣೆ ಅಚ್ಚಯ್ಯ ದೇವ ತಾಂಡ ತಂಗಮ್ಮನೂ ಪುಟ್ಟಿ ಬೊಳ್‌ಂದಾನ ನೆಲೆ ತೇಡಿ ಬಂದಾನ ಮೈಪೊದ್ದಾನ ಮಕ್ಕಳಗುಂಡ್ ಎಣ್ಣೆ ಚಿಟ್ಟತ್.

ಇದಲ್ಲತೆ ಅಚ್ಚಯ್ಯ ದೇವಯ್ಯ ನಾನೂ ಏಡ ತಂಗಮ್ಮನೂ ಈ ಊರರ ನಡುಲ್ ನೆಲೆ ನಿಪ್ಪ. ಆನಗುಂಡ್ ನಿಪ್ಪಕ್ ನೆಲೆಯಾಂಡು ನಿತ್ಯ ನೈವೇದ್ಯ ಚಾಂದ್ ಪೂಜೆ ಕೈಕೋಂಡು. ಕಾಲೋರಾಂಡೆಕ್ಕೋರಮ ಬಿರ್ಚಿಯಾರ್ ಪೋಕ್‌ಲ್ ದಲ್ಮಾರ್ ಎದ್‌ಪಾಕ್ ನಾಡ ಊಟ್‌ಂಬಾಟ್ (ನಮ್ಮೆ) ನಡ್ತೊಂಡು. ತೀರ್ಥಕುಳಿ ಆಂಡು. ಆರಾಟ್ ಬೊಳ್ಕನ ನಡ್ತೊಂಡೂಂದೆಣ್ಣೆತ್ ನಾಲ್ಕೇರಿ ಊರೋಂಗ್ ಅಪ್ಪಣೆ ಮಾಡ್‌ಚಿ.

ದೇವ ಎಣ್ಣಾನ ಅಪ್ಪಣೆ ಪ್ರಕಾರ ನಾಲ್ಕೇರಿ ಊರೋಂಗ ಮಣ್ಣೊಡ್ಡಳ

ಕಾಕಿತ್ ಪಾಕರೆ ತೋಡ್‌ಚಿಟ್ಟಿತ್. ದೇವನೂ ದೇವಿಕ್ ನೆಲೆ ನಿಪ್ಪಕ್ ರತ್ನ ಪೀಠ ಬೆಚ್ಚಿತ್ ಗರ್ಭಗುಡಿ ಕೆಟ್ಟಿತ್ ಗರ್ಭ ಗುಡಿರೊಳ್‌ಲಾ ಕಾರ್ಯಪ್ಪಂಗ್ ನಿಪ್ಪಕ್ ನೆಲೆ ಕೊಡ್ತತ್. ಅಚ್ಚಯ್ಯ ದೇವಕೂ ಅಚ್ಚಯ್ಯ ದೇವಡ ತಂಗಮ್ಮಂಗೂ ಗರ್ಭಗುಡಿ ಕೆಟ್ಟಿತ್ ನೀಲೇಶ್ವರ ತಂತ್ರಿಯಪ್ಪನ ಕಾಕಿತ್ ಬ್ರಹ್ಮಕಲ್ಪ ಮಾಡಿತ್ ದೇವನೂ ದೇವಿನೋ ನೆಲೆ ನಿಪ್ಪಾಚಿಟ್ಟಿತ್. ಅಂದ್ ತೊಟ್ತ್ ಈ ಅಮ್ಮಂಡಿರ ಐಪಣ್ಣ ದೇವ ಮಾಯ್ ಮಿಂಞಾಲ್ ಕೇಂಚಾಂಗ್ ದೇವಡ ನಮ್ಮ ನಾಳ್‌ಲಾ ನ್ಯಾಯ ಕೂಟತೇ ಪಾಂಗ್ ಕೋಯಿಮೆ ನಡ್ತುವಾಂಗ್ ದೇವಡ ಮಿಂಞಾಲ್ ಭಂಡಾರತ ತಕ್ಕಾಮೆಂದೆಣ್ಣಿತ್ ಅಮ್ಮಂಡಿರ ವಕ್ಕಕ್ ಕೊಡ್ತತ್. ಅನ್ನನೆ ಅಂದ್‌ತೊಟ್ತ್ ಇಂದೋಳ ವಾರಾಂಡಕ್ಕೊಮ್ಮ ಈ ಮಮ್ಮಾಯತ್ ದೇವಡ ನಮ್ಮ ನಾಳ್‌ನ ಊರ್ ನಾಡ್‌ಕಾರ ನಡ್ತಿಯೆಂಡುಂಡ್, ಅನ್ನನೆ ದೇವಕೂ ಅಯಿನ ಕಾತ್ ರಕ್ಷಣೆ ಮಾಡಿಯೆಂಡುಂಡ್.

ಪುಗ್ಗರೊಕ್ಕಡ ಮೊಣ್ಣಯ್ಯ (ಕ್ರಿ.ಶ. 600)

ಪದಾನಂಜನೆ ಶತಮಾನತ್‌ಲ್ ಕೊಡಗಲಿಂಜ ಪತ್ತ್ ಪಾಳೆಯಗಾರ ವಿಜಯನಗರ ಸಾಮ್ರಾಜ್ಯತ್ರ ಅಧೀನತ್ಲ್ ಇಂಜತ್. 1565ಲ್ ವಿಜಯನಗರ ರಾಜಂಗೂ, ಇಕ್ಕೇರಿ ರಾಜಂಗೂ ಆನ ಯುದ್ಧತ್ ವಿಜಯನಗರ ರಾಜ್ಯ ಅಂತ್ಯ ಆನಲ್ಲಿ ಪಾಳೆಯಗಾರರೆಲ್ಲಾ ಸ್ವತಂತ್ರಂಗಲಾಯಿತ್ ಅಪ್ಪರಿಷ್ಟರ ಯುದ್ಧ ಮಾಡಿಯೆಂಡ್ ದಬ್ಬಾಳಿಕೆಲಿಂಜತ್. ಆ ಸಮಯತ್ ಕೊಡಗಲ್ ಶಾಂತಿ ಇಲ್ಲತೆ ದಂಗಿ, ದರೋಡೆ, ಕಳ್ಳತನ ಆಯಂಡ್ ಕೊಲ್ಲ್ ಕೊಲೆಕ್ ಮಿತಿ ಇಂಜದಿಲ್ಲೆ. ವೀರಂಗಲಾನ ಕೊಡವ ಜೆಮ್ಮಿಯ ದುರಾಸೆಲ್ ಒಬ್ಬಂಡ ಮೇಲೆ ಇಂಞೊಬ್ಬ ಪಡೆಪೊತ್ತಿತ್ ಆಸ್ತಿ ಪಾಸ್ತಿನ್ನೆಲ್ಲಾ ಉಡಾಪ್ಲ ವಶಪಡ್ತಿಯೆಂಡಿಂಜತ್.

ಆ ಸಮಯಕ್ ವಿರಾಜಪೇಟೆ ನಾಡ್ ದೇವಣಗೆರಿ ಊರ್‌ಲ್ ಪುಗ್ಗರ ಕುಟುಂಬತ್ ಮೊಣ್ಣಯ್ಯಂದ್ ಪೆದಪೋನೋರ್ ಜಮ್ಮಿ ಇಂಜತ್. ಅವು ದಂಡಾಯಿರ ಭಟ್ಟಿ ಭೂಮಿ, ಅದ್‌ಂಗ್ ಸೆರಿ ಆನ ತೋಟ ತೊಡಿಯ ಅತ್ತಕಡ್ಡಿ, ಆಳ್‌ಕ್ಕಾಳ್ ಆಯಿತ್ ನೆಮ್ಮದಿಲ್ ಬಾಳಿಯುಂಡಿಂಜತ್. ಅಲ್ಲತೆ ಅವು ಊರ್ ತಕ್ಕಾನಾಯಿತೂ ನಾಡ್‌ಲೋರ್ ತೌಂದರಿಯಾಯಿತೂ ನೆರೆ ಊರ್ಲ್ ಚೆಂಬೆಚ್ಚೂರ್ಲ್ ಸೋಮಯ್ಯಂಡ ವಕ್ಕತ್‌ಂಜಿ ಕಾಳವ್ವನ ಮಂಗಲಾಯಿತ್ ಸಂಸಾರ ನಡ್ತಿಯೆಂಡ್ ಇಂಜತ್. ಅಕ್ಕ ನೆರೆ ರಾಜ್ಯ ಮೈಸೂರ್‌ಕ್ ಸೇರ್‌ನ ಹುಣಸೂರ್ ತಾಲೂಕ್‌ರ ಕಾರಪಳ್ಳಿ ಗ್ರಾಮತ್‌ಂಜಿ ಓರ್ ದರೋಡೆಕಾರಡ ಗುಂಪ್ ಕೊಡಗ್‌ಕ್ ನುಗ್ಗಿತ್ ಪೆರ್ತ್ ಜಾಗ ಲೂಟಿ ಮಾಡಿಯೆಂಡ್ ಬಂದನ್ನೆಕ್ಕೆ ಐಶ್ವರ್ಯ ದುಂಬ್‌ನ ಪುಗ್ಗರೊಕ್ಕಡ ಮೇಲೆ ದಾಳಿ ಮಾಡ್‌ನಲ್ಲಿ ದಂಡ್ ಕಡೆಲೂ ನಡ್‌ಂದ ಕೊಲ್ಲ್ ಕೊಲೆಲ್ ಪುಗ್ಗರವು ತೀರಾ ಚತ್ತತ್. ಆಚೆಂಗಿ ದೇವಡ ದಯತ್ ಮೊಣ್ಣಯ್ಯಂಡ ಪೊಣ್ಣಾ ದುಂಬ್‌ನ ಕುಳಿಮೆಲಿಂಜವಳ ಎನ್ನನೆಲ್ಲೊ ಆಯಿತ್ ತಪ್ಪೆಚಿಟ್ಟಿಂಡ್

ಇರ್ಲ್‌ಕಿರ್ಲ್ ತಾಮನೆಕ್ ಓಡಿ ಪೋಯಿತ್ ಅಪ್ಪ ಅವ್ವಂಡ ಮರೆ ಬುದ್ಧತ್. ಕುತ್ತಿನಾಶ ಆಯಿಪೋಕೂಂದೆಣ್ಣೆತ್ ದುಃಖತ್ ಕೋರ್ಗಿಯಂಡ್ ಇಂಜ ಕಾಳವ್ವ ಚೆನ್ನಂಗೇ ದಿವಸತ್ ಕಣ್ಣುಕುಂಞಿ ಪೆತ್ತಲ್ಲಿ ಸಂತೋಷತ್ ಕುಂಞಿಕ್ ಮೊಣ್ಣಯ್ಯಾಂದ್ ಅಪ್ಪಂಡ ಪೆದ ಇಟ್ಟಿತ್. ಕಾಲಕೈಂಜನ್ನೆಕ್ಕೆ ಮೊಣ್ಣಯ್ಯ ಅಜ್ಜ ತಾಯಿರಲ್ಲಿಯೇ ವಿದ್ಯೆ ಬುದ್ಧಿ ಪಡ್ಡಿತ್ ಆಳ್‌ಕ್ಕಾಳ್ ತೇಂದಲ್ಲಿ ಪೆತ್ತವೊನ್ನಗುಂಡ್ ದರೋಡೆಕೋರಂಗ ಮನೆ ನುಗ್ಗಿತ್ ಅಪ್ಪನೋ ಬಾಕಿ ಸಂತಾನತ್ತೊ ಕೊಲ್ಲ್ ಕೊಲೆ ಮಾಡಿ ತಾಂಡಾಸ್ತಿ ಎಲ್ಲಾ ಪಾಳ್ ಬುದ್ಧ ಸಂಗತಿನೆಲ್ಲಾ ಅಂಜೆಂಡತ್. ತಾನ್ ಪ್ರಬುದ್ಧಕ್ ಬಂದಾನಗುಂಡ್ ಅಜ್ಜ ತಾಯಿರಲ್ಲಿ ಇಂಞಿ ಇಪ್ಪದ್ ಸರಿಯಲ್ಲಾಂದ್ ತಾಂಡಾಸ್ತಿನ ರೂಡಿ ಮಾಡಿತ್ ಬುದ್ಧಪೋನ ಮನನೆ ಕೆಟ್ಟಿ ನೇತಿತ್ ವಕ್ಕಡ ಕೇಳಿ ಕೀರ್ತಿನ ಮಿಂಞಾಕ್ ಕೊಂಡ್ ಬರೋಂದೂಂದೆಣ್ಣುವೊ ನಿರ್ಧಾರ ಮಾಡಿಯೆಂಡತ್. ಅನ್ನನೆ ತಾಂಡ ಅಭಿಪ್ರಾಯತ್ತ್ ಅವೊಂಗೆಣ್ಣೆತ್ ನಲ್ಲೋರ್ ದಿವಸತ್ ಅಜ್ಜ ತಾಯಿರ ಆಶೀರ್ವಾದ ಎಡ್ತಂಡ ಪಾಳ್ ಬುದ್ಧ ಆಸ್ತಿಕ್ ಪೋಯಿತ್ ಊರ್ ನೆರೆಕಾರಡ ಪಿಂಞ ಬಂಧು ಮಿತ್ರಂಗಡ ಸಹಾಯತ್ ಅಲ್ಲತೆ ಅಜ್ಜಿ ತಾಯಿ ಕೊಡ್ತ ಪಣತ್ತ್‌ಗುಂಡ್ ಮನೆ ಪುದಿಯೆದಾಯಿತ್ ಕೆಟ್ಟಿತ್ ಅವ್ವನೂ ಸೇವಕ್ಕನಲಂದತ್. ಅಲ್ಲಿಂಜಿ ಪಾಳ್‌ಬುದ್ಧ ಆಸ್ತಿನ ಸಾಗುವಳಿ ಮಾಡಿತ್ ಎತ್ತಕಡ್ಡಿ ಎಡ್ಡಿತ್ ಆಳ್‌ಕ್ಕಾಳ್ ಬೆಚ್ಚೆಂಡ್ ದಂಡ್ ಮೂಂದ್ ಕಾಲತ್ರೊಳ್‌ಲಾ ಅಪ್ಪಂಡ ಕಾಲತ್ತಿಂಚೆನ್ನೆಕ್ಕೆ ಜಮ್ನಿ ಆಯಿತ್ ಊರ್‌ರ ತಕ್ಕನಾಯಿತೂ, ಣಾಡ್‌ಲ್ ತಕ್ಕನಾಯಿತೂ ಕೇಳಿಲ್ ಬಲ್ಲಿಯೆ ಮನೆ ಕೆಟ್ಟ್‌ಚಿಡೊಂಜಿ ಬದ್ಕಿಯೆಂಡಿಂಜತ್.

ಆ ಸಮಯತ್ಲ್ ಕ್‌ಗ್ಗಟ್ಪ ನಾಡ್‌ಲ್ ಚೆಟ್ಟಿಚ್ಚೆಂದೆಣ್ಣೆತ್ ಪೆದ ಪೋನೋರ್ ಜಮ್ನಿ ಇಂಜತ್. ಅವು ಓರ್ ಶಕ್ತಿಕಾರನಾಯಂಡ್ ಬೇರೀದಿ ಆಸ್ತಿಕಾರಳ ತಾಂಡ ದರೋಡೆ ಕೋರಂಗಡ ಸಹಾಯತ್ ಪಡೆ ಪೊತ್ತಿತ್ ಆಸ್ತಿ ಪಾಸ್ತಿನೆಲ್ಲಾ ವಶ ಪಡ್ಡಿಯೆಂಡಿಂಜತ್ ಅಲ್ಲತೆ ತಾಂಡ ನೆರೆಮನೆ ಚೆಟ್ಟಿಮಾಡ ಕುಟುಂಬತ್‌ರ ಓರ್ ಪೊಣ್ಣಾಳ್‌ರ ಸಹಾಯತ್ ಪುಗ್ಗೆರ ಮೊಣ್ಣಯ್ಯಂಡ ಆಸ್ತಿ ಪಾಸ್ತಿ ಪಣ ಕಾಸಾರ ಗುಟ್ಟಾನ ಅಂಜ್‌ಂಡ್ ಅದಾನ ಅಪಹರಿಚಿಡ್ಪೊ ಆಕಾಂಕ್ಲೆಲ್

ಓರ್ ದಿನ ತಾಂಡ ಮೂಂದ್ ನಾಲ್ ಪಡೆಯಾಳಿಯಳ ಕೂಟಿಯಂಡ್ ಮೊಣ್ಣಯ್ಯಂಡಲ್ಲಿಕ್ ಪೋಕಣೆ ಪೊಲೆಯ ಪತ್ ಕೂಟ ಎತ್ತಕೆಟ್ಟಿತ್ ಓಟಾಕತ್ತ ಉಪ್ಪಾನ ಯಜಮಾನ ಆಕತ ಬಡ್ಡೇರಿಲ್ ತಂಡೂರಿ ನಿಂದಿತಿಂಜಾನ ಕಂಡಿತ್ ಗೊತ್ತಿಲ್ಲತೆ ಆ ಜನ ಪಕ್ಯ ಬಂದಿತತ್ತುವೊದು ಕೈ ಚೋಡ್‌ಚಿಟ್ಪ್ ನಮಸ್ಕಾರ ಮಾಡಿತ್ ನಿಂಗ ದಾಡ ಮಹಾಬೆಂದು? ದಣ್‌ಂದ್ ಬಂದ ನಿಂಗ ನಂಗಡ ಮೊಟ್ಪ್ ಪತ್ತಿತ್ ಉಂಡ್ ಕುಡ್ಡಿತ್ ದಣುವಾರಿಚಿಟ್ಟುಂಡ್ ಪೋಂಡೂಂದೆಣ್ಣ್ ಚಿ. ಚಿಟ್ಪ್ ಚಿ ಮೂಡ್ ಕರ್ಪ್‌ಚಿಟ್ಟುಂಡ್ ಕೂಪೆಲುಳ್ಳ ಕಪ್ಪೆಯಾನ ನೀಕ್ ಅಂಡಮಾಡ ಚಿಟ್ಟಿಚಿ ದಾರ್‌ಂದ್ ಎನ್ನನೆ ಗೊತ್ತಾಕು? ಎಣ್ಣೆತ್ ಮೀಸೆ ತಿರ್ಕಿಯೆಂಡ್ ನಿಕ್ಕಣೆ ಬೇರೆಕಾರ ಮೊಣ್ಣಯ್ಯ ಬಂದ ಚಿಡಿನ ಚೌಂತ್ ಎರ್ಕಿಯೆಂಡ್ ಶಾಂತಚಿತ್ತನಾಯಿತ್ ಅಂಡವಾಡ ಚಿಟ್ಟಿಚ್ಚಿ ನಾನ್ ಕೂಪೆಲುಳ್ಳ ಕಪ್ಪೆಂದೂ, ಆ ಆಸ್ತಿ ನಾಡ ಅಜ್ಜ ಅಪದರಿಚಿಟ್ಟಿತ್‌ಂದೂ ನೀನ್ ಬೊಗುಳೋದು ಪೊಟ್ಪ್‌ಂದ್ ನೀಕ್ ಈ ಕ್ಷಣತ್ ಕಾಟಿತಪ್ಪ. ಶಕ್ತಿ ಸಾಮರ್ಥ್ಯ ನಾಕುಂದೆಂಗ್ಯ ನೀಡ ಈ ಸ್ಥಿತಿಲ್ ನೀಡ ಮೇಲೆ ಕೈ ಎಡ್‌ಪದ್ ನಾನ್ ಪಡ್ಡಿತ್ತಿಲ್ಲೆ. ಆಂಗಾಯಿತ್ ನೀನ್ ಬಂದ ಒಟ್ಟೆಲ್ ಬೈಪಿರಿಂಜಿ ಪೋಪದ್ ನಲ್ಲದ್‌ಂದ್ ಎಣ್ಣೆಯೆಂಡ್ ತಾನೂ ಮೀಸೆರ ಮೇಲೆ ಕೈ ಬೆಚ್ಚಿತ್ ತಂಡಾರ ಮೇಲೆ ತಾಂಗಿ ನಿಂದಿತ್. ಮೊಣ್ಣಯ್ಯಂಡ ತಕ್ಕೂರ ಗುಟ್ಟಾನ ಕ್ಷಣ ಮಾತತ್ ಅಂಜೆಂಡ್ ಚಿಟ್ಟಿಚ್ಚಿ ಆಕೂ ಇಕ್ಕಕ್ ನಾನ್ ಬೈಪಿಂಜಿ ಪೋಪಿ, ಆಚೇಂಗಿ ನೀನ್ ಕಡ್‌ಚಿತ್ ಬೆಚ್ಚಿ. ಇಂದೇಕ್ ಓರ್ ತಿಂಗತ್ ನಾನ್ ಪಿಂಞ ಬಪ್ಪಿ. ಅಕ್ಕ ನೀನ್ ನಾಡ ಸ್ಥಿತಿನ ಅಂಜೋಲೂಂದೆಣ್ಣೆಯೆಂಡ್ ತಾಂಡ ಕೂಟಾಳಿಯಡ ಕೂಡ ಬಯ್ಯಕ್ ಪೋಯಿರ್ತ್. ಆ ತಕ್ಕ ಕೇಟ ಮೊಣ್ಣಯ್ಯ ಓರ್ ಗಳಿಗೆ ಕಲ್ಲರ ಮೂರ್ತಿರೆನ್ನೆಕೆ ನಿಂದಿತ್ ಬಯ್ಯಕ್ ತಿರಿತ್ ನೋಟಣೆ ಪತ್ ಪಾಲೆಯಳೂ ಎತ್ತ ನಿಪ್ಪಿಚಿಟ್ಟಿತ್ ತಾಂಡ ಬಯ್ಯಲ್ ದಪ್ಪ ತೆಕ್ಕಿತ್ ಕಾವಲ್ ನಿಂದಾನ ಕಂಡದಲ್ಲತೆ ನೆರೆಕರೆಯೆಲ್ಲಾ ಓಡಿ ಪಾರಿ ಬಂದಾನೋ ಕಂಡಿತ್ ಅಯಿಂಗೆಲ್ಲಾ ಆನಪೋನ ಸಂಗತಿನೆಲ್ಲಾ ಎಣ್ಣೆತ್ ಸಮಾಧಾನ ಮಾಡಿತ್ ಆಯಿಚಿತ್.

ಮನೆಕ್ ಪೋನ ಮೊಣ್ಣಯ್ಯ ಅವ್ವಂಗ್ ನಡ್‌ಂದ ವಿಷಯತ್ತೆಲ್ಲಾ ಅರಿಚಿಟ್ಟಿತ್ ನಾಲ್ ಕೆಟ್ ಅಯಿಮರತ್ ಭೇರ ತಾಂಗಿ ಅಳ್ತತ್. ಅಕ್ಕಣೆಕ್

ಮೇಕಿಯ ತೊಡಿಯತ್ ಆಳಾಯಿತ್ ನೆಲದಿಂಜ ಬಣ್ಣ ಕರಿಂಬು ಯಜಮಾನಂದ ಎದಿಕೆ ಕೈ ಜೋಡ್‌ಚಿಟ್ಟಿತ್ ಬೇಜಾರ ಮಾಡತಿ ಯಜಮಾನ, ಮಲಬಾರ್ಲ್ ಬೈತೂರಪ್ಪಂಡ ಕೇಳಿ ಕೇಟಿತಿಕ್ಕು ನಿಂಗ, ಆ ಸ್ವಾಮಿರ ಮರೆ ಬುದ್ಧಕ ನಿಂಗಡ ತೊಂದರೆ ನಿವಾರಣೆ ಆಕೂಂದ್ ಅರಿಕೆ ಮಾಡ್‌ನಾನ ಮನ್‌ಚಿಟ್ಟಿತ್ ಪಿತ್ಯಾಂದೇ ನಂದಾದೀಪತ್ರ ಮಿಂಗಳಲ್ ಬೈತೂರಪ್ಪನ ಪ್ರಾರ್ಥನೆ ಮಾಡಿತ್ ಅವ್ವಂಡ ಆಶೀರ್ವಾದ ಪಡೊಂದಂಡ್ ಕರಿಂಬು ಸಹಿತ ಬೈತೂರ್‌ಕ್ ಪೋರ್ಟ್ ಪೋಚಿ. ಆ ಕಾಲತ್ ಕೊಡಗ್ ಮಲಬಾರ್‌ರ ಮದೈ ಬೊರೀ ವ್ಯಾಪಾರತ್ರ ಸಂಪರ್ಕ ಮಾತ್ರ ಇಂಜತ್. ಕಾಡ್‌ಬಟ್ಟೆಲ್ ಎತ್ತರ ಬೆನ್ನಲ್ ಸಾಮಾನ ಸಾಮಗ್ರಿ ಸಾಕ್‌ಚಿಟ್ಟಂಡ್ ವ್ಯಾಪಾರ ಮಾಡೊಂಜತ್. ಇಂತ ಸಂದರ್ಭತ್ ಮೊಣ್ಣಯ್ಯನೂ ಕರಿಂಬನೂ ಕಾಲ್ವಡಿಗಲ್ ಪೋಪಕ ಅಳ್ಳಿತ್ ದಣುವಾರಿಚಿಟ್ಟಂಡ್ ಪೈಪಕ್ಕ ಅಪೊ ಕಟ್ಟಿಕೊಡ್ತ ಕೂಪದಿ ಕೂಳ್‌ನೊ ಬೆಲ್ಲತೊಟ್ಟಿನೋ ತಿಂದಿತ್ ಬೈಟಾನಲ್ಲಿ ಮರತ್ರಡಿಲೋ ಪಾರಕಲ್ಲ್‌ರ ಮೇಲೆಯೋ ವರಿಯಂಡ್ ಕಾಡ್ ಪ್ರಾಣಿಯಡ ಪೋಡಿಲ್ ಮೆಲ್ಲೆ ಮೂಂದ್ ದಿವಸತ್ರ ಬಟ್ಟೆನ ದಂಡ್ ದಿವಸತ್ ನಡೊಂದಂಡ್ ಬೈತೂರ್‌ಕ್ ಎತ್ತಚಿ.

ದೇವಸ್ಥಾನತ್ ಶಾಂತಿಗಾರ ಮೊಣ್ಣಯ್ಯಂಡ ಕೊಡವ ಉಡ್ವನ ಕಂಡಿತ್ ಸೋಜಿಗತ್ ನಿಕ್ಕಣೆ ಮೊಣ್ಣಯ್ಯ ಅಡ್ಡ ಬುದ್ಡ ದೇವಳ ಪ್ರಾರ್ಥನೆ ಮಾಡಿತ್ ತಾನ್ ಪೋನ ಸಂಗತಿನೆಲ್ಲಾ ಶಾಂತಿಗಾರಂಗ್ ಎಣ್ಣನದು ಅಂವೊ ಅಲ್ಲಿಯತ ಭಕ್ತ ಜನಳ ಕಾಕಿ ಕೂಟಿತ್ ಪೂಜೆ ಸುರು ಮಾಡ್‌ಚಿ. ಅಕ್ಕಣೆಕ್ ಬೈತೂರಪ್ಪ ಕೋಲಕಾರಂಡ ಮೈ ಪುಡ್ಡಿತ್ ಮೊಣ್ಣಯ್ಯಂಡ ಮಂಡೆ ತೊಟ್ಟಿತ್ ಆಶೀರ್ವಾದ ಮಾಡಿತ್ ನೀನ್ ಬಂದ ಕಾರ್ಯ ನಾನ್ ಅರಿಂಜಿಯೆ. ಆ ವಿಷಯತ್ ನೀಕ್ ಬೇಜಾರ ಬೊಂಡ. ನೀಡ ಬೆನ್ನ ಬಯ್ಯ ನಾನೆಕ್ಕಲೂ ಇಪ್ಪಿ. ನೀನ್ ಬಯ್ಯಕ್ ಪೋಯಿತ್ ಶತ್ತು ಬಪ್ಪ ದಿವಸ ತೋಕ್ ಕತ್ತಿನೆಲ್ಲಾ ನೆಲ್ಲಕ್ಕಿ ನಡುಬಾಡಲ್ ಬೆಚ್ಚಿತಿರ್. ನೀನೊಂದೂ ಮಾಡತೆ ಎಲ್ಲಾ ಭಾರತ್ ನಾಡ ಮೇಲೆ ಇಟ್ಟಿತ್ ನಾಡ ಗೇನತ್‌ಲ್ ಇರ್. ನೀಡ ಕಷ್ಟ ನಿವಾರಣೆಕ್ ಶಕ್ತಿ ಸ್ವರೂಪಿಣಿ ಚಾಮುಂಡಿನ ಬೆನ್ನ ಬಯ್ಯ ಅಯಿಚಿತ್ ತಪ್ಪಿ. ಬೈಪಿಂಜಿ ಪೋಪಕ ಬಯ್ಯಕ್ ತಿರಿತ್ ನೋಟತೆ. ನೀಡ

ಆಪತ್ತ್ ನೀಂಗೋದು ಚಾಮುಂಡಿ ದೇವಿಕ್ ನೀಡ ಮಣ್ಣಲ್ ನೆಲೆ ಕೊಡ್‌ಂದೆಣ್ಣೆತ್ ಅನುವಾದ ಕೊಡ್ತತ್. ಪೊಣ್ಣಯ್ಯ ಬಯ್ಯಕ್ ಕರಿಂಬು ಸಹಿತ ಬಂದಂಡಿಪ್ಪಕ ಪೆಗ್ಗಳ ದಾಟಣೆಕೂ ಮಾಯಿ ಚಾಮುಂಡಿ ಬೆನ್ನ ಬಯ್ಯಲೇ ಉಂಡೆಂದೆಣ್ಣುವನ್ನೆಕೆ ಎನ್ನೆಲ್ಲೋ ಶಬ್ಧ ಆಯೆಂಡಿಂಜತ್ತೆಂಗ್ಯೂ ಬೈತೂರಪ್ಪ ಎಣ್ಣಾನೆನ್ನೆಕೆ ಅವು ಬಯ್ಯಕ್ ತಿರಿ ನೋಟತೆ ನಡ್‌ಂದಿತ್ ಮನೆಕೆತ್‌ಚಿ. ಬೈತೂರನ್ ನಡ್‌ಂದ ಸಂಗತಿನೆಲ್ಲಾ ಅವ್ವಂಗೂ ಅರಿಚಿಟ್ಟಿತ್ ಪ್ರಸಾದ ಕೊಡ್ತತ್.

ಅಂಡಮಾಡ ಚೆಟ್ವಚ ಪುನಃ ಪುನಃ ಬಪ್ಪಿಂದೆಣ್ಣ ದಿವಸ ಆಯುಧತ್ಲೆಲ್ಲಾ ಕತ್ತಿತ್ ತೇಟಿತ್ ನೆಲ್ಲಕ್ಕಿ ನಡುಬಾಡೆಲ್ ಬೆಪ್ಪಂಜಿ ನಂದಾದೀಪ ಕತ್‌ಚಿಟ್ವ ಸಂಸಾರತ್ವ ಮನೆರೊಳಲೇ ತಾಂಡ ಕೂಡೆ ಇಪ್ಪನ್ನೆಕ್ಕೇಣ್ಣಂಜಿ ವೊಣ್ಣಯ್ಯ ಕನ್ನಿಮೂಲೆ ಕೋಂಬರೆಲ್ ಬೈತೂರಪ್ಪನ ಆರಾಧನೆಲ್ ಮೈಮರಂದಲ್ಲಿತ್ತಿಂಜತ್. ಅಕ್ಕಣೆಕ್ ಅಂಡಮಾಡ ಚೆಟ್ವಚ ಪಡೆಯಾಳಿಯ ಮುಂಬಾಯಿ ಪುಗ್ಗರ ಅಂಬಾಲತ್ ಎತ್ತನದೇ ಯುದ್ಧ ಘೋಷ ಮಾಡಿತ್ ಗುಡ್ಡೋಣಿಕಾಲೆ ಐನ್‌ಮನೆಕ್ ದಾಳಿ ಮಾಡೋಕ್ ಸುರು ಮಾಡಣೆ ಆದಿಶಕ್ತಿ ಚಾಮುಂಡಿ ತಾಂಡ ಮಮ್ಮಾಯ ಮಹಿಮೆನ ಬೀರುವೊದು ಜಬ್ಬೂಮಿ ಕುಲ್‌ಂಗ್‌ಚಿ. ಮೋಡ ಕವಂಜಿ ಗುಡ್‌ಗ್‌ಚಿ. ತೆಡ್‌ಮಿನ್ನಿ ಪೊಲ್‌ಂದತ್. ಲೆಕ್ಕ ಮಿತ್ತಿಯಿಲ್ಲತೆ ತೇನ್ ವಲ್‌ಂಜಿಯೊಳೊ, ನರಿಕಡ್‌ಂದಿಯೊಳೊ ಶತ್ರುವೊಳ ಕಡ್ಡಿತ್ ನಿಪ್ಪಕಯ್ಯತನ್ನಕ್ಕೆ ಮಾಡಣೆ ನೆಲ್ಲಕ್ಕಿ ನಡುಬಾಡೆಂಜಿ ತೋಕ್ ತನ್ನಾಲೆ ಬೊಡಿ ಬೆಪ್ಪಕ್ ಸುರು ಆಚಿ. ಒಡಿಕತ್ತಿ ಪಿಂಞ ಪೀಚೆಕತ್ತಿ ಸಹ ತನ್ನ ತನ್ನಾಲೆ ಶತ್ರುವೊಳ ಕೆತ್ತಿತೂ, ಕುತ್ತಿತೂ ಕೊಲ್ಲುವೊಕ್ ಸುರು ಆಕಣೆ ಚೆಟ್ಟಿಯಪ್ಪನೂ ಬಾಕಿ ಪಡೆಯಾಳಿಯಳೂ ಬೊತ್ತಿ ಬೊರಂಡಿತ್ ಬೆರಗಾಚಿ. ಅಕ್ಕಣೆಕ್ ಚಾಮುಂಡೇಶ್ವರಿ ಪಟ್ಟೆ ಬಲ್ಲಿಯ ನರಿರೂಪತ್ತ್ ಆರ್ಭಟ ಇಟ್ಟುಂಡ್ ಶತ್ರುವೊಡ ಮೇಲೆ ಪಾರಿಯಂಡ್ ಬಪ್ಪಾನ ಕಂಡಿತ್ ಚೆಟ್ಟಿಚ್ಚೆನೂ ಬಾಕಿಯಾನ ಪಡೆಯಾಳಿಯಳೂ ಆಶ್ಚರ್ಯತ್ ನಿಪ್ಪಕ್ ನೆಲೆ ಇಲ್ಲತೆ ಜೀವತ್ರ ಮೇಲೆ ಆಸೆಲ್ ಓಡಿ ಕಳ್ಳಿ ಪರಾರಿಯಾರ್ತ್. ಚೆನ್ನ ನೇರತ್ ನಾಲ್ ದಿಕ್‌ಲೂ ನಿಶಬ್ಧ ಆಕಣೆ ಕನ್ನಿ ಮೂಲೆ ಕೋಂಬರೆಲ್ ಪೂಜೆಲ್ ಮೈಮಂದಿತ್ ನೋಟಣೆ

ಚಾಮುಂಡಿರ ಮಹಿಮೆನ ದೂರತ್ ನಿಂದ್ ನೋಟಿಯೆಂಡ್ ಇಂಜ ನೆರೆ ಕರೆ ಪಿಂಞ ಕಂಬು ಸಹ ಬೆರಗಾಯಿತ್ ಆನಪೋನಾನೆಲ್ಲಾ ಮೊಣ್ಣಯ್ಯಂಗ್ ಅರಿಚಿಟ್ಟಿತ್. ಎಲ್ಲಾರೂ ಕೂಡಿ ಆದಿಬೈತೂರಪ್ಪನ ಕೊಂಡಾಡಿತ್ ಸ್ತೋತ್ರ ಮಾಡ್ಚಿ. ಆ ಕ್ಷಣತ್ಲೇ ಮೊಣ್ಣಯ್ಯ ಮನೆರೆದಿಕೆ ಚೆನ್ನ ದೂರತ್ಲ ಚಾಮುಂಡೆಯಮ್ಮೆಕ್ ನೆಲೆ ಕೊಡ್ತಿತ್ ಊರ್‌ಪತ್ತಾನೋ ಕೂಟಿತ್ ಭಾರಣಿ ಕೊಡ್ತಿತ್ ಆರಾಧನೆ ಮಾಡ್ಚಿ. ಆದಾಯತ್ ಚೆನ್ನ ದಿವಸತ್ರ ಒಳ್ಳೆಲೆ ಚೌಂಡಿಕೋಲ ಕೆಚ್ಚೆಚಿಟ್ಟಿತ್ ಶಾಸ್ತ್ರ ರೀತಿಲ್ ಶಂಖು ಸ್ಥಾಪನೆ ಮಾಡಿತ್ ವಾರಾಂಡೆಕ್ಕೊಮ್ಮೆ ಚಾಮುಂಡಿ ತೆರೆಂದೂ, ಭಾರಣೀಂದೂ ಅವಳ ಆರಾಧನೆ ಮಾಡಿಯೆಂಡ್ ಇಂದೂ ಉಂಡ್. ಈ ಕಷ್ಟ ಪರಂಪರೆ ಕೈಂಜ ಪಿಂಞ ಮೊಣ್ಣಯ್ಯ ಮಂಗಲ ಆಚಿ. ದೇವ ಭಕ್ತ ಮೊಣ್ಣಯ್ಯ ಕರಿಂಬುನೋ ಕೂಟಿಯೆಂಡ್ ಬೈತೂರ್ಕ್ ಪೋಕಣೆ ದೇವಸ್ಥಾನತ್ ಪೂಜೆ ಆಯಂಡಿಂಜತ್. ಕೋಲಕಾರಂಡ ಮೈಪ್ಪುಡ್ತಿತ್ ಅನುವಾದ ಕೊಡ್ತೆಂಡ್ ಇಂಜ ಬೈತೂರಪ್ಪಂಗ್ ಮೊಣ್ಣಯ್ಯ ಭಕ್ತಿಲ್ ಅಡ್ಡ ಬೂವಣೆ ಕೈ ಪುಡ್ಡಿತ್ತೆಪ್ಪಿತ್ ನೀಡ ಭಕ್ತಿ ನರ ಜೀವಿಯಕ್ ಮೀರನದ್ ಇಂಞ ಮಿಂಞಕ್ ಇಲ್ಲಿ ಕಾಲೋದಿ ನಮ್ಮೆಕ್ ಮೂಂದ್ ಎತ್ತು ಪೋರಾಟ ಆಯಿತ್ ಪೋಯಿತ್ ತಕ್ಕಾವೆನ ನಡ್ತಿಯೆಂಡ್ ಉಂಡ್. ಬೈತೂರಪ್ಪಂಡ ಕೇಳಿಕೀರ್ತಿ ಕೊಡಗ್‌ಲೆಲ್ಲಾ ಪಟ್ಟಿಕ್ ಎಡ್‌ನಾಡ್‌ರ ಬೆಪ್ಪನಾಡ್‌ರ ಕೆಲವು ಕುಟುಂಬಸ್ಥಂಗ ಸಹ ಅದಿದೇವಂಡ ಭಕ್ತಂಗಲಾಯಿತ್ ನಮ್ಮೆಲ್ ಇಕ್ಕಲೂ ಭಾಗವಹಿಸಿಯಂಡುಂಡ್‌ಂದ್ ಬಾಲೆಕಾರ ಮೊಣ್ಣಯ್ಯ ಬೈತೂರ್ಕ್ ನಮ್ಮೆಕ್ ಎಕ್ಕೇಂಗಿ ಸಮಯಕ್ ಸೆರಿ ಆಯಿತ್ ಎತ್ತ್ ಪೋರಾಟ ಎತ್ತತೆ ದೇವಡ ಕೆಲಸಕ್ ತೊಂದರೆ ಬಕ್ಕೂಂದ್ ಅಲ್ಲಿ ವಕ್ಕಡ ಪೆದತ್ ಇರೂರ್ ಭಟ್ಟಿ ಭೂಮಿ ಎಡ್ತಿತ್ ದೇವಡ ಜೋಡಿ ಭೂಮೀಂದ್ ಕೊಡ್ತತ್.

ಪುಗ್ಗೆರ ವಕ್ಕ ಕುಲನಾಶ ಆಪಂತ ಸಂದರ್ಭತ್ ಬೈತೂರಪ್ಪಂಡ ಅನುಗ್ರಹತ್ ವಕ್ಕತ್ರ ಪುನರುದ್ಧಾರ ಮಾಡ್‌ನ ಮಹಾಪುರಷ ಮೊಣ್ಣಯ್ಯನೇ ಅಯಿಂಡ ಗುರು ಕಾರಣಂದೆಣ್ಣಿತ್ ಅಯಿಂಡ ಮರು ದಿನತ್ಲೇ ಕೈಮಡ ಕೆಟ್ಟಿತ್ ವಾರಾಂಡೆಕ್ಕೊಮ್ಮೆ ವಕ್ಕ ಪತ್ತೂ ಕೂಡಿತ್ ತೊತ್ತಿತ್ ಇಕ್ಕಲೂ ಮೀದಿ ನೀರ್ ಬೆಚ್ಚೆಂಡುಂಡ್.

ಬೈತೂರ್ ಜಾಗ ಮಹಿಮೆ

ಇಕ್ಕಲೂ ಉಳ್ಳ ಬೈತೂರಪ್ಪಂಡ ದೇವಸ್ಥಾನಕ್ಕೆ ಬಡ್ಡು ಭಾಗತ್ ಮೂಂದ್ ಮೈಲ್ ದೂರತ್ ಕಾರ್ಯಾರ್ ಬನಾಂದೆಣ್ಣುವೊ ಓರ್ ಬಲ್ಲಿಯೆ ಕಾಡುಂಡ್. ಆ ಕಾಡ್‌ರ ಎಣ್ಣು ಬಣ್ಣ (ಉದ್ದಗಲ) ಎಚ್ಚಕ್‌ಲೆಂದ್ ಇಂದೂ ದಾರ್ಯೂ ಗೊತ್ತಿಲ್ಲೆ. ಬ್ರಿಟಿಷಂಗಡ ಕಾಲತ್ಲ ಸರ್ವೆ ಮಾಡೋಕ್ ಪೋನವು ಬಯ್ಯಕ್ ಬಂದಿತ್‌ಲ್ಲೆಂದ್ ಎಣ್ಣುವೊ ಪಳೆ ಉಂಡ್. ಅಲ್ಲೆಯೂ ಕ್‌ಟ್ಲೆಲೆ ಅಚ್ಚಕ್ ಬಲ್ಯ ಕಾಡದ್. ಆ ಕಾಡ್‌ಕ್ ಪೋನವು ಬಯ್ಯಕ್ ಬಪ್ಪಲೆಂದೆಣ್ಣುವೊ ಪಳಮೆ ಉಂಡ್. ಪಂಡ್ ದ್ವಾಪರ ಯುಗತ್ಲ ಪಾಂಡವಡ ಅರ್ಜುನ ಈ ಕಾರ್ಯಾರ್ ಬನತ್ಲ ಈಶ್ವರನ ಪುಡ್ಡಿತ್ ತಪಸ್ ಮಾಡೊಂಜತ್. ಅಕ್ಕ ಈಶ್ವರ ಪಾರ್ವತಿನ ಕಾಕಿತ್, ನೋಟ ಪಾರ್ವತಿ ಅರ್ಜುನ ಕೂಳ್ ನೀರ್ ಬುಟ್ಟಿತ್ ತಪಸ್ ಮಾಡುವ. ಇಕ್ಕ ಪೋಯಿತ್ ಅವಂಗ್ ಕೇಟಾನ ಕೊಡ್ಕೊಂಡು. ನಾನ್ ಪೋಯಿತ್ ಬಪ್ಪಿ. ಆಚಿಂಗಿ ಓರ್ ವಿಷಯ ನೀಕ್ ಎಣ್ಣುವಿ ಕೇಳ್. ಅರ್ಜುನ ಮಹಾ ಗಟ್ಟಿಗ. ಅಂವೊ ಯುದ್ಧ ಮಾಡ್ಕೊಕ ಅಂವಂಡ ಬೆನ್ನ ಕಂಡಂವನಿಲ್ಲೆ. ಅಚ್ಚಕ್ ಚಮತ್ಕಾರತ್ ಅಂವ ಯುದ್ಧ ಮಾಡ್ಕೊಂದ್ ಎಣ್ಣೊಚಿ. ಇದ್‌ನ ಕೇಟಿತ್ ಪಾರ್ವತಿ ಅಂದಕ, ನಾ ಅಂವಂಡ ಬೆನ್ನ ನೋಟೊಂಡೊಂದ್ ಹಠ ಪುಡಿಚತ್. ಈಶ್ವರಂಗ್ ವಿಧಿ ಇಲ್ಲತೆ ಒತ್ತಂಡತ್. ಈಶ್ವರ ಕಿರಾತ ರೂಪ ತಾಳಿತ್ ಅನ್ನನೆ ಕಿರಾತಂಡ ಓರ್ ದಂಡ್ ಕೂಟ್‌ಚಿ. ಬಾಣಬಿಲ್ಲ ಎಡ್ತಂಡತ್. ಬಲ್ಯ ಓರ್ ಪಂದಿನ ಸೃಷ್ಟಿ ಮಾಡ್‌ಚಿ. ಆ ಪಂದಿಕ್ ಬೋಟೆ ಕೂಟ್‌ಚಿ. ಬಾರೀ ಬೊಬ್ಬೆ ಶಬ್ದ ಮಾಡಿಯೆಂಡ್ ಅರ್ಜುನ ತಪಸ್ ಮಾಡ್ಕೊ ಜಾಗಕ್ಕಾಯಿತ್ ಪಂದಿ ಪೋಪನ್ನೆಕ್ಕೆ ಮಾಡಿತ್ ಬಯ್ಯಲೇ ಕಿರಾತ ಸೈನ್ಯ ಬೊಬ್ಬೆ ಮಾಡಿಯೆಂಡ್ ಪಂದಿರ ಬಯ್ಯಲೇ ಪೋಚಿ. ಈ ಕೂತ್‌ಕ್ ತಪಸ್ಸುಲುಳ್ಳ ಅರ್ಜುನ ಕಣ್ಣು ಬುಟ್ಟಿತ್ ನೋಟೋಕ ಬಲ್ಲೋರ್ ಪಂದಿ ಓಡಿ

ಬಪ್ಪಂಜತ್. ಅಕ್ಕ ಅರ್ಜುನ ತಾಂಡ ಬಿಲ್ಲಾನ ಎಡ್ಡಿತ್ ಅಂಬ್ ಎಡ್ಡಂಜಿ ಪಂದಿಕ್ ಗುರಿ ಬೆಚ್ಚಿ ಅಂಬ್ ಬುಟ್ಟತ್. ಪಂದಿ ಬುದ್ದತ್. ಅಕ್ಕಣೆಕ್ ಈಶ್ವರನೂ ಓರ್ ಅಂಬ್ ಬುಟ್ಟತ್. ಅದೂ ಪಂದಿಕ್ ಪಟ್ಟತ್. ಇಕ್ಕ ದಂಡ್ ಬಾಣ ಪಂದಿರ ಮೇಲ್ಲ್ ಆಚಿ. ಇಕ್ಕ ಅಲ್ಲಿ ತಕರಾರ್ ಬಾತ್. ಅರ್ಜುನ ನಾಡ ಬಾಣತ್ ಬುದ್ಧಿಯೆಂದೂ ಈಶ್ವರ ನಾಡ ಬಾಣಕ್ ಬುದ್ಧಿಯೆಂದೂ ಜಗಳ ಸುರು ಆಚಿ. ಕಡೆಕ್ ಓರ್ ತೀರ್ಮಾನಕ್ ಬಾತ್. ಎಣ್ಣೆಚೇಂಗಿ ದಂಡಾಳೂ ಇಕ್ಕ ಮಲ್ಲ ಯುದ್ಧ ಮಾಡುವನೆಕೆಯೂ, ದಾರ್ ಅಡಿಕ್ ಬೂವ ಅವು ಚೋತವು ಮೇಲೆ ಬುದ್ಧವು ಗೆದ್ದವೊಂದೂ ಒಪ್ಪಂದ ಆಯಿತ್ ಕುಸ್ತಿ ಪುಡಿಚತ್. ಸುಮಾರ್ ನೇರ ಪುಡ್ಡಿತ್ತಾಪಕ ಈಶ್ವರ ಅಡಿಲೂ, ಅರ್ಜುನ ಮೇಲೆಯೂ ಬುದ್ಧತ್. ಅಕ್ಕ ಈಶ್ವರ ಪಾರ್ವತಿಕ್ ಇಕ್ಕ ನೋಟ್ ಅರ್ಜುನಂಡ ಬೆನ್ನನಾಂದ್ ಎಣ್ಣೆಚಿ. ಅಕ್ಕ ಅರ್ಜುನಂಗ್ ಜ್ಞಾನೋದಯ ಆಯಿತ್ ಬೆರಿಯ ಏವಂಜಿ ಈಶ್ವರಂಡ ಪಾದಕ್ಕ ನಮಸ್ಕಾರ ಮಾಡಿತ್ ಆನ ತಪ್ಪಕ್ ಮಾಡ್ನ ಕೆಲಸ. ನೀಕ್ ಇದ ಪಾಶುಪತಾಸ್ತ್ರ ಎಣ್ಣುವೊಂಜಿ ಪವಿತ್ರವಾನ ಪಾಶುಪತಾಸ್ತ್ರ ಎಣ್ಣುವೊ ಬಿಲ್ಲಾನ ಅರ್ಜುನಂಗ್ ಕೊಡ್ಡಿತ್ ಆಶೀರ್ವಾದ ಮಾಡೊಂಜಿ ಮಾಯ ಆಚಿ. ಅಲ್ಲಿಂಜಿ ಚೆನ್ನ ಸಮಯ ಕಯ್ಯೊಕ ಇಕ್ಕ ಮುಕ್ಕಾಟಿ ಅಯ್ಯೆಂದೆಣ್ಣೆಚೇಂಗಿ ದೇವಕ್ ಬೊಳ್ಳ ಪುಡಿಪವು, ಚಂಡೆಕೊಟ್ಟುವವು ಅಯಿಂಡ ಓರ್ ವ್ಯಕ್ತಿ ಓರ್ ದಿವಸ ಅಲ್ಲಿಕ್ ಪೋಪಕ್ ಓರ್ ಸುಂದರವಾನ ಕಲ್ಲ್ ಕಂಡತ್. ಅಕ್ಕ ಅಂವೊ ಅಂವಂಡ ಕತ್ತಿನ ಕೂಟೋಕ್ ನಲ್ಲ ಕಲ್ಲ್ಂದೆಣ್ಣೆತ್ ತಾಂಡ ಕತ್ತಿನ ಆ ಕಲ್ಲ್ಲ್ ಕೂಟೆಚಿ. ಅಕ್ಕ ಆ ಕಲ್ಲ್ಂಜ ಚೋಲ ಬಾರ್ಚಿ. ಇದ್ನ ಕಂಡ ಮುಕ್ಕಾಟಿ ಅಯ್ಯೆ ಜನಕ್ಕೆಲ್ಲಾ ಎಣ್ಣೆತ್ ಪುನಃ ಪೋಪೂಕ್ ನೋಟೋಕ ಅಲ್ಲಿ ಸುಂದರಂಜಿ ಬೆನಲೆ ಕಾರ್ಚಿ. ಇದ್ನ ಕಂಡ ಮುಕ್ಕಾಟಿ ಅಯ್ಯೆ ಜನಕ್ಕೆಲ್ಲಾ ಎಣ್ಣೆತ್ ಪುನಃ ಪೋಪೂಕ್ ನೋಟೋಕ ಅಲ್ಲಿ ಕಲ್ಲ್ ಇಂಬಲೆ. ಅಲ್ಲಿ ದೇವಸ್ಥಾನ ಅಂಡೊಂದ್ ಆಚಿ. ಪಿಂಞ ಕಾಲ ಕಯ್ಯೊಕ ಕಲಿಯಾಟ್ ಜಮ್ನಿಕ್ ಸ್ವಪ್ನ ಆಯಿತ್ ಈಶ್ವರ ದೇವಸ್ಥಾನ ಅಂಡೊಂದ್ ಆಚಿ. ಪಿಂಞ ಇಕ್ಕ ಉಳ್ಳ ಚಾಗತ್ ದೇವಸ್ಥಾನ ಕೆಟ್ಟಿತ್ ಪೂಜೆ ಸುರು ಆಚಿ. ಇಕ್ಕ ಅಲ್ಲಿ

ದಂಡ್ ಕಲ್ಲರ ಲಿಂಗ ತನ್ನಷ್ಟಕ್ಕೇ ಉದ್ಭವ ಆಯಿತ್ ಬೊಳಂದಂಡ್ ಬಂದಂಡುಂಡ್. ಅದಾನ ಈಶ್ವರ ಪಾರ್ವತೀಂದೆಣ್ಣಿತ್ ಪೂಜೆ ಮಾಡುವಾ. ಆ ಕಲ್ಲರ ಲಿಂಗ ಇಕ್ಕ ಬಂದ್ ಮುಕ್ಕಾಲಡಿ, ಪಿಂಗಳೊಂದ್ ಅರೆ ಅಡಿ ಎತ್ತರ ಬೊಳಂದಂಡುಂಡ್. ಇಲ್ಲಿ ಅರ್ಜುನಂಡ ಕ್ಷೇತ್ರ ಅಯ್ಯಪ್ಪಂಡ ಕ್ಷೇತ್ರ, ನೀಲಕಾಳಿರ ಕ್ಷೇತ್ರ ಪಶ್ಚಿಮತ್ ಪೊಳೆರ ಕರೆಲ್ ಬಲ್ಯ ಆಲ್ಮರ ಇಂಜತ್. ಈ ಬೈತೂರ್ ಕ್ಷೇತ್ರ ಅಯ್ಯಪ್ಪಂಡ ಕ್ಷೇತ್ರ, ನೀಲ ಕಾಳಿರ ಕ್ಷೇತ್ರ ಪಶ್ಚಿಮತ್ ಪೊಳೆರ ಕರೆಲ್ ಬಲ್ಯ ಆಲ್ಮರ ಇಂಜತ್. ಈ ಬೈತೂರ್ ಕ್ಷೇತ್ರ ಬಾರೀ ಪವಿತ್ರತ್ ಉಂಡ್. ಇಲ್ಲಿ ಮುಖ್ಯ ಪೂಜೆ ಮೃತ್ಯುಂಜಪ. ಸಾಧಾರಣ ಓರ್ ಕಾಲಕ್ ನಾಲ್ ಆಯಿರತ್ರ ಮೇಲೆ ಈ ಪೂಜೆನ ಜನ ಮಾಡ್ಚಿಡ್ಚ. ಕೊಡಗ್ ಪರ್ತ್ ಜನ ಇಲ್ಲಿಕ್ ಎಡ್ಗೆ ಆಯಿತ್ ಎತ್ ಪೋರಾಟ ಎಡ್ಗೆ ಅಕ್ಕಿ, ಪಣ ಕೊಡ್ತಿತ್ ದೇವದ ಆಶೀರ್ವಾದ ಪಡೆಯುವ. ಇಲ್ಲಿ ಮಾಲ್ಯಾರ್ ಎಟ್ಟಾಲ್ಂಜ ಪನ್ನಂದಾಂಗತ್ತಣೆ ನಮ್ಮೆ ಆಪ. ಪುಗ್ಗೆರ ಕುಟುಂಬತ್ರ ಪೆರಿಯವು ಇಲ್ಲಿ ತಕ್ಕನಾಯಿತ್ ಕಾರ್ಯಾಂಭೀರ್ಯ ನಡ್ತುವ.

ಅರಂಜದ್

ಕೊಡವ ಕಾಡ್‌ಪಣ್ಣ್

ನೇರಪಣ್ಣ್, ಇಡ್‌ಂಜಿಪಣ್ಣ್, ಅಮ್ಮೆಪಣ್ಣ್, ಕೂಮೆಪಣ್ಣ್, ಕೂಮತ್ತಿ ಪಣ್ಣ್, ಎಲ್‌ಂದೆ ಪಣ್ಣ್, ಕೂಕ್ರಪುಳಿ, ಕೋಡಂಗಿತ್ತುಳಿ, ಮಾಂಗ್, ಚಕ್ಕೆತ್ತೊಂಬಳಿ, ಮಾಂಗ್, ಕರ್ಮಾಂಜಿ ಪಣ್ಣ್, ಕೊಟ್ಟೆಪಟ್ತ್, (ಮುಳ್ಳಾಪಣ್ಣ್) ನೆಲ್ಲಿಕೆ, ಕಾಯಿ (ಸೀಬೆ)ಚಕ್ಕೆಪಣ್ಣ್, ಕಕ್ಕಡೆಪಣ್ಣ್, ತೊಲಿಯಾರ್ಪುಳಿ, ಕಾಕೆಪಣ್ಣ್, ಅಂಬಟೆ, ಉಪ್ಪುಲಿ ಪಣ್ಣ್.

ಕಕ್ಕಡ್ ತಿಂಗತ್‌ರ ವಿಶೇಷ ತೀನಿ

ಸರ್ವ ಸಾಧಾರಣ ನಾಟಿ ಪಣಿ ಪೆರ್ತ್ ಅದ್ವಾನ ಉಳ್ಳ ಪಣಿ. ಮಾಡೋಂಗಕ್ ಪೇರ್ತ್ ತಾಕತ್ತ್ ಕಾಪಾಡಂಡಿಯೇ ಅವಶ್ಯಕತೆ ಉಂಡ್. ಅನೇರಕ್ಕ ಸರಿ ಆಯಿತ್ ಪರಮಾತ್ಮ ಪ್ರಕೃತಿ ದತ್ತವಾನ ಪೇರ್ತ್ ತೀನಿಕ್ಕಾಯಿತ್ ಸೃಷ್ಟಿ ಮಾಡಿತ್ ಬೆಚ್ಚದ್ ವಿಶೇಷತೆ. ನೈಚಿತ್ ತಡಿನ ಭರ್ತಿ ಮಾಡಿತ್ ತಡಿನ ಪೋತುವೋಕ್‌ಂದೆನ್ನೋ ದೇವ ನೀರ್‌ಲ್, ಬಾಣೆಲ್‌ಂದ್ ಫಲವಿಧತ್ರ ಚೋದ್ ಚೋದಾನ ತೀನಿಕ್ ಎಡೆ ಮಾಡಿತ್ ಬೆಚ್ಚಿತ್.

ಕಕ್ಕಡ ತಿಂಗಕ್ ಮಿಂಗಳೇ ಸುರು ಆಯಿತ್ತಿಪ್ಪ. ಕೇಚಿ ಇಂಡ್ ಕರಿ, ಕಕ್ಕಳೆ ಇಂಡ್ ಕರಿ, ಕೊಯಿಲೆ ಮೀನ್ ಕರಿ, ವಣ್ಣ್ ಕೊಯಿಲೆ ಮೀನ್ ಕರಿ, ಪೊರ್ಕ ಮೀನ್, ಬಾಂಬ, ಬರೆ ಮೀನ್, ಕದ್ರೆಕೊಟ್ಟಿ, ಬಾಳೆಮೀನ್ ಇನ್ನನೆ ಪಲ ತರತ್ರ ಮೀನ್ ಕರಿ ಆಳಾಕುಮ್ಮ ಕರಿ, ಕಾಟೋಳ ಕುಮ್ಮ ಕರಿ, ಮರಕುಮ್ಮ, ಕಾಡಿಯ ಕುಮ್ಮ ಕರಿ, ಕಾಟೋಳ ಕುಮ್ಮ ಕರಿ, ಕಾಡ್ ಕೇಂಬ್ ಕರಿ, ತಾಳಾಕೇಂಬ್

ಕರಿ, ಮರಕೇಂಬ್ ಕರಿ, ಮಲೆಯಾಳ ತಾಳಕೇಂಬ್ ಕರಿ, ಪಾವಕ್ಕೆ ಕರಿ, ಕಾಕೆತೊಪ್ಪ್ ಕರಿ, ತೆರ್ಮೆತೊಪ್ಪ್ ಕರಿ, ಬೆಯಿಂಬಳೆ ಕರಿ, ಪುದಿನ ತೊಪ್ಪ್ ಪಜ್ಜಿ, ಚಕ್ಕೆ ಚಳೇ, ಕುರು ಪಜ್ಜಿ, ಕೈಪುಳಿ ಪಜ್ಜಿ, ಕಕ್ಕಡ ಕೋಳಿ ಕರಿ, ಬೊಳ್ಳರಿ ಕರಿ, ಪಂದಿಕರಿ, ಮದ್ದಾಕೂಳ್ ಪಿಂಞ (ಪುಟ್ಟಾ) ಕಕ್ಕಡ ಪದ್ದೆಟ್ಟಾಂಗ್ ಪತ್ರೊಡೆ ಇಚ್ಚಕ್ಕಾಂಡ ಕೂಟ್ ಕ ನನ್ನಾಲ್ ಬೆರ ಭತ್ತ ಸರಾಯಿ ಕಳ್ಳ, ಇಚ್ಚಕ್ಕಾತ್ ಚೆನ್ನಂಗಲ್ಲಾ ಬೋರೆತಿಂಗತ್ತೂ ಕೂಡಿತಿಪ್ಪ. ಹೆಚ್ಚಿ ಕಮ್ಮಿ ಬಯ್ಯ ಮಿಂಞ ಕೂಟಿತಿಪ್ಪ.

ಕೊಡವ ಪುಟ್ಟಾ

ಪುಕ್ಕ ಪುಟ್ಟಾ: ತಳಿಯ ಪುಟ್ಟಾ, ಕಡಂಬುಟ್ಟಾ, ಪಾಪುಟ್ಟಾ, ಬೊಣ್ಣೆ ಕಡಂಬುಟ್ಟಾ, ನೂಪುಟ್ಟಾ, ಪತ್ರೊಡೆ, ಮದ್ದಾಪುಟ್ಟಾ.

ದೋಸೆ: ದೋಸೆ, ಓಡ್ ಪುಟ್ಟಾ, ನೀರ್ದೋಸೆ,

ಬರ್ತ ಪುಟ್ಟಾ: ಖರ್ಜಿ ಕಾಯಿ, ಕೊಡ್ಡಿ ಖಜಾಯ, ತಟ್ತ್ ಖಜಾಯ, ಕುಂಡ್ ಪುಟ್ಟಾ, ಚಿಕ್ಕುಂಡೆ, ಚೆಟ್ಟಿಪುಟ್ಟಾ, ಚಿಟ್ಟಾಣಿಪುಟ್ಟಾ, ಅಡುಕೆ ಪುಟ್ಟಾ, ತೆಂಗೆ ಟಾಫಿ, ಚಿರೋಟಿ, ಕಲ್ಸೆ, ಮರ್ಕಿನ್ ಕಜಾಯ, ಪಕ್ಕೋಡ ಕಾರ್ಸೆವೆ, ವಡೆ, ರವೆ ಉಂಡೆ, ಬಾಳೆನುರ್ಕ, ಚಕ್ಕುಲಿ, ನಿಪ್ಪಿಟ್ಟಾ, ಬಾಳೆಬೋಂಡ, ಕೋಡ್ ಬಳೆ, ಪೊರಿಉಂಡೆ.

“ಮೃತ್ಯುಂಜಯ ದೇವಸ್ಥಾನ” (ಸಂಗ್ರಹ) ಬಾಡಗರಕೇರಿ, ದಕ್ಷಿಣ ಕೊಡಗ್ (ಬಿರುನಾಣಿ) (ಈಶ್ವರ ದೇವಸ್ಥಾನ)

ಈ ದೇವಸ್ಥಾನಕ್ಕೆ ಎಳ್ತಕಾರ (ನಾನ್) ಮುದ್ದಾ ಪೋಯಿತ್ ಅಲ್ಲಿಯತ್ರ ಸ್ಥಳ ಮಹಿಮೆನ ಕೇಟಂಜಿತ್ (ಪೂಜೆನೇರಕ್) ಅಲ್ಲಿಯತ್ರ ಅಧ್ಯಕ್ಷ, ಗೌ. ಕಾರ್ಯದರ್ಶಿ ಪಿಂಞ ಪೂಜೆಕಾರ ಪುಟ್ಟಸ್ವಾಮಿ, ಈಯಂಗಳ ಅಲ್ಪಚಿಟ್ಟಿತ್ ಅಲ್ಲಿಯತ್ರ ದೇವಡ ಮಹಿಮೆ, ವಿಶೇಷತೆ ಇನ್ನತ್ತಾನ ಚರ್ಚೆ ಸಹಿತ ಸಾಧಾರಣವಾಯಿತ್ ಅಂಜ್ ವಿಷಯತ್‌ನ ಕೇಟಿತ್ ಪೂಜಾ ಮಹಿಮೆರನ್ನತ್ತಾನ ಕೇಟಿತ್ ಇಲ್ಲಿ ಎಳ್ಳನದಾಯಿತುಂಡ್. ಅಧ್ಯಕ್ಷ, ಗೌ. ಕಾರ್ಯದರ್ಶಿ ಪಿಂಞ ಪೂಜೆಕಾರ ಅಯಿಂಗಡ ಅನುಭವತ್ತ್ ಎಣ್ಣೆತು ತಾತ್. ಅಲ್ಲಿ ಪೂಜೆ ನಡಂದಂಡಿಂಜತ್. ಅಲ್ಲಿಯೂ ನನ್ನ ಪೂರ್ಣ ಗೌರವತ್‌ಲ್ ಧರಣಿಲ್ ಕಾಕಿ ಕೂಟಿಯಂಡ್ ತೀರ್ಥ ಪ್ರಸಾದ ತಂದಿತೂ, ಎಲ್ಲಾಡೋ ಕೂಡೆ ಕಾಕಿಯ ಪೋಯಿತ್ ನನ್ನೊ ನಾಡ ಕೂಟಲಿಂಜ ನಾಡ ಮೋಂವನೋ ಊಟೋಪಚಾರೋ ತಂದಿತ್ ಸಹಕಾರ ತಂದಿತ್ ಅಯಿಚಿ ತಂದಾಂಗ್ ಸಂಗ ಅಯಿಂಗಕ್ಕೆಲ್ಲಾರ್‌ಕೂ ಮನದುಂಬ್‌ನ ವಂದನೆನ ಈ ಮಾರಿಪತ್ ಅರ್ಪಾಚಿಡುವಿ. ಅಲ್ಲತೆ ಸರ್ವ ವ್ಯಾಪಿಯಾನ ಈಶ್ವರ ಮೃತ್ಯುಂಜಯ ಈಶ್ವರ ಮಾಲೋಂಗಳೋ ಸರ್ವ ಸಜೀವಿಯಳೋ ಈ ಲೋಕತ್ನೋ ಚಾಕಿ ಪೊಲ್ತಡ್‌ಂದ್ ಮನಸಾರೆ ಅಡ್ಡಬುದ್ಧಾ ಬೋಡುವಿ.

ತಾರೀಕ್ 22.03.05ನೇ ಬೇಳಾಚೆ ಬಿರುನಾಣಿ ಬಾಡಗರಕೇರಿ ಗ್ರಾಮತ್ ಸೆಲೆಗೊಂಡ ಶ್ರೀ ಮೃತ್ಯುಂಜಯ ದೇವಸ್ಥಾನಕ್ ಪೊಲಾಕ 11.30 ಗಂಟೆಕ್ ಎತ್ತಿತ್ ಕೊಟ್ಟನ ಮಾಹಿತಿ (ವಿಷಯ) ಇನ್ನನೆ ಉಂಡ್.

ಶ್ರೀ ಮೃತ್ಯುಂಜಯ ದೇವಸ್ಥಾನಕ್ (ವಠಾರಕ್) ಎತ್ತುವೊಕ್ಕಲೇ ಅಲ್ಲಿ ವಿಷಯ ಕಂಡ್ ಬಾತ್. ಚೆನ್ನಂಗ್ ದೂರತಿಂಜಿಯೇ ಓರ್ ಮೊಟ್ಟಾಲೇ ದೇವಸ್ಥಾನ ನಿಂದದ್ ಕಾಂಬ. ಸಿಮೆಂಟ್ ಕಲ್ಲಾಯಿತ್ ಮೊಟ್ಟ್ ಕೆಟ್ಟಿತ್ ಅದ್ನ ಚೊಟಿತ್ ಕೇರಂಡಿಯೇ ನೇಮ. ಪೆರ್ತ್ ಎತ್ತರಕ್ ಪತ್ತಿತ್ತಾನ ಪಿಂಞ ಸಮತಟ್ಟಲ್ ಬಲ್ಲದಾನ ಬೆಲಿಕಲ್ ಕಾಟ್ವಪ. ಅಂದಾಜ್ ನಾಲರೆ ಅಡಿ ಚೊಕ್ಕಟ್ಟಲ್ ಎಳೆಟ್ಟಡಿ ಎತ್ತರಕ್ (ಅಂದಾಜ್) ಬೆಲಿಕಲ್ ನಿಂದಿತುಂಡ್. ಅಲ್ಲಿಯೇ ಪ್ರತ್ಯೇಕತೆ ಓರ್ ಭಕ್ತಿ ರೂಪ ಉಂಡಾಪ. ಮಿಂಞಕ್ ದೇವಸ್ಥಾನ ಎದಿಕೆ ದ್ವಾರ ಕಟ್ಟೋಳೆ ಪಡಿ, ಸುತ್ತ ಕಟ್ಟ್ ಪೊಳಿ (ದಂಡ್ ಬರಿಸುರುವಾಯಿತ್ ನಾಲ್ ಬರಲೂ ಪೊಳಿ ಇಂಜಿತ್ ಎದಿಕೆ ಮಂಟಪ) (ಅನುಕೂಲಕೊತ್ತಿತ್) ಪಕ್ಕತ್ ಗರ್ಭಗುಡಿ ಇನ್ನತ್ತದ್ ಸೃಷ್ಟಿಯಾಯಿತುಂಡ್. ಗರ್ಭಗುಡಿರ ಒಳ್ಳಲ್ ಭಕ್ತಿ ಭಾವ ಉಕ್ಕಿ ದುಂಬುವೊ ವಿಗ್ರಹ (ಈಶ್ವರಂಡ) ಕಂಡ್ ಬಪ್ಪ ಅದ್ಂಡ ವಿವರಣೆ ಅದಿಶೇಷನೇ ವಿವರಿಚಿಡಂಡ್ಪ.

ಗರ್ಭಗುಡಿರ ಪಿಂಞ ಮಂಟಪತ್ರ ಮಾಡ್ ಚೆಂಬ್‌ರೋಡ್‌ಲ್ ಪೊದ್‌ಂಜಿತ್ ಊರ್‌ಕಾರ ಪೆರ್ತ್ ಪುರ್‌ಡ್‌ಲ್ ಚಾಯಿಕೂಟಿತ್ ಬೆಚ್ಚಾಲೆ ಅಯಿಂಡ ಭಕ್ತಿರ ತೂಕ ಅರಿಯುವಾ. ಪೊಳಿರ ಮೇಪರೆ ಕೂಡ ಚೆಂಬೋಟ್ಟಿತ್ ಆಂಡ ಮೇಲೆ ಆರ್.ಸಿ.ಸಿ ಇಟ್ಟಿತ್ ಇಲ್ಲಿ ಕಂಡ್ ಬಂದ ವಿಶೇಷತೆ ಗಾಂಭೀರ್ಯವಾನದಾಯಿತುಂಡ್. ಆಚೇಂಗಿ ಅದ್‌ಂಡ ಕಾರಣತ್ ಅರಿಯೋಕ್ಕೇದೋರ್ ಬಟ್ಟೆಯೂ ಇಲ್ಲತ್ತಾನದಾಶ್ಚರ್ಯ ಉಳ್ಳ ಪರಿಯ್ಯೆಂಗಕೂ ಗೊತ್ತಿಲ್ಲೆ. ಪಳಿಯಯಿಂಗ ಎಳ್ಳಿತ್ ಬೆಚ್ಚದೂ ಇಲ್ಲೆ.

ಗರ್ಭಗುಡಿಲ್ ಹಣ್ಣುಕಾಯಿ ಮಾಡೋಕ ತೆಂಗೆ ನೀರ್ ಪಿಂಞ ಬ್ರಹ್ಮ ಕಲಶ ಮಾಡ್‌ನ ತೀರ್ಥ ಪಿಂಞ ತರ ತರ ಅಭಿಷೇಕ ಮಾಡ್‌ನ ತೀರ್ಥ ಇನ್ನನೆ ಪಲತರತ್ರ ತೀರ್ಥ ಲಿಂಗತ್ರ ಪೀಠತ್‌ಂಜಿ ಒಕ್ಕಿತ್ "ಸೋಮಸೂತ್ರ) ಗರ್ಭಗುಡಿಂಜ ಪೊರ ಬೂವದ್ ಸರ್ವದೇವಸ್ಥಾನತ್ ಉಳ್ಳ ನೇಮ. ಪೊರ್ಮೆ ಅದ್ ನಿಷ್ಪಂಜಿ ಕೋತಿತ್ ಚೆಲ್ಲುವೊಕ್ ಓರ್ ಸಿಮೆಂಟ್‌ರ ಕುಂಡೊಂದಿಪ್ಪದ್ ವಾಡಿಕೆ.

ದೇವಸ್ಥಾನತ್ರ ಒಳ್ಳೆ ಕೂಡಾನ ಎಲ್ಲಾ ಭಕ್ತಂಗ ನಂಗಡ ಎಡ್ಡೆ ಬರಿಂಜ (ದೇವಸ್ಥಾನತ್ರ ಬಲ್ಲೆ ಬರಿಕಾಲೆ ಪ್ರದಕ್ಷಿಣಾ ರೂಪತ್ ಪ್ರದಕ್ಷಿಣೆ ಪೋಯಿತ್ ದೇವಸ್ಥಾನತಾರ ಎಡ್ಡೆಬರಿಕಾಲೆ ಬಂದಿತ್ ದೇವಡ ಎದಿಕೆ ನಿಂದಿತ್ ದೇವಳ ತೊಪ್ಪ ಪದ್ಧತಿ.

ಆಚೆಂಗಿ ಬಾಡಗರಕೇರಿ (ಬಿರುನಾಣಿ)ರ ಮ್ಯತ್ಯುಂಜಯ ದೇವಸ್ಥಾನತಾರ ಗರ್ಭಗುಡಿರ ಭಲ್ಲೆಂಜಿ ಭಕ್ತಂಗ ಪ್ರದಕ್ಷಿಣೆ ಪೋಯಿತ್ ಗರ್ಭಗುಡಿರ ಎಡ್ಡೆ ಬರಿಲ್ ಉಳ್ಳೆ "ಸೋಮಸೂತ್ರ" (ಗರ್ಭಗುಡಿಂಜ ಪೂರ್ಮೆ ನೀರ್ ಬಪ್ಪಕುಳ್ಳೆ ಕೊಳ್ಳೆಪೆ) (ಸಿಮೆಂಟ್ ಕಲಲುಂಡಾಕನದ್) ಪ್ರದಕ್ಷಿಣೆ ಅಲ್ಲಿಂಜ ಮಿಂಞಾಕ್ ಮಾಮೂಲ್ ಬಪ್ಪ ಪ್ರದಕ್ಷಿಣೆ ಮುಂದುವರಿಚಿಡುಪಕ್ಕಿಲ್ಲೆ. ಅಲ್ಲಿ ಸಂಬಂಧಪಟ್ಟವು ಬೊಳ್ಳೆ ಸಿಮೆಂಟ್ ಗುರ್ತು ಮಾಡಿತುಂಡ್. ಅಲ್ಲಿಂಜ ಬೈಯಕ್ ಆ ಪ್ರದಕ್ಷಿಣವಾಯಿತ್ ಬಂದಿತ್ ಕೇಕ್ ಬರಿಲ್ ಗರ್ಭಗುಡಿರ ಎದಿಕೆ ದೇವಳ ನೋಟುಂಡು ಅಚ್ಚಕೆ. ಈ ವಿಷಯ ದಾರ್ಕೂ ಕಾರಣ ಗೊತ್ತಲೆ. ಹೋಮಕುಂಡತಾಲೆ (ಬಲ್ಲೆ ಬರಿಲ್) ಉಂಡ್. ಅಲ್ಲಿ ಭಕ್ತಂಗಡ ಹೋಮ ನಡಪ. ಇಲ್ಲಿ ಭಕ್ತಂಗ ಬೋಡಾನಾನ ಈಶ್ವರ ನಡತ್ ಕೊಡುಪಾಂದ್ ಪ್ರತೀತಿ ಉಂಡ್. ಅಲ್ಲೆಂಗೂ ಈಶ್ವರಪ್ಪಂಡೆಂಜಿಯೂ ಪುರಾಣ ಕಥೆಲೂ ಬೋಡಾನೆಂಗಕ್ ಬೋಡಾನಾನ ಕೊಡತರೊ ಓರ್ ಧಾರಾಳಿಯನ್ನೇ, ಆಚೆಂಗಿ ಇದ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಈ ಪುಣ್ಯ ಭೂಮಿಲ್ ಅವ ತಾಂಡ ಭಕ್ತಂಗ ಕೇಟಾನ ಕೊಡಪ ಮಹಿಮೆ ಉಂಡ್ ಎಂದೆಣ್ಣವಕ್ ನಂಗ ಧನ್ಯಂಗ, ಪಾವನಂಗ.

ನಮ್ಮೆಲ್ ದೇವಳ ಎಡ್ಡೆ ಪಟ್ಟಿನ ಕೂಡ ಸೋಮಸೂತ್ರತಾನ ಕಡ್ಂದಿತ್ ಪೋಪದ್ ಕಯ್ಯ. ಆ ಪ್ರದಕ್ಷಿಣವಾಯಿತ್ ಬೈಯಕ್ ಬಂದವಂಡು.

ಗರ್ಭಗುಡಿರ ಬಲ್ಲೆ ಉಳ್ಳೆ ಗಣಪತಿರ ವಿಗ್ರಹತಾರ ಮೂಡ್ ದಕ್ಷಿಣಕ್ ಬೆಚ್ಚಿತುಂಡ್. ಇಲ್ಲಿಯತಾರ ಪೂಜೆಕಾರ ಗಿರೀಶ್ಂದೆಣ್ಣವವು ಸಾಧಾರಣ 12 ಕಾಲತಂಜಿ ಸಂಸಾರೋಡೆ ಮ್ಯತ್ಯುಂಜ ಈಶ್ವರಂಡ ಪೂಜೆ ಪುನಸ್ಕಾರ (ಸೇವೆ) ನಡ್ಡಿಯೆಂಡ್ ನಲ್ಲಾಮೆ ನಡ್ಡಿಯೆಂಡುಂಡ್. ಇಲ್ಲಿ ಪ್ರತಿದಿನ ಪೂಜೆ ಕೈಂಜಿತ್

ಅನ್ನದಾನ ನಡವಿದ ಇಲ್ಲಿಯತರ ವಿಶೇಷತೆ. ಈ ದೇವಸ್ಥಾನತರ ಎಲ್ಲಾ ವ್ಯವಹಾರತ್ಯ ಊರ್ಕಾರೇ ನಡ್ತಿಯಂಡ್ ಪೋಯುಂಡುಂಡ್. ಮಹಾಪೂಜೆರ ನೇರತ್ಯ ವಿದ್ಯುತ್ ಚಾಲಿತ ಚಂಡೆ ಪೂಜೆರ ವ್ಯವಸ್ಥೆ ಉಂಡ್. ಇಲ್ಲಿ ದೇವಸ್ಥಾನಕ್ ಸಂಬಂಧಪಟ್ಟಿತ್ 5 ಎಕರೆ ಜಾಗ ಉಂಡ್. ಒಂದರೆ ಎಕರೆ ಕೆರೆ ಉಂಡ್. ನಮ್ಮೆಲ್ ಅಯ್ಯಪ್ಪ ದೇವಡ ದರ್ಶನ (ತಿರೋಳ) ಉಂಡ್.

ಶ್ರೀ ಮೃತ್ಯುಂಜಯ ದೇವಸ್ಥಾನಕ್ ಸಂಬಂಧಪಟ್ಟಿತ್ ಪೋರ್ಮ್ ಸುತ್ತಮುತ್ತಲ್ ಮಹಾವಿಷ್ಣು ದೇವಸ್ಥಾನ, ಭಗವತಿ ದೇವಸ್ಥಾನ (ಎದಿಕೆ ಕಾವಲ್ದಾರ) ಅಂಜಿ ಅಯ್ಯಪ್ಪ ದೇವಸ್ಥಾನ ಉಂಡ್. ಬಾಡಗರಕೇರಿ ಪಿಂಞ ಪೋರಾಡ್ ಇವು ಮೂಂದ್ ಕೂಡಿತ್ ಬಾಡಗರಕೇರಿಂದಾಪ. ಭಗವತಿ ದೇವಿಕ್ ಮಾತ್ರ ಕೋಲಕೆಟ್ಟಿತ್ (ತೆರೆ) ಪದ್ಧತಿನಡ್ತುಪೊದುಂಡ್. (3 ಕಾಲಕೊಮ್ಮೆ) ಪೂಜೆರ ವಿವರ:

1. ಮೃತ್ಯುಂಜಯ
2. ಮೃತ್ಯುಂಜಯ ಹೋಮ
3. ಮಹಾ ಮೃತ್ಯುಂಜಯ
4. ರುದ್ರಾಭಿಷೇಕ
5. ನವಜಪ
6. ಕರಹೋಮ
7. ಗೃಹ ಶಾಂತಿ ಹೋಮ
8. ಶಾಂತಿ ಪೂಜೆ
9. ಶತ ರುದ್ರಾಭಿಷೇಕ ಪೂಜೆ
10. ಸತ್ಯ ನಾರಾಯಣ ಪೂಜೆ
11. ಬಿಲ್ಲಪತ್ರ ಪೂಜೆ.

ನಮ್ಮರ ನೇರತ್ಲಾ: 1. ವಸಂತ ಪೂಜೆ

2. ತುಲಾಭಾರ

3. ಪರಕೆ ಬೊಳಕ್

4. ವಿಷ್ಣು ದೇವಂಗ್ ಅಲಂಕಾರ ಪೂಜೆ ಪ್ರತಿದಿನ ಪೂಜೆ ನಡಂದಂಡಿಪ್ಪ.

ಪ್ರತಿದಿನ ಅನ್ನ ಸಂತರ್ಪಣೆ ಉಂಡ್. ಬೈಟ್ ಇಲ್ಲಿ ದಾರೂ ಬುದ್ದವ ನೇಮ ಇಲ್ಲೆ.

ಪೊರ್ಮೆತ್ರ ಭಕ್ತಂಗಕ್ ಆಪ ಅನಾನುಕೂಲ (ತೊಂದರೆ) ನೀಕೋಕ್ಕಾಯಿತ್ ಊರಾಲ್ ದಾರೇಂಗಿ ಚತ್ಪೋಚೆಂಗಿಯೂ ದೇವಸ್ಥಾನಕ್ ಸೂತ್‌ಗತ್‌ರ ಸಮ್ಮಂಧವಿಲ್ಲತೆ ನಿತ್ಯ ಪೂಜೆ ನಡತ್‌ವೊ ನೇಮ ಬೆಚ್ಚಂಡಿತ್. ದೇವಸ್ಥಾನತ್ರ ವರಾರ ಶುಚಿತ್ವಕ್ ಒತ್ತ್ ಕೊಡ್ತಿತ್ ಪೆರ್ತ್ ಗಾಂಭೀರ್ಯ ಕಂಡ್ ಬಪ್ಪ. ಊಟಕ್ಕಾಯಿತ್ ಚೆನ್ನ ತೆರ್ಪತ್ ಕಟ್ಟಡ ನಿರ್ಮಾಣ ಕೆಜ್ಜಿತುಂಡ್. ಊಟರ್ ವ್ಯವಹಾರ ಪೂಜೆಕ್ಕಾರ ಶ್ರೀ ಗಿರೀಶ್ ಅಯಿಂಗಕ್ಕೇ ಒಪ್ಪ್ಪಚಿಟ್ಟಿತ್. ಈ ಊರಾಕ್ ಅಡ್‌ಂಗ್‌ನ ಜನಸಂಖ್ಯೆ 320 ಆಯಿತುಂಡ್.

ಗಿರೀಶ್ ಸ್ವಾಮಿರ ಬಾಯಿ ತಕ್ಕರ ಪೋಲೆ ಭಕ್ತಂಗ ಬಂದಿತ್ ಇಲ್ಲಿ ದೇವಡ ಸನ್ನಿಧಿಲ್ ಬೋಡಾನಾನ ಜಯ ಮಾಡಿತ್ ಕೊಡ್ತಿತ್‌ಂದ್ ಆಧಾರ ಉಂಡ್. ಅಲ್ಲತೆ, ರೋಗ (ಗಂಭೀರ)ತ್ ನರಳಿಯೆಂಡ್ ಚಾವುರ ದವಡೆಲ್ ಚಿಕ್ಕಿತ್ ಇಂಜ್ಯೆಂಗ ಇಲ್ಲಿಕ್ ಬಂದಿತ್ ಕಣ್ಣೀರ್ ಕೈಲ್ ಬೋಡನ್ಯೆಂಗಳ ರೋಗತ್‌ಂಜ ಬುಡ್‌ಗಡೆ ಮಾಡಿತ್ ಬದ್ಕಚಿಟ್ಟಿತ್‌ಂದ್ ಆಧಾರ ಕಥೆ ಎಣ್ಣೆನದುಂಡ್. ಅಲ್ಲತೆ, ಮಂಗಲ ಕೈಂಜಿತ್ ಎಚ್ಚಕೋ ಕಾಲಕೆತ್ತಣೆಕ್ ಮಕ್ಕ ಫಲ ವಿಲ್ಲತೆ ಚಿಂತೆಲ್ ಇಂಜ ದಂಪತಿಯ ಮೃತ್ಯುಂಜಯ ದೇವಸ್ಥಾನತ್ ಪೂಜೆ ಕೈಚಿತ್ ಪರ್ಕೆ ಕೆಟ್ಟಿತ್ ಪೋನ್ಯೆಂಗಕ್ ಪುತ್ರ ಸಂತಾನ ಕೊಡ್ತಿತ್ ಸಂತಾನ ಪೆರ್ತಿತ್ ಸಂತುಷ್ಂಗಳಾನ ಪ್ರತ್ಯಕ್ಷ ದರ್ಶನ ಅದೆಚ್ಚಕ್ಕೋ ಉಂಡ್‌ಂದೆಣ್ಣುವ. ಎಲ್ಲಿಂಜೆಲ್ಲಿಂಜಿಯೋ ಭಕ್ತಂಗ ಬಂದಿತ್ ಬೋಡಿತ್ ಅಯಿಂಡ ಇಷ್ಟಾರ್ಥತ್‌ನ

ಜಯ ಮಾಡಿತ್ ಶ್ರೀ ಮೃತ್ಯುಂಜಯ ಈಶ್ವರ ಅಯಿಚಿ ಕೊಡ್ತಿತ್‌ಂದೆಣ್ಣುವ ಸತ್ಯವೂ ಕೂಡ ಅಕ್ಕು.

ಶ್ರೀ ಮೃತ್ಯುಂಜಯ ಪೆದತ್ ಬಾಡಗರಕೇರಿಲ್ ಸ್ಥಾಪನೆ ಆನ ಈ ದೇವಸ್ಥಾನ ಏದ್ ಇಸವಿಲ್ ದಾರ್ ಸ್ಥಾಪನೆ ಮಾಡ್‌ಚಿ. ಎನ್ನನೆ ನಡ್‌ಂದ್ ಬಾತ್ ಎಣ್ಣುವೊ ವಿಷಯ ಸೆರಿಯಾನ ದಾಖಲೆ ಇಲ್ಲತೆ ಕೆಲವು ಜನಡ ಬಾಯಿ ತಕ್ಕಲ್ ಕೇಟಿ ವಿಷಯತ್‌ನ ಈ ಲೇಖನತ್ ಕಾಟಿತ್.

ಸುಮಾರ್ ಅಞ್ಞಾರ್ ಕಾಲಕ್ ಬಯ್ಯ ಕೊಡಗ್‌ರ ಉತ್ತರ ಭಾಗತ್‌ನ ಪಾಳೆಗಾರಂಗಳೂ, ಪೂರ್ವಭಾಗತ್‌ನ ನಾಯಕಂಗಳೂ ಆಳುವಂಜತ್. ದಕ್ಷಿಣ ಕೊಡಗ್‌ರ ಪಶ್ಚಿಮ ಭಾಗತ್ ಕುಂದ್‌ರ ಕೋದಿಯ ಬರಿಯತ್ರ ಚೆನ್ನಂಗ್ ಜಾಗತ್‌ನ ಮಳಿಯಾಳತ್ರ ಚೆರಕಲ್ ರಾಜ ಆಳುವ ಇಂಜತ್. ಕುಂದರ್‌ರ ಮರೆಲ್ ಉಳ್ಳ ಈ ನಾಡ್‌ಕ್ ಚೆರಕಲ್ ರಾಜ ಮಲೆಯಾಳ ಭಾಷೆಲ್ ಮರೆನಾಟ್‌ಂದ್ ಪೆದ ಇಟ್ಟಿತ್ ಬಾಡಗರಕೇರಿ ಈ ಮರೆನಾಟ್ ಈ ಉಪನಾಡ್‌ಲ್ ಕೊಡವಡ ವಕ್ಕತ್‌ಂಜ ಅಮ್ಮ ಕೊಡವಡ ವಕ್ಕ ಜಾಸ್ತಿ ಇಂಜತ್. ರಾಜಂಡ ಅಚ್ಚೆ ಪ್ರಕಾರ ತೆಕ್ಕಡಮ್ಮಡ ಅಚ್ಚಮ್ಮ ಎಣ್ಣುವವು ಬಾಡಗರಕೇರಿನಾಡ್‌ರ ತಕ್ಕನಾಯಿತ್ ತೆರಿಗೆ ವಸೂಲ್ ಮಾಡಿತ್ ರಾಜಂಗ ಅಯಿಚಿ ಕೊಡ್‌ಪಂಜತ್. ತೆರಿಗೆನ ಚೆರಕಲ್ ರಾಜಂಗ್ ಕೊಡಪೋಯಿ ತೆರಿಗೆನ್ನ ಕೊಡ್‌ಪಂಜಿ ಬಾಡಗರಕೇರಿಕ್ ಬೋಂಡ್ಯಾನ ಸಾಮಾನ್‌ನ ಅಲ್ಲಿಂಜಿ ಕೊಂಡ್ ಬಪ್ಪ. ಜವಾಬ್ದಾರಿನ ಇಲ್ಲಿಂಜಿ ಕುಟ್ಟಂಡ ಮುದ್ದ ಎಣ್ಣುವವಂಗ್ ವಹಿಸಿತಿಂಜತ್. ಇವನ ಚೆರಕಲ್ ರಾಜಂಗ್ ದುಂಬಾ ಕುಶಿ ಇಂಜತ್.

ಚೆರಕಲ್ ರಾಜಂಗ್, ಎಚ್ಚಕ್ ಮಕ್ಕ ಪುಟ್ಟಾಚೇಂಗಿ ಬದ್ವೊಂಜಿಲೆ. ಇದ್‌ಂಗಾಯಿತ್ ಕೋಟೆರೊಳ್‌ಲ್ ಎಕ್ಕಲೂ ರಾಜ ಶ್ರೀ ಮೃತ್ಯುಂಜಯ ಪ್ರಾರ್ಥನೆ ಮಾಡೊಂಜತ್. ಇನ್ನನಿಪ್ಪಕ ರಾಜಂಡ ಪ್ರಾರ್ಥನೆರ ಫಲಗುಂಡ್ ದಂಡ್ ಕ್ಕಣ್ಣ ಮಕ್ಕ ಉಳ್‌ಂಜತ್.

ಚೆನ್ನಂಗ್ ಕಾಲ ಕಯ್ಯೊದೂ ಕಣ್ಣೂರ್ ಸಂಸ್ಥಾನ ರಾಜ ಚರಕಲ್ ರಾಜಂಡ ಸಾಮ್ರಾಜ್ಯತರ ಮೀದ ದಾಳಿ ಮಾಡುವಾಂದೂ ಚೆರಕಲ್ ಅವಂಡ ದಂಡ್ ಕಣ್ಣಮಕ್ಕಳೋ ಕೆತ್ತಿ ಕೊಲ್ಲುವಾಂದೂ ಸೂಚನೆ ಕೊಟ್ಟಚಿ. ಈ ವಿಷಯತಾನ ಕೋಟೆ ಕುಟ್ಟಿಂಡ ಮುದ್ದಂಗಣ್ಣಿ ರಾಜಂಡ ದಂಡ್ ಕಣ್ಣ ಮಕ್ಕಳ ಮರೆನಾಟಾರ ಬಾಡಗರಕೇರಿಲ್ ಒಳಪೊಚಿಟ್ಟಿತ್. ಕಾಪಾಡೋಂದ್ ಕೇಟಂಡತ್. ಅನ್ನನೆ ಕೋಟೆ ಕುಟ್ಟಿಂಡ ಮುದ್ದ ಚೆರಕಲ್ ರಾಜಂಡ ದಂಡ್ ಮಕ್ಕಳ ಕೂಟಿಯ ಬಂದಿತ್ ತೆಕ್ಕಡಮ್ಮಡ ಅಚ್ಚಮಂಗ್ ಸಂಗತಿ ಎಣ್ಣೊಚಿ. ರಾಜ ಮಕ್ಕಳ ತಾಂಡ ಮನೆಲ್ ಬೆಚ್ಚವಕ್ ಬೊತ್ತಿತ್ ತೆಕ್ಕಡ ಕೊಡವಡ ಮನೆಲ್ ಒಳಪೊಚಿಟ್ಟಿತ್.

ಅತ್ತಟಿ ಕಣ್ಣೂರು ರಾಜ ಚೆರಕಲ್ ರಾಜಂಡ ಮೇಲೆ ದಾಳಿಕ್ ಸುರು ಮಾಡ್ಚಿ. ಶ್ರೀ ಮೃತ್ಯುಂಜಯಂಡ ಭಕ್ತನಾನ ಚೆರಕಲ್ ರಾಜ ಈ ಯುದ್ಧತಾನ ತಾನೂ ತಾಂಡ ದಂಡ್ ಕಣ್ಣ ಮಕ್ಕಳೂ ಚಾವತೇ ಬದ್ಕೆಚೆಂಗಿ ತಾಂಡ ದಂಡ್ ಕಣ್ಣ ಮಕ್ಕಳ ಒಳಪೊಚಿಟ್ಟಿ ಜಾಗತ್ ಶ್ರೀ ಮೃತ್ಯುಂಜಯ ದೇವಸ್ಥಾನ ಕೆಟ್ಟೊಚಿಡುವಕ್ ಭಕ್ತಿಲ್ ಪ್ರಾರ್ಥನೆ ಮಾಡಿಯೆಂಡತ್.

ಅನ್ನನೆ ಚೆರಕಲ್ ರಾಜಂಡ ಸಾಮ್ರಾಜ್ಯತರ ಮೀದ ಕಣ್ಣೂರ್ ರಾಜ ಯುದ್ಧಕ್ ಸುರು ಮಾಡ್ಚಿ. ಚೆರಕಲ್ ರಾಜ ಶ್ರೀ ಮೃತ್ಯುಂಜಯ ದೇವಡ ಪ್ರಾರ್ಥನೆ ಮಾಡಿಯಂಡ್ ಯುದ್ಧ ಮಾಡುವಕ್ ದೇವಡ ದಯತ್ ಕಣ್ಣೂರ್ ರಾಜ ಬೊತ್ತಿತ್ ಓಡಿ ಪೋಚಿ. ಚೆರಕಲ್ ರಾಜ ತಾನ್ ಪ್ರಾರ್ಥನೆ ಮಾಡಿತ್ ಶ್ರೀ ಮೃತ್ಯುಂಜಯನ ಮರೆ ಬೋಡ್ನ ಪೋಲೆ ಮರೆನಾಟಾರ ಬಾಡಗರಕೇರಿಕ್ ಬಂದಿತ್ ರಾಜ ಮಕ್ಕ ಒಳಿಚಂಡಿಂಜ ತೆಕ್ಕಡ ಕೊಡವಡ ತೆಕ್ಕಡಮ್ಮಂಡ ಮನೆರ ಪಕ್ಕತಲ್ ನಲ್ಲ ಜಾಗ ನೋಟಿಚಿಟ್ಟಿತ್ ದೇವಸ್ಥಾನ ಕೆಟ್ಟುವಕ್ ತೆಕ್ಕಡಮ್ಮಂಡ ಅಚ್ಚಮ್ಮಂಗ್ ರಾಜಾಚ್ಚೆ ಮಾಡ್ಚಿ. ಚೆರಕಲ್ ರಾಜ ಶಾಸ್ತ್ರ ನೋಟಿತ್ ನಲ್ಲ ಮುಹೂರ್ತತ್ ಶ್ರೀ ಮೃತ್ಯುಂಜಯ ಲಿಂಗ ಸ್ಥಾಪನೆ ಮಾಡ್ಚಿ. ದೇವಡ ಅಲಂಕಾರ ಸಾಮಾನತಾನ ತೆಕ್ಕಡಮ್ಮಂಡ ಅಚ್ಚಮ್ಮಂಡಲ್ಲಿ ಬೆಪ್ಪನ್ನೆಕ್ಕೆಯೂ ತೆಕ್ಕಡ ಕೊಡವ ವಕ್ಕ ದೇವತಕ್ಕನಾಯಿತೂ ರಾಜ ನೇಮಕ ಮಾಡ್ಚಿ. ಕೊಡವ ವಕ್ಕ

ದೇವತನಾಯಿತೂ ರಾಜ ನೇಮಕ ಮಾಡ್‌ಚಿ. ದೇವಸ್ಥಾನ ಕಾರ್ಯತನ ಚೆರ್‌ಕಲ್ ರಾಜಂಡ ವಂಶಕಾರಳೇ ಸುಮಾರ್ ಕಾಲ ನಡ್ತಿಯೆಂಡ್ ಬಾತ್.

ಕಾಲಕ್ರಮೇಣ ಚೆರ್‌ಕಲ್ ರಾಜಂಡ ಕೊಡಗಲ್ ಇಂಜ ಜಾಗತನ ಪಾಳೆಗಾರಂಗ ಪ್ರಡ್‌ಚಂಡತ್ ದೇವಸ್ಥಾನ ಪೂಜೆ ಪುರಸ್ಕಾರಕ್ ನಾಡ್‌ಕಾರಂಡಲ್ಲಿಂಜ ತೆರಿಗೆ ವಸೂಲ್ ಮಾಡಿತ್ ನಡ್ತುವನ್ನೆಕೆ ತಕ್ಕ ಮುಖ್ಯಸ್ಥಂಗಕ್ ಪಾಳೆಗಾರಂಗಕ್ ಆಜ್ಞೆ ಮಾಡ್‌ಚಿ. ಪಾಳೆಗಾರಡ ಅಳ್ವಿಕೆಲ್ ಮರೆನಾಟಾರ ಪೆದ ಮರೆ ನಾಡಾಚಿ.

ಶ್ರೀ ಮೃತ್ಯುಂಜಯ ದೇವಡ ಪೂಜೆ ಪುನಸ್ಕಾರ ಪಾಳೆಗಾರಂಗಡ ಅಳ್ವಿಕೆ ಪೋಯಿತ್ ಲಿಂಗ ರಾಜಂಡ ಅಳ್ವಿಕೆ ಬಂದಲ್ಲಿಯೂ ಓರ್ ಅಡತಡೆ ಇಲ್ಲತೆ ನಡ್‌ಂದೆಂಡ್ ಬಾತ್. ಟಿಪ್ಪುಸುಲ್ತಾನ್ ರಾಜ ಕೊಡಗಕ್ ನುಗ್ಗಿತ್ ಹಿಂದೂ ದೇವಸ್ಥಾನತ್ನ ಪೊಳಿಪಾಂಡ ಕೂಟ್‌ಕ್ ದೇವತಕ್ಕ ಮುಖ್ಯಸ್ಥಳಂಗಳೋ ಕೆತ್ತಿಕೊಲ್ಲುವೊಂಜತ್. ಅಚೆಂಗಿ ಟಿಪ್ಪು ಸುಲ್ತಾನ್‌ರ ಕಡೆಕಾರ ಬೊಟ್ಟಿತ್ ನಾಡ್‌ಲಿಂಜ ಬಯ್ಯಕ್ಕೇ ಪೋಯಿರ್‌ತ್.

ಕರ್ನಾಟಕ ರಾಜ್ಯತ್ ಒಂದೇ ಅಯಿತುಳ್ಳ ಈ ಮೃತ್ಯುಂಜಯ ದೇವಸ್ಥಾನತ್ ಪ್ರತಿದಿನ ಮೃತ್ಯುಂಜಯ ಹೋಮ ಪೊಲಾಕ 4 ಗಂಟೆಕ್ ಸುರು ಮಾಡುವಾ. ಮಜ್ಜಣ ನೇರತ್ ಮಹಾಪೂಜೆ ಆಪ. ಮಹಾಪೂಜೆ ಆಯಿತ್ ಗರ್ಭಗುಡಿರ ಪಡಿ ಇಟ್ಟು ಪಿಂಞ ಅಂದ್ ಪೂಜೆ ಮಾಡುವೊ ಕ್ರಮ ಇಲ್ಲೆ. ಕಾಲಕ್ಕೊಮ್ಮೆ ನಡ್ತುವೊ. ದೇವಡ ನಮ್ಮೆಲ್ ಮಾತ್ರ ಈ ಕೆಟ್ ಇಲ್ಲೆ. ಪ್ರತೀ ಕಾಲ ಕುಂಬ್ಯಾರ್ ತಿಂಗ ಆರಿದ್ರ ನಕ್ಷತ್ರತ್ ಕೊಡಿಮರ ನಿಪ್ಪಾಚಿಟ್ಟಿತ್ 11 ದಿನ ಕೆತ್ತನೆ ವಿಶೇಷವಾಯಿತ್ ಬೋರೆ ಬೋರೆ ಪೂಜೆ ಪುರಸ್ಕಾರ ನಡ್‌ಪ. ಪತ್ತನೇ ನೆರಪುರ ದಿನ ಈ ದೇವಸ್ಥಾನತ್‌ರ ಪಕ್ಕತ್ತುಳ್ಳ ಶ್ರೀ ವಿಷ್ಣು ದೇವಡ ಅಲಂಕಾರ ಪೂಜೆ ಆಪ. ಪನ್ನಂದನೆ ದಿನ ಕಕ್ಕಟ್ ಪೊಳೆಲ್ ಅಂದಿಮುಂದಿ ನೇರತ್ ದೇವ ಕುಳಾಚಿತ್ ನಮ್ಮೆ ಆಖೀರಿ ಆಪ.

"ಜೈ ಶ್ರೀ ಮೃತ್ಯುಂಜಯ"

‘ರಾಮಸ್ವಾಮಿ ಕಣಿವೆ (ರಾಂಪುರ) ಕ್ಷೇತ್ರ ವರ್ಣನೆ’ ಪಿಂಞ ನವಮಿರಾ ರಾಮೋತ್ಸವ

ಪ್ರೇಜರ್ ಪೇಟೆಂಜಿ (ಕುಶಾಲನಗರ) ಕೂಡಿಗೇ ಶಿರಂಗಾಲಕ್ ಪೋಪ ರೋಡ್‌ಲ್ ಪೋಯಂಡಿಪ್ಪಕ ರಾಮಂಪುರತ್ರ ಪಕ್ಕ ಪೋಯಂಡಿಪ್ಪಕ ನಂಗ ನಡ್‌ಂದಂಡ್ ಪೋಯಂಡುಳ್ಳ ಬಟ್ಟೆ ಚೆರಿಯ ಕುಂದ್‌ನ ದಂಡ್ ಭಾಗ ಮಾಡಿಯಂಡ್ ಮಿಂಞಾಕ್ ಪೋಪನ್ನೆಕೆ ಕಂಡ್ ಬಪ್ಪ. ಈ ಜಾಗ ಓರ್‌ತರತ್ಲ್ ಬಲ್ಯ ಕಡ್‌ಂಗ್‌ರ ಮಾದ್ರಿ ಕಂಡ್ ಬಪ್ಪಾನಗುಂಡ್ ಕನ್ನಡತ್ ಕಣಿವೆಂದಾನಂಗುಂಡ್ ರಾಂಪುರತ್ ರಾಮಸ್ವಾಮಿ ಕಣಿವೆಂದ್ ಕಾಕುವೊ ನೇಮ. ಕಣಿವೆ ಬಟ್ಟೆ ರೋಡ್‌ಕ್ ನುಗ್ಗುವಕ ಪಕ್ಕಾ ಎಡತೆ ಬರಿಲ್ ಕೌನ್ಸಿಲ್ ಕಟ್ಟೆಯೊಂದ್ ಒರ್ ಆಲ್‌ಮರತ್ರ ಕೋದಲ್ ಕಂಡ್ ಬಪ್ಪ. ಈ ಕಟ್ಟೆ ಕೊಡಗ್‌ಕ್ ಕೌನ್ಸಿಲ್ ಕಟ್ಟಿತ್ ಕೌನ್ಸಿಲ್‌ಕ್ ಓಟ್‌ಲ್ ಗೆದ್ದಿತ್ ಬಂದ ಸದಸ್ಯಂಗ ರಾಂಪುರ ಕ್ಷೇತ್ರಕ್ ದೇವತಾ ಪ್ರಾರ್ಥನೆಕ್ ಬಂದ ಜ್ಞಾಪಕಾರ್ಥ (ಗ್ಯಾನೋಲೆ)ವಾಯಿತ್ ರಾಮಸ್ವಾಮಿಕ್ ಕಣಿವೆ ನಾಡ್‌ಕಾರಂಗಳ (ಹೋಬಳಿಕಾರಳಗುಂಡ್) ಸ್ಥಾಪನೆಗೊಂಡತ್.

ಈ ಬಟ್ಟೆ ದಂಡ್ ಭಾಗ ಆಯಿತ್ (ಕುಂಪ್) ದಂಡ್ ಭಾಗತ್ರ ಮೇಲೆ ಎಡ್ತೆ ಬರಿಲ್ ಹರಿಹರೇಶ್ವರ ಪಿಂಞ ಬಲ್ತೆ ಬರಿಲ್ ಲಕ್ಷ್ಮಣೇಶ್ವರ ದೇವಸ್ಥಾನ ಉಂಡ್. ನಂಗ ಮಿಂಞಾಕ್ ಏಳೆಟ್ಪ್ ಮಾರ್ ನಡ್‌ಂದ್ ಕೂಟ್‌ಚಿಂದಾಂಚೆಂಗಿ ರಾಮೇಶ್ವರ ದೇವಸ್ಥಾನತಾರ ಉತ್ತರ ದಿಕ್ಕ್ ಕಾಂಬಕ್ ಕಾಟ್ಟುವ (ಎಲ್‌ಂಗುವಾ)

ಆಂಡ ರಾಜ ಮಾರ್ಗತ್‌ಲ್ ಮಿಂಞಾಕ್ ಪೋನಕ ನಂಗ ರಾಂಪುರ ಪೇಟೆಕೆತ್ತುವ. ರಾಜ ಮಾರ್ಗತ್‌ಂಜಿ ಬಲ್ತೆ ಬರಿಕ್ ಪೋಚೆಂಗಿ ನೇರೆ ದೇವಸ್ಥಾನಕ್ ಪೋಪ. ಪೇಟೆಕ್ ಪೋಪ ರೋಡ್ ಪ್ರವೃತ್ತಿ ಮಾರ್ಗ ದೇವಸ್ಥಾನಕ್ ಪೋಪ ರೋಡ್ ನಿವೃತ್ತಿ ಮಾರ್ಗ ದೇವಸ್ಥಾನ ಪೋಳೆರೆ ಬರಿಲುಳ್ಳಾನಗುಂಡ್ ಮಾರ್ಗತ್‌ರ

ಆಯಾಸತ್‌ನಗುಂಡ್ ಚೋತ ಯಾತ್ರಿಕಂಗ ದೇವಸ್ಥಾನತ್‌ರ ಮಿಂಞಾಲುಳ್ಳ ಹಾಸ್‌ಂಗಲ್ಲ್‌ರ ಮೇಲೆ ಅಳ್ತತೇಂಗಿ ಅವಂಡ ಸೋಲ್ (ಆಯಾಸ) ಸುತ್ತ್‌ಕಟ್ತ್‌ಲ್ ಕಂಡ್ ಬಪ್ಪ. ಚಾಯಿ ಬೋಜತ್‌ನ ಗುಂಡ್ ನೀಂಗಿ ಪೋಯವ. ದೇವಸ್ಥಾನತ್‌ರ ಬಯ್ಯತ ಬರಿಯ ಎಲ್ಲಾ ಕುಂದ್‌ಮಯ (ಕುಂದ್ ಸಾಲ್) ಈಂಡ ಎಡತೆ ಬರಿಯ ಓರ್ ವಿಶಾಲವಾನ ಬಾಣೆ ಉಂಡ್. ಪ್ರತೀ ಕಾಲ ನಡ್ಜ ಜಾತ್ರೆ ಇಲ್ಲಿಯೇ ನಡ್ಜ. ದೇವಸ್ಥಾನತ್‌ರ ಈಶಾನ್ಯ ದಿಕ್ಕ್‌ಲ್ ಹಾಸ್‌ಕಲ್ಲ್ ಮುಟ್ಟತೆ ಓರ್ ಅಶ್ವತಕಟ್ಟೆ ಉಂಡ್. ಸಾಮಾನ್ಯವಾಯಿತ್ ದೇವಸ್ಥಾನತ್‌ರ ಪಂಚಾಯಿತಿ ಸಭೆ ಇಲ್ಲಿಯೇ ನಡ್‌ಪ. ಇಲ್ಲೇ ಹರಿಜನ ಗಿರಿಜನ ಅವು ಇವೂಂದ್ ಜಾತಿ ಭಿನ್ನಭೇದವಿಲ್ಲ. ಕೇವಲ ಎಲ್ಲಾರೂ ಓಡಿಕಳಿಪದುಂಡ್. ಅಲ್ಲಿ ಮಾತ್ರ ಜನಕ್ ಪಂಡಂಜಿಯೇ ಅಸ್ತಶ್ಯತ್‌ರ ಗೋಜಿಯೇ ಇಲ್ಲೆ. ಪಾಡ್ಯಮಿಂಜ ಸಪ್ತಮಿಕೆತ್ತಣೆಕ್ ಅಲ್ಲಿಯತ್ರ ಎಲ್ಲಾ ವರ್ಗತ್ರ ಭಕ್ತಂಗ ಅಯಿಂಗೈಂಗಳೇ ಸ್ವಹಸ್ತತ್ ಪೂಜೆ ನಡ್ತವ.

ರಾಮೋತ್ಸವಕ್ಕಾಯಿತ್ ಮೆರವಣಿಗೆ ನಡ್ತವೊಕ್ ಸಾಮಾನ್ಯತ್ರ ಒರ್ ತೇರ್ ಉಂಡ್. ತೇರ್ ಬೆಪ್ಪ ಮನೆಯು ಕುಂದ್‌ಕ್ ಪಕ್ಕತವು ಲಕ್ಷ್ಮೀಶ್ವರಂಡ ಮೊಟ್ಟ್‌ಕ್ ಪಕ್ಕತ್ತುಂಡ್. ನಮ್ಮೆರ ಸಮಯಕ್ ರಥ ಬಾಣೆ ಆಪಕ ಯಾತ್ರಿಕಂಗಡ ಆತ್ಮಾನಂದಕ್ಕಾಯಿತ್ ಹರಿಕಥೆ, ಭಜನೇಂದ್ ಈ ತೇರ್‌ರ ಮನೆಲ್ ನಡ್ತವೊದುಂಡ್. ರಾಮೋತ್ಸರ ದೇವಸ್ಥಾನ ಪೊಳೆರ ಮುಟ್ಟಕ್ ಐಂಬದಡಿ ಎತ್ತರತ್ತುಂಡ್. ದೇವಸ್ಥಾನತ್‌ಂಜಿ ಪೊಳೆಕ್ ಇಳಂಜಿತ್ ಪೋಪಕ್ ಒರ್ ಚಾಯಿಲುಳ್ಳ ಮೊಟ್ಟ್ (ಸೋಪಾನ ಉಂಡ್) ಉಂಡ್. ಈ ಮೊಟ್ಟ್ ಚೆನ್ನಂಗ್ ದೂರತ್ ಪೊಳೆರ ನಡುಲ್ ನಂದಿಪುಷ್ಕರಣಿ ಎಣ್ಣುವ ಜಾಗ ಕುಳಿಪಕ್ ಅನುಕೂಲತ್ತುಂಡ್. ಮೊಟ್ಟ್‌ರ ಬಲೆ ಬರಿಂಜ ಭಕ್ತಂಗ ಪೂಜೆ ಮಾಡುವೊಕೂ, ಕುಳಿಪಕೂ, ಪೋಪಕ್ ಅನುಕೂಲ ಆಪನ್ನಕೆ ಪೊಳೆ ಕಲ್ಲ್ ಇಟ್ಟು ಒರ್ ಹಂಗಾಮಿ ಸೇತುವೆ ಉಂಡ್. ಈ ಸೇತುವೆಲ್ ಪೋನದಾಚೆಂಗಿ ನೆರಪುಷ್ಕರಣಿರ ಕೊಡಿ ಬರಿಕ್ ಪೋಕಲು. ಈ ಪುಷ್ಕರಣಿ ಚೆರಿಯದ್, ರಾಮನವಮೀಂದ್ ರಾಮನಾಥ ಪುರತ್ ಗೋಪು ಕಲ್ಲ್ ನುಗ್ಗುವೊ ಪದ್ಧತಿ ಉಂಡ್. ವ್ಹಾಡಿಕೆಯಾಯಿತ್ ಪರ್ಕೆ

ಮಾಡಿಯಂಡವು ಮಾತ್ರ ಗೋವು ಕಲ್ಲನುಗ್ಗುವೊ. ಮೇಲ್‌ಲ್ ಪೀಡೆ ಉಳ್ಳವು ಈ ಗೋವು ಕಲ್ಲನ ನುಗ್ಗಿ ಚೀಂಗಿ ನೀರಾರೊಳ್‌ಲ್ ಪ್ರಜ್ಞೆ ತಪ್ಪುವಾಂದ್ ಜನ ಎಣ್ಣುವ. ಆನಗುಂಡ್ ಮೂಡನಂಬಿಕೆಯುಳ್ಳ ಜನ ಅಯಿಂಡ ಪೊಮ್ಮಕ್ಕಡ ತಡಿಲ್ ಪೀಡೆ ಉಂಡೋ, ಇಲ್ಲವೊ ಎಣ್ಣುವ ಸಂಶಯ ಪರಿಹಾರಕ್ಕಾಯಿತ್ ಅಯಿಂಡ ಪೊಮ್ಮಕ್ಕ ಮಕ್ಕಳ ಗೋವುಕಲ್ಲರೊಳ್‌ಲ್ ನುಗ್ಗಿ ಚಿಡುವ. ರಾಮೋತ್ಪವತ್ಲ್ (ನಮ್ಮೆಲ್) ಪೊಮ್ಮಕ್ಕ, ಮಕ್ಕಮರಿ ಎಲ್ಲರೂ ನಂದಿ ಪುಷ್ಕರಣತ್ ಕುಳ್ಳಿತ್ ತಂಗಡ ಪಾಪ ಪರಿಹಾರ ಮಾಡಿಯವ, ಗರುಡ ಪುರಾಣತ್‌ಲ್ "ನಂದಿ ತೀರ್ಥ, ಮುಕ್ತಿ ಕೋಟಿ ತೀರ್ಥ ಫಲ ಪ್ರದಮ್" ಎಣ್ಣಿಯುಂಡ್ ಒತ್ತಕೊಡ್ತಾನಗುಂಡ್ ನಂದಿ ಪುಷ್ಕರಣಿಕ್ ಪೆರ್ತ್ ಮಹತ್ವ ಉಂಡ್.

ಶ್ರೀರಾಮ ಕಣಿವೆ ರಾಂಪುರಕ್ ಬಂದಿತ್ತಿಪ್ಪಕ ಕಾಶಿಂಜ ಕೊಂಡ್ ಬಂದ ಅಂಗತ್ನ ಪೂಜೆಕ್ ಇಲ್ಲಿ ಸ್ಥಾಪನೆ ಮಾಡೊಂಡೊಂದೆಣ್ಣುವೊ ಅಭಿಪ್ರಾಯ (ಧೃಢಸಂಕಲ್ಪ) ಪಟ್ಟಿತ್ತಿಂಜಿತ್. ಆನಗುಂಡ್ ಶ್ರೀರಾಮ ತಾಂಡ ಸೇವಕನಾನ ಆಂಜನೇಯನ ಲಿಂಗ ಕೊಂಡ್ ಬಪ್ಪಕ್ಕಾಯಿತ್ ಕಾಶಿಕ್ ಅಯಿಚಿತ್. ಆಂಜನೇಯ ಕಾಶಿಂಜ ಲಿಂಗ ಕೊಂಡ್ ಬಪ್ಪಕ್ ತಡ ಆಯೆಂಡತ್. ಆಚಿಂಗಿ ಆಂಜನೇಯ ಬಪ್ಪಾಂಗ್ ಮುಪ್ಪಡೆಯೇ ಶ್ರೀರಾಮಚಂದ್ರ ಲಿಂಗ ಪ್ರತಿಷ್ಠಾಪನೆ ಮಾಡಿರ್‌ತಿಂಜತ್. ಈ ಲಿಂಗತ್‌ನ ನೋಟಿತ್ ಆಂಜನೇಯಂಗ್ ವ್ಯಥೆ ಆಚಿ.

ಶ್ರೀರಾಮ ತಾಂಡ ಭಕ್ತ ಆಂಜನೇಯ ಕೊಂಡ್‌ಬಂದ ಲಿಂಗವೇ ಶ್ರೇಷ್ಠಾಂದ್ ಹೊಗಳಿತ್ ಲಿಂಗತ್ನ ಕುಂದ್‌ರ ಕೊಡಿಲ್ ಲಕ್ಷ್ಮಣನುಂಡ್ ಪ್ರತಿಷ್ಠಾಪನೆ ಮಾಡ್‌ಚಿಟ್ಟಿತ್. ಲಕ್ಷ್ಮಣನುಂಡ್ ಪ್ರತಿಷ್ಠಾಪನೆ ಮಾಡ್‌ಚಿಟ್ಟಿ ಲಿಂಗಕ್ ಲಕ್ಷ್ಮಣೇಶ್ವರಂದೆಣ್ಣುವ ಪೆದಗೊಂಡತ್. ಹರಿಹರೇಶ್ವರಂದೆಣ್ಣುವೊ ಲಿಂಗ ಉದ್ಭವ ಮೂರ್ತಿಯಾಯಿತುಂಡ್. ರಾಮಪುರತ್ ಸರ್ವೆ ಸಾಧಾರಣ ಸಪ್ತಮಿ, ನವಮಿ ದಿನತ್ತೇ ಊರ್‌ಂಜ ಭಕ್ತಂಗ ಬಂದಿತ್ ನೇಮ ಪೋಲೆ ಪೂಜೆ, ಪುನಸ್ಕಾರ ನಡ್ತುವೊ ನೇಮ ಕಂಡ್‌ಬಪ್ಪ, ನವಮಿರಂದ್ ಉದಯ ಕಾಲತ್ (ಬೊಪ್ಪಾಪಕ್ಕಾ) ಕಾಶಿಂಜಿ ಕೊಂಡ್ ಬಂದಿತ್ತಿಪ್ಪ ಕಾಶಿ ತೀರ್ಥತ್ನ ಹೆಬ್ಬಾಲೆ ಊರ್‌ಕಾರ ರಾಂಪುರಕ್

ತೀರ್ಥತ್ವ ವಾದ್ಯಗೋಷ್ಠಿ ಸಹಿತ ಸಾಗಿತ್ ಗಂಗಾಭಿಷೇಕ ರಾಮೇಶ್ವರಂಗ್ ನಡ್ತುವ.

ನವಮಿ ದಿನತ್ರಂದ್ ಹಳ್ಳಿ ಜನರಲ್ಲತೆ ಪೊರ್ಮೆತ ಯಾತ್ರಿಕಂಗ ಪೆರ್ತ್ ಕೂಡ್‌ವಾ. ಜಾತ್ರೆಕ್ ಬಂದ ಪ್ರತಿಯೊಬ್ಬನೂ ದೇವಸ್ಥಾನತ್ರ ಪಕ್ಕತ್ ಆಲ್‌ಮರತ್ತ್ ಮುಟ್ಟಿಯೆಂಡೇ ಪೋಪ ಬಟ್ಟೆಕ್ಕಾಯಿತೇ (ಕೊಡಗ್‌ರ ಕಡೆ ರಾಜ ಓಡಿ ಪೋನ ಬಟ್ಟೆ) ಅತೀ ಪೊಳೆಕ್ ಪೋಯಿತ್ ನೀರ್ (ತೀರ್ಥ) ಮೇಲ್ ಮಂಡೆಕ್ ತೆಳ್‌ಚೆಂಡ್ ಸೋಪಾನಕ್ಕಾಲೆ ರಾಮೇಶ್ವರ ದೇವಸ್ಥಾನಕ್ ನುಗ್ಗಿತ್ ರಾಮೇಶ್ವರ ಲಿಂಗತ್ತ್ ದರ್ಶನ ಮಾಡುವೊಂದ್ ಪಿಂಞ ದೇವಸ್ಥಾನತ್ರ ದಕ್ಷಿಣ ದ್ವಾರಕ್ಕಾಲೆ ಸಪ್ತಾವರತ್ತ್ ಕಾಟುವೊ ಸಪ್ತತಿರೂವುಳ್ಳ ಸೋಪೋನತ್ತ್ ಪತ್ತಿತ್ ಪೋಚೆಂಗಿ ಲಕ್ಷ್ಮಣೇಶ್ವರ ದೇವಸ್ಥಾನ ಕಾಂಬಕ್ ಕೊಟ್ಟುವ. ಮೂಂದನೇ ತಿರುವುಲ್ ನಿಂದಿತ್ ನೋಟ್‌ನಕ ಪೂರ್ವಕ್ ಕಾವೇರಿ ಪೊಳೆರ ಗತ್ ಗಾಂಭೀರ್ಯ, ಹರಿಹರೇಶ್ವರ ದೇವಡ ಲಿಂಗ ಕಾಂಬದುಂಡ್. ನಾಲನೇ ತಿರುವುಲ್ ಲಕ್ಷ್ಮಣೇಶ್ವರಂಡ ಮಹಾದ್ವಾರ ಕಂಡ್ ಬಪ್ಪ. ಆರನೇ ಪಿಂಞ ಏಳನೇ ತಿರುವುಂದೆಣ್ಣಕ ದೇವಸ್ಥಾನತ್ರ ಪೊರ್ಮೆ, ಒಳಿಯತ್ರ ಪಡಿಕಾಂಬ. ತಿರುಪತಿರ ಸಪ್ತಗಿರಿ ಪಿಂಞ ಶ್ರೀರಂಗತ್ರ ಸಪ್ತ ಮಾದ್ರಿರ ಒಳಭಿಪ್ರಾಯತ್ತ್ ಸೂಚನೆ ಮಾಡುವೊ ಕ್ಷೇತ್ರ ರಾಂಪುರ ದೇವಸ್ಥಾನ ಮಾತ್ರವಲ್ಲತೆ, ಬೋರೆ ಏದೊಂದಿಲ್ಲೆಂದ್ ಅಭಿಪ್ರಾಯ ಆಪ.

ಲಕ್ಷ್ಮಣೇಶ್ವರಂಡ ದರ್ಶನವಾನ ಪಿಂಞ ಹರಿಹರೇಶ್ವರ ದೇವಸ್ಥಾನಕ್ ಪೋಯಿತ್ ಅಲ್ಲಿ ಹರಿಲಿಂಗೇಶ್ವರ ದರ್ಶನ ಮಾಡಿಯೆಂಡ್ ಪುನಃ ರಾಮೇಶ್ವರ ದೇವಸ್ಥಾನಕ್ ಪೋಯಿತ್ ಅಲ್ಲಿ ಹರಿಲಿಂಗೇಶ್ವರನ ದರ್ಶನ ಮಾಡಿಯೆಂಡ್ ಪುನಃ ರಾಮೇಶ್ವರ ದೇವಸ್ಥಾನಕ್ ಬಪ್ಪಾನಗುಂಡ್ ಪ್ರದಕ್ಷಿಣೆ ಪೂರ್ಣ ಆಪಾಂದ್ ತೀರ್ಮಾನ. ಕೂಡ್‌ನ ಭಕ್ತಂಗ ಮಕ್ಕ, ಮರಿ ಸಹಿತ ಬೋರೆ ಬೋರೆ ಪಾಟ್, ಪದ್ಯ, ಭಕ್ತಿ ಭಾವ ಪುದಿಯ ಶ್ಲೋಕ ಇನ್ನತಾನ ಬಾಯಿದುಂಬ ಪಾಡುವೊದುಂಡ್. ಅದತ್ ತುಳಸಿದಾಸನೇ ಪಾದ್‌ನ ಪಾಟ್‌ನ ಕೇದತ್ ಎಳ್ಳಿ ಕಾಟ್‌ನದುಂಡ್.

ಜಯ ಸಕರಾತ್ಮ ರಾಮ
 ಜಯ ಸುಗುಣಾ ರಾಮ ಸಕಲ ದುರಿತ ರಾಮ
 ಜಯಜಿತ ಭಾರ್ಗವ ರಾಮ
 ಜಯ ಜಯ ಲೋಕಭಿ ರಾಮ ಸೀತಾರಾಮ
 ಜಯ ರಿಪು ಕುಲ ಸಂಹಾರ
 ಜಯ ಜಯ ಯೋಗೀಂದ್ರ ಹೃದಯ ನಿಲಯ ವಿಹಾರ
 ಜಯ ದುಷ್ಪ್ರತಾಪಹಾರ
 ಜಯ ಜಯ ಶೋಭಾಸಿನವಮಣಿ ಹಾರ
 ಜಯ ನಿರುಪಮ ಪ್ರಾಕಾರ
 ಜಯ ಜಯ ಮಾರ್ತಾಂಡ ವಂಶಸದಲಂಕಾರ
 ಜಯ ಜಯ ಮೋಚಿತ ಸುರಕಾರ
 ಜಯ ಜಯ ನೀಲಾಂಬುವಾದ ಸದಾಕಾರಾ

ಪೇಟೆರ ತಲೆಕ್ ರಥ ಪೋನನ್ನೆಕೆ ಅಲ್ಲಿ ಪೂಜೆ ನಡ್ತಿತ್ ಆರೋಪಣ
 ಕಾರ್ಯ ಅಂತ್ಯಗೊಳ್ಳುವಂಗಾಯಿತ್ ಬಯ್ಯಕ್ ಪೋಪ ಉಟೋಪಚಾರ ತಿಂಡಿದೆಲ್ಲಾ
 ತಿಂದಂಡ್ ಉಪವಾಸತ್ನ ನೀಕುವ.

ವನವಾಸತ್ ಇಪ್ಪಕಾಲತ್ ರಾವಣನುಂಡ್ ಸೀತಾಪಹರಣ ಆಸದೂ,
 ಅಂಜನೇಯ, ಸುಗ್ರೀವ ಅಯಿಂಡ ಕಪಿ ಸೇನೆಯಡ ಸಹಾಯತ್ ಲಂಕೆಕ್ ತಿತ್ತ
 ಕೊಡ್ತಿತೂ ಎಲ್ಲಾರೊ ನಾಶ ಪಡ್ತಿತೂ ವಿಭೀಷಣಂಗ್ ಪಟ್ಟ ಕೆಟ್ಟಿತ್ ಅಯೋಧ್ಯೆಕ್
 ಶ್ರೀರಾಮ ಲಕ್ಷ್ಮಣ ಸೀತಾದೇವಿ ಸಹಿತ ಬಂದಿತ್ ಪುನಃ ಪೊರೆರ ಕೊಡಿಯ ಕಾತ್‌ನ
 ನಂಬಿತ್ ಸೀತಾದೇವಿ ಕುಳಿಮೆಕರ್ತಿಯಾಯಿತಿಂಜತುಂಡೆಂಗ್ಯೂ ಅವಳ ಕಾಡ್‌ಕ್
 ಅಯಿಚಿರ್‌ತ್. ಅವ ವಾಲ್ಮೀಕಿ ಆಶ್ರಮತ್ ಕಾಲ ಕೈಚೆತ್.

ಇದಾನ ಪಿಂಞ ರಾಮ ಲಕ್ಷ್ಮಣ, ಸೀತೆ, ಲವಕುಶ ಪಿಂಞ ವಾಲ್ಮೀಕಿ
 ಈಯಂಗೆಲ್ಲಾರೂ ಕುದುರೆ ಸಹಿತ ಅಯೋಧ್ಯೆಕ್ ಪೋಯಿತ್ ರಾಜಸೂಯ ಯಾಗ

ತೇಡಿತ್ ವಾಲ್ಮೀಕಿ ತಾನ್ ಎಳ್ವಾನ ರಾಮಾಯಣ ರಾಮಂಡ ಅವಳಿ ಮಕ್ಕಳಾನ ಲವಕುಶಂಗಳಗುಂಡ್ ಪ್ರಥಮತ ಎಲ್ಲಾರ್ಕೂ ದಿವ್ಯ ನಂದಾಪನ್ನೆಕೆ ಪಾಡ್‌ಚಿಟ್ಟತ್. ಈ ದಿನ ರಾಂಪುರತ್‌ಲೂ ಲವಕುಶಂಗಳೆನ್ನೆಕೆ ರಾಮಂಡೆದಿಕೆ ರಾಮಚರಿತ್ರನ ಪಾಡಿತ್ ಆಡಿತ್ ಕಾಟಿಕೊಡ್. ಕಾಶಿಲ್ ನಡ್‌ಪನ್ನೆಕೆ ರಾಂಪುರ ಕ್ಷೇತ್ರತ್‌ಲೂ ಯಾತ್ರರಂದ್ (ನವಮಿರಂದ್) ಚೆನ್ನಂಗ್ ಹೋಲಿಕೆ ಕಂಡ್ ಬಪ್ಪದುಂಡ್.

ದಶಮಿರಂದ್ ಪೊಲಂದೆನ್ನೆಕೆ ಊರ್ ಜನ ನವಮಿರಂದಿಯತ್ರನ್ನೆಕೆ ರಾಂಪುರತ್‌ಲ್ ಸೇರುವ ಪೊಮ್ಮಕ್ಕೆಲ್ಲ ರಾಮನ ನೋಟೋಕ್ ಪೋಕನಾಂದ್ ಉತ್ಸಾಹತ್ ಅಯಿಂಡೆಂಡ ಮನೆ ಕೆಲಸತಾನ ತೇಪದುಂಡ್. ಪೆರ್ತ್ ಕುಸಿಲ್ ರಾಂಪುರಕ್ ಪೋಪ.

ಇಂದ್ ಬಂದ ಜನಳೆಲ್ಲರೂ ದೇವತಾ ಪೂಜೆ ತೇತಂಡ್ ಹರಿಹರೇಶ್ವರ ದೇವಸ್ಥಾನತ್ರ ಬಯ್ಯಕ್ಕುಳ್ಳ ದೇವಸ್ಥಾನತ್ರ ಬೇಲ್ (ಹೊಲ)ಲ್ ಕಟ್ಟಿತುಳ್ಳ ಎತ್ತಳ ಮಾರಾಟಕ್ಕೂ, ಪಂಥಕ್ಕೂ ಕೊಂಡ್‌ಬಪ್ಪ. ದೂರ ದೂರತ್ರ ಊರ್‌ಂಜ ಸಪ್ತಮಿಯಂದೇ ಪೆರ್ತ್ ಅತ್ತ ಬಂದಿತಿಪ್ಪ. ಇಂದ್ ಪೆರ್ತ್ ಬಲ್ಲಿಯೆ ಜಾತ್ರೆ ನಡ್ಚ ಆಚೇಂಗಿ ಅತ್ತಡ ಮೇಳ (ಜಾತೆ) ನೋಟೋಂದೆಣ್ಣಕ ಪೆರ್ತ್ ಖುಷಿ. ಅದ್ ದಶಮಿ ದಿನತ್ತೇ ವಿಶೇಷ. ಇದ್‌ಂಡ ವ್ಯವಹಾರಕ್ಕಾಯಿತೇ ಅತ್ತಡ ಈ ಬಾಣೆಲ್ ಸರಕಾರಿ ಉದ್ಯೋಗಸ್ಥಂಗಳಾಯಿತೇ ಪ್ರತ್ಯೇಕ ಚಪ್ಪರ ಇಟ್ಟಿತ್ ಏರ್ಪಾಡ್ ಮಾಡಿತಿಪ್ಪ. ವ್ಯವಸಾಯ ಇಲಾಖಾಧಿಕಾರಿಯಳು ಬೋರೆ ಬೋರೆ ಇಲಾಖಾಧಿಕಾರೀಂದೂ ಬೋರೆ ಬೋರೆ ಇಲಾಖೆರ ಬಲ್ಯ ಬಲ್ಯ ಅಧಿಕಾರಿಯಳೂ ಇಲ್ಲಿ ಅತ್ತಡ ಜಾತ್ರೆಕ್ಕಾಯಿತ್ ಕೂಡಿತಿಪ್ಪ. ಅತ್ತಡ ಜಾತ್ರೆಲ್ ಅತ್ತಕಡ್ಡಿಯಳ ಕ್ರಯಕ್ ಕೊಂಡ್ ಪೋಪಕ್ಕಾಯಿತ್ ಬೋರೆ ಬೋರೆ ಊರ್‌ನಾಡ್‌ಂಜ ಜನ ಕೂಡಿತ್ತಿಪ್ಪ. ಬೋರೆ ಬೋರೆ ಉದ್ಯೋಗಸ್ಥಂಗಂದೂ, ವಿದ್ಯಾವಂತಂಗಳೂ, ಪಣಕಾರಳೂ ಇಲ್ಲಿಯೆತ್ರ ಮಹಿಮೆ ವಿಶೇಷತಾರ ನ್ಹಟ್‌ಲ್ ಭಾಷಣ ಮಾಡುವೊದಿಪ್ಪ. ಪೆರ್ತ್ ಚಾಯಿ ಇಪ್ಪ. ಊರ್ ನಾಡ್‌ಂಜೆ ಬಂದಿತ್ ಕೂಡ್‌ನೈಂಗ

ಈ ಭಾಷಣ ಕೇಟಿತ್ ಖುಷಿ ಪಡುವ.

ಅಚ್ಚಕ್ಕಾಕಣೆಕ್ ಭಕ್ತಂಗ ತಪ್ಪೋತ್ಸವ ನಡ್ತುವೊಕುಳ್ಳಾಂಗ್ ಬೋಂಡ್ಯಾನ ಏರ್ಪಾಡ್ ಮಾಡುವ. ಪೋಲೆಲ್ಲಾ ರುದ್ರಾಭಿಷೇಕ, ಸಹಸ್ರ ನಾಮಾದಿ ಬಿಲ್ವಪತ್ರ ತುಳಸಿ ಪೂಜೆ ನಡ್ಂದಂಡಿಪ್ಪ, ರಾಮೇಶ್ವರ ದೇವಸ್ಥಾನತ್ರ ಸುತ್ತಮುತ್ತಲೂ ಬೊಳ್ಳ ಬೆಪ್ಪದಲ್ಲತ ಇರ್ಲ್ ಪೊಳೆ ಕರೆ ಜಾಗತ್ಲೂ ಅಗಲವಾನ ಬೊಳ್ಳ ಬೆಚ್ಚಿತ್ ಅಲಂಕಾರಕ್ ಬೆಚ್ಚಿತ್ತಿಪ್ಪ. ಅಂತೂ ಆ ಜಾಗ ಇಡೀ ಬೊಳ್ಳತ್ರ ಬೊಳಿನ ಗುಂಡ್ ಪೆರ್ತ್ ಗಂಭೀರತಿಪ್ಪ. ಸಂಸಾರಂದೆಣ್ಣುವ ಅಂಧತನ ಜ್ಞಾನಂದೆಣ್ಣುವೊ ಬೊಳ್ಳತ್ನಗುಂಡ್ ಮಾಯ ಆಯಿತಿಪ್ಪ.

ಪೂಜೆಕಾರ (ಅರ್ಚಕಂಗ) ರಾಮಂಡ ಬಿಂಬತ್ನ ದೇವಸ್ಥಾನತ್ರ ಪಲ್ಲಕ್ಕಿರೊಳ್‌ಲ್‌ಟ್ಟಿತ್ ಪೇಟೆಕಾಯಿತ್ ಪೊಳೆಕ್ ಎದ್ದೆಂಡ್ ಪೋಪಕ ಜನಸ್ತೋಮ ರಾಮಂಡ ಮೂಡ್ ನೋಟೋಂಡೂಂಡ್ ಪುರ್‌ಡ್‌ಲ್ ನೂಕಿ ಕಳಿಪದ್ ಪೆರ್ತ್ ಚಾಯಿ. ರಾಮ ಮೂರ್ತಿನ ಒಡ್ಡೋಲಗತ್ (ಮಂಗಳವಾದ್ಯ) ಪೊಳೆರ ಪಕ್ಕ ಕೊಂಡ್ ಪೋಯಿತ್ ಶೃಂಗಾರ ಮಾಡ್‌ನ ತೆಪ್ಪತ್ರ ಮಂಟಪತ್ ಪೀಠತ್ರ ಮೇಲೆ ಬೆಚ್ಚಿತ್ ಪೂಜುವಾ. ಕೂಡ್‌ನ ಭಕ್ತಂಗ (ಮಂಡಲಿ) ಶ್ರೀರಾಮಚಂದ್ರನ ಫಲ ತರತ್ ಸ್ತೋತ್ರ ಮಾಡುವ. ಹೇ ರಾಮ, ಹೇ ಸೀತಾಪತೆ, ಜಗನ್ನಿವಾಸ ಭಕ್ತ ಪರಾಧೀನ, ದೇವರ ದೇವಾ, ಮುಕ್ತಿಪದಾಯಕ ಲೋಕ ಪಾವನ, ರಾವಣಾಂತರ, ಅಂತಜನೋದ್ಧಾರಕ ತ್ರೀಗುಣತೀತ, ನಿರಾಮಯ, ಸರ್ವಾಂತಯಾರ್ಮಿ, ಇನ್ನನೆ ಭಕ್ತ ಶಿರೋಮಣಿಯ ಶ್ರೀರಾಮ ಚಂದ್ರನ ಫಲ ವಿಧತ್ ಹೋಗಳುವಾ. ತಪ್ಪೋತ್ಸವ ಸುಮಾರ್ ಮೂಂದ್‌ಗಂಟೆರವಧಿಲ್ ನಡ್ಪ, ಕಡೇದಾಯಿತ್ ರಾಮಬಾಣ ಚಿತ್ತಾಕರ್ಷಣೆ ಮಾಡುವನ್ನೆಕೆ ಇಂಜಿತ್ ಅವದಾರವೆಲ್ಲಾ ಮಿನ್ನಿಯಂಡಿಪ್ಪ.

ಪಿಂಞ ದೇವಳ ದೇವಸ್ಥಾನಕ್ ಕೊಂಡ್ ಪೋನ ಪಿಂಞ ರಾಮೇಶ್ವರಂಡ ಪೂಜೆ ನಡ್ಪ ಆ ನೇರತ್ ದೇವಸ್ಥಾನತ್ರ ಪೂರ್ಮೆಯೂ ಒಳ್‌ಲೂ ದುಂಬ್‌ನ ಬೊಳ್ಳ ಬೊಳಿಲ್ ಮಿನ್ಯಂಡಿಪ್ಪ.

ಇಂಥಾ ದಯಾಮಯನಾನ ಶ್ರೀರಾಮ ತಪ್ಪತ್‌ಂಜಿ ರಾಮೇಶ್ವರ ದೇವಸ್ಥಾನಕ್ಕೆ ಬಂದಿತ್ ಲಿಂಗೇಶ್ವರಂಡ ಪೂಜೆಕ್ ಸಿದ್ಧನಾಯಿತುಂಡ್‌ಂದೆಣ್ಣುವೊ ಮಾದ್ರಿಲ್ ಅಂದ್ ಇಲ್ ಕೂಡ್‌ನ ಜನಕ್ ಆಯಿತಿಪ್ಪ. ಶ್ರೀರಾಮ (ಆತ್ಮ) ಸೀತಾ (ನಿರ್ಮಲ ಮನಸ್ಸು) ಸಮೇತ ಕರ್ಪೂರತ್ತಾರ ಎಡ್ತಾಂದೆಣ್ಣು ವನ್ನೆಕೆ ಪೂಜೆರ ನೇರತ್ ಕೂಡ್‌ನ ಜನಕ್ ತೋಂದುವ. ಕೂಡ್‌ನ ಭಕ್ತಂಗ ಪೆರ್ತ್ ಭಕ್ತಿಲ್ ಪೂಜೆನ ನೋಟಿತ್ ತನ್ನ ತಾನೆ ಮರ್‌ಂದಂಡಿಪ್ಪ. ಕೂಡ್‌ನ ಭಕ್ತಂಗ ಭಕ್ತಿ ಪಾಟ್ ಪಾಡಿತ್ ಪೂಜೆ ತೀರ್ಥ ಪ್ರಸಾದ ಎಡ್ತಂಡ್ ಅಯಿಂಡ ಮನೆಕ್ ಪೋಪ.

ಏಕಾದಶಿಯಂದ್ ಕಾಶಿ ತೀರ್ಥ ಕುಂಬತ್ತ ಹೆಬ್ಬಾಲೆಕ್ ವಾದ್ಯಗೋಷ್ಠಿಲ್ ಅಯಿಪ ನೇಮ ಉಂಡ್. ಅಯಿಂಗ ಧನ್ಯಂಗ ಪುಣ್ಯವಂತಂಗ. ಏಕಾದಶಿರ ದಿನತ್ರಂದ್ ವೃಧಾಚರಣೆ ಮಾಡಿತಾನ ಪಿಂಞ ಈ ಕಾಶಿ ತೀರ್ಥತ್ತ ದಾರೂ ಎಡ್ತಂಡ್ ಪೋಜೆಂಗೂ ಕಾಶಿಯಾತ್ರೆ ಮಾಡ್‌ನಚ್ಚಕ್ಕೇ ಪುಣ್ಯ ಕ್ಷುಪ್ಪವಾಂದೆಣ್ಣುವಾತ್ಲ ದಂಡಿಲ್ಲೆ. ಪಿಂಞ ರಾಂಪುರತ್ರ ರಾಮೇಶ್ವರಂಡ ಜಾತ್ರೆಕ್ ಪೋಪ ಜನಕ್ಕೆಲ್ಲಾ ಮಧುರೆ ರಾಮೇಶ್ವರಂಡ ಕೃಪೆ ಕ್ಷುಪ್ಪೊದ್ ತೀರ್ಮಾನ.

ಜ್ಞಾನಯೋಗಿಯಳಾನ ವ್ಯಾಘ್ರಪಾದ ಅಯಿಂಗ ಓರೋರ್ಮ ಈ ಗುಹೆಲ್ ಇಪ್ಪಂಜತ್. ಚಿದಂಬರತ್‌ಕ್ ಪೋಪ ಬಪ್ಪದಾಯೆಂಡ್ ಅಯಿಂಗ ಶ್ರೀರಾಮಂಡ ಪರಿಚಯ ಬೊಳ್ತಾಯೆಂಡಿಂಜತ್. ಚಿದಂಬರತ್‌ಲ್ ಶ್ರೀ ಶಿವಾರಾಧನೆ ಆಚರಣೆಕ್ ಕೊಂಡ್ ಬಾತ್. ಈ ಕಾರಣತುಂಡ್ ಈಯೆಂಗ ಭಕ್ತಿಯೋಗಿಂದೆಣ್ಣುವ. ವ್ಯಾಘ್ರಪಾದ ಬಲ್ಯ ಬಲ್ಯ ಕಾಡ್ ಸಂಚಾರ ಮಾಡಿಯೆಂಡಿಂಚಾಂಗುಂಡ್ ಅಕ್ಕಕ್ಕೆ ಅಯಿಂಡ ಕಾಲ್‌ಕ್ ಮುಳ್ಳು ಪಟ್ಟು ಪಟ್ಟು ಪಾದ ಜಡ್ಡ್ ಕಟ್ಟಿಪೋಯಿತಿಂಜತ್. ನರಿಯ ತಾಂಡ ತೀನಿಕ್ಕಾಯಿತ್ ಕಾಡ್‌ಲ್ ಮುಳ್ಳುನೆಲ್ಲಾ ಗಣನೆಕ್ಕಿಡ್ಡತೆ ತಿರ್‌ಗಿಯೆಂಡಿಪ್ಪನೆಕೆ ಈ ಮಹಾಮುನಿ ಇನ್ನತ ಬಲ್ಯ ಕಾಡ್‌ಲ್ ಸಂಚಾರ ಮಾಡಿ ಮಾಡಿ ಅಯಿಂಡ ಪಾದ ದಂಡು ವಿರೂಪಾನಾಂಡ ನೆಟ್ಟುಲ್ ಅಯಿಂಗಕ್

ವ್ಯಾಘ್ರಪಾದಂದೆಣ್ಣುವೊ ಪದ ಬಾತ್.

ಶ್ರೀರಾಮಚಂದ್ರ ರಾಮಸ್ವಾಮಿ ಕಣಿವೆಂಜಿ ಪೊರ್ಡುವೊ ಕಾಲತ್ ಅಂವೊಂಗ್ ಪಶ್ಚಿಮಕ್ಕೆ ಪೋರಕ್ಕಾಗಂದ್ ವ್ಯಾಘ್ರಪಾದ ಎಣ್ಣನನ್ನಕ್ಕೆ ಶ್ರೀರಾಮ ಆ ಬಟ್ಟೆ ಬುಟ್ಟಿತ್ ದಕ್ಷಿಣಕ್ ಪೋರ್ಟ್ ಪೋಚಿ. ವ್ಯಾಘ್ರಪಾದ ಶ್ರೀರಾಮಂಗಳ್ಲೆನ ಬುದ್ಧಿವಾದತ್‌ನ "ಬಹುಜಮ ಪಾನೀಯೆಂಬಹುವ್ಯಕ್ತ ನಾಶ್ರಯಂಬಹು ಜನಮಸತ್ತಂ ಚಪಶ್ಚಿಮಂತ್ಯೆಜೇ ರಾಘವ" ಎಣ್ಣವ ಶ್ಲೋಕ ಪುಷ್ಟಿಕರಿಚಿಡ್ತ.

ವ್ಯಾಘ್ರಪಾದ ಅಯಿಂಗ ಅದೇಚ್ಚಕ್ಕೋ ಕಾಲ ರಾಮೇಶ್ವರನ ಆರಾಧನೆ ಮಾಡಿಯೆಂಡಿಂಜತ್. ಈ ಜಡ ಶರೀರ ತಾಂಗ್ ಬೋಂಡಾಂದ್ ತೋಂದ್‌ನಕ ಅದ್‌ನ ಕೈಚ್ಚಿತ್‌ಚ್ಚಿತ್ ಅಯಿಂಗ ನಿತ್ಯ ಮುಕ್ತಂಗಳಾಯೆಂಡತ್. ಈ ನೇರತೂ ಆ ಋಷಿ ವರ್ಯಂಗಡ ಕೃಪಾಕಲಾಕ್ ರಾಂಪುರತ್ರ ಮೇಲೆ ಇಂಜಿತ್ ಇಪ್ಪ. ಈ ಋಷಿರ ಅಶರೀರ ಶಕ್ತಿ ಸಾಮಥ್ಯ ಪ್ರಭೆ ಇಂಗಳೂ ಇಲ್ಲಿಯೆತ್ರ ಜನಡ ಮೇಲೆ ಬುದ್ಧಿತ್ ನಮ್ಮ ನಾಳ್ ಪಿಂಞ ಬೋರೆ ಉತ್ಸವ ಕಾಲತ್ ಜನಕ್ ನೆಮ್ಮದಿಕ್‌ಟ್ಟುವೊಂಜಾನಗುಂಡೇ ಎಲ್ಲಾ ಚಾಕ್ರಿಯೂ ನಿರ್ವಿಘ್ನವಾಯಿತ್ ನಡ್‌ಂದೆಂಡುಂಡ್.

"ಪ್ರಿಯಂ ಶ್ರದ್ಧೇದರತಃ ಪ್ರಿಯಂ ಶ್ರದ್ಧೇದಿ ದಾಸತಃ

ದಾನಕ್ ದಂಡ್ ಕುರಿ ಮನ್ನಣೆ ಕ್‌ಟ್ಟುವಾಂದೆಣ್ಣವ. ದಾನ ಕೇಪಂವನೋ, ದಾನ ಕೊಡ್‌ಪದಾತನೊ ಆಶೀರ್ವಾದ ಮಾಡ್ಬಲೋ.

ಟಿಪ್ಪುಸುಲ್ತಾನಂಡ ಸೈನಿಕಂಡ ಕೂಡಿಗಕ್ ಪೋಪ ಬಪ್ಪದಿಂಜ ಬಟ್ಟೆ ರಾಂಪುರತ್ರ ರಾಮೇಶ್ವರಂಡ ಪಡಿಕ್ಕಾಲೆ ಇಂಜತ್. ಇನ್ನನಿಂಜಂಡ್ ಈ ದೇವಸ್ಥಾನ ಮುಸ್ಲಿಮಡ ವಕ್ರ ದೃಷ್ಟಿಕ್ ಚಿಕ್ಕಿ ಬುದ್ಧಿತ್ ಪೆರ್ತ್ ಕಾಲಕೆತ್ತಣೆಕ್ ಪಾಳ್ ಬುದ್ಧಿತಿಂಜತ್. (ಅವನತಿ) ಆಚೇಂಗಿ ರಾಮಲಿಂಗೇಶ್ವರಂಡ ಪೂಜೆ ಪುನಸ್ಕಾರ ವಿಜೃಂಭಣೆ ಅಲ್ಪತ್ತಿಂಜಿತುಂಡೆಂಗ್ಯೂ ಸಾವಾನ್ಯ ರೀತಿಲಾಚೆಂಗ್ಯೂ ನಡ್‌ಂದೆಂಡಿಂಜತ್. (ಕೊಡಗಿನ ರಾಮೇಶ್ವರ ಕ್ಷೇತ್ರಂದೆಣ್ಣುವೊ ಪುಸ್ತಕ, ಶಿವಸುತ

ಎಣ್ಣುವವು ಎಳ್ಳನ ಪುಸ್ತಕತಾರ 71ನೇ ಪುಟ.

ಸುವಾರ್ ನಾಪದ್ ಕಾಲಕ್ ಮಿಂಞ ವೆ. ಐಮುಡಿ ಪೂವಯ್ಯಂದೆಣ್ಣುವವನೊಬ್ಬ ಭಕ್ತನಾನವ ಸುತ್ಮಮುತ್ ನಾಡ್‌ಕಾರಡ ಕೈಂಜಿ ವಸೂಲಾನ ಚಂದ ಪಣಕ್ ತಾಂಡ ಕೈಂಜಿ ಚೆನ್ನಂಗ್ ಪಣ ಕೂಟಿತ್ ತಾಂಗ್ ಪುತ್ರಪ್ರಾಪ್ತಿಯಾಂಡೊಂದೆಣ್ಣುವೊ ಉದ್ದೇಶಕ್ಕಾಯಿತ್ ರಾಮೇಶ್ವರ ದೇವಸ್ಥಾನತ್ತ ಚಾಯಿಲ್ ಕೆಟ್ವಚಿಟ್ಟಿತ್. ಜೀರ್ಣೋದ್ಧಾರ ಮಾಡಿತ್ ಅಯಿಂಡ ಭಕ್ತಿಕ್ ಮೆಚ್ಚಿತ್ ರಾಮೇಶ್ವರ ದಂಡ್ ಕಣ್ಣ ಕುಂಞಿಯಳ ಈಯಂಗಕ್ ಕೊಡ್ತತ್. ಆ ಮಕ್ಕಕ್ ರಾಮ ಲಕ್ಷ್ಮಣಂದ್ ಪೆದ ಇಟ್ಟಿತ್. ಆ ಊರ್ ನಾಡ್‌ಕ್ಕಡ್‌ಂಗ್‌ನ ಭಕ್ತಂಗ ಈ ರಾಮೇಶ್ವರಂಡ ಸೇವೆಕ್ಕಾಯಿತ್ ಅಯಿಂಡ ಮನತ್‌ನ ಅರ್ಪಣೆ ಮಾಡಿಯೆಂಡ್ ಸೇವೆಕೆಜ್ಜೆಂಡುಂಡ್.

ಶ್ರೀರಾಮಂಡ ಮೇಲೆ ಉಳ್ಳ ಭಕ್ತಿನುಂಡ್ ಭಕ್ತಂಗ ಪೆರ್ತ್ ತರತ್ರ ಸೇವೆ ಪ್ರತ್ಯಕ್ಷ ಪರೋಕ್ಷಾಂದ್ ನಡ್ತಿಯುಂಡ್ ಬಾಳ್ ಕೈಚಂಡುಂಡ್. ಅನ್ನನೆ ದೇವಡ ಸಹಾಯತ್ ದಿನಕ್ಕೋರ್ ವ್ರತ ಮಾಡಿಯುಂಡುಂಡ್.

ಓಂತತ್‌ಸತ್

ಕೊಡಗರ ರಾಮೇಶ್ವರ ಕ್ಷೇತ್ರ (ಶಿವರಾಂಪುರ) ತ್‌ರ ವಿಶೇಷತೆ ಕ್‌ದತ್ರ ಮಾದರಿ ಉಂಡ್.

1. ದೇವಸ್ಥಾನ : ರಾಮಲಕ್ಷ್ಮಣ, ಸೀತಾಂಜನೇಯ (ಆದ್ಯತ) ರಾಮಲಿಂಗೇಶ್ವರ ದೇವಸ್ಥಾನ

2. ಈಶಾನ್ಯ ಮೂಲೆ (ಪೂರ್ವರ) ಅಶ್ವತ ಮರ ಪಿಂಞ ಕಾವೇರಿ ಪೊಳೆ ಲಕ್ಷ್ಮಣೇಶ್ವರ ದೇವಸ್ಥಾನ - ಅಂಜನೆಯ್ ಕೊಂಡ್ ಬಂದ ಲಿಂಗತ್ತ್ ಲಕ್ಷ್ಮಣನಗುಂಡ್ ಪ್ರತಿಷ್ಠಾಪನೆ ಮಾಡ್ ಚಿಟ್ಟಿತ್.

ಹರಿಹರೇಶ್ವರ (2ನೇ ಕುಂದ್) ಓರ್ ಲಿಂಗ ವಿಷ್ಣು ಸ್ವರೂಪ, 2ನೇ ಲಿಂಗ ಈಶ್ವರ ಸ್ವರೂಪ ಊರಾರ ಮಧ್ಯತ್‌ಲ್ ಬಸವೇಶ್ವರಂಡ ಸ್ಥಾಪನೆ

ಇಲ್ಲಿಯೋರ್ ಪಾವಿತ್ರತೆ : ಕಾವೇರಿ ಪೊಳೆ ರಾಮಪುರ ದೇವಸ್ಥಾನತ್‌ರ ಬರಿಕಾಲೆ ದಕ್ಷಿಣತ್‌ಂಜ ಉತ್ತರಾಭಿಮುಖವಾಯಿತ್ ಪಂರ್ಜಂಡ್ ದೇವಸ್ಥಾನತ್ರ ಮಿಂಞಲ್ ಪ್ರದಕ್ಷಿಣಾಕಾರಕ್ ಮಿಂಞಕೋಪ ಕಾರಣ ಎನ್ನಂದೆಣ್ಣಕ ಕಾವೇರಮ್ಮೆ ಶ್ರೀ ರಾಮಲಿಂಗೇಶ್ವರ ದೇವಸ್ಥಾನಕ್ಕಾಲೆ ಪಂರ್ಜಿತ್ ಪೋಕಂಡ್ಯಾಂಗ್ ಒಪ್ಪಿಗೆ ತರಂಡೂಂದ್ ಕೇಪಕ (ದೇವಳತೊಪ್ಪಕ್) ಮರ್‌ಂದ್ ಪೋನಾನಂಗುಂಡ್ ಪುನಃ ಕಾವೇರಿ ಪೊಳೆ (ಕಾವೇರಮ್ಮೆ) ಕೊಡಿಕ್ (ಬಯ್ಯಕ್ ಬಂದಿತ್ ಭಕ್ತಿಲ್ ಓರ್ ಸುತ್ತ್ ಪ್ರದಕ್ಷಿಣೆ ಬಂದಿತ್ ನಮಸ್ಕಾರ ಮಾಡಿತ್ ಓರ್ ಸುಳಿ ಉಂಡಾಕಿತ್) ಕ್‌ದಕ್ ಪಿಂರ್ಜಿಪೋಪ. ಇದ್ ಇಕ್ಕಲೂ ಓರ್ ಸುಳಿ ಉಂಡ್. ಅಲ್ಲತೆ ಮಳೆ ಕಾಲತ್ ಇಕ್ಕಲೂ ಕೊಡಿಂಜ ಚತ್ತ ಮನುಷ್ಯಂಡ ಚಾವು ಪಿಂಞ ಮರ ಮುಟ್ಟ್ ಇನ್ನತದೆಲ್ಲಾ ಈ ಸುಳಿಕಾಲೆ ಪಂರ್ಜಿಂಡ್ ತಡೆ ಉಂಡಾಕುವ. ಅಲ್ಲಿಯತ್ರ ಕೊಡಿಲ್

ಮಣ ಪಟ್ಟಿಲ್ ಓರ್ ತೂಟ್‌ಗಳ ಆಯೆಂಡಿತ್.

ಪಂಡ್ ಈ ದೇವಸ್ಥಾನ ನಿಂದಿತಿಂಜ ಜಾಗ ಬಲೋರ್ ಕುಂದ್ ಸಾಲಾಯಿತಿಂಜತ್. ಕೊಡಿಂಜ ಕಾವೇರಿ ಪೊಳೆ ಪೆರ್ತ್ ಸೂಕ್ಷ್ಮವಾಯಿತ್ ಚೂಡ್ ಪೋಲೆ ಕುಂದ್‌ರೊಳಿಯ ಪೊರ್ತಿತ್ ಒಕ್ಕಿತ್ ಕುಂದ್‌ನ ದಂಡ್ ಭಾಗ ಉಂಡಾಕ್‌ನ ವಿಶೇಷತೆಕ್ಕಾಯಿತ್ ಈ ಸ್ಥಳತ್ತ್ ಕಣವೇಂದ್ ಕಾಕುವೊಕ್ ಕಾರಣ ಉಂಡಾಯಂಡತ್.

ಅಲ್ಲತೆ, ಗಂಗಿ ಕಾಶಿಲ್ ಮಾತ್ರ ದಕ್ಷಿಣತ್‌ಂಜ ಉತ್ತರಕ್ ಪಂಜಂಡುಳ್ಳ ಪ್ರತ್ಯೇಕ ದರ್ಶನ ಉಂಡ್ ಪಿಂಞ ಅಲ್ಲಿಯೇ ಓರ್ ತೂಟ್‌ಗಳ (ಸ್ಮಶಾನ) ಉಂಡ್. ಅದ್ ಬುಟ್ಟತ್ತೇಂಗಿ ಕಣಿವೆಲ್ ಕಾವೇರಿ ಪೊಳೆ ದಕ್ಷಿಣತಿಂಜ ಉತ್ತರಕ್ ಪರಾಂಜಿತ್ ದಕ್ಷಿಣ ಕಾಶೀಂದೆಣ್ಣುವೊ ಹೊಗಳಿಕೆ ಉಂಡ್.

ಕಾಶಿ ಬುಟ್ಟತ್ತೇಂಗಿ ದಕ್ಷಿಣತ್‌ಂಜಿ ಉತ್ತರಕ್ ಪರಿಯುವೊ ಪಿಂಞ ಸ್ಮಶಾನ (ಉತ್ತರತ್) (ಕಾವೇರಿ ಪೊಳೆಲುಳ್ಳ) ಕಣಿವೆ ದೇವಸ್ಥಾನತ್ರ ಪಕ್ಕ ಕಾವೇರಿ ಪೊಳೆಲ್ ಮಾತ್ರ ದೇವಸ್ಥಾನತಾರ ಎದಿಕೆ ಉತ್ತರಕ್ ಪೊಳೆರ ಎಡತೆ ಬರಿಲ್ ಪೊಳೆರ ಸ್ವರೂಪತ್ ಚೆನ್ನ ವ್ಯತ್ಯಾಸ ಇಂಜಿತ್ ಅಲ್ಲಿ ಸುಳಿ ಉಂಡ್. ಅಲ್ಲಿ ಮಾತ್ರ ಪೊಳೆರ ಆಳ ಕಂಡವನ ಇಲ್ಲೆ. ಆಳ ಕಂಡ್ ಪುಡಿಪಕ್ ಪುರಾಡಾಲ್ ಸಾಹಸ ಮಾಡಿತ್ ಇಳ್ಳಂಜವು ಬಯ್ಯಕ್ ಬಂದಿತ್ತಿಲ್ಲೆಂದೆಣ್ಣುವ.

ಅನುಭವಸ್ಥಂಗಳ ತಕ್ಕ :

ಪೆರ್ತ್ ಮಿಂಞತಾರ ಕಾಲತ್ ದೇವಸ್ಥಾನಕ್ ಸಮ್ಂಧಪಟ್ಟಿ ಕಚ್ಚಿರ ಪೆರ್ತ್ ಬಲ್ಲಿಯ ರಥವೊಂದಿಂಜತ್‌ಂದೂ, ಚಾತ್ರರ ಸಮಯತ್ ತಿಂಗ ಸೂತಕತ್ರ ವಧಿಲ್ ಓರ್ ಪೊಮ್ಮಕ್ಕೆ ಅರಿಯತೆ ತಿರಿಯತೆ ಕಚ್ಚಿರ ರಥತ್ತ್ ಮುಟ್ಟಾನಾಂಡ ಫಲಗುಂಡ್ ರಥ ಪೊಳೆರ ನಡುಕ್ ತೆಂಗಿತ್ ನೀರ್‌ಲ್ ತಾಂದ್ ಪೋಯಿರ್‌ತೆಂದ್ ಬಾಯಿತಕ್ಕ (ಅಧ್ಯಕ್ಷ) ಉಂಡ್.

ವನವಾಸತ್ರವಧಿಲ್ ರಾಮಲಕ್ಷ್ಮಣ ಬಳಗ (ಕೂಟ್‌ಕಾರ) ರಾಮಂಪುರಕ್

(ಕಣಿವೆಕ್) ಪೋಯಿತಿಪ್ಪಕ (ರಾಮಲಕ್ಷ್ಮಣ ಅಣ್ಣ ತಮ್ಮಂಗ ದಂಡೂ ಶತ್ರುವಳಾಯೆಂಡತ್. ಕಾರಣ ಇಲ್ಲಿಕ್ ಬಂದಿತಿಪ್ಪಕ (ರಾಮ ಲಕ್ಷ್ಮಣ ಪಶ್ಚಿಮತ್‌ಂಜ ಪೂರ್ವಾಭಿಮುಖವಾಯಿತ್ ಪೋಪಕ್ಕ ಸಂದ್ಯಾಕಾಲ ಅಡ್ಡ ಬುದ್ಧಿತ್ (ಅಂದಿ ಮುಂದಿ ನೇರತ್ಲ) ಶ್ರೀ ರಾಮಚಂದ್ರ ಸಂಧ್ಯಾವಂದನೆ ಮಾಡೋಕ್ಕಾಯಿತ್ ಅಂಬೋಂಡುಂದ್ ಲಕ್ಷ್ಮಣಂಗಣ್ಣಾನಾಂಗ್ ಲಕ್ಷ್ಮಣ ತಾಂಡ ಅಣ್ಣಂಡ ಆಜ್ಞಾಪಾಲನೆ ಮಾಡೋಕ್ಕಾಯಿತ್ ಕಾಶಿಂಜಿ ಲಿಂಗ ಕೊಂಡ ಬಪ್ಪಕ್ಕಾಯಿತ್ ಲಕ್ಷ್ಮಣ ಪೋಚಿ.

ಇರ್ಪು ಕ್ಷೇತ್ರ ಭೀರ್ಯ

(ಸಂಗ್ರಹ) ಅಜ್ಜಮಾಡ ರಘು ಕುಶಾಲಪ್ಪ

ಬ್ರಹ್ಮಗಿರಿ ಎಳ್ - 28.03.2005 ಅಯಿಂಗ ಎಳ್ ನ

ಶ್ರೀಮಂಗಲ ನಾಡ್, ಕುರ್ಚಿಗ್ರಾಮ ಶ್ರೀ ರಾಮೇಶ್ವರ ದೇವಸ್ಥಾನತ್ರ ಶಿವಲಿಂಗತಾರ ವಿಷಯತ್ ತ್ರೇತಾಯುಗತಾರ ಚರಿತ್ರರ ಹಿನ್ನೆಲೆ ಉಂಡ್. ಶ್ರೀರಾಮ ವನವಾಸತ್ ಇಂಜ ಸಂದರ್ಭತ್ ರಾವಣಂದೆಣ್ಣುವ ರಾಕ್ಷಸ ಚದಿಲ್ ಸೀತೆನ ಕಟ್ಟುಂಡ್ ಪೋಯಿತ್ ಅಶೋಕ ವನತ್ ಬೆಚ್ಚಿರುವ. ರಾಮ ಪಿಂಞ ಲಕ್ಷ್ಮಣ ಸೀತೆನ ಕಾಡಲ್ ತೇಡಿಯುಂಡ್ ಕಿಷ್ಟಿಂದಾ ರಾಜ್ಯಕ್ ಎತ್ತುವ. ಅಲ್ಲಿ ವಾಲಿ ಸುಗ್ರೀವ ಅಂಜನೆಯುಂಡ ಪರಿಚಯ ಆಪ. ಗಾಳಿಲ್ ಪಾರಿಕಳಿಪ. ಅಂಜನೆಯು ಏರ ಗಟ್ಟಿಗನಾಯಿತಿಪ್ಪ. ಎಲ್ಲಾಂಗೂಡಿ ಸೀತೆನ ತೇಡಿಯುಂಡ್ ನಡ್‌ಂದಲ್ಲಿ ಜಟಾಯುಂದೆಣ್ಣುವೊ ಪಕ್ಷಿನುಂಡ್ ಸೀತೆರ ವಿಷಯ ಅರಿವ. ಅಂಜನೆಯು ಪಿಂಞ ಕೋಡ ಪಡೆನುಂಡ್ ರಾವಣನ ಕೊಂದಿತ್ ಶ್ರೀರಾಮ ಸೀತೆನ ಕಾಕಿಯುಂಡ್ ಬಂದಂಡಿಪ್ಪಕ್ಕಾಪಕ ಬಟ್ಟೆಲ್ ರಾಮುಂಗ್ ಚೆನ್ನಂಗ್ ವಿಶ್ರಾಂತಿ ಬೋಂಡುಂದಾಪ.

ಕುರ್ಚಿಗ್ರಾಮತ್ರ ಇರ್ಪು ಕುಂದ್‌ಲ್ ವಿರಾವು (ಆರಾವು) ಮಾಡಿಯೆಂಡಿಂಜಲ್ಲಿ ರಾಮಂಗ್ ಶಿವ ಪೂಜೆರ ಗ್ಯಾನಾಯಿತ್ ಆಂಜನಯ್ಯನ ಕಾಕಿತ್ ತ್ರಿವೇಣಿ ಸಂಗಮಕ್ ಪೋಯಿತ್ ಶಿವಲಿಂಗ ಎಡ್‌ತಂಡ್ ಬಪ್ಪಕ್ ಎಣ್ಣುವ. ಅಕ್ಕ ವಾಯುಪುತ್ರ ಆಂಜನೇಯ ಕೂಡೆನ್ನೆ (ಕಡ್‌ಂಜನ) ಪಾರಿತ್ ತ್ರಿವೇಣಿ ಸಂಗಮಕ್ ಎತ್ತುವ. ಅಕ್ಕ ಅಲ್ಲಿ ದೇವ ಕನ್ನಿಯ ಕುಳಿಚಂಡಿಂಜಾನಂಗುಂಡ್ ಚೆನ್ನ ತಡವಾಯಿತ್ ಶಿವಲಿಂಗ ಕೊಂಡ್‌ಬಪ್ಪ. ಅಕ್ಕಣೆಕ್ ಅಲ್ಲಿ ಶ್ರೀರಾಮಂಗ್ ತಡವಾನಂಗುಂಡ್ ತಾನ್ ಅಳ್ತ ಜಾಗತ್ತೆ ಮಣತ್‌ನ ಗುಡ್ಡೆ ಮಾಡಿತ್ ಅದ್‌ಲೇ ಶಿವಲಿಂಗ ಮಾಡಿತ್ ತೊಪ್ಪ. ಅಕ್ಕ ಶಿವ ಪ್ರತ್ಯಕ್ಷವಾಯಿತ್ ಅದ್‌ನ ಶಿವಲಿಂಗ ಮಾಡುವ. ಈ ಚಾಕ್ರಿ ಶ್ರೀರಾಮ ನಡ್ತಾನಾ ಗುಂಡ್ ಅದ್‌ನ ರಾಮ+ಈಶ್ವರ -ರಾಮೇಶ್ವರ ಎಣ್ಣುವೊ ಪೆದ ಆಚಿ.

ಲಕ್ಷ್ಮಣತೀರ್ಥ : ಶ್ರೀರಾಮಂಗ್ ಪೂಜೆಕ್ ನೀರ್ ಬೋಂಡೊಂದುಂದಾಚಿ. ಅದ್‌ಂಗೂ ಲಕ್ಷ್ಮಣಗಣ್ಣೆಚಿ. ಅಂವೊ ಭೂಮಿಕ್ ಅಂಬ್ ಕನಿಚತ್. ನೀರ್ ಬಪ್ಪನ್ನೆಕೆ ಮಾಡ್‌ಚಿ. ಈ ನೀರ್ ಪೊಳೆ ರೂಪತ್ ಪರಿವೊಕಾಚಿ. ಇದ್‌ನಗುಂಡ್ ಇದ್‌ಂಗ್ ಲಕ್ಷ್ಮಣತೀರ್ಥಂದೆಣ್ಣುವೊ ಪೆದ ಆಚಿ.

ಚೋಮ ಪೊಳೆ : ಚೋಮ ಪೊಳೆಲ್ ಎಂದೂ ನೀರ್ ಪರಿವ. ಇದ್‌ನುಂಡ್ ಪ್ರಾಣಿ ಪಕ್ಷಿಯ ಮಾಲೋಂಗ ಕುಡಿಪ ನೀರ್ ಪಡೆವ. ಬೋಟೆಕ್ ಪೋಪ ಜನ ಈ ಪೊಳೆರ ಕರೆಲ್ ಕೂಪದಿ ಕೂಳೆನ ಉಂಬ.

ಬ್ರಹ್ಮಗಿರಿ : ಪೊಳೆ ಕಡಂದಿತ್ ಚೆನ್ನ ಮಿಂಞಕ್ ಪೋನಕ, ಏರ ಎತ್ತರತರ ಬ್ರಹ್ಮಗಿರಿ ಕುಂದ್ ಕಾಂಬ. ಈ ಕುಂದ್ ಸಾಲ್ ನೋಟುವೆಂಗೆಡ ಕಣ್ಣೆಕ್ ದುಂಬಾ ಚಾಯಿತೆ ಕಾಂಬ. ಇಲ್ಲಿಂಜ ಚೆನ್ನ ಮಿಂಞಕ್ ನಡ್‌ಂದಕ ಕೇರಳತ್ರ ತಿರನೆಲ್ಲಿ ದೇವಸ್ಥಾನ ಕಾಂಬಕ್ ಕಟ್ಟುವಾ. ಜನ ಪೊಳೆಲ್ ತಂಗಡ ಪಾಪ ಕರ್ಮ ತ್‌ಪಕ್ ಪೂಜೆ ಮಾಡುವೊದುಂಡ್.

ಎಮ್ಮೆಮಾಡ್ ಸೂಫಿ ಶೇಖರಮಾರ್ ಶಹೀದಾರ ಮಹಿಮೆ

ಶಿವರಾತ್ರರಂದ್ ಪಕ್ಕತ್ ಬೇಲ್ಲ್ ಭಾಗವತಕಳಿ ಇಪ್ಪಂಜತ್. ಜನಸ್ಥೋಮ ನೇರಕ್ಕೆಪಕ್ಕ ಚಾಯಿಯೂ ಆಪಂಜತ್. ದೇವಡ ನೆವೆ ಮಾಡುವೊ, ಬಾಳೋಪಾಟ್ ಪಾಡಿತ್ ಅಮ್ಮೆ (ಅಮ್ಮೊ) ಕಾವೇರಿನ, ಅಗಸ್ತ್ಯೆ ಮಹಾಮುನಿನ ಭಗಂಡೇಶ್ವರನ ದೇವಳ ಕವೇರ ಮುನಿನ ಬ್ರಹ್ಮ ಮಹೇಶ್ವರ ಗಣಪನ ಪಿಂಞ ಬೋರೆ ಬೋರೆ ದೇವಳ ಭಕ್ತಜನ ಪಾಡಿತ್ ಕೊಂಡಾಡಿತ್ ಪೂಜುವೊ ನೇಮ ಇದತ್. ಅಂದ್ ಅರೆ ಬಗ್ಗಿಯೆಂಡ್ ದೇವರೂಂದ್ ಕಾಕೊಂಜತ್. ನೊಣೆ ಪರಂದಂಡ್ ಅಯಿಂಡ ಬಾಳ್ ನೀಸೋಂಜತ್. ನೈಚಂವಂಡ ಕೆಲಕ್ ಕೂಳ್, ಮಂಡಕ್ಕೆಣ್ಣೆ ಪೆತ್ತೆಂಡ ಮೇಲ್ಕ್ ತುಂಡ್ ಪೊದ್ಲ್, ಬಟ್ಟೆಂದ್ ಕೊಡ್ತಿತ್ ಬೆಂಬಲ ಕೊಡ್ಪಂಜತ್. ಅಂದ್ ದೇವ್ರೊ, ಕೊಡಿ ನೇಂದಿತ್ ಇಂದಿಕ್ಕ ಕೈಂಜ ನಲ್ಲಾನ ಪರವಕ್ ಅಯಿಂಡ ಬಾಯಿಲ್ ನಾವು ಮೊಳ್ಳಿತ್ತಿಲ್ಲೆ. ಕೊಡಗಲ್ ಅಂದ್ಂಜ ಇಂದೋಳ ಜಾತಿ ಭಿನ್ನಭೇದ ಇಂಜಿಲೆಂದೆಣ್ಣುವಾಂಗ್ ಅಂದಿಯೆತ್ರ ಊರೊರ್ಮೆ ಕಳವೇ ಸಾಕ್ಷಿಯಾಯಿತಿಂಜತ್. ಎಣ್ಣೆಚೇಂಗಿ ಅಂದ್ ಕೊಡವ ಊರೊರ್ಮೆ ಕಳಕ್ ಬೆರಂಗೈಲ್ ಬಂದ ಕೊಡವೇತರ ಜನಾಂಗಕ್ ಕಾಕಿ ಕಾಕಿ ಕೊಡಪಂಜಿ ಒಟ್ಟಿಯೇ ಸಾಕ್ಷಿ. ಅಜ್ಜಪ್ಪನ ಪಾಡಿತ್ ಉಂಡ್ ಕುಡ್ಡಿತ್ ಬಯಿ ಪಿರಿಯೋಗ ಮೂತಂಪನೊಬ್ಬ ಉರೊರ್ಮೆಯಾ? ಇರ್ಮೆಯಾಂದ್ ಕೇಟಿತ್ ಒರ್ ಮೂಪ ಅಪ್ಪರ್ತಂಜ ಒರ್ಮೆಂದ್ ಕೂಟಿತ್ ಪಿರಿಯೋಂಜತ್. ಒರೇ ಚರ್ಚಿಲ್ ಪನರಡಿಲ್ ಬೊಳ್ಳೆಕಳ್ಳು ಕುಡ್ಡಿತ್ತೇವಂಜತ್. ಇಂದಿಕ್ಕ ಕೊಡವಳ ದೂರಿಯಂಡ್ ಚೆಲ್ಲೊರಪ ರೆವಕ್ ಪೆರ್ತ್ ಜನ ಉಂಡ್. ಆಚೇಂಗಿ ಪಂಡೆಯತ ದಾನಧರ್ಮ (ಕೊಡವಡ) ತ್ತ ಪರವೊಕ್ ಒಬ್ಬಡೊ ನಾವು ಸರಿ ಇಲ್ಲತ್ತದ್ (ಮಡ್ಡಿತ್ತುಳ್ಳದ್) ಪೆರ್ತ್ ಬೇಜಾರ. ಅಜ್ಜ ತಾತಂಗಡ ಕಾಲತ್ ಅಯಿಂಡ

ಆಶ್ರಯತೀರ್ಥ ಒಬ್ಬನಲ್ಲೇನಿಗಿ ಒಬ್ಬ ನಿಂದಿಂಜತ್. ಅದ್ವಾನ ಮಂದಿತ್, ತೇಕಿತ್ ಕೊಡವಡ ಕುಪ್ಪಾ ಚಾಲೆನ ಉತ್ ಚಿಡ್ವಿಂದೆಣ್ಣಾನ ನೀಚಂಗಿಂಜತ್. ಅದಲ್ಲಿಕ್ಕಡ್, ಕೊಡವ ಮಾಲೆ ಪೊಮ್ಮಾಲೆ ಕೊಡಗ್ ಬ್ರಹ್ಮಗಿರಿ ಕುಂದಲ್ ಕೊಡವಡ ಅದಿದೇವತೆ ಶ್ರೀ ಮೂಲ ಕಾವೇರಮ್ಮ ಮಹಾತಾಯಿ ಏಳುಕೋಟಿ ತೀರ್ಥರೂಪತ್ ಪರೋಪಕಾರಿಯಾಯಿತ್ ಪಂಜಿತ್ ಸಮುದ್ರಕ್ ಕೂಡ್‌ನದಾಯಿತುಂಡ್. ಅಲ್ಲಿಂಜ ವರ ಬೋರೆ ಬೋರೆ ದೇವಾಸ್ತೇವತೆಯ ಕೊಡಗಲ್ ಎಟ್ಪ ದಿಕ್ಕಲ್ ಮೂಲೆ ಮೂಲೆಲ್ ಬೋರೆ ಬೋರೆ ಶಕ್ತಿ ರೂಪತ್ ದೇವತೆಯಳಾಯಿತ್ ನೆಲೆ ನಿಂದದುಂಡ್. ಕೊಡವ ದೈವ ಸ್ವರೂಪಿಯಳೂ ಅಕ್ಕು. ಇದೋರ್ ಮಹಾಶಕ್ತಿ ದಾಯದ ಮಣ್ಣಾಯಿತೂ ಉಂಡ್. ಪೋರತಾಂಗ್ ಇದೋರ್ ಪುಣ್ಯ ಭೂಮಿಯಾಯಿತಿಂಜತ್. ತಪೋ ಭೂಮಿಯಾಯಿತುಳ್ಳಾನಗುಂಡ್ ಈಂಡ ಶಕ್ತಿ ಸಾರ ಶಕ್ತಿ ಸಾರತ್ವಂಜಿತ್ (ಈಜಿಪ್ತಂಜಿ) ಪರದೇಶತ್ವಂಜಿ ಓಡಿ ಪಾರಿ ಬಂದಿತ್ ಕೊಡಗರ್ ನಾಪೋಕ್ಲಕ್ ಕೂಡ್‌ನ ಎಮ್ಮೆ ಮಾಡಲ್ ಒರ್ ಮುಸ್ಲಿಂ ದೈವ ಸ್ವರೂಪಿ ಮೂಲವೊ ಸೂಫಿ ಶಹೀದ್ ಶೇಖಮಾರ್ ಪೆದಲೋಲೆ ತಾಂಡ ಸ್ವಂತ ತಂಗೆರ ಚಿದಿಗುಂಡ್ ಪ್ರಾಣಕಳಂದಂಡ್ ಮಹಿಮೆಗುಂಡ್ ಆಯಿರ ಲಕ್ಷಕೋಟಿ ಕಣಕ್‌ಲ್ ನರಮಾಲೋಂಗಡ ಕಷ್ಟ ಪರಿಹಾರ ಮಾಡಿಯುಂಡ್, ಮಕ್ಕ ಫಲ ಇಲ್ಲತ್ತೆಂಗಕ್ ಸಂತಾನ ಕೊಡ್ತುಂಡ್, ಬೋಡ್‌ನಾನ, ಕೇಟಾನ ಕೊಡ್ತುಂಡ್ ತಣ್‌ಪ್ ಉಂಡಾಕಿತ್ ಮುಸ್ಲಿಂ ಪಳ್ಳಿಲ್ ಆಯಿರಾಯಿರ ಪೊನ್ನ್ ಪಣ ಲಕ್ಷ ಕೋಟಿ ಭಂಡಾರ ಬೂವದೂ ಫಲತರತ್ ಮಹಿಮೆ ಕಾಟಿಯುಂಡ್ ಮಾಲೋಂಗಕ್ ಕೋಣಕೆಜ್ಜುಂಡುಂಡ್.

ಇಲ್ಲಿಕ್ ಮುಸ್ಲಿಂ ಮಾತ್ರವಲ್ಲತೆ, ಕೊಡವ ಗೌಡ ಬೋರೆ ಎಲ್ಲಾ ಜಾತಿಯಳೂ ಅಯಿಂಚೆಯಿಂಡ ಕಷ್ಟತ್ವ ಎಣ್ಣೆಯುಂಡ್ ಪರ್ಕೆಪಟ್ಟು ಒಪ್ಪುಚಿಟ್ಟದ್ ಉಂಡ್. ಕಾಲತ್ತೋಡ್ ಕಾಲತ್ ನಡಪ ನೇರಕ್ ಪೆರ್ತ್ ಜನ ಜಾತಿ, ಭಿನ್ನಭೇದವಿಲ್ಲತೆ ಕೂಡಿತ್ ಸೇವೆ ಪರ್ಕೆ ಒಪ್ಪುಚಿಟ್ಟಿತ್ ಊಟ ಉಪಚಾರಗೊಂಡಿತ್ ಪ್ರೋಪದುಂಡ್.

ಸೂಫಿ ಶೇಖಮಾರ್ ಶಹೀದ್ ಅಯಿಂಡ ಸ್ವಂತ ತಂಗನುಂಡ್ ಈಯೆಂಗಕ್ ಒಡ್ವು ಕಂಡ್ ಬಂದಾನ ಗುಂಡ್ ಇಂದೂ ಈ ಪಳ್ಳಿಲ್ ಸೂಫಿ ಶಯೀದ್‌ರ ಗೋರಿರಲ್ಲಿಕ್ ಪೊಮ್ಮಕ್ಕ ಪೋಪಕ್ ಅರ್ಕತ್ ಉಂಡಾಕಿತ್ ಬೆಚ್ಚಿತ್ ಅಯಿಂಡ ಪ್ರಾರ್ಥನೆಕ್ಕಾಯಿತ್ ಪೂಮ್ಮಕ್ಕ ಮೂಡಿಯಕ್ಕಾಯಿತ್ ತರ್ಪತ್ ಜಾಗ ಉಂಡಾಕಿತುಂಡ್. ಪೊಮ್ಮಕ್ಕಡ ಬುದ್ಧಿ ಮೊಳಕ್ಕೆಲ್‌ಂದೆಣ್ಣುಟ, ಪೊಮ್ಮಕ್ಕಡ ಬುದ್ಧಿ ಪ್ರಳಾಯಾಂತಕಂದೆಣ್ಣುವೊ ನೆಲೆ, ಮೀನಾರ ಚೌಟ್‌ನಾಚೆಂಗೂ ಕಂಡ್‌ಪುಡಿಕ್ಕೋಲು ಪೊಮ್ಮಕ್ಕಡ ಮನಸ್ಸರ ಮಹಿಮೆನಾ ಕಂಡ್ ಪುಡಿಪಕ್ ಕೈಯ್ಯುಲೆಂದೆಣ್ಣುವೊ ಪಳಂಜೊಲ್‌ಕ್ಕಾಧಾರತ್ತ್ ಎಮ್ಮೆಮಾಡ್ ಸೂಫಿ ಶೇಖಮಾರ್ ಶಯೀದ್ ಮಹಾ ಪುರುಷಂಡ ಕಥೆಲ್ ಕೇಕಲು. ಮಹಿಮೆನ ಅಲ್ಲಿ ನೋಟಲು. ಈ ಕಥೆನ ವಿಮರ್ಶೆ ಮಾಡಿತ್ ನೋಟನಕ, ಪೊಮ್ಮಕ್ಕಾಂದೆಣ್ಣುವೊ ಚೆನ್ನಂಗ್ ಮೂದೇವಿಯ ಪುರುಷ ಪ್ರಧಾನಕಾಲವೇ ಆಯಿತ್ತಿರಡ್, ಸ್ತ್ರೀ (ಮಹಿಳಾ) ಪ್ರಧಾನ ಕಾಲವೇ ಆಯಿತ್ತಿರಡ್ ಅಯಿಂಗ ತಾಂಡ ಸ್ವಂತ ವಡ ಹುಟ್ಟಿಳಿ (ಅಣ್ಣ ತಮ್ಮಣಿಗಳೇ) ಆಯಿತ್ತಿರಡ್ ನೇರಕ್ಕೊತ್ತಿತ್ ಅಪ್ಪ ತಾತಪ್ಪಂಗಳೋ ಚದಿಕತೆ ಬುಡಲೂಂದೆಣ್ಣುವಾಂಗ್ ಆಧಾರ ಕಥೆಯಾಯಿತ್ ನೆಲಜಿ ಎಮ್ಮೆಮಾಡ್ (ನಾಪೋಕ್ಕು) ಶೂಫಿ ಶೇಖಮಾರ್ ಶಾಯಿದ್ ದರ್ಗಾ (ಪಳ್ಳಿ)ತ್ಲ ನೋಟೊಂಡು ಕಥೆರ ಮಹಿಮೆ. ಇದೊಂಗೇ ಎಣ್ಣುವೊ ಮಾಪಳೆ ತಕ್ಕಾಲ್ ಪಳ್ಳಿಂಡ ಕಾರ್ಯ ಅಲ್ಲಾಹುಕ್ಕೇ ಅರಿಯಾಂದ್, ಇಂದೂ ಎಮ್ಮೆಮಾಡ್ ಪಳ್ಳಿಲ್ ಸೂಫಿ ಶೇಖಮಾರ್ ಶಾಯೀದ್‌ರ ಗೋರಿರಲ್ಲಿಕ್ ಪೊಮ್ಮಕ್ಕ ಪೋಪಕ್ ಎಡೆ ಇಲ್ಲೆ. ಅಲ್ಲಿ ಈ ನಾರ್ಲ ರಾಜಕೀಯಕ್ ಎಡೆ ಇಚ್ಚೆ, ಇಲ್ಲಿಯತ್ರ ಮಹಿಮೆ ಎಚ್ಚಕುಂಡ್‌ಂದೆಣ್ಣುಕ್ ಶೇಖಮಾರ್ ಸೂಫಿ ಶಾಹೀದ್‌ರ ಗೋರಿರ ಕಂಬತ್ರೊಳ್‌ಲೆ ಟೆರೇಸ್‌ಲೇ ಮೂಂದ್ ನಾಲ್ ಪೊಂದೇನ್ ತೂಂಗಿತಿಪ್ಪಂದೋರ್ ಪರ್ತ್ ಬಲ್ಯ ಮಹಿಮೆ ಆಯಿತುಂಡ್. ಈ ಪಳ್ಳಿಲ್ ವಿದೇ ನೇರತ್ತೂ ಪೊಲೀಸ್ ಕಾವಲ್‌ಂದ್ ಇಪ್ಪದಿಲ್ಲೆ. ಪೊಂದೇನೆ ಎಲ್ಲಾ ವಿಷಯತ್ ಕಾವಾಲಾಯಿತ್ತಿಪ್ಪ. ಆಚೆಂಗಿ ಇಕ್ಕಿಕ್ ಈ ನಾಸ್‌ಲ ರಾಜಕೀಯ ಬಿರ್ದಲ್ ಮಂದ್ರಿ ಮೋಹಿನಿಯ ಬುಪ್ಪಕ್ಕ ಅಯಿಂಡ ಕಾವಲ್‌ಕ್ಕಾಯಿತ್ ಪೊಲೀಸ್ ಕಾವಲ್

ಬಪ್ಪದುಂಡ್ಲೋ. ಎಣ್ಣೆಚೆಂಗಿ ಅಯಿಂಗ ಎಕ್ಕಲು ಮಯಿಲಿಗೆ ಆಯಿತ್ತಿಪ್ಪಲ್ಲ. ಕಳ್ಳ ಕಾಕಂಗ ಬೋರೆ ಅನ್ಯಾಯಿಯ, ದ್ರೋಹಿಯ, ಚದಿಯಂಗಳ ಕೆಣಿಪಕ ಪೊಂದೇನೆ. ಪೊಲೀಸ್ ಚಾಕರಿ ನಡ್ತುವಲೋ, ಉಪ್ಪಾ ತಿಂದವಂಗ್ ಉಪ್ಪಾಕೂಲಿ, ಮುತ್ ತಿಂದವಂಗ್ ಮುತ್ ಕೂಲಿಂದೆಣ್ಣೆಟ ಈ ಸಮ್ಮಂಧ ಅನ್ಯಾಯ ಅರೋಲೆ ಕೆಜ್ಜಕ, ಇಲ್ಲೇಂಗಿ ದಾರೇಂಗಿ ನೊಂದಿತ್ ಪರ್ಕೆಪಟ್ಟ ಕೆಟ್ವನಕ ಅಂಡಾಂಡ ಫಲ ಅಲ್ಲಲ್ಲಿ ಅಕ್ಕಕ್ಕೆ ಕಂಡವೊ ವಾಡಿಕೆ. ಚೆನ್ನಂಗ್ ಚೊಕ್ಕನ್ಯೆಂಗ ಅಂಥ ಭಕ್ತಿ ಮೂಡ ನಂಬಿಕೆಂದೆಲ್ಲಾ ಚೆನ್ನ ಚೊಕ್ಕನ ಕೊಡವ (ರಾಜಕೀಯ ಚೊಕ್ಕಿ, ಮುಲಾಜಿಲ್) ಬೊಗ್ಗಳೋದೆಲ್ಲಾ ಉಂಡ್. ಅಯಿಂಗ ಇಲ್ಲಿಯತ್ರ ಪ್ರತ್ಯಕ್ಷ ಮಹಿಮೆನ ಕೇಟಿರಿಯೋಂಡು. ಇಲ್ಲಿಯತ್ರ ನೇರ್ಚೆಕ್ ಆಡ್ ಕೋರಿಂದೆಲ್ಲಾ ಪರ್ಕೆ ಮಾಡ್ತೊಂದುಂಡ್. ಅದ್ನ ಕೆಣ್ಕನ್ಯೆಂಗಡ ಕೋಲತ್ತ ಕೇಟಿರಿಯೋಂಡು. ಅಲ್ಲತೆ ಉಲ್ಲಾಳಕ್ ಪರ್ಕೆ ಬುಟ್ಟ ಆಡೆಲ್ಲಾ ರೈಲ್ಕೇರಿತ್ ಅಂದೇತ್ರ ದಿನ ಉಲ್ಲಾಳಕ್ ಎತ್ತನ ವರ್ತಮಾನತ್ತ ಈ ಕೊಡವ ಎನ್ನತ್ತದೊಂದ್ ಪಂದಿತ್ ತೇಪಾ? ಅನ್ನತ್ತೆಂಡ ನಾವು ಅಕ್ಕನ್ನೇ ಮಡ್ಂಗಿತ್ ತೊಂಡಲ್ ಕೆಣಿಯೋದುಂಡ್. ನೆನಕೊಂಡು ಒಂದೂ ಬೊಂಡಾ, ಸ್ತ್ರೀಶಕ್ತಿ, ಸ್ವಶಕ್ತಿ, ಸ್ತ್ರೀ (ಮಹಿಳಾ) ಪ್ರಧಾನಾಂದೆಲ್ಲಾ ಚೊಕ್ಕಿತ್ "ಎಮ್ಮೆಮಾಡ್ ಸೂಫೀ ಶಯಿದ್ ಅಯಿಂಡ ಗೋರಿಕ್ ಇಕ್ಕತ್ತ ಚೊಕ್ಕನ ಪೊಮ್ಮಕ್ಕೆ ಅಯಿಂಡ ಘೋಷ ಪೊದ್ಂಜಿತೋ ಪನಿ ಘೋಷ ಉತ್ತಿತೋ ನುಗ್ಗಿತ್ ನೋಟಡ್.

ತಾತ್ಪರ್ಯದಣ್ಣೆಚೆಂಗಿ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್ಗರ ಮಣ್ಣಲ್ ಪರ್ತ್ ಮಹಾ ಪುರುಷಂಗ ಗುರುವಾ ನೆಲೆ ಎಡ್ಡಿತ್. ಅಯಿಂಡಯಿಂಡ ಮಮ್ಮಾಯತ ಮಹಿಮೆನ ಕಾಟಿತ್ತೂ, ಪವಾಡ ಕಾಟಿತ್ತೂ ಗುರು ಮಹಿಮೆನಾ ಕಾಟಿತ್ತೂ ಪಶು ಪಕ್ಷಿಯಾಂದಲ್ಲತೆ ಮಾಲೋಂಗಳೊ ಈಯಂಡ ಮಡ್ಲಾಟ್ಟಿತ್ ಚಾಕಿಪೊಲ್ತುವಾಂದೆಣ್ಣುವಾತ್ ದಂಡಿಲ್ಲೆ. ಇದೋರ್ ಮಹಾ ಮಹಿಳೆ ಉಳ್ಳ ಪುಣ್ಯ ಲೋಕಂದೆಣ್ಣುವೊದ್ ಸತ್ಯ. ದೈವದತ್ತವಾನದೂ ಅಕ್ಕು. ಅದಲ್ಲಿಕ್ಕಡ್, ಯಂಗ ಇಕ್ಕ ಈ ಮಹಾ ಪುರುಷಂಡ ಪವಾಡತ್ನ ಮಿಂಞಾಕ್ ಓದಿ ನೋಟಂಗನಾ.

ಎಮ್ಮೆಮಾಡಲ್ ಅಂಡಾಯಂಜಂಡ್ (ಚತ್ ಕಟ್ಟ್) ಪೋಯಂಡ್ (ಸ್ವರ್ಗಕ್ಕೇರ್ನ) ದೇಹ ಬುಟ್ಟಂಡ್ ಇಂದಿಕ್ಕ ಸೂಫಿ ಶೇಖಮಾರ್ಂದ್ ಪೆದಲೋಲೆ ನೆಲೆಗೊಂಡಿತ್ (ಸಮಾಜಿ)ಯಾನವು ಫಲತರತರ ಪವಾಡ ಕಾಟಿಯಂಡ್ ಈ ಮೂಪ ಪೆರ್ತ್ ತರತ್ ಮಾಲೋಂಗಕ್ ಪಿಂಞ ಮಾಲೋಂಗಕ್ ಸಂಬಂಧಪಟ್ಟು ಮಾರಿ ಮಸಣ ನೀಕಿಯಂಡ್ ಇಲ್ಲಿಕ್ ಬಂದಿತ್ ಬೋಡ್ನಾನ ಕೇಟಾನ ಕೊಡ್ತದು ಮಕ್ಕಫಲ ಇಲ್ಲತ್ತೆಂಗ ದುಃಖತ್ತು ಭಕ್ತಿಲೂ ಬೋಡ್ಚೇಂಗಿ ಮಕ್ಕ ಫಲ ಕೊಡ್ತದು ಎಚ್ಚೆಕ್ಕಿಚ್ಚೆಕ್ಕೋ ಪವಾಡ (ನಲ್ಲಾಮೆ) ನಡತ್ನಾಂಗ್ ಆಧಾರ ಉಂಡ್.

ಪವಾಡ ಪುರುಷ ತಾಂಡೋರ್ ತಂಗಯಡ್ ಅರಬೀ ದೇಶತ್ತ್ಂಜ (ಈಜಿಪ್ತ್) ಪೊರ್ಟಿತ್ ಹಿಂದೂ ದೇಶಕ್ ಬಂದಿತ್ತೆತ್ತಿತ್ ಕರ್ನಾಟಕತ್ರ ಹುಣಸೂರ್ ಚೆನ್ನಂಗ್ ಪುರುಷೋತ್ತ ಎಡ್ತಂಡ್ ಆಯಾಸ ಪರಿಹರಿಚಿಟ್ಟಂಡ್ ಮಿಂಞಕ್ ಪೊನ್ನಂಪೇಟೆರ ಕುತ್ತನಾಡ್ ಗ್ರಾಮ (ಕೊಂಗಾಣ)ತ್ ಪೊಳೆ ಕರೆಲ್ ಕೈಕಾಲ್ ಮೂಡ್ ಕತ್ತಿಯಂಡ್ ಅಲ್ಲಿತ್ (ಒಲು ಎಡ್ತಂಡ್) ದೇವಳ ಭಕ್ತಿಗೊಂಡ್ ಪ್ರಾರ್ಥನೆ ಮಾಡುವೊಕ್ ಸುರು ಮಾಡ್ಚಿ. ಆ ನೇರತ್ ಈ ಮೂಪಂಡ ಪವಾಡವೋಂದೆಣ್ಣು ಓರ್ ಪಯ್ಯು ನೇರೆ ಈಯೆಂಡ ಪಕ್ಕ ಪೋಯಿತ್ ಬೋಂಡ್ಯಾನ ಪಾಲ್ತೊಂಜಿಕ್ಕೊಡ್ತೊ. ಈ ಪವಾಡ ನಡಂದಂಡಿಂಜ ನೇರತ್ ತಾಂಡ ಏದೋ ಚಾಕ್ರಿಕ್ಕಾಯಿತ್ ಪೊಳೆ ಕರೆಕ್ಕಾಲೆ ಪೋಯೆಂಡಿಂಜ ಅದೇ ಊರ್ಕಾರಕಾನ ಕುರ್ತುಡೋರ್ ಪೆರಿಯ ಮೋಲಿ (ತೊಂಡ) ಈ ದೃಶ್ಯ ಪವಾಡತ್ ನೋಟೀರ್ತೊ. ಈನ ಸೂಫಿಶೇಖಮಾರೂ ಕಂಡಂಡತ್ ಕಡಂಜನೆ ಆಳ್ ಸೂಫಿ ಶೇಖಮಾರ್ ತಾಂಡಲ್ಲಿಕ್ ಕಾಕಿತ್ ಪಯ್ಯು ತಾಂಗ್ ತಂದ ಪಾಲ್ನ ನೀನ್ ದಾರುಕೂ ಎಣ್ಣೆಕ್ಕೊಡ್ತಕ್ಕಾಗಂದೆಣ್ಣಿತ್ ಕೇಟಂಡತ್. ಪ್ರಚಾರ ಮಾಡೋಕ್ಕಾಗಂದೆಣ್ಣಿಚ್ಚಿಲೊ.

ಆಚೆಂಗಿ ಕರ್ತುರ ಮೋಲಿ ತಾಂಡ ಮಕ್ಕಡ ಐನ್ಮನೆಕ್ ಪೋನನ್ನೆಗೆ ವಕ್ಕಡ ಐನ್ಮನೆರ ಕಯ್ಯಲೆರ ಐಮರತ್ ಅಲ್ಲಿತ್ ತಾಂಡ ವಕ್ಕಡ ಚೆನ್ನಂಗಾಳ್

ತಾನ್ ಕಂಡ ಪವಾಡತ್ರ ಮಹಿಮೆನ ಎಣ್ಣೆಕಾಟಿರತ್. ಗುಟ್ಟ್ ರಟ್ಟಾನ ಪರಿಸ್ಥಿತಿಗುಂಡ್ ಅಲ್ಲಿಪ್ಪದ್ ಚಾಯಿಯಲ್ಲಾಂದ್ ನೆನತಿತ್ ತಾಂಡ ತಂಗನ ಕೂಟಿಯೆಂಡ್ ಆ ಊರ್ (ಕುತ್ನಾಡ್) ಬುಟ್ಟಿತ್ ಜಾಗ ಖಾಲಿ ಮಾಡ್ಚಿಲ್ಲೊ.

ಅಲ್ಲಿಂಜ ಅಯಿಂಗ ದಂಡಾಳೂ ಪೊಳೆರ ಕರೆಲ್ ಓರ್ ಚೆರಿಯ ನೆರ್ಕೆ ಮನೆ ಕಟ್ಟಿಯಂಡ್ ಅಲ್ಲಿಯೇ ವಾಸ ಇಂಜತ್ಂದೂ, ಒನ್ನಾಂದ್ ತಾಂಡ ತಂಗೆ ಒಲೆಲ್ ಕುಡಿಕೆ ಬೆಚ್ಚಿತ್ ನೀರ್ ಬೂಕಿತ್ (ಕೂಕಲ) ಕೂಳ್‌ಕ್ ಅಕ್ಕಿ ಇಲ್ಲೆಂದೂ ಕರಿಮಾಡೋಕ್ ಏದೋರ್ ವಸ್ತುವೂ ಇಲ್ಲೆಂದ್ ತಾಂಡ ಅಣ್ಣಂಗ್ ಕುತ್ತುಪನ್ನೆಕ್ಕೆಣ್ಣ್ ಚ್ಚಿಲ್ಲೊ. ತಂಗೆರ ತಕ್ಕ ಕೇಟ ಶೂಫಿಶೇಖಿಮಾರ್ ಅಕ್ಕನ್ನೆ ಓರ್ ಪುಡಿ ಮಣ್ಣ್ ಬಾತಿತ್ ಕುಡ್ಕೆಕ್ ಇಟ್ಟತ್ತೊ, ಆ ನೇರತ್ ಆಸಾಮಿರ ಪಕ್ಕತ್ತೇ ಓರ್ ಕ್ಯಾಮ ಬಂದಿತ್ ನಿಂದತ್ತೊ. ಆನೇ ತರ್ಚಿಮರ್ಚಿ ಕರಿ ಮಾಡ್ಚಿಲ್ಲೊ. ತಾನ್‌ಟ್ಟ ಮಣ್ಣ್ ಬೆಂಜಿತ್ ಆ ಪುಣ್ಯಾತ್ಮಂಡ ಶಕ್ತಿ ಸಾಮರ್ಥ್ಯತ್ ಚಿಂಗ್ರಿ ಅಕ್ಕಿರ ಘಮಕೂಟಿಯೆಂಡ್ ಕೂಳ್ ಆಚಿಲ್ಲೊ. (ಬಾಯಿತಕ್ಕ ಕೇಟಂಜ್ ಮಹಿಮೆ) ಕಡ್‌ಂಬನೆ ತಂಡೂ ಕೂಡಿ ಉಂಡ್ ಕುಡ್ಕಿ ಕೆಲ ದುಂಬ್‌ಚಿಟ್ಟಂಡತ್ತೊ.

ಪರಮಾತ್ಮ ಮಾಲೋಂಗಳ ತಿದ್ದೋಕ್ಕಾಯಿತ್ ಅವತಾರ ಪುರುಷಂಗಳಾಯೆಂಡ್ ಮೂಲ ರೂಪತ್ ಜಬ್ಬೂಮಿಕ್‌ಳಂಜಿತ್ ಫಲತರತ್ರ ನಾಟಕ ಕಳಚಿತ್ ದುಷ್ಟಂಗಳ ಶಿಕ್ಷೆ ಕೊಡ್ತಿತ್ ತಳ್ಳಿತ್ ನಲ್ಲ ಬಟ್ಟೆಕ್ ಕೊಂಡ್ ಬಪ್ಪದೂ, ಚೆನ್ನಂಗೆಲ್ಲಾನ ನರ್ಕಲೋಕಕ್ಕೆಪದೂ ಶಿಷ್ಯಂಗಳ ರಕ್ಷಣೆ ಕೊಡ್ತಿತ್ ತಾಂಡ ಮಡ್‌ಕ್‌ಟ್ಟಿತ್ ಚಾಕಿಪೊಲ್ತುವೊದು ಪವಾಡ ಕಾಟಿತ್ ಕಾಣತ್ತಾಯವೊದು ಇಪ್ಪ. ಅನ್ನನೇ ಶ್ರೀರಾಮಚಂದ್ರ ನಾಟಕ ಕಳ್ಳಿತ್ ಜಾಗ ಖಾಲಿ ಮಾಡ್ಚಿ. ಶ್ರೀಕೃಷ್ಣ ಪರಮಾತ್ಮನೂ ತರತರ ನಾಟಕ ಕಳ್ಳಿತ್ ಮಾಯ ಆಯಂಡತ್. ಅವಂಡವತಾರತ ಸತ್ಯವಂತ ಧರ್ಮರಾಯ ತಾನ್ ತಾಂಡ ಶರೀರಡ್ಕತ ಸ್ವರ್ಗಕ್ಕೆತ್ತಿಯೆಂಡತ್ತೇಂದ. ಸಾಕ್ಷಾತ್ ಪರಮಾತ್ಮನೇ ಆಯಿತ್ತಿಂಜ ಶ್ರೀಕೃಷ್ಣ ಪರಮಾತ್ಮನೇ ಮಾಲೋಂಡ ರೂಪತ್ತೇ ಎಲ್ಲಾ ನಾಟಕ ಕಳ್ಳಿತ್ ತಾನ್ ಸಾಮಾನ್ಯ ನರ ಮಾಲೋಂಡ ಮಾದ್ರಿಲೇ ಚತ್ ಕೆಟ್ಟಿಂಡ್ ತಡಿನ ಭೂಮಿಲೇ ಬುಟ್ಟಿತ್ ಆತ್ಮ ಸ್ವರ್ಗಕ್ಕೇರಿಯಂಡತ್ತೇಂದ್

ಚೊಲ್ಲುಂಡ್.

ಇಲ್ಲಿಕ್ಕೆ ಸೂಫೀ ಶೇಖರಮಾರ್ ಅಯಿಂಗ ತಾಂಡ ತಂಗಯಡ್ಡ ಕುತ್ನಾಡ್‌ರ ಪೊಳೆರ ಕರಲೇ ಓರ್ ಚೆರಿಯ ಗುಡ್ಡಿಲ್‌ಲ್ ವಾಸ ಇಂಬ ನೇರತ್ ಸರಕಾರತ್ರ (ಬ್ರಿಟೀಷ್‌ಕಾಲ) ಇಲಾಖೆಕಾರ ಪೊಳೆಕಡ್ಡ ಓರ್ ಸೇತುವೆಕೆಟ್ಟುವೊಕ್ಕಾಯಿತ್ ಈಯಾಳ್‌ರ ಮನೆ ಪೊಳೆಕೊಂಡೊಂದ್ ಅರ್ಕತ್ ಮಾಡಿತ್. ಅಯಿಂಗ ನಿಪ್ಪಾಕ್ ನೆಲೆ ಇಲ್ಲತೆ ಚೆರಿಯ ಗುಡಿಸ್ಲ (ಪೊಳೆರಕರಲ್) ಚೊಡಿತ್ತುಂಡೆಂಗ್ಯೊ ಅಲ್ಲಿಕೊ ಉಪದ್ರ ತಪ್ಪಲ್ಲಾಂದ್ ಸೂಫಿ ಶೇಖರಮಾರ್ ನೊಂದಂಡತ್. ಬ್ರಿಟೀಷ್‌ಕಾರ ಈಯೆಂಗಡ ಕಷ್ಟ ಸುಖ ಕೇಕತ ಸೇತುವೆ ಕಟ್ಟುವೊಕ್ ಗುರ್ತ್ ಮಾಡಿತ್ ಇಂಬ್‌ನೆಲ್ಲಾ ಪೂತಿತ್ ಅಯಿಚಿತಿಂಬತ್ತೊ. ಜಲ್ಲಿ ಇಂಬ್‌ ಸಾಮಾನೆಲ್ಲಾ ಲಾರೀ ಲಾರೀಲ್ ಕ್ವಾಂದಿತ್‌ಟ್ಟಿತಿಂಬತ್ತೊ. ಪೋಲೀಸ್ ಗುಡ್ಡೆ ಬಂದಿತ್ ಈ ಪವಾಡಕಾರ ದಂಡಾಳ್ಳೆ ಅಲ್ಲಿಂಜಿ ಪೋಕೊಂಡೊಂದ್ ಓಡ್‌ಚಿಲೊ. ನಿರ್ವಾಕ್ಯಿಲ್ಲತೆ ಗುಡಿಸಲ್‌ಂಬ ಶೇಖರಮಾರ್ ಅಯಿಂಡ ತಂಗಯೊ ಅಲ್ಲಿಂಜಿ ಪೊರ್ತಿತ್ ಜಾಗ ಖಾಲಿ ಮಾಡ್‌ಚಿಲೊ.

ಅದೋಳಿ ಈ ಪವಾಡ ಪುರುಷ ಅಲ್ಲಿಂಜ ಕಾಲೆಡ್ಡಿತ್ ಜಾಗ ಖಾಲಿ ಮಾಡ್‌ನನ್ನೆಕೆ ಪೊಂದೇನ್ ಗುಡ್ಡೆ ಪಾರಿ ಪಾರಿ ದೋತಿತ್ ಎಚ್ಚೆಕ್ಕೋ ದೂರಕ್ಕೆತ್ತಣೆ ಏದ್ ಜನಳೋ ನಿಕ್ಕತೆನ್ನಕ್ಕೆ ಮಾಡುವುಂಬತ್ತೊ. ಬ್ರಿಟೀಷ್‌ಕಾರ ಪೆರ್ತ್ ಹರಸಾಹಸ ಮಾಡಿತ್ ಆ ಜಾಗತ್ ಸೇತುವೆ ಕಟ್ಟುವೊಕ್ ಬೋಂಡ್ಯಾನ ಪುರ್‌ಡ್‌ಟ್ಟಿತ್ ಚಾಕ್ರಿಸ ನಡ್‌ಚಿಲೊ. ಆಚೆಂಗ್ಯೊ ಸೂಫಿ ಶೇಖರಮಾರ್ ಅಯಿಂಡ ಪವಾಡ ಮಹಿಮೆರ ಫಲಗುಂಡ್ ಅಲ್ಲಿ ನರ ಮಾಲೋಂಗಳೊ ನಾಯಿ, ಪೂಂಞಿ, ಕಾಕೆ ಪಕ್ಕಿಂಡೊಂದಾನೊ ನಿಪ್ಪಕ್ ಬುಡತ್ತಿಂಬತ್. ಸುಮಾರ್ ಕಾಲಕೆತ್ತಣೆಕ್ ಪೊಂದೇನೊಲೊಂಜಿಯಡ ಬೋಟೆ ತಡ್ಡಕ್ ಕಯ್ಯತೆ ಸೇತುವೆ ಕಟ್ಟುವೊ ಯೋಜನೆನೇ ಬುಟ್ತೊ. ಈಯೆಂಡ ಚೆರಿಯ ಕುರೀರ ಪಿಂಞಿ ಬ್ರಿಟೀಷ್‌ಕಾರ ಸೇತುವೆ ಕಟ್ಟುವೊಕ್‌ಟ್ಟಿ ಇಂಬ್‌ ಸಾಮನ್, ಕಲ್ಲ್ ಇನ್ನತೆಲ್ಲಾ ಇಂದೊ ಕುತ್ನಾಡ್‌ಲ್ ಉಂಡ್‌ಂದೆಣ್ಣುವ ಅಲ್ಲಿಯೆತ್ರ ಜನ.

ಪೊಂದೇನ್ ವಲ್‌ಂಜಿರ ಕಛನ ನೆನಪಕ್ಕ ಇಂದಿಕ್ಕ ಎಮ್ಮೆಮಾಡ್‌ರ ಸೂಫಿ ಶೇಖಿಮಾರ್‌ಕ್ ದರ್‌ಗತ್ಲೂ ಓರ್ ಪೊಂದೇನ್ ಕುಡಿ ದರ್‌ಗತ, ಕಟ್ಟಡತ, ಓರ್ ಕಂಬತ್ತೊಳ್‌ಲೊಂಡ್‌ಲೊ. ದಾರ್‌ಕೂ ತೊಂದರೆ ಮಾಡುಲೆಲೊ. ಎಂತೇಂಗಿ ಬೊಂಡತ್ತದಾಚೆಂಗಿ ಮಾತ್ರ ಅದ್ ಪಿಂಞ ಕಛೆ ತೇಂದತ್‌ಂದೆಣ್ಣವ. ಅಲ್ಲತೆ ಕಾಲಕ್ಕೋರಾಂಡಕ್ಕೊಮ್ಮ ನಡಪ ನೇರ್ಚಿರಂದ್ ಮಾತ್ರ ನಾಲಂಜಿ ಪೊಂದೇನ್ ಕುಡಿಯತೊಂಗಿತಿಪ್ಪಾಂದೂ ಉಂಡಾಚೆಂಗಿ ಅದ್ ಪರೆಯಂಡಾಂದೆಣ್ಣವ. ಅಂದಿಯೆತ ದಿನ ಭಂಡಾರ ಲಕ್ಕ ಲಕ್ಕ ಪಣ ಬೂವೊದುಂಡ್. ಆಪಾಟಿ ಭಕ್ತಂಗ ಕೂಡುವೊ ನೇರತ್ ಮಾಲೊಂಗಳ ಪುಡ್ತತ್ ಬೆಪ್ಪಕ್ ಅಲ್ಲೇಂಗಿ ಕಳ್ಳ ಕಾಕಂಗಳ ತಸೆಗೊಳ್ಳುವೊಕ್ ಪೋಲೀಸ್‌ಕ್ಕಾರಡ ಸಹಾಯ ಬೊಂಡುವೆ ಬೊಂಡು. ಆಚೆಂಗಿ ಎಮ್ಮೆಮಾಡ್ ಸೂಫಿ ಶೇಖಿಮಾರ್ ಅಯಿಂಡ ಮಹಿಮೆನುಂಡ್ ಅಂದಿಯೆತ ದಿನ ಅಲ್ಲಿ ಕೊಂಡು ಕೂಡುವೊ ಪೊಂದೇನ್ ಕುಡಿಯೆ ಅಲ್ಲಿ ಪೋಲೀಸ್ ಚಾಕ್ರಿಕ್ ತಯಾರಾಯಿತಿಪ್ಪದೂ, ಕಳ್ಳತ್ತನಾಡ್ ಬೋರೆ ಏದೋರ್ ತಾಪತ್ರೆಯಾಪ್‌ಲೆಂದ್ ಆಧಾರ ಉಂಡ್.

ಆಚೆಂಗಿ ಅಲ್ಲಿಕ್ ಬಪ್ಪ ಓಟ್ ಚೋಯಿ (ಕಳಿಪೊರ್ಟ)ಯಳ ಆಟೋಕ್ ಬೊಂಡಾಯಿ (ಮಂತ್ರಿಕೂಟ) ಚೆನ್ನಂಗ್ ಪೋಲೀಸ್ ಹೇಟ್‌ಕಾರ ಬಂದಿತ್ ದೊಣ್ಣೆ ಪುಡ್ಚಿತ್ತಿಪ್ಪಲೊ. ಪೊಂದೇನ್ ಗುಡ್ಡೆಯೆಲ್ಲ ಅಯಿಂಡೈಂಡ ಜಾಗತ್ ಪಾರಿಪೋಯವಲೊ. ಅದಲ್ಲಿಕ್ಕಡ್, ಇಪ್ಪರೆ, ಕರ್ತುರ ಬೈಂಬನೊಬ್ಬ ಪವಾಡಕಾರ ಪಾಲ್‌ಕುಡಿಪಂಜೇನ ವಕ್ಕಡ ಕೂಟ್‌ಕಾರಕ್ ಎಣ್ಣಾನಾನಂರ್ಜಿತ್ ಸೂಫಿ ಶೇಖಿಮಾರ್ ತಾಂಡ ತಂಗಿನ ಕೂಟಯೆಂಡ್ ಕುತ್‌ನಾಡಾರ ಮನೆಬುಟ್ಟ್ ನಡಂದಿತ್ ಭಾಗಮಂಡಲತ್ರ ತಾವೂರ್ ಓರ್ ಚಿರಿಯ ಮನೆ ಉಂಡಾಕಿತ್ ಅದಲ್ ವಾಸ ಮಾಡಿಯೆಂಡ್ ನಾಳ್ ಕೈಚಂಡಿಂಜತ್. ಆ ಮನೆ ಇಕ್ಕಲೂ ಪಳಿಯ ಮಾದ್ರಿಲ್ ಉಂಡ್.

ಇಲ್ಲಿ ಸೂಫಿ ಶೇಖಿಮಾರ್ ತಾಂಡ ತಂಗಿ ಸಹಿತ ನಾಳ್ ಕೈಬಂಡಿಂಜತ್. ಫಲತರತ್ರ ಚಾಕ್ರಿ (ವಡಬಾಳಾರ ರೂಪತ್) ಸೂಫಿ ಶೇಖಿಮಾರ್ ಪೊರ್ಮೆ ಪೋಪ.

ಅಲ್ಲಿ ಕೆಲ್ಸ ತೇಂದ ಪಿಂಞ ಮನೆಕ್ ಬಂದಿತ್ ಕೂಡುವೊ, ಮನೆಲುಳ್ಳ ತಂಗೆ ನೇರಕ್ ಬೋಡ್ಯಾನ ಊಟೋಪಚಾರ (ಅಡಿಗ್) ಮಾಡಿತ್ ಬೆಪ್ಪದೋ, ಗುಡ್ಡಕ್ ತಿತ್ತಾಕಿತ್ ಮೂಪಂಗ್ ಕುಳಿಪಕ್ ನೀರ್ ಕಾಚಿತ್ ಬೆಪ್ಪ ಇನ್ನತ ಮನೆ ಚಾಕ್ರಿ ತೇತಿಪ್ಪ ವಾಡಿಕೆಯಾಯಿತಿಂಜತ್. ಪೊಲ್ಂಜತೆಕ್ ಅಣ್ಣ ಪೂರ್ಮೆ ಪೋಪ. ಬೈಟಾಪಕ ತೆಂಗೆಕ್ಕೂ ತಾಂಗೂ ಪಾಪತ್ತಂವ ತಿಂಬಕ್ ರಾತೀಫ್ ಕೊಂಡ್ ಬಪ್ಪಂಜ ವಾಡಿಕೆ.

ಇವಕ್ಕೆನ್ನ? ದಂಡಾಳ್ ಅಡಿಗ್. ಬಾಕಿ ನೇರತ್ ಆಲೆ ಈಲೆ ಕಡ್ಪೆಂಗಳ ನೋಟಿಯೆಂಡ್ ಕಣ್ಣ್ ಭಾಷೆ, ಕೈಭಾಷೆ, ಮಂಡೆ ಭಾಷೆ ಇನ್ನನೆಲ್ಲಾಯಿತ್ ತಾಂಡ ನೇರತ್ತ ದುರುಪಯೋಗ ಮಾಡಿಯೆಂಡಿತ್ತೆನ್ನೊ?

ಮೂಪ ಸೀದೇಪೋ-ಸೀದೇ ಬಾಂದೆಣ್ಣು ವನ್ನಕ್ಕೆ ಸತ್ಯನಡ್ಂದಿತಿಂಜತ್. ಕೆಟ್ಟ ಗ್ಯಾನ ಬೆಚ್ಚಿತಿಪ್ಪಕ್ಕಿಲ್ಲೆ. ನಾಳ್ ಕೈಂಜೆನ್ನಕ್ಕೆ ಸೂಫಿ ಮನೆಂಜ ಪೂರ್ಮೆ ಪೋಪ, ಬಪ್ಪ ನೇರತ್ ಪೂರ್ಮೆ ಏದೋರ್ ಪ್ರಲಿಯಾಡಿ ವೋವೂ ನೋಟಿತ್ತಂಜಿತಿಂಜತ್. ಮೂಪಂಡ ತಂಗೆರ ಕೂಡೆ ನೋಣಿಯೆನಾಯಿತ್ ಕೊಣ ಕೊಣ ಕಳಿಕ್ಕಳಿಂಜತ್, ಕಾಲಹರಣ ಮಾಡೊಂಜತ್ತೆನ್ನೊ.

ದಿನ ಪೋನನ್ನಕ್ಕೆ ಪರಪುರುಷನೂ ಸೂಫಿ ಶೇಖಿಮಾರ್ ತಂಗೆಯೂ ಮನೆರೊಳ್ಲೂ ಪೂರ್ಮೆಯೂ ಅನೈತಿಕ ಸಮ್ಮಂಧ ಬೊಳ್ತಿಯೆಂಡ್ (ಎಣಿಯಾಡೊಂಜತ್) ಕಾಲ ಕೈಂಪಂಜತ್. ದಿನ ಪೋನನ್ನೆಕೆ ಪೋನನ್ನೆಕೆ ಪರಪುರುಷನೂ, ಸೂಫಿ ಶೇಖಿಮಾರ್ ತಂಗೆಯೂ ಮನೆರೊಳ್ಲೆ ವ್ಯಭಿಚಾರತ್ರ ಸರ ಮಾಲೆಲ್ ಕೆಣ್ಂಜಂಡ್ ಮನ್ಮಥಂಡ ಬಾಣಕೆ ಕಣ್ಣ್ ನೆಯಿ ಇಳಿಂಜಿತ್ ಲೋಕವೇ ಕಾಣತ್ತಾಯೆಂಡತ್. ಚೂಳೆ ಖಾಳೆಂದಾಯೆಂಡ್ ಇಲ್ ಪೋಲ್ಂದಿಲ್ಲತೆ ಈಯೆಂಡ ಏಣಿಯಾಟ್ ಮನೆರೊಳ್ಲೆ ಪೆರ್ತ್ ಕೆಟ್ಟ ರೂಪತ್ರ ಮೇಳ ತ್ರಾಟಾಯೆಂಡ್ ಕಡೆ ಕಡೆಕ್ ಈಯೆಂಡ ಈ ಮಾದ್ರಿರ ಅನೈತಿಕ ಮೇಳ ಸಮ್ಮಂಧತ್ರಡಲ್ ಸೂಫಿಶೇಖಿಮಾರ್ ಮನೆರೊಳ್ಲೆ ಬಪ್ಪದೂ, ಪೋಪದೂ ಓರ್ ತರತ್ರ ಕಿರುಕುಳತ್ರ ಮಾದ್ರಿಯೂ ಈಯೆಂಡಾಟ್ ಓರ್ ತಡೆಗೋಡೆ

ಆಯೆಂಡನ್ನೆ ಕಾಯಂಡತ್. ಈಯೆಂಡ ಸರ್ಕಸ್ಸ್, ಟೆಂಟ್ ಅಟ್ಟಿತ್ತ, ಕೊಡಿಲಾಚೆಂಗ್ಗೂ ಈಯೆಂಡ ಕೊದಿ ಪೊದ್ಂಜೆನ್ನೆಕ್ಕೇ ಅದೋರ್ ತರತ್ರ ಇರ್ತಕೇಡ್ ಉಂಡಾಪನ್ನಕ್ಕಾಯೆಂಡತ್. ಪರಪುರುಷನೂ ಸೂಫಿಶೇಖಿಮಾರ್ ಚೂಳೆ ತಂಗಡ ಕೊದಿಕಳಿಕ್ ಅಡ್ಡ ಗೋಡೆಯಾಯಿತ್ತುಳ್ಳ ಸೂಫಿಶೇಖಿಮಾರ್ನ ಏದೇಂಗೋರ್ ರೂಪತ್ ಕೆಣಿಕೊಯ್ತಿತ್, ಬಿಲ್ಕ್ ಕೆಣಿಕೊಂಡೊಂದ್ ಪೆರ್ತ್ ಪೆರ್ತ್ ಚರ್ಚೆಯಾಯಿತ್. ಈ ದಂಡ್ ಮದ್ಚ ಮೂದೇವಿಯ ಸೂಫಿಶೇಖಿಮಾರ್ನ ಮೋಸತ್ ಚದಿಪಕ್ ಕೆಣಿಕೊಯ್ತಿತ್ ವಡ ಹುಟ್ಟಾಯಿತ್ ಪುಟ್ಟಾನ ತಂಗೆಯೇ ವ್ಯಭಿಚಾರ ಮೊಳಿಗೊಂಡಿತ್ ತಾಂಡ ಸ್ತಂತ ಅಣ್ಣನೇ ಚದಿಪಂದೆಣ್ಣಾನಕ್ಕ ಪಿಂಞ ಲೋಕತ್ ನಂಬುವೊಕುಳ್ಳ ವಿಷಯ ಎನ್ನತುಂಡ್ಂದ್ ಚೋದ್ಯ ಎದ್ ಬಪ್ಪದ್ ವಾಡಿಕೆ.

ಒನ್ನಾಂದ್ ಪೊಲಾಕ ಪೊರ್ಮೆ ಪೋಯಿತಿಂಜ ಸೂಫಿಶೇಖಿಮಾರ್ ಮಜ್ಜಣ ತಾಂಡ ಮನೆಕ್ ಪತ್ತಿತ್ ಈ ಚೂಳೆ ತಂಗರೆ ಕೈಲಾಟ್ಟಿ ಕೂಳುಂಡಿತ್ ಕೈ ಚಾಯಿ ಕತ್ತಿತ್ ಅಪ್ಪರ್ದ ತಾಂಡ ಕೊಡಿಯಲಡ್ಕೆ ಚೀಲತ್ಂಜ ಆಂಜಿತ್ ಬಾಯಿದುಂಬಾ ಕೊಡಿಯಲಡ್ಕೆನ ಬಾಯಿಕ್ಟ್ಟುಂಡ್ ಅಪ್ಪರಿಪ್ಪರ ತಿರ್ಗಿಯಂಡ್ ಸೂಫಿಶೇಖಿಮಾರ್ ಆರಾಮ್ಲಿಪ್ಪನೇರತ್ ತಾಂಡ ತಂಗೆ ಪುಲಿಯಾಡಿರ ಗೆಣಿಯ ಮಿಂಞಲೇ ಅವಡ ಕೂಡೆ ತೇರ್ಮಾನ ಮಾಡಿತ್ತಿಂಚಾಂಡ ಮಾದ್ರಿ ಈ ತಾಯಿ ಕಂಡ ಅಟ್ಟಿತ್ ಉಕ್ಕತ್ಟ್ಟುಂಡ್ ಕೈಲಿಂಜ ತೋಕರ ಕೊತ್ತಿ ಬಲ್ಲಿತ್ ಕಳ್ಳಂಗ್ ಕೈಬೆರ ಕೊಡ್ಕಣೆ ತೋಕಂಜ ಪೊರ್ಟಿ ಬಿಲ್ಮಮದ್ ಸೂಫಿ ಶೇಖಿಮಾರ್ ಕ್ಪೊಟ್ಟೆಕ್ ಚೆನ್ನ ತೋಪರೆ ಗುಡ್ಡೆಗೊಂಡ್ ಕುತ್ತಾಚಿ. ಬೊಡಿಗೊಂಡ ತಕ್ಕಣ ಸೂಫಿಶೇಖಿಮಾರ್ ತಾಂಡ ಪುಲಿಯಾಡಿ ತಂಗೆ ಅವಡ ಗೆಣಿಯನುಂಡ್ ಮಾಡ್ಚಿಟ್ಟಿ ಚದಿ ಇದ್ಂದ್ ಮನಗೊಂಡ್ ಅಂಜಿತ್ ಕಡ್ಞಾನ ಬೊಡಿಗೊಂಡಲ್ಲಿಕ್ ತಾಂಡ ಕೈಪೊತ್ತಿಯೆಂಡೇ ಕೇಕಿಯ ಕಂಡಿಕ್ಕಾಲೆ ಪಾರಿತ್ತುಳ್ಳ ಪೊರಬುದ್ಧಿತ್ ಓಟ್ ಮುರ್ಕಚಿ.

ಮನತ್ತೇ "ಅಲ್ಲಾಂದ್" ಬಾಯ್ಲೆರ ಕೊಡ್ತಂಡ್ ಓಡ್ಚಿ. ತಾಂಡ ತಂಗೆ

ಪರಪುರುಷಂಡ ಮಂಗಳ್ಲಿಣಕೊತ್ತಿತ್ ಅಂವಂಡ ಪೊನ್ನಪಣತ್ರ ಕೊದಿಕೊ. ಪುಲಿಯಾಟ್ ಕೋಣಿಕಳಿಕ್ಕಾಯಿತ್ ತನ್ನ ಚದಿಚತ್‌ಂದ್ ಗೊತ್ತಾಯಿತ್ ಅಪಕ್ ಉರಿಬೆದ್‌ಲ್ ಶಾಪಕೊಡ್‌ಂದ್ ಓಡಿ ಪಾರಿತ್ ನೆಲಚಿರ ಪಕ್ಕತ್ತ ಎಮ್ಮೆ ಮಾಡ್‌ರ ಚೆಂಬಾರಂಡ ಪಾರಕಲ್ಲ್‌ಲ್ ಬೊಡಿರ ಉರಿ ತಡ್‌ಪಕ್ ಕೈಯ್ಯತ್ತೆ ಸೂಫಿಶೇಖಮಾರ್ ಮಲಾರ ಬುದ್ಧತ್. ಮಣವಟ್ಟಿರ ವಕ್ಕಡ ಅಕ್ಕತ್ತ ಪೆರಿಯಂವನಾನ ಉತ್ತಯ್ಯ ಅಯಿಂಡ ಪೆರಿಯ ಮೋಂವ ಸೋಮಪ್ಪಜ್ಜ (ಸೋಮಯ್ಯ) ಅಯಿಂಡ ಕೊಟ್ಟಾಲಿಂಜ ಕರ್ಪಪಯ್ಯುವ ಕರ್ಪಕ್ ಅಯಿಂಡ ಪೊಮ್ಮಕ್ಕ ಪೋನಲ್ಲಿ ಕೊಟ್ಟಾಲಿಂಜ ಕರ್ಪಪಯ್ಯು ಕೇರ್ ತುಂಡ್‌ಚಿಟ್ಟಿಂಡ್ ಪ್ಲೆ ರ ಬುದ್ಧಾನ ಕಂಡಿತ್ ವಿಷಯತ್‌ನ ಕಡಜ್ಜನೆ ಪೋಯಿತ್ ಪೊಮ್ಮಕ್ಕ ತಾಂಡ ಪು. ಪ ಸೋಮಪ್ಪಜ್ಜಿಂಗ್ ಎಣ್ಣೆಚಿ. ಅಯಿಂಗ ಅಕ್ಕೆನ್ನ ಪಯ್ಯುನ ತೇಡಿಯಿಂ ಪೋಕಣೆಕ್ ಚೆನ್ನದೂರತ್ತುಳ್ಳ ಪಾರೆ ಕಲ್ಲ್‌ಲ್ ತಾಂಡ ಪಯ್ಯು ಅದ್‌ಂಡ ಕತ್ತಲ್ ತಾನೇ ತೋಡ್‌ಲ್ ಮುಕ್ಕಿ ಕತ್ತಿತ್ ಪಾರೆಕಲ್ಲ್‌ರ ಮೇಲೆ ಬಾಯಿ ಪೊಳ್‌ಂದಂಡ್ ಮಲಾರ ಬುದ್ಧಿತ್ತಿಂಜ ಸೂಫಿಶೇಖಮಾರ್‌ಕ್ ಪಾಲ್ ತೋಂದಂಡಿಂಜಾನ ಸುಮಾರ್ ನೇರ ನೋಟ್‌ಚಿ. ಸೋಮಪ್ಪಜ್ಜ ಕಲ್ಲ್ ಇಡಿಯ ಸೂಫಿರ ಬೊಡಿಗೊಂಡ ಜಾಗತ್‌ಂಜ ಚೋರೆ ಒಕ್ಕಿತ್ ತಳಗೊಂಡಿತಿಂಜತ್. ಇಂದೂ ಚೋಂದಿತೆ ಕಾಂಬ. ಪಯ್ಯು ಜಾಗ ಖಾಲಿ ಮಾಡ್‌ನ ನೇರತ್ ಈ ಮೋಲಿ ತಾಂಡ ಕೈಲಿಂಜ ಚಾಲಿಮುಂಡ್‌ನ ತೋಡ್‌ಕ್ ಮುಕ್ಕಿತ್ ನೀರ್‌ಕ್ಕಾಂದ ಬಂದಿತ್ ಸೂಫಿಶೇಖಮಾರ್ ತಾಂಡ ದಂಡ್ ಕಣ್ಣನ ಮೂಂದ್ ಕುರಿ ಚಕ್ರತ್ರ ಮಾದ್ರಿ ತಿರ್ಕಿತ್ ಕಡ್‌ಜ್ಜನೆ ಪೊಳ್‌ಂದ ಬಾಯಿ ಪೊತ್ತ್‌ಚಿ. ಅಂದ್ ನಡ್‌ಂದ ಪವಾಡ ಪಾರೆ ಕಲ್ಲ್‌ಲ್ ಪಯ್ಯು ತುಂಡ್‌ಚಿಟ್ಟಿಂಡ್ ಈತಂಡ್ ಬಂದ ಕೇರ್‌ರ ಗುರ್‌ತ್ ಇಂದೂ ಪಾರೆಕಲ್ಲ್‌ಲ್ ಕಂಡಂಡುಂಡ್. ಸೂಫಿರ ತಡಿಂಜ ಒಕ್ಕನ ಚೋರೆರ ಗುರ್‌ತ್ ಇಂದೂ ಕಂಡಂಡುಂಡ್. ಇದೋರ್ ಪೆರ್ತ್ ಬಲ್ಯ ಪವಾಡವಾಯಿತ್ತುಂಡ್. ಅಲ್ಲಿ ಪಾರೆಕಲ್ಲ್‌ಲ್ ಇಂದೂ ಪಯ್ಯುರ ಕಾಲ್‌ರ ಕವಣೆ ಮೊಟ್ಟ್ ಕಾಂಬಕ್ ಕಟ್ಟುವೊದ್ ಪೆರ್ತ್ ಬಲ್ಯ ವಿಶೇಷತೆಯಾಯಿತುಂಡ್.

ಅಂದ್ ಸೂಫಿಶೇಖಿಮಾರ್ ಕಡೇ (ಪೋಕ್) ಕಾಲತ್ ಮಣವಟ್ಟಿರ ವಕ್ಕಡ ಸೋಮಪ್ಪಜ್ಜ ಕೆಜ್ಜ ನಲ್ಲಾಮೆನುಂಡ್ ಮಣವಟ್ಟಿರ ವಕ್ಕ ಅಂದ್‌ಜಿಂದೋಳ ಪಾಬಳ್ಳಿ ಪೋಲೆ ಸಂಸಾರ ಪೆರ್ತಿತ್ ತೋಟ ತೊಡಿಯ, ಬೇಲ್ ಬಾಣೆ, ಮನೆ ಮರ ನೇಡಿತ್ ಪೋಣ್ಣ್ ಮಕ್ಕಂದ್ ವಕ್ಕ ಮನೆ ಪೆರ್ತಿತ್ ವಿದ್ಯಾಬುದ್ಧಿ ಪಡ್‌ಚಿತ್, ಉದ್ಯೋಗ ಪಂಡಿತ್ ಊರ್ ನಾಡಲ್ ನೀತಿನಿಯಮತ್, ಒತ್ತೋರ್ಮೆ ಒಗ್ಗಟ್ಟಲ್ ನೈಚಿತ್ ಆಚಾರ, ವಿಚಾರ, ಸಂಸ್ಕೃತಿ, ಪದ್ಧತಿ, ಆಟ್‌ಂಬಾಟ್ ಶೂರಂಗಳಾಯಿತ್ ದಾನ ಧರ್ಮತ್ ಗತ್ ಗಾಂಭೀರ್ಯತ್ ಕೊಡವ ಮಾಲೆ ಪೊಮ್ಮಾಲೆಲ್ ಎನ್ನಂಗ್ ಪರ ದೇಶತೂ ಕೊಡಿ ನೇಂದಿತ್ ಬಾಳ್‌ಬದ್ ನೀಸಿಯಂಡುಳ್ಳದ್ ಸೂಫಿಶೇಖಿಮಾರ್ ಪವಾಡತ್ರ ತಗರ್ದಿದೆಣ್ಣೆಚೇಂಗಿ ತಪ್ಪಾಗ.

ಅಂದ್ ಈ ಪವಾಡ ಪುರುಷ ಬೊಡಿಕೊಂಡಿತ್ ತಾವೊರಂಜಿ ಓಡಿ ಬಂದಿತ್ ನೆಲಜಿ ಎಮ್ಮೆಮಾಡ್‌ರ ಪಾರಕಲ್ಲಲ್ ಬುದ್ಧಿತ್ತಿಪ್ಪಕ ಓಡಿಪಾರಿ ಕೂಡ್‌ನ ಜನಡ ಕೂಡೆ ತಾನ್ ಪ್ರಾಣಬುಟ್ಟಿ ಪಿಂಞ ಪಕ್ಕತ್ತೇ (ಇಕ್ಕತ್ರ ದರ್ಗ ಉಳ್ಳಲ್ಲಿ) ಸಮಾದಿ ಮಾಡೊಂಡೊಂದೂ ಅಲ್ಲತೆ ತಾಂಡ ಕೂಟ್‌ಲಿಂಜ ಕೂಟ್‌ಪರ್ಪ್ (ತಂಗಿ) ತನ್ನ ಚದಿಚಾನಗುಂಡ್ ಮಿಂಞಕ್ ದರ್ಗತ್ರ ವತಾರಕ್ಕ ಎದೋರ್ ಪೊಮ್ಮಕ್ಕಳೋ, ಕೂಟೋಕ್ಕಾಗಂದ್ ಅಯಿಂಡ ಬಾಯಿಂಜ ಬುದ್ಧಾನಗುಂಡೇ ಇಂದೂ ದರ್ಗಕ್ ಪೊಮ್ಮಕ್ಕ ಕೂಡೋಕ್ ಕಯ್ಯಾಂದ್ ಅರ್ಕತ್ ಮಾಡಿತುಂಡ್. ಇಲ್ಲಿ ಮಹಿಳಾ ಪ್ರಧಾನಾದೆಲ್ಲ ರಾಜಕೀಯ ಮೇಕಿತ್ ಹಾಲಾಹವಾಲ ಉಂಡಾಕೋಕ್ ಕಯ್ಯಲೆ. ಪೊಮ್ಮಕ್ಕ ಪ್ರಾರ್ಥನೆ ಮಾಡೋಕ್ ಜಾಗ ತರ್ಪ ಬೆಚ್ಚಿತ್. ಚೆನ್ನಂಗನ್ನೇಂಗಿ ಚೊಕ್ಕಿತ್ ಕಳಿಚಕ್ಕ ಪೊಂದೇನ್ (ವಲ್‌ಂಜಿ) ಪೊಲೀಸ್ ಅಯಿಂಡ ಕುಯಿಲ್‌ಚ್ಚಿತ್ ಲಾರಿಚಾರ್ಜಿ ಮಾಡಿರುವಾ. ಇಲ್ಲಿ ಏಳ್ ಕಾಲ (ಪಯಸ್)ತ್ರ ಮೇಲೆ ಮೂಡಿಕುಂಞಿಯಕ್ ಕೂಡೋಕ್ ಅನುವು (ಅಪ್ಪಣೆ) ಇಲ್ಲ.

ಅಂದಿಯೆತ ಕಾಲತ್ ಪವಾಡ ಪುರುಷ ಸೂಫಿಶೇಖಿಮಾರ್ ಅಯಿಂಗ

ಅಂದಿಯತ ಮಣವಟ್ಟಿರ ವಕ್ಕಡ ಪೆರಿಯವು ಕೆಜ್ಜ ಪುಣ್ಯ ಕಾರ್ಯಕ್ಕಾಯಿತ್ ಕಾಲ ಕಾಲ ನಡಪ್ ನೇರ್ಚಕ್ ಕೂಳ್ ಮಾಡ್ತೊಕ್ಕ ಮಣವಟ್ಟಿರ ವಕ್ಕ ಪೆರಿಯಂವಂಡಲ್ಲಿಂಜ ಕ್ಕಾಂದ ಅಕ್ಕಿ ಮಿಂಞಿ ಕಡಾಯಕ್ಕಡೋ ನೇಮ ಇಂಜತ್. ನೇರೆಚತ್ ರಂದ್ ಮಣವಟ್ಟಿರ ವಕ್ಕ ಪೆರಿಯಂವೊಬ್ಬ ಕುಪ್ಪಚಾಲೆ ಇಟ್ಟಿತ್ತಿಪ್ಪಂಜತ್‌ಂದೂ, ಉರೂಸ್ (ನೇರ್ಚೆ) ನಡಪಂದ್ ಕೊಡವಡ ಎತ್ತಪೋರಾಟ ಪೋಪದೂ ಪಿಂಞ ತುಲಾಭಾರ ತೂಕುವೊದು ಇಂಜತ್‌ಂದೆಣ್ಣುವ. ತೆಂಗೆಕ್ ಬೊಡಿ ಬೆಚ್ಚಿತೊಡ್ಡ ನೇಮವೂ ಇಂಜತ್. ಅಂದಿಯತ್ರ ಮಾಪಿಳ್ಳೆಯೊಬ್ಬ ಕೊಡವಡ ಮಾದ್ರಿಲೇ ಕುಪ್ಪಚಾಲೆ ಇಟ್ಟಿತ್ ಮಂಡೆಕ್ ವಸ್ತು ಕೆಟ್ಟುವೊ ನೇಮ ಇಂಜತ್.

ಪುತ್ತರಿ ಕಯ್ಯುವ ನೇರತ್ ಎಮ್ಮೆಮಾಡ್‌ರ ಕೊಡವ ಮಾಪಿಳ್ಳೆಯ ಅಯಿಂಡ ಕೊಟ್ಟ್ ಚೀನಿಯಡ್ಡ ಮಣವಟ್ಟಿರ ಪಳಿಯ ಐನ್‌ಮನೆಕ್ ಪೋಯಿತ್ ಫಲಾಹಾರ ಕೆಜ್ಜಿತ್ ನೆಲಜಿ ಊರ್‌ಮಂದ್ ಕೇರಿಕ್ ಅಲ್ಲಿಂಜಿ ಪಿರಿಯುವೊ ನೇಮ.

ಈಂಡ ಪರವಾಯಿತ್ ಅಯಿಂಡ ಎಮ್ಮೆಮಾಡ್‌ರ ನೇರ್ಚೆ ಸಮಾರಂಭತ್ ಮಣವಟ್ಟಿರ ವಕ್ಕಕಾರಳ ಮಾತ್ರ ಎಮ್ಮೆಮಾಡ್‌ರ ಊರ್‌ಕಾರ (ಮಾಪಿಳ್ಳೆಯ) ಕಾವೇರಿ ಪೊಳೆರ ಕರಲ್ (ನೇರ್ಚೆಕಡು) ಕೋಳಿ ತೆಂಗೆ, ಅಕ್ಕಿ, ಅಡಿಗ ಸಾಮಾನ್ ಕೊಡ್ತಿತ್ ಸತ್ತಾರ ಮಾಡುವೊ ನೇಮ ಇಂಜತ್.

1947ಲ್ ಈ ಪದ್ಧತಿನ ಮಾಪಿಳ್ಳೆಯ ನಿಪ್ಪಾಚಿಟ್ಟಾನಗುಂಡ್ ಮಣವಟ್ಟಿರೈಂಗ ಸಹ ಅಯಿಂಗಕ್ ಕೊಡ್ತಂಡಿಂಜ ಮರ್ಯಾದಿನ ನಿಪ್ಪಾಚಿಟ್ಟತ್. ರಾಜಕೀಯ ತೊಯಿಲಾಳಿಯ ಜಾತಿ ಭಿನ್ನಬೇದ ಬೆಪ್ಪಕ್ಕಾಗಂದೆಣ್ಣುವ. ಆಚೇಂಗಿ ಎಮ್ಮೆಮಾಡ್‌ರ ಮಾಪಳಿಯ ಪಂಡ್ ಕೊಡವ ಆಯಿತ್ತಿಂಜತ್. ಅಯಿಂಗಳೆಲ್ಲಾ ಟಿಪ್ಪು ಸುಲ್ತಾನಂದೆಣ್ಣುವೊ (ಉರ್ತವಾರಿ) ದಬ್ಬಾಳಿಕೆಲ್ ಕೊಡವಳ ಶ್ರೀರಂಗಪಟ್ಟಣಕ್ ಕೊಂಡಪೋಯಿತ್ "ಮಾಪಿಳ್ಳೆಂಗಳಾಯಿತ್" ಮತಾಂತರ ಮಾಡಿರ್. ಅಕ್ಕತ್ರ ಕೊಡವವಂಶತ್ರ ಪಳಿವುಳಿಕೆಯೇ ಸಾಧಾರಣವಾಯಿತ್ ಇಕ್ಕ ಅಲ್ಲಿ ಉಳ್ಳ ಮಾಪಳಿಯ ಅಕ್ಕತ್ರ ಕೊಡವಡ ಮನೆ ಪೆದವೇ ಇಕ್ಕಲೂ ಉಳ್ಳ

ಅಲ್ಲಿಯತ್ರ ಕೊಡವ ಮಾಪಿಳ್ಳೆಯ ಮನೆಪೆದ ಚಂಬಾರಂಡ, ಚಕ್ಕೇರ ಕನ್ನಡಿಯಂಡ, ಪೊಟ್ಟಂಡ, ವಂಗಳೀರ, ಬಲ್ಲಿಯತ್ತಕಾರಡ. ಅಂದಿತೂ ಅಲ್ಲಿಯತ್ರ ಮಾಪಿಳ್ಳೆಯೆಲ್ಲಾ ಪಂಡೆಯತ ಕೊಡವ ವಂಶಕಾರಳೆಂದೆಣ್ಣುವಾತ್ಲ ದಂಡಿಲ್ಲೆ.

ಎನ್ನೇಂಗಾಡ್, ಏದೇಂಗಾಡ್ ಕಾಲೋರಾಂಡೆಕೊಮ್ಮೆ ಎಮ್ಮೆ ಮಾಡ್ ಪಳ್ಳಿಲ್ ನಡ್ಡ ಉರೂಸ್ ನೇರ್ಚೆರಂದ್ ಮಾತ್ರ ಅಲ್ಲಿ ಜಾತಿ ಭಿನ್ನ ಬೇಧ ಬೆಕ್ಕತೆ ಅನ್ನ ಸಂತರ್ಪಣೆ ನಡ್ಡ. ಇದ್ ಆ ಪವಾಡ ಪುರುಷ ಸೂಫಿಶೇಖ್‌ಮಾರ್‌ರ ಮಹಿಮೆಯಲ್ಲತೆ ಬೋರೆದಾರ್‌ಗುಂಡೂ ಅಲ್ಲ. ನೇರ್ಚೆರವಧಿಲ್ ಕೇರಳ, ಬೊಂಬಾಯಿ ಮೈಸೂರ್, ಬೆಂಗಳೂರ್‌ಂದ್ ಕೊಡಗ್ ಸಹಿತ ಪೊರ್ಮೆತ್ರ ಜನಭಕ್ತಂಗಳೂ ಎಮ್ಮೆಮಾಡ್ ನೇರ್ಚೆಕ್ ಬಂದಿತ್ ಭಕ್ತಿ ಸೇವೆ ಮಾಡಿತ್ ಪೋಪ ನೇಮ ಉಂಡ್.

ಪೋರತ್ತಾಂಗ್ ನೇರ್ಚೆ (ಉರೂಸ್)ರವಧಿಲ್ ಅಲ್ಲಿಯತ್ರ ಮುಸ್ಲಿಂ ತೋಕ್‌ಡ್ತಂಡ್ ಕಾಡ್‌ಲ್ ಕಾಟಿ ಪಿಂಗಳ ಬೋರೆ ಜಾತಿಯಳ ಬೋಟಿಯಾಡೋಕ್ ಪೋಯಿತ್ ಕಾಡೆರ್ಚಿ ಎಡ್ತೆಂಡ್ ಬಪ್ಪದುಂಡ್. ಆ ನೇರತ್ ಪೋಲೀಸ್ ಕಾನೂನ್ ಫಾರೆಸ್ಪ್ಪಕಾರಡ ಕಾನೂನುಕ್ಕೆಲ್ಲಾ ಪಡಿಮುಚ್ಚಿತ್ತಪ್ಪ. ಅದ್ ಆ ಪವಾಡ ಪುರುಷಂಡ ಮಹಿಮೆ, ಪವಾಡ. ಈ ಸಮಯತ್ ಏದೇಂಗಿ ಬಾಲ ಇಲ್ಲತದೆಲ್ಲಾ ಅಹಿಂಸೆ, ಪ್ರಾಣಿಕ್ಕೊಲ್ಲ ಕೊಲೆ ಅಗಂದೆಲ್ಲಾ ನಿರ್ಬಂಧ ಉಂಡಾಕ್‌ಚೇಂಗಿ ಅನ್ನತ್ತೆಂಡ ಬಾಯಿನ ಕೀತಿಯವ. (ಅಯಿಂಡ ದೇವ) ಇಲ್ಲಿಯತ್ರ ಭಂಡಾರ ಲಕ್ಷ ಲಕ್ಷ ಕೋಟಿ ಕಣ್ಣೆಲ್ ದುಂಬುವಾ ಇದಾಂಡಾಷೆಲ್ ಸ.ರ. ಕಾ.ರ. ಇಲ್ಲೇಂಗಿ ಮುಚೆರಾಯ ಇಲಾಖೆಂದೆಲ್ಲಾ ಬಾಯಿ ತೊಂದರ್‌ತ್ತೇಂಗಿ ಅಯಿಂಡ ನಾವು ಬಲ್ವಿಪೋಪ. ಇದ್ ಆ ಮಹಾಪುರುಷಂಡ ಪವಾಡ.

ಲೋಕತ್ (ಜಬ್ಬೂಮಿಲ್) ಸೊಳ್ಳೆ ಕತ್ತೆ ಕುಂಡಾಂಡಾನ ವಲ್‌ಂಜಿಯ (ಮನೆ ಅತ್ತ ಕೊಟ್ಟಲಿಪ್ಪ) ಶಾನ್ವೋಗ ಇನ್ನತ್ತ ಒಳಕಣಲ್ ತೇಂಜಿತಿಪ್ಪ ವರ್ಗ ಇಡೀ ಊರಾಕ್ಕೇ ಎನ್ನಂಗ್ ಇಡೀ ದೇಶಕ್ಕೆ ನಾಶ ಉಂಡಾಕುವನ್ನೆಕ್ಕೆ ಸ್ವತಂತ್ರ 6 ರಂದೂ (ಭಾರತ ದೇಶತ್ರ ಚೆನ್ನಂಗ್ ರಾಜಕೀಯ ಕುತಂತ್ರತ್ರ ತೊಯಿಲಾಳಿಯ

ಬುಡ ಮೇಲೆ ಮಾಡುವುದಿಷ್ಟು. ಅದೂ ತೆರೆ ಮರೆಲ್ ಮೇಯುವ ಇದ್ದಾನ ಬುದ್ಧಿ ಜೀವಿಯ ಕಂಡ್ ಪುಡ್ಡಿತ್ ಕಾಟ್ಪಾಂಡ ಬೇರಳ್ಳಿತ್ ಬುಡಂಡ್ಪಾಪ.

ಇನ್ನತ್ತೋರ್ ಪದ್ಧತಿನ ಬೋರೆ ದೇವಸ್ಥಾನತ್ತೆಲ್ಲಾ ಪ್ರಾಣಿ ಹಿಂಸೆ ಮಾಡೋಕ್ಕಾಗ. ಕೋಳಿ, ಪಂದಿ, ಆಡ್, ಕುರಿ ಇನ್ನತ್ತಾನೆಲ್ಲ ಕೊಲ್ಲೋಕ್ಕಾಗ. ಕಾನೂನ್ ಬಾಹಿರ ಅನ್ನತ್ತೆನ ಶಿಕ್ಷೆಕ್ ಒಳಪಡ್ತುವ. ಅಲ್ಲತೆ ಅನ್ನತ್ತದೆಲ್ಲಾ ಕಾಂಬನ್ನತ್ತದಲ್ಲ. ಅದೆಲ್ಲಾ ಮೂಡಭಕ್ತಿ ಅಂದಭಕ್ತಿಯೆಲ್ಲಾ ಜನಡ ಬಾಯಿಲ್ ಕೂತ್‌ಡುವಾ. ಆಚೇಂಗಿ ಇಲ್ಲಿ ಎಮ್ಮೆಮಾಡ್ ದರ್ಗಾತ್ಲೆ ಎನ್ನಂಗ್? ಉಲ್ಲಾಳ ಪಳ್ಳಿಕ್ ದಾರೆಂಗಿ ಭಕ್ತಂಗ ಕಷ್ಟ ನಷ್ಟಕ್ಕ ಆಡ್ ಕೊರಿ ಇನ್ನತ್ತಾನೆಲ್ಲಾ ಪರ್ಕೆ ಮಾಡಿತ್ ಉರೂಸ್‌ಕ್ ಮಿಂಞ ಪರ್ಕೆ ಮಾಡ್‌ನ ಆಡ್ ಕೊರಿರ ತೊಂಡೆಕ್ ಚೀಲ ಕೊಯ್ತಿತ್ ಬುಟ್ಟಾತೇಂಗಿ ಭಕ್ತಂಗ ಚೀಲಕಟ್ಟಿ ಭಕ್ತಿಭಂಡಾರ ಪಣತ್ತೋಡ ರೈಲ್‌ಕ್ ಆಡ್, ಕೊರಿ ಪತ್ತಿತ್ ತನ್ನಷ್ಟಕ್ಕೇ ಉಲ್ಲಾಳಕ್ ಪೋಯಿತ್ ಎತ್ತಿತ್ ಅಲ್ಲಿಯತ್ರ, ಮೂಪಂಗಡ ಎದಿಕೆ ಕತ್ತಿರ ಬಾಯಿಕ್ ಮಂಡೆಕೊಡ್ಲೆಲೋ? ಅದ್ ಅಕ್ಕ ಅಂದ ಭಕ್ತಿಯೆಲ್ಲೆಲುವಾ? ಅದೊಂದಿಲ್ಲೆ. ಮೂಡಭಕ್ತಿಯು ಅಲ್ಲ. ಭಕ್ತಿರ ಮಿಞ್ಞಲ್ ಏದೋರ್ ಶಕ್ತಿಯೂ ಇಲ್ಲೆ. ಅರ್ಕತ್‌ಕ್ ಭರ್ಕತ್ತಿಲ್ಲೆ. ಇನ್ನತ್ತದೆಲ್ಲಾ ಅಂದೂ ಕಂಡ್‌ಕೇಟುಂಡುಂಡ್. ಇಂದೂ ಅನ್ನತ್ತಾಂಡ ಕೊಣಕಂಡುಂಡು ಉಳ್ಳಲ್ಲಿ ಅಂಧ ಭಕ್ತಿ ಆಯಿಪೋಪೋ? ಎಲ್‌ಂಬ್ (ಮೂಲೆ) ಇಲ್ಲತ ನಾವುಲ್ ಎನ್ನತ್ತದೂ ಪರೆಯೊಲು. ನೇರರಂದಿಯತ್ರ ಕೂಳ್ ಪರ್ತ್ ಪವಿತ್ರತ್ ಉಳ್ಳದಲೋ ಭಕ್ತಂಗ ಆನ ವಣೈತ್ ಬೆಚ್ಚಂಡ್ ಬಯ್ಯ ಪರ್ತ್ ಭಕ್ತಿಲ್ ಉಂಡವಲೊ.

ಓರ್‌ಕಾಲ ನೇರ್ಚೆರ ಅವಧಿಲ್ ಚೆನ್ನಂಗ್ ಮಾಪಳೆಯ ತೋಕ್ ಕತ್ತಿ ಎಡ್ತಂಡ್ ಬೋಟೆಕೇಂದ್ ಕುಂದ್ ಬರಿಕ್ ಪೋಚಿಲೊ. ಅಂದ್ ಅಲ್ಲಿ ದುರಾದ್ಯಷ್ಟತಲ್ಲ ಈಯಂಗಡ ಎನ್ನತ್ತೆಂಗೋರ್ ಮೊಡ್ನ್ನ ಗುಂಡೆನ್ನೊ ಅಂದ್ ಬೋಟೆ ಕೂಡಿತ್ತಾಪಕ ಏದೋರ್ ಜಾತಿಯಳೂ ಕೆಣ್‌ಂಜಾಲೆಲೊ. ಕೂಟಕ್ ಅಯಿಂಗ ಪೋನ ಜೀಪ್‌ರ ಏದೋರ್ ಭಾಗ ಪೊಳಂಜಿತ್ ಜೀಪ್ ಅನ್‌ಂಗತ್ತಾಚಿಲೊ. ಅಲ್ಲಿಯೇ ಈಯೆಂಗ ಗಾಬರಿಯಾಯಿತ್

ಸೂಫಿಶೇಖಮಾರ್ನ ಕಠಿಣ ಭಕ್ತಿಲ್ ನೆನತ್‌ತ್ಲೊ. ಕುಂಬ್‌ಟ್ಲ್ ಬೋಡ್‌ಚಿಲೊ. ಆ ನೇರತ್ ಕುಂಬ್‌ಟ್ಲಿತ್ ಬೋಡಿತ್ ನೇರಣೆಕ್ ಎದಿಕೆ ಓರ್ ಕಾರಿ ಕಡ್ಡಿ ಬಂದಿತ್ ನಿಂದಿತ್ತಿಂಜತ್ಲೊ. ಆಂಡ ಬೋಲೆಲ್ ಓರ್ ಬಲ್ಯ ಸರ್ಪಣ ಇಂಜಿತ್ ಆ ಸರ್ಪಣೆಲೇ ಜೀಪ್‌ನ ಬಲ್ವಿತ್ ಕೊಂಡಾಕ್‌ಚಿಲೊ. ಇದಿಚ್ಚಕ್ ಸೂಫಿ ಶೇಖಮಾರ್ ಪವಾಡತ್ರ ಮಹಿಮೆಂದಲ್ಲ ಎಂತೆಣ್ಣವಕುಳ್ಳೊ? ನಂಬ್‌ನ್ಯೆಂಗಳ್ ಅಂದ್‌ಂಜ ಇಂದಾಕಣೆಕೊ ಮಿಳ್ಳಾಕ್ಲೊ ಇಂಬ್ ಕೊಡ್ತಂಡ್ ತಾಂಡ ಮಡ್‌ಲ್‌ಟ್ಲಂಡ್ ಕಾಪಾಡಿಯಂಡುಂಡ್.

ಪಂಡ್‌ಂಜಿಯೇ ಈ ಮಣ್ಣಲ್ ಶ್ರೀರಾಮ ಶ್ರೀಕೃಷ್ಣ ಪರಮಾತ್ಮಂಗಳ್ ಶ್ರೀಮನ್ನಾರಾಯಣವತಾಯಿಳಾಯೆಂಡ್ ಇಡೀ ಹಿಂದೂ (ಭಾರತ) ದೇಶತ್ ಎನ್ನಂಗಳ್ ಕೊಡವ ಮಾಲೆ ಪೊಮ್ಮಾಲೆ ಕೊಡಗಲ್ ಓರೋರ್ ಕಥೆ ಕೆಟ್ಟಿತ್ ಪವಾಡ ಕಾಟಿತ್ ಮಾಲೋಂಗಳ್ ಬಟ್ಟೆ ಕಾಟ್‌ನದುಂಡ್. ಕೊಡಗಲ್ ಓರೋರ್ ಅವತಾರಿಯಳಾಯಿತ್ ಕೊಣಕೆಜ್ಜುಂಡುಂಡ್. ಇದ್ ಸ್ಥಳತ್ರ ಪಾವಿತ್ರತೆರ ಮಹಿಮೆ.

ಈ ಕಥೆನ ಎಳ್‌ದುವಕ್ ಬೆಂಬಲ ತಂದ್ಯೆಂಗಳ್ ನೆಲಜಿ ಗ್ರಾಮತ್‌ರ ಮಣವಟ್ಟಿರ ಮೇದಯ್ಯ ಪಿಂಞ ಅಯಿಂಡ ಪರ್ಯ ಮೋಂವ ಶ್ರೀ ದೊರೆ ಅಯಿಂಗಳ್.

ಶ್ರೀ ಸತ್ಯ ಹರಿಶ್ಚಂದ್ರ ಸತ್ಯ ಕಥೆ

ಶಿವ, ಬ್ರಹ್ಮ ವಿಷ್ಣು ಈಯಿಂಗ ಮೂಂದಾಳೂ ಪದ್ಮಾಲ್ ಲೋಕತ್ಯ ಸೃಷ್ಟಿ ಮಾಡೋಕ ಜಬ್ಬೂಮಿಲ್ ಸೂರ್ಯನ ಚಂದ್ರನ, ಗಾಳಿ, ಮಣ್ಣ್ ಇನ್ನತ್ತಾನ ಉಂಡಾಕಿತ್ ಅದ್‌ಂಗೊತ್ತಿತ್ ಮಳೆ, ಬೊಳಿ, ಗಾಳಿ, ಸಮುದ್ರ, ಪೊಳೆ, ತೋಡ್ ಪಿಂಞ ಕುಂದ್ ತಟ್ಪಂದೂ ಉಂಡಾಕಿತ್ ಅದ್‌ಂಗೊತ್ತ ಮಾಲೋಂಗ ಫಲತರತ್ರ ಜಾತಿಯು, ಪಕ್ಷಿ, ಪಾಂಬ್ ಪಲ್ಲಿ ಪುಳು ಪುಕ್ಕಟೆಯಳ ಉಂಡಾಕಿತ್ ಲೋಕತ್ರ ಕಾಲ ಚಕ್ರನಡ್ವನ್ನೆಕೆ ಮಾಡ್‌ಚಿ.

ಅದತ್ ಸೂರ್ಯಚಂದ್ರ ಪಿಂಞ ಗಾಳಿ, ಮಳೆ, ಬೊಳಿ ಇನ್ನತ್ತದ್ ಪೆರ್ತ್ ಸತ್ಯವಾನದ್. ಅನ್ನನೇ ದೇವಾನ್ವೇವತೆಯಡ ಎಚ್ಚಕ್ಕೆಚ್ಚಕೋ ಸತ್ಯ ಕಥೆಲ್ ಹರಿಶ್ಚಂದ್ರ ಮಹಾರಾಜಂಡ ಕಥೆಯೂ ಕೂಡ ಓರ್ ಪೆರ್ತ್ ಬಲ್ಯ ಸತ್ಯ ಕಥೆಯಾಯಿತುಂಡ್. ಈಯಂಗೆಲ್ಲಾ ದೇವಾನ್ವೇವತೆಯ ಮಾಲೋ ಜನ್ಮತಾಳಿತ್ ಮಿಂಞಾಕ್ ಮಾಲೋಂಗಡ ಉದ್ಧಾರಕ್ಕಾಯಿತ್ ಜಬ್ಬೂಮಿಲ್ ನಲ್ಲದ್ ಕೆಟ್ಟದ್ ಸುಖ ದುಃಖಿತ್ರ ಕಥೆ ಉಂಡಾಕಿತ್ ಸತ್ರಮಿತ್ರತ್ ತಿರ್ಚಿತ್ ತಂಗಡ ಬಾಳ್ ಬದ್‌ಕ್ ಮೋಳಾಕೇತೋಕ್ಕಾಯಿತ್ ಉಂಡಾಕ್‌ನ ಓರ್ ನಾಟಕವಚ್ಚಕ್ಕೆ ಇದ್‌ನ ಎಂಗ ಮಾಲೋಂಗ ತೂಕಿತ್ ನೋಟಿತ್ ನಲ್ಲ ಬಟ್ಟೆಲ್ ನಡ್‌ಕಂಡಿಯ ಅವಶ್ಯಕತೆ ಉಂಡ್. ಇದ್ ಮಾಲೋಂಗಡ ಬಾಳ್‌ಕ್‌ಂದ್ ಉಂಡಾಕ್‌ನ ಎಚ್ಚರ ಗಂಟೇಂದ್ ನಂಗ ಎಚ್ಚರತ್ ಬೇರ್ಚಿಟ್ಟಿತ್ ನಡ್ಕಂಡಿಯ ಅವಶ್ಯಕತೆ ಉಂಡ್.

ಶ್ರೀ ರಾಮಂಡ ವಂಶ ಇಕ್ಷ್ವಾಕುವಂಶ. ಈ ವಂಶತ್ರ ಓರ್ ರಾಜ ಹರಿಶ್ಚಂದ್ರ. ಇಂದ್ರಂದ ಭೋಗತ್ರ ಅನುಭವಿಚಿಟ್ಟಿಂವ್ ಇಂಜತ್. ಅವಂಡ ಕಾಂತಿರ ಮಿಂಞ ಸೂರ್ಯತ್ರ ಕಾಂತಿ ಕಮ್ಮಿಂದ್ ಎಣ್ಣೆಕ ಪೋಟ್ಟಾಗ. ಉಂಡಲ್ಲಿ ಅಗ್ನಿರ ಕಾಂತಿ

ಪೊದಾಂಜಿತಿಂಜತ್. ಅವ ಸಮುದ್ರತ್ರ ಮಾದ್ರಿ ಗಂಭೀರ ಕುಬೇರಂಡ ಮಾದ್ರಿ ಪಣಕಾರ. ಚಂದ್ರಂಡ ಮಾದ್ರಿ ಶಾಂತಿಯುತ. ಅವದಾನಿ ಉದಾರಿ. ಪ್ರಜಾವತ್ಸಲ, ಕಾಮಧೇನು ದೀನ ದಲಿತಂಗಕ್ ಕಲ್ಪವೃಕ್ಷ ಅವಂಡ ಅಯೋಧ್ಯಾ ನಗರೇ ಸ್ವರ್ಗಭೂಮಿ.

ಅವಂಡ ಧರ್ಮಪತ್ನಿ ಚಂದ್ರಮತಿ ದೇವಿ ಅವ ಸೌಂದರ್ಯತೌರಿತಿಕ ಸಮಾನತೆ ಉಳ್ಳವ. ಅವ ಆರುಂಧತಿರ ಮಾದ್ರಿ ಪತಿವೃತೆ ಗಾಯತ್ರಿರ ಮಾದ್ರಿ ಪೂಜ್ಯಳೂ ಜಾಣತನತ್ ಸರಸ್ವತಿರ ಮಾದ್ರಿ.

ಅಯಿಂಗಕ್ ಪೆರ್ತಕಾಲಕೆತ್ತಣೆಕ್ ಮಕ್ಕಳಾಯಿತ್ತಿಲೆ. ಇದೋರ್ ಚಿಂತೆ ಅಯಿಂಡ ಸುಖಿ ಶಾಂತಿ ಮಣ್ಣ್ ಪಾಲಾಯಿತಿಂಜತ್. ಕಡೆಕ್ ಕುಂಞಿ ಪುಟ್ಟತ್ ಅದ್ ಇಲ್ಲತ್ತಾಚೆಂಗ್ಲೊ ಪರೋಂಜಿಲೆ. ಮಕ್ಕ ಇಲ್ಲತೆ ಬಂಜೇಂದೆಣ್ಣುವೊ ಅಪಕೀರ್ತಿ ತಪ್ಪಿತ್ತಂಡೇಂಗಿ ಮದಿಯಾಯಿತಿಂಜತೇಂದ್ ಚಂದ್ರಮತಿ ನೆನತ್ತಂಡತ್.

ದಂಪತಿಯ ದಂಡಾಳೂ ಪೆರ್ತ ಭಕ್ತಿಲ್ ವೃಥ್ ಆಚರಿಚಿಟ್ಟತ್. ತೀರ್ಥಯಾತ್ರ ಮಾಡ್ಚಿ. ಕಡೆಕ್ ವರುಣ ದೇವಳ ನೆನತಿತ್, ಪೂಜಿತ್ ಪ್ರಾರ್ಥನೆ ಮಾಡಿತ್ ಅವನ ಮೆಚ್ಚಿಚಿಟ್ಟತ್. ಅವನುಂಡ್ ವರ ಒಂದಾನಪಡ್ಂದತ್. ವರುಣ ಪುತ್ರ ವರ ಕೊಡ್ಪಕ್ಕ ಓರ್ ನಿಯಮನಿಟ್ಟತ್. ನಿಂಗಕ್ ಮೋಂವ ಪುಟ್ಟುವ. ಆಚೇಂಗಿ ಆ ಮೋಂವನ ನಾಕೇ ಬಲಿತಕ್ಕೊಂಡೊಂದೆಣ್ಣ್ಚಿ.

ಹರಿಶ್ಚಂದ್ರ ಪಿಂಞ ಚಂದ್ರಮತಿ ಈ ದಂಪತಿಯಕ್ ಬೋರೆ ಬಟ್ಟೆ ಇಂಜಿಲೆ. ವರುಣಂಡ ತಕ್ಕ ಒಪ್ಪಂಡ್ಯಾಚಿ.

ಹರಿಶ್ಚಂದ್ರ ಪಿಂಞ ಅವಂಡ ಪೊಣ್ಣ್ ಈಯಂಡ ಕಠಿಣ ಭಕ್ತಿಗೊಂಡ್ ಓರ್ ಕಾಣ್ಣ ಕುಂಞಿ ಪುಟ್ಚಿ. ರಾಜ ರಾಣಿ ಪಿಂಞ ಕೂಟಕಾರಕ್ಕೆಲ್ಲ ಪೆರ್ತ ಮಿಷಿ ಆಯೆಂಡತ್. ಈ ದಂಪತಿಯ ಎಲ್ಲಾ ರೋ ಕಾಕ್ಚಿಡೊಂಜಿ ಭಾರೀ ಗದ್ದಾಳ ಮಾಡ್ಚಿ. ನಲ್ಲೋರ್ ದಿನತ್ಲ ಬೋಂಡಿಯೆನ ಕೂಟೋಂಜಿ ಕುಂಞಿಕ್

ಲೋಹಿತಾಶ್ವಾಂದ್ ಪದ ಇಟ್ಟಿತ್. ದಿನ ಕೈಂಜೆಂಡಿಪ್ಪಕ ಈಯೆಂಗಕ್ ಬೋರೆ ಓರ್ ಚಿಂತೆ ಅಯಿಂಡೆದಿಕೆ ಬೇತಾಳೆಂದೆನ್ನೆಕ್ಕೆ ನಿಂದತ್. ಪುತ್ರ ಸಂತಾನಕ್ಕಾಯಿತ್ ವರ ಕೊಡ್ತ ವರುಣ ಪ್ರತ್ಯಕ್ಷನಾಯೆಂಡತ್. ಈ ತಕ್ಕನ ಕೇಟಿ ಹರಿಶ್ಚಂದ್ರ ಭೇ! ಕುಂಞಿ ಇಂಞೂ ಪಾಕುಂಞಿ. ಅದ್ಂಂಗ್ ಪಲ್ ಪುಟ್ಟಡಪ್ಪಾ. ಆನೇರತ್ ಬಲಿತಪ್ಪಾಂದೆಣ್ಣೆ ಚಿ. ದಿನ ಉಂಡ್ ಚಿ. ಕುಂಞಿಕ್ ಪಲ್ಲೂ ಪುಟ್ಟ್ ಚಿ. ಇತ್ತಟಿ ವರುಣ ಪುನಃ ಬಾತ್. ಇನ್ನನೆ ಕುಂಞಿನ ಬಲಿಕೊಡಕಂಡಿಯೆ ಷರತ್ತನ ಮಿಂಞಾಕ್ಟ್ಟೆಂಡ್ ಪೋಯಂಡಿಪ್ಪಕ ಕುಂಞಿ ತರುಣನಾಯಿತ್ ಅಂವಂಗ್ ತನ್ನ ತಾಂಡ ಅಪ್ಪ ವರುಣಂಗ್ ಬಲಿಕೊಡ್ಪಾಂದೆಣ್ಣು ವೊ ವಿಚಾರ ಲೋಹಿತಾಶ್ವಂಗ್ ಅರಿವಾಯೆಂಡತ್.

ಲೋಹಿತಾಶ್ವ ಅಪ್ಪಂಗೂ ವರುಣಗೂ ಕಾಣತ್ತೆನ್ನೆಕ್ಕೆ ರಾಜ್ಯತ್ ಬುಟ್ಟ್ ನಡಂದಿತ್ ಕಾಣತ್ತಾಯೆಂಡತ್. ವರುಣಂಗ್ ಚಿಡಿ ಬಾತ್. ಈಂಡ ಫಲಗುಂಡ್ ಹರಿಶ್ಚಂದ್ರಂಗ್ ಜಲಲೋದರಾಂದೆಣ್ಣು ವೊ ಕಾಯಿಲ ಪೊದ್ ಚಿ. ಕಡೆಕ್ ವರುಣನೇ ದಯಾಮಯನಾಯೆಂಡ್ ಲೋಹಿತಾಶ್ವ ನಾಕ್ ಬೋಂಡಾಂದ್ ಹರಿಶ್ಚಂದ್ರಂಡ ರೋಗ ವಾಸಿಯಾಡ್ಂದ್ ಆಶೀರ್ವಾದ ಮಾಡ್ ಚಿ.

ಹರಿಶ್ಚಂದ್ರಂಡ ಕಣ್ಣ್ ತೊಂದರ್ತ್. ಪುತ್ರ ವ್ಯಾಮೋಹತ್ಂಜ ತಾನ್ ವರುಣಂಗ್ ಕೊಡ್ತ ತಕ್ಕನ ಮಿಂಞಾಕ್ಟ್ಟೆಂಡ್ ಬಂದಂಗಾಯಿತ್ ತಾಂಗ್ ಎಂತ ಶಿಕ್ಷೆ ಆಚಿ ವರುಣನುಂಡ್ ಬಲಿಕ್ಕಾಯಿತ್ ಸಮಯ ಕೇಪಾಂಗುಂಞಿ ಅವನೇ ಪ್ರಾರ್ಥನೆ ಮಾಡಿಯೆಂಡಿತುಂಡೇಂಗಿ ಆಪಕ್ಕಿಂಜತ್ತಲ್ಲ, ಅವನೇ ಪುತ್ರ ಸಂತಾನ ತಂದವ. ಅವನೊಟ್ಟಿ ನೇಮತ್ ಅವನೇ ಬದ್ ಮಾಡೋಕಿಂಜತ್ ತಕ್ಕ ಕೊಡ್ತ ದುರಾಷೆನುಂಡ್ ಬಲಿಕ್ಕಾಯಿತ್ ಸಮಯ ಕೇಟಾನುಂಗುಂಡೇ ತಾಂಗೂ, ತಾಂಡ ಮೋವಂಗು ಇನ್ನತ್ತೋರ್ ದುರವಸ್ಥೆ ಬಾತ್. ಕೂಟ್ ಕೊಡ್ತ ತಕ್ಕೇಕ್ಕೇ ತಪ್ಪಿತುಂಡೇಂಗಿ ನಾಡ ಗತಿ ಎನ್ನಾಪಕ್ಕಿಂಜತ್. ನಾಡ ವಂಶತ್ರ ಕೀರ್ತಿ ಎನ್ನಾಪಕ್ಕಿಂಜತ್. ನಾಡ ಪೊಣ್ಣ್ ಮಕ್ಕಡ ಭವಿಷ್ಯ ಎನ್ನಾಪಕ್ಕಿಂಜತ್? ಎಚ್ಚಕ್ ಕಷ್ಟ ಆಪಕ್ಕಿಂಜತ್? ಗ್ಯಾನ ಮಾಡಿತ್ ಇಂಞಿ ಮಿಂಞಿಕ್ ಎಂತೇಂಗಾಡ್.

ಕೊಡ್ತ ತಕ್ಕಾಕ್ ತಪ್ಪಿತ್ ನಡ್ವಕ್ಕಾಗ. ಮನುಷ್ಯಂಗ್ ಪರಂದ ತಕ್ಕಾ ಮುಖ್ಯ. ಅದ್‌ನ ನಾನ್ ಉಳ್ಳೆ ಮಾಡಿಯೊಂಡು. ಸತ್ಯತ್ರ ಕನತ್ ಅರ್ಜಿ ತಿಕ್ಕೊಂಡು. ನಾಡ ನಡ್ತೆ ಅದ್‌ನ ಆಚರಣೆಕ್ ಕ್ಯಾಂದ ಬರಂಡೂಂದ್ ತೀರ್ಮಾನ ಮಾಡಿಯೆಂಡತ್. ಅಂಡ ಮಾದ್ರಿ ಆಚರಿಚಿಟ್ಟಿಂಡ್ ಸತ್ಯವಂತನಾಯಿತ್ ಪ್ರಸಿದ್ಧ ನಾಯೆಂಡತ್. ಅಂವಂಡ ಸತ್ಯ, ನಿಷ್ಠೆ ದೇವಲೋಕಕ್ ಮುಟ್ಟಿಯೆಂಡತ್.

ಒಮ್ಮೆ ದೇವೇಂದ್ರಂಡಲ್ಲಿ ಸಭೆ ಕೂಡ್‌ಚಿ. ಅಲ್ಲಿಯೆತ್ರ ಫಲತರತ್ರ ಕಾರ್ಯಕ್ರಮತ್ರ ಮಧ್ಯತ್ ಜಬ್ಬೂಮಿರ (ಭೂಲೋಕ) ವಿಚಾರ ತಕ್ಕಾಕ್ ಮೊಳಿ ಆಚಿ. ಆ ಸಭೆಲ್ ಭೂಲೋಕತ್ (ಜಬ್ಬೂಮಿಲ್) ದಾರೆಂಗೋರ್ ಸತ್ಯವಂತನುಂಡಾಂದ್ ದೇವೇಂದ್ರ ರರಾವು ಇಟ್ಟತ್. ಈ ತಕ್ಕಾ ಕೆಟ ವಶಿಷ್ಠ ಮಹಾಮುನಿ ಕಡ್‌ಜ್ಜನೆ ಎದ್ ನಿಂದಿತ್ ಜಬ್ಬೂಮಿಲ್ ಖಂಡಿತವಾಯಿತು ಸತ್ಯವಂತ ಉಂಡ್. ಅಂವನೇ ಸತ್ಯ ಹರಿಶ್ಚಂದ್ರಂದೂ ಎಣ್ಣಿಯೆಂಡತ್. ಅದ್ ದಾರೇಂದ್ ಇಂದ್ರ ಚೋದ್ಯ ಇಟ್ಟತ್. ಅದೇ ಸತ್ಯ ವತಿಂಡ ಮೋಂವ ನಾನ ಸತ್ಯ ಹರಿಶ್ಚಂದ್ರನೇ ಅಂವಂದೆಣ್ಣಿತ್ ವಶಿಷ್ಠ. ಈ ತಕ್ಕಾ ಕೆಟ ವಿಶ್ವಾಮಿತ್ರಂಗ್ ಎಲ್ಲಿಲ್ಲತ ಚಿಡಿ ಬಾತ್. ವರುಣಂಗ್ ಕೊಡ್ತ ತಕ್ಕಾನ್ ಉಳಿಕೆ ಮಾಡೋಕ್ ಕೈಯ್ಯತ ಅಂವನ ಸತ್ಯವಂತಂದ್ ದಾರ್ ಎಣ್ಣುವಾ? ವರುಣಂಡ ಶಾಪತ್‌ಂಜ ಅಂವ ಜಲೋದರಂದೆಣ್ಣುವೊ ರೋಗಕ್ ಬಲಿಯಾನದ್ ತಂಗಕ್ ಗೊತ್ತಿಲ್ಲೆಯಾಂದ್ ಕೆಟತ್.

ನಾಕ್ ಪಳೆಯ ವಿಷಯ ಗೊತ್ತಿಲ್ಲೆ. ಅದ್‌ನ ಎಣ್ಣಿಯೆಂಡೂ ಇಲ್ಲೆ. ಇಂದ್ ಅಂವ ಸತ್ಯವಂತನಾಯಿತುಂಡ್. ಅಂವಂಡ ಪಕ್ಕ ಪೊಟ್ತ್ ಎಂದೂ ಸುಳಿಯುಲೆಂದೆಣ್ಣೆ ಚಿ. ಅಂವಂಡಲ್ಲಿ ಪೊಟ್ತ್ ಅಸತ್ಯ ಕಂಡ್ ಬಾತೇಂಗೀಂದ್ ಸಭೆಲ್ ಪೊರ್ಟ ಪ್ರಶ್ನೆಕ್ ವಿಶಿಷ್ಠ ಮಹರ್ಷಿ ಅಂವ ಎಲ್ಲಿಯೇಂಗಿ ಪೊಟ್ತ್ ಪರಂದತ್‌ಂದಾಚೀಂಗಿ ಅಂವಂಡಲ್ಲಿ ಅಸತ್ಯ ಕಂಡ್ ಬಾತೇಂದಾಂಚೀಂಗಿ ನಾನ್ ಬೆತ್ತಲೆಯಾಯೆಂಡ್ ಬಿರ್ಚಿ ಮಂಡೆಯಾಯೆಂಡ್ ನರಕ ಕೂಪತ್ ಸುರೆ ಕುಡಿಚೆಂಡ್ ದಕ್ಷಿಣ ದಿಕ್ಕ್ ಪೊರ್ಟ್ ಪೋಪಿಂದ್ ಹರಿಶ್ಚಂದ್ರಂಡ ಮೇಲೆ ಸಂಪೂರ್ಣ

ನಂಬಿತುಳ್ಳ ವಶಿಷ್ಠ ಮಹರ್ಷಿ ಪೆರ್ತ್ ಕಠಿಣ ಸ್ವರತ್ ಎಣ್ಣೆಚಿ.

ಈ ತಕ್ಕನ ಕೇಟ ಅಲ್ಲಿಂಜ ನಾರದ ಮಹರ್ಷಿ ವಿಶ್ವಾಮಿತ್ರನ ತೇಂಡಿತ್ ಹರಿಶ್ಚಂದ್ರ ಸತ್ಯತ್ಯ ಬುಡುತ್ತಂಡುವೆಂಗಿ ತಂಗ ಎನ್ನ ಕೆಯ್ಯುವಿರಾಂದ್ ಕೇಟತ್. ಈ ತಕ್ಕನ ಕೇಟ ವಿಶ್ವಾಮಿತ್ರ ಮಹರ್ಷಿ ತಾನ್ ಸಂಪಾದನೆ ಮಾಡ್ನ ಪುಣ್ಯತ್ರ ಪಾದಿನ ಹರಿಶ್ಚಂದ್ರ ರಾಜಂಗ್ ಧಾರೆ ಬೂಕಿತ್ ಅವನ ಲೋಕ ಪ್ರಖ್ಯಾತನಾಯಿತ್ ಮಾಡುವೀಂದ್ ಇಂದ್ರಂಡ ಮಹಾಸಭೆಲ್ ಪ್ರತಿಚ್ಚ ಮೂಡಿತೆಣ್ಣೆಚಿ.

ವಶಿಷ್ಠ ಮಹರ್ಷಿ ಪಿಂಚ ವಿಶ್ವಾಮಿತ್ರ ಮಹರ್ಷಿ ಈ ದಂಡಾಳ್ ಸ್ವಾರ್ಥ, ಗತ್ಚಾಂಚಾಯಿತ್ ಹರಿಶ್ಚಂದ್ರ ಮಹಾರಾಜಂಗ್ ಇಲ್ಲ ಸಲ್ಲತ ಕಷ್ಟ ಕೋಟಲೆರ ಕೊಯಿಪ್ನೇ ಉಂಡಾಕ್ಚಿ. ಅನ್ನನೆ ಇನ್ನನೇಂದೆಣ್ಣೆತ್ ಹರಿಶ್ಚಂದ್ರ ಮಹಾರಾಜಂಡ ಸತ್ಯ ಪರೀಕ್ಷೆ ಸುರು ಆಚಿ.

ಇಪ್ಪರ ತಾಂಡ ಪ್ರೀತಿ ವಾತ್ಸಲ್ಯತ್ರ ಪೊದಿಕ್ ಅಂಟಿತುಳ್ಳ ಪೊಣ್ಣೆ, ಮೋಂವೊ, ಬುದ್ಧಿವಂತ (ಚಾಣ) ಮಂತ್ರಿ ಸಜ್ಜನಂಗಳಾನ ಪ್ರಚೆಯಳುಂಡ್ ಕೂಡ್ಯಾಡಿಯುಂಡ್ ಸುಖಿತ್ ರಾಜ್ಯಭಾರ ಮಾಡಿಯುಂಡಿಂಜ ಹರಿಶ್ಚಂದ್ರ ಮಹಾರಾಜಂಗ್ ದೇವಲೋಕತ್ ವಿಶಿಷ್ಠ ವಿಶ್ವಾಮಿತ್ರಂಗೆಡ್ತಂಡ ಪ್ರತಿಚ್ಚೆರ ಅರಿವಿಂಜಿತ್ತಿಲ್ಲೆ. ಜಬ್ಬೂಮಿಕ್ ತಿರಿತ್ ಬಂದ ವಿಶ್ವಾಮಿತ್ರ ಹರಿಶ್ಚಂದ್ರಂಡ ರಾಜ್ಯಭಾರ ಕ್ರಮತ್ನೊ ಅಂಪಂಡ ಬೋರೆ ರೀತಿ ನೀತಿನೆಲ್ಲಾ ಚೆನ್ನಂಗ್ ಕಾಲಕೆತ್ತಣೆ ಪರಿಶೀಲನೆ ಮಾಡ್ಚಿ. ಅವನ ಪೊಟ್ಕಾರ ಬಟ್ಟೆ ತಿರ್ಕುವೊ ಎನ್ನನೇಂದ್ ಮನತ್ ಯೋಚನೆ ಮಾಡ್ಚಿ. ಅಂಪಂಡ ಪಣತ್ತೆಲ್ಲಾ ಸುಲಿಗೆ ಮಾಡಿತ್ ತೊಂದರೆಕ್ ಬೂಕುವೊ ಎನ್ನನೇಂದ್ ಯೋಚನೆ ಮಾಡ್ಚಿ. ಪಣಕಾಸ್ನೆಲ್ಲಾ ಸುಲಿಗೆ ಮಾಡಿತ್ ಅವನುಂಡ್ ಪೊಟ್ಕ ಪರಿಚಿಡುವೊ ಎನ್ನನೇಂದ್ ತಾಂಡಲ್ಲಿಯೇ ಎಣ್ಣೆಯೆಂಡತ್.

ಹರಿಶ್ಚಂದ್ರ ಮಹಾರಾಜ ಒನ್ನಾಂದ್ ಸುಖಿ ಭೋಗತಿಪಕ್ಕ ವಿಶ್ವಾಮಿತ್ರಂಡ ಕಡೆರ ಚೆನ್ನಂಗಾಳ್ ಋಷಿಯ ಬಂದಿತ್ ರಾಜಂಗ್ ಬಹು ಸುವರ್ಣಯಾಗತ್ ವಿವರತ್ಯ ಎಣ್ಣೆತ್ ಅನ್ನತಯಾಗತ್ಯ ನಡ್ತವೊಕ್ ತಾನೇ ಸಮರ್ಥಂದ್

ಮಹಾರಾಜಂಗ್ ವಿವರ್ಚಿಟ್ ಕೊಡ್ತತ್. ರಾಜಂಗೂ ಮುನಿಯಡ ಬೋಧನೆ ಪುಡ್ತತ್. ಮಿಂಞಾಕ್ ಋಷಿ ಮುನಿರಸ್ತಾಹಾಕಾರ ಸಾಯತ್ನುಂಡ್ ಯಾಗ ನಡ್ತುವೀಂದ್ ಭಾಷೆ ಕೊಡ್ತತ್. ಈ ಯಾಗತ್ರ ಓರ್ ವೈಶಿಷ್ಟ್ಯವೆನ್ನತಂದೆಣ್ಣಕ್ಕೆ ಯಾಗ ತೇಂದ ಪಿಂಞ ಕೊಡ್ತ ದಾನ ದಕ್ಷಿಣೆಕ್ ಏದೋರ್ ನಿರ್ಕ್ ನಿಯಮ ಇಪ್ಪಕ್ಕಾಗ ಎಣ್ಣೆಚೇಂಗಿ ಬೋಡುವವು ಕೇಟಚ್ಚಕ್. ದಕ್ಷಿಣೆನ ಇಲ್ಲೆಂದೆಣ್ಣೆತೆ ಕೊಡ್ತೊಂಡು. ಇದ್ ಹರಿಶ್ಚಂದ್ರ ಮಹಾರಾಜ ಮಿಂಞಾಲೇ ಅರ್ಜಿತಿಂಜತ್. ಯಾಗತ್ತ್ ನಿರ್ವಿಘ್ನವಾಯಿತ್ ಪೆರ್ತ್ ಚಾಯಿಲ್ ಯಶಸ್ವಿಯಾಯಿತ್ ಮಾಡಿತ್ ತೇತತ್. ಬಡವ ಬಗ್ಗಂಗ, ದೀನ ದಲಿತಂಗ ಎಲ್ಲಾರೂ ತೃಪ್ತಿಗೊಂಡತ್. ಇದ್ ನೋಟನ ವಿಶ್ವಾಮಿತ್ರಂಗ್ ಅಸಮಧಾನ ಅತ್ಯಪ್ತಿಯೇ ಆಯಂಡತ್. ಆಚೆಂಗ್ಯೂ ಅಯಿಂಗ ಅಯಿಂಡ ಯೋಜನೆರ ಗುರಿನ ಬುಟ್ಟಾಲೆ.

ವಿಶ್ವಾಮಿತ್ರ ಮಹರ್ಷಿ ಹರಿಶ್ಚಂದ್ರ ಮಹಾ ರಾಜಂಡಲ್ಲಿಕ್ ಬಾತ್. ಮಹಾರಾಜ ವಿಶ್ವಾಮಿತ್ರ ಋಷಿಕ್ ನೀರ್ ಕೊಡ್ತಿತ್ ಬೊಂಡ್ಯಾನ ಮಾದ್ರಿಲ್ ಅಹ್ವಾನ ಮಾಡಿತ್ ಉಪಚಾರ ತಕ್ಕಾರ ಮಾಡಿತ್ ಅಳ್ವಾಚಿಟ್ಟಿತ್. ಮಹರ್ಷಿ ಬಂದಕಾರ್ಯತ್ ಕೇಟರ್ಜಿತ್ ಮಹಾರಾಜ ಏದೋರ್ ಕೊರ್ಚ್ಲಿತ್ತೆ ಯಾಗತ್ರ ದಕ್ಷಿಣೆಕ್ಕಾಯಿತ್ ಬಂದಂದೆಣ್ಣೆಚಿ. ವಿಶ್ವಾಮಿತ್ರ ಮಹಾಋಷಿರ ತಕ್ಕಾ ಕೇಟಿತ್ ತಂಗಡ ಇಷ್ಟಾರ್ಥತ್ ತಪ್ಪಕ್ ಸಿದ್ಧನಾಯಿತುಳ್ಳಂದೆಣ್ಣೆನ ಮಹಾರಾಜಂಡ ತಕ್ಕಾ ಕೇಟ ವಿಶ್ವಾಮಿತ್ರ ಮಹಾಋಷಿ ಓರ್ ಬಲ್ಯ ಆನೆಕ್ ಪತ್ತಿತ್ ಓರ್ ಮಾಲೋ ಆಂಡ ಕೊಡಿಕ್ ಪತ್ತಿತ್ ಓರ್ ಕವುಡಿನ ಬೊರ್ಚತೇಂಗಿ ಅದ್ ಎಚ್ಚಕ್ ಎತ್ತರ ಪಾರುವೋ ಆಂಡಚ್ಚಕ್ಕಿತ್ತರತ್ರ ಗುಡ್ಡೆ ಪಣತ್ತ್ ತಾಂದೆಣ್ಣೆಚಿ.

ಆಡ್ ತಂಗ ಕೇಟಚ್ಚಕ್ ಪಣತ್ತ್ ತಂದಿಯ ಎಡ್ತಂಡ್ ಆಶೀರ್ವಾದ ದಯ, ಮಾಡೋಂಡೂಂದ್ ಮಹಾರಾಜ ಕಡ್ಜ್ಲನೆ ಮಿಂಞಾಕ್ ಬಯ್ಯಕ್ ನೋಟತ್ತೆಣ್ಣಾನ ಕೇಟ ವಿಶ್ವಾಮಿತ್ರ ಮಹರ್ಷಿಕ್ ದಿಕ್ಕೇ ಕಾಣತ್ತಾಯಂಡ್ ತೆಡ್ ಬಡ್ಚೆನ್ನಕ್ಕಾಯೆಂಡತ್. ರಾಜಂಡ ಧೈರ್ಯ ಕೆಡ್ತಿತ್ ಪೊಟ್ವಾಕಾರನಾಯಿತ್ ಮಾಡೋಂಡುಂದೆಣ್ಣೆವೊ ಯೋಚನೆಕ್ ಭಂಗ ಉಂಡಾಯೆಂಡತ್. ಆಯೋಡ್,

ಸಂತೋಷ ಬೋಂದ್ಯಾಪಕ್ಕೆ ಕೊಂಡಾಪ್‌ಚಿತ್ತೋವೀಂದಣ್ಣೆತ್ ಬಂದ ಬಟ್ಟೆಕ್ ಸುಂಕವಿಲ್ಲೆಂದ್ ಲೆಕ್ಕ ಇಟ್ಟಿತ್ ತಾಂಡ ಆಶ್ರಮಕ್ ಚಪ್ಪೆ ಮೂಡ್‌ಚಿಟ್ಟೆಂದ್ ಬಯ್ಯಕ್ ಪೋಚಿ.

ಆದಿಯತ ಪರೀಕ್ಷೆಲ್ ಹರಿಶ್ಚಂದ್ರ ಪಾಸ್ ಆಯೆಂಡತ್. ವಿಶ್ವಾಮಿತ್ರಂಡ ಮನಸ್ ಮಥನ ಮಾಡ್ಲೊಕ್ ಸುರು ಆಯೆಂಡತ್. ಇಕ್ಕ ಮಿಂಞಕ್ಕುಳ್ಳ ಚೋದ್ಯಂದೆಣ್ಣಕ ದೇವೇಂದ್ರಂಡ ಸಭೆಲ್ ಮಾಡ್‌ನ ಪ್ರತಿಜ್ಞೆನ ನಡ್ತವೊ ಎನ್ನನೆಂದ್ ಎಲ್ಲಾಡೋ ಎದಿಕೆ ಅವಮಾನ ಉಂಡಾಪ ಸಂದರ್ಭಕ್ಕೆಡೆ ಉಂಡಾಯೆಂಡತ್ತಲ್ಲ? ಎನ್ನ ಮಾಡ್‌ಡೇಂದ್ ತಾಂಡ ಮನಸ್ಸು ಮೇಕಾಕೊಯಿಕ್ಕಾ ಮೇಂಗಿಕಳಿಚೆಂಡ್ ತಳರಾಮಳರಂದಾಯೆಂಡತ್. ಹರಿಶ್ಚಂದ್ರ ಮಹಾರಾಜಂಡ ಕೀರ್ತಿ ಮೂಂದ್ ಲೋಕಕ್ಕೂ ಬಿತ್ತನೆನ್ನಕಾಯೆಂಡತ್ತಲ್ಲಾ?

ನಾಕ್ ಮಿಂಞಕ್ಕುಳ್ಳ ಬಟ್ಟೆ ಏದೇಂದ್ ತಾಂಡ ಮನತ್ ವಿಶ್ವಾಮಿತ್ರ ಗ್ಯಾನ ಮಾಡ್‌ಚಿ. ಕರ್ಪೂರ ಕತ್ತಾಚಿಟ್ಟಿತ್ ಆಂಡ ತಿತ್ತರ ಜ್ವಾಲೆರ ಕಾವುಕ್ ಕಾಚೋನ್ನಕ್ಕೆ ಪಿಂಞೋರ್ ಕೇನಿನ ಯೋಚನೆ ಮಾಡ್‌ಚಿ.

ಚೆನ್ನಂಗಾಳ್‌ಕ್ ಪಣತ್ರ ಬಲ ಇಪ್ಪ. ಇಂಞಿ ಚೆನ್ನಂಗ್ ಜನಕ್ ಸಜ್ಜನಡ ಪ್ರಭಾವತ್ರ ಬಲ ಇಪ್ಪ ಪಿಂಞ ಚೆನ್ನಂಗಾಳ್‌ಕ್ ಅಧಿಕಾರ ಬಲ ಇಪ್ಪ. ಸ್ಥಾನ ಬಲ ಇಪ್ಪದೂ ಉಂಡ್, ಅನ್ನನೆ ವಿಶ್ವಾಮಿತ್ರ ಮಹಾಮುನಿ ಹರಿಶ್ಚಂದ್ರನ ತಾಂಡ ಆಶ್ರಮಕ್ ಬಲತ್ಕಾರತ್ ಬಲ್ಲೆಂಡ್ ಕ್ಷಾಂದಿತ್ ನಾಡ ಸ್ಥಾನ ಬಲತ್ ಪರೀಕ್ಷೆ ಮಾಡುವಿ. ಅವಂಡ ಸತ್ಯಾಗಿತ್ಯತ್ರ ಶಕ್ತಿನೋಟ್ಟ ಎಂದೆಣ್ಣೆಚಿ ವಿಶ್ವಾಮಿತ್ರ.

ಅನ್ನನೆ ಬಪ್ಪಾಚಿಡುವವದೇ ಓರ್ ಸಾಹಸಂದೆಣ್ಣುವನ್ನೆಕ್ಕೆ ತಾಂಡ ಸೃಷ್ಟಿ ಶಕ್ತಿನ ಉಪಯೋಗಿಚಿಟ್ಟಿತ್ ಪೆರ್ತ್ ಪೆರ್ತ್ ದುಷ್ಟ ಶಕ್ತಿಯಳ ಉಂಡಾಕಿತ್ ಹರಿಶ್ಚಂದ್ರಂಡ ರಾಜ್ಯತನೊ ಪ್ರಜೆಯಳೊ ಗೋಳೆಪ್ಪುವನ್ನೆಕ್ಕೆ ಅಯಿಂಗಕ್ ಪ್ರೇರೇಪಣೆ (ಪುರುಡ್) ಮಾಡ್‌ಚಿ. ವಿಶ್ವಾಮಿತ್ರಂಡ ಕಾಟ (ಉಪದ್ರ) ಕಠೋರ (ಭಯಾನಕ) ರೂಪ ತಾಳ್‌ಚಿ. ರಾಜ್ಯತ್ರ ಪ್ರಜೆಯಕ್ ಪೀಡೆ ತೊಡ್‌ಞಿಚಿ)

ವಿಶ್ವಾಮಿತ್ರ ಸೃಷ್ಟಿಮಾಡ್‌ನ ಪ್ರಾಣಿಯಳಗುಂಡ್ ಕ್ರಿಮಿಕೀಟ ಬಿತ್‌ನ ಕುರುನೆ ಮುಗ್ಗ್ ಚಿ ಕ್ಯಾಮ. ಇನ್ನತ್ತದೆಲ್ಲಾ ಬೊಳೆರ ಚಿಗ್‌ರಾನೇ ಮೇಂಜತ್. ಕದ್‌ನೆಲ್ಲಾ ನವಿಲ್‌ರನ್ನತ ಪಕ್ಷಿಯಳೇ ತಿಂದ್ ಮುಕ್ಚ್‌ಚಿ. ಮಾಲೋಂಗಕ್ ದವಸ ಧಾನ್ಯ ಒಯಿಂಜದೇ ಇಲ್ಲೆ. ಜನವೆಲ್ಲಾ ಬೊತ್ತಿಯಂಡತ್. ರಾಜಂಗ್ ಮೊರೆ ಇಟ್ಟತ್. "ಮಹಾಪ್ರಭು ಇಂದಾಕಣೆಕ್ ನಂಗಕ್ ಏದೋರ್ ರೂಪತ್ಲಾ ಉಪದ್ರ ಕಾಟಂಡಿಂಜಿಲ್ಲೆ. ಶತ್ರುವೊಡ ಪೋಡಿ ಭಯಂದಿಂಜಿಲೆ. ಸಾತ್ರ ಬಾಧೆ ಇಂಜಿಲೆ. ಪೈಪ್ ಬಾಯಾರಿಕೆರ ಉಪದ್ರ ಇಂಜಿಲೆ. ಆಚೇಂಗಿ ಇಕ್ಕ ಬಂದಿತ್ತೆಡ್ ಭೀತಿ (ಪೋಡಿ) ವಿಪರೀತವಾನದ್. ಬೊಳ್‌ಲ್ಲೆ ಬಿತ್ತಿಲ್ಲೆ, ನೀರಿಲ್ಲೆ ಪಕ್ಷಿಪ್ರಾಣಿಯಡ ಕಾಟ ತಡ್‌ಪಕೊಂದೂ ಕಯ್ಯಲೇಂದ್ ಮೊರೆ ಇಟ್ಟಂಡತ್. ಮಹಾರಾಜ ತಾಂಡ ಪ್ರಜೆಯಕ್ ಭರವಸೆ ಕೊಡ್‌ತಿತ್ ಪ್ರಾಣಿ ಸಂಹಾರಕ್ಯಾಯಿತ್ ಬೋಟೆಕ್ ಪೊರ್ಟತ್. ಇಡೀ ದಿನ ಬೋಟೆಕ್ ಕೂಡ್‌ಚಿ. ದುಷ್ಟ ಜಾತಿಯಳ ಕೊಂದಿತ್ ಇನ್ನನೆ ಬೋಟೆ ಕೂಡಿ ಕೂಡಿ ಮಿಂಞಾಕ್ ಮೊಟ್ಪ್ ಇಟ್ಟಿತ್ತಾಪಕ ಅಂವಂಗೋರ್ ಆಶ್ಚರ್ಯವೇ ಎದೆ ಮುಟ್ಪ್‌ಚಿ. ಎಲ್ಲಾ ಜಾತಿಯ ಪೋಡಿ ಬಯವೊಂದೂ ಇಲ್ಲತೆ ಓಡಾಡಿಯೆಂಡಿಂಜೋರ್ ಜಾಗ ಕಂಡತ್. ಅಲ್ಲಿ ನರಿಯು ಪಯ್ಯು, ಎತ್ತಳೂ, ಒಕ್ಕಚ್ಚೊಕ್ಕಚಿ ಇಂಜತ್. ಸಿಂಹ ಆನೆ ಕಳಿಪಂಜತ್. ನವಿಲ್ ಪಿಂಞ ಪಾಂಬ್ ಪ್ರೀತಿ ಭಾವನೆಲ್ ಇಂಜತ್. ಇನ್ನನೆ ಜಾತಿ ದ್ವೇಷ ಬುಟ್ಟಿತ್ ಹೊಂದಾಣಿಕೆಲ್ ಇಪ್ಪಕ್ ಎನ್ನ ಕಾರಣಾಂದ್ ಹರಿಶ್ಚಂದ್ರ ಮಹಾರಾಜ ಯೋಚನೆ ಮಾಡ್‌ಚಿ.

ಮಿಂಞಾಕ್ ಚೆನ್ನದೂರ ನಡ್‌ಂದಿತ್ ಬಪ್ಪಕ ಋಷಿ ಕುಮಾರಂಗ ಅಭ್ಯಾಸತ್ಲ ತೊಡ್‌ಂಗ್‌ನದ್ ಕಾಂಬಕ್‌ಟ್‌ಚಿ. ಇದ್ ಏದೋ ಋಷಿಯಡ ಆಶ್ರಮವಾಯಿತ್ತಿಕ್ಕೊಂಡೂಂದ್ ವಿಚಾರ್‌ಚಿಟ್ಟಿಲ್ಲಿ ಅದ್ ತಾಂಡ ಕುಲುಗುರು ವಶಿಷ್ಠಂಡ ಆಶ್ರಮಂದೇ ಗೊತ್ತಾಚಿ. ಅಲ್ಲಿಯತ್ರ ವಾತಾವರಣ ಅಂವಂಡ ಬೋಟೆರ ಆಯಾಸಕ್ ತಂಪ್ ಉಂಡಾಕ್‌ಚಿ. ಗುರುನ ಕಂಡಿತ್ ಭಕ್ತಿಲ್ ನಮಸ್ಕಾರ ಮಾಡಿತ್ ಅಯಿಂಡ ಆಶೀರ್ವಾದ ಪಡ್‌ಂದಂಡತ್.

ತಾನ್ ಬಂದ ಉದ್ದೇಶತ್‌ನ ಅರಿಚಿಟ್ಟಿತ್. ಮಿಂಞಾತ್, ಚಾಕ್ರಿರ ಬರಿಕ್

ನಡೆಂದತ್, ಇಂಞೋರ್ ಬೋರೆ ಆಶ್ರಮ, ಅಲ್ಲಿಯೆತ್ರ, ವಾತಾವರಣ (ವತಾರ) ಮಿಂಞ ಕಂಡ ಆಶ್ರಮಕ್ಕೆ ವಿರೋಧತಿಯೆಂಜತ್. ಸೋಲ್ ನೀಂಗಿತ್ತಿಂಜಿಲೆ, ಜಾಸ್ತಿಯೂ ಆಚಿ, ಮನಸ್ಸಕ್ ಶಾಂತಿ ಕ್ಕಟ್ಟಿತ್ತಿಂಜಿಲೆ. ಬದಲ್ ತಳಮಳಾಂದ್ ಸಂಶಯ ಜಾಸ್ತಿಯಾಚಿ. ಅದ್ ವಿಶ್ವಾಮಿತ್ರಂಡ ಆಶ್ರಮಾಂದ್ ಅಂರ್ಜತ್. ಅಂದ ಪಿಂಞ ಆಶ್ರಮಕ್ ವಿರುದ್ಧ ಪರಿಣಾಮ ಎನ್ನಂಗಾಚೀಂದ್ ನೆನತಿತ್ ಪೊಣ್ಣ್ಲೆರ ತೋಡೆನ ಮೆತ್ತೆಯಾಯಿತ್ ಮಾಡಿಯಂಡ್ ಬುದ್ಧಂಡತ್.

ವಿಶ್ವಾಮಿತ್ರಂಗ್ ಹರಿಶ್ಚಂದ್ರ ತಾಂಡ ಆಶ್ರಮಕ್ ಬಂದದ್ ಅಂರ್ಜತ್, ತಾನ್ ಇಟ್ಟಿ ಗಾಳ ಅವನ (ರಾಜನ) ಈತಂಡ್ ಕೊಂಡಾಕ್ಚಿ. ತಕ್ಕ ತಂಡ ಜಾಗ (ಸ್ಥಳ) ಶಕ್ತಿನ ಕಾಟಿತ್ ಅವನುಂಡ್ ಪೊಟ್ ಪರಿಚಿಟ್ಟಿತ್ತೇ ಪರಿಚಿಡೋಂದೂಂದ್ ತೀರ್ಮಾನ ಮಾಡಿಯೆಂಡತ್. ವಶಿಷ್ಠಂಡ ಕೂಡ ಉಂಡಾನ ಪೈಪೋಟಿರ ದ್ವೇಷ (ಚಿಡಿ) ಭಗ್ಗಂದ್ ಕತ್ ಚಿ. ತಾಂಡ ಮಿಂಞತ್ರ ಸಾಹಸ ಸೋತ್ ಬುದ್ಧದೂ ನೆಪ್ಪಕ್ ಬಾತ್. ಇಂದ್ರಂಡ ಸಭೆಲ್ ಮಾಡ್ನ ಪ್ರತಿಜ್ಞೆ (ಆಣೆ) ಅದಲ್ ಚೋತಕ್ಕ ತಾಂಗುಂಡಾಪ ಅಪಮಾನ ಮನಸ್ಕ್ ತೋಂದಿತ್ ತುಯಿಂಚಿತ್ತೇ ದಂಡ್ ತರುಣಿಯ ಅಯಿಂನುಂಡ್ ಸೃಷ್ಟಿ ಆಚಿ. ಮುನಿಕ್ ಸೂತ್‌ಗ (ಪೊಲೆ) ಜಿಡ್ಡ್ (ಕೊಳಕ್) ಏದೆಂದೆಣ್ಣ ಕ ಚಿಡಿ, ನಿಷ್ಕಾರಣಾನ ಶತ್ರುತ್ವ. ಈ ಭಾವನೆಲ್ ಪುಟ್ಪೊಂಗೆ ಅಯಿಂಗ, ಆನಂಗುಂಡ್ ಅಯಿಂಗ ಪೊಲ್ತಿಯಳಾಚಿ. ಅಯಿಂಗ ಅಯಿಂಡ ಯಜಮಾನಂಡ ಹುಕುಂನಗುಂಡ್ ಹರಿಶ್ಚಂದ್ರ ಮಹಾರಾಜನ ಮರಕ್ ಮಾಡೋಕು ಪೂರ್ತಬಾತ್. ಆಯಾಸತ್ತಿಂಜ ಹರಿಶ್ಚಂದ್ರಂಗ್ ಕೆಟ್ಟ ಸೊಪ್ಪವೊಂದ್ ಬುದ್ಧತ್. ಇದ್‌ನೋರ್ ಅಶುಭ ಶೂಚನೇಂದ್ ನೆನತಿತ್ ತಾಂಡ ಪೊಣ್ಣ್ಲೆಕ್ ಎಣ್ಣ್ಲೆಚಿ. ಈ ತಕ್ಕ ಕೇಟಿ ಚಂದ್ರಮತಿ ತಂಗ ಮನತ್ ನೊಂಬಲ ಪಟ್ಟೋತಿ, ಎಂತಾಚೆಂಗ್ಲೂ ಸತ್ಯತ್ವ ಮಾತ್ರ ಬುಟ್ರಂಡ, ಕೂಟ್‌ಕ್ ಮಂತ್ರಿಯೂ, ಮೋಂವನೂ, ಮಹಾರಾಜನ ಸಮಾಧಾನ ಪಡ್ ಚಿ. ಆನೇರತ್ ವಿಶ್ವಾಮಿತ್ರಂಡ ಕನ್ಯಕಾನ ತರುಣಿಯ ಬಾತ್. ಅಯಿಂಡ ಪಾಟ್ ಪಿಂಞ ಡ್ಯಾನ್ಸನುಂಡ್ ರಾಜಂಡ ಮನಸ್ಕ್ ಸಂತೋಷತ್ಲೊ, ಸುಖತ್ಲೊ, ಉಂಡಾಕ್‌ಚಿ.

ಹರಿಶ್ಚಂದ್ರ ಮಹಾರಾಜಂಗ್ ಪೆರ್ತ್ ಸಂತೋಷ ಆಯೆಂಡತ್. ತಾನ್ ಕೊಯಿತಂಡ ಅಮೂಲ್ಯವಾನ ಮುತ್ತರ ಮಾಲೆನ ಇನಾಂ ಆಯಿತ್ ಕೊಡ್ತತ್. ಅಯಿಂಗಕ್ ಇನಾಂ ಬೋಂಡಾಯಿತ್ಂಜಿಲೆ. ಅಯಿಂಗ ಬಂದದೇ ಕೀಟೆ ಕ್ಷಾಯಿತ್ ವಿಶ್ವಮಿತ್ರ ಮುನಿರ ಕಾರಣತ್ನುಂಡ್. ಅಯಿಂಡ ತಕ್ಕರ ಮೋಡಿಲ್ ರಾಜನ ತಕ್ಕಲ್ ಕೊಯಿತ್ತಿತ್ ಇಡುವಾಂಗಾಯಿತ್ ಪ್ರಯತ್ನ ಉಂಡಾಕ್ಚಿ. ಕಡಕ್ ಅಯಿನ (ದಂಡಾಳೊ) ಮಂಗಲ ಮಾಡ್ಕೊಂಡೊಂದ್ ಕೇಟತ್, ತಾಳೆಲಿಂಜ ರಾಜಂಡ ಮನಸ್ಸು ಉರಿಕ್ಕೇರಚಿ. ಪೊಲ್ತಿಯ ಸೂರ್ಯವಂಶತ್ರ ರಾಜನ ಮಂಗಲ ಆಂಡೊಂದೆಣ್ಣು ಪೊ ದುಷ್ಟತನ ಅಯಿಂಗಕ್ ಎನ್ನನೆ ಬಾತ್? ಅದ್ಂಗೆ ನೇರ ಕೆಟ್ಟಾಂಡ ಕಾರಣವಾಯಿತ್ತಿಕ್ಕು. ಇಲ್ಲೆಂಗಿ ಜಾಗತ್ರ ಮಹಿಮೆ ಆಯಿತಿಕ್ಕು. ಇದ್ಂಗೆ ಶಿಕ್ಷೆಯೇ ಫಲಾಂದೆಣ್ಣೊಂಡ್ ಕೊಡ್ತತ್. ಅಯಿಂಗಲ ಪೊಜ್ಜಿತ್ ಓಟ್ಚಿ. ಪೊಯಿತ್ ತಿಂದ ಅಯಿಂಗ ವಿಶ್ವಾಮಿತ್ರಂಡ ಪಕ್ಕ ಪೋಯಿತ್ ಮೊರೆ ಇಟ್ಟತ್.

ವಿಶ್ವಾಮಿತ್ರ ಮಹರ್ಷಿಕೂ ಬೋಂಡ್ಯದೂ ಅಚ್ಚಕ್ಕೇ. ತಿತ್ ಚೆಡಿಲ್ ಗುರ್ಗುಟ್ಟಿಯೆಂಡ್ ತಾನೇ ಹರಿಶ್ಚಂದ್ರಂಡ ಪಕ್ಕ ಓಡಿತ್ತೆಚ್ಚಿ. ಇನ್ನೆ ಆಕಸ್ಮಿಕವಾಯಿತ್ ಬಂದಿತ್ತೆತ್ತನ ವಿಶ್ವಾಮಿತ್ರ ಗೊತ್ತುಪಡ್ತುವೊದೇ ಹರಿಶ್ಚಂದ್ರ ಮಹಾರಾಜಂಗ್ ಕಷ್ಟತರ ಚಾಕ್ರಿ ಆಯಿತಿಂಜತ್. ಅಯಿಂಗ ಇಟ್ಟಂಡದ್ ಜಡೆಯೋ ತಿತ್ ಪೊದಿಯೋ? ತಾಂಡ ನೆತ್ತಿಕ್ಟ್ಟಂಡ ತಿತ್ಕ್ ಋಷಿ ಸ್ವರೂಪ ಉಂಡಾಚೊ? ಎನ್ನೋ, ರಾಜಂಗ್ ಗೊತ್ತಾಯಿಲೆ. ವಿಶ್ವಾಮಿತ್ರಂಡ ಸ್ವರೂಪತ್ನೇ ಎದೊಂದಾಂಗೂ ಹೋಲಿಕೆ ಮಾಡೋಕ್ ಕೈಂಜಿಲೆ. ಹರಿಶ್ಚಂದ್ರಂಗ್ ಕ್ಷಣಕಾಲ ಒಂದೂ ಗೊತ್ತಾಯಿಲೆ.

ಆಚೆಂಗ್ಯೂ ತಾಂಡ ಸತ್ಯ ಬಲಗುಂಡ್ ಅಂದರ್ಚಿಟ್ಟಂಡ ಮಹರ್ಷಿನ ಗೌರವಿಚಿಟ್ಟಿತ್ ತಕ್ಷಣ ಕಾಂಗತ್ತಾನಗುಂಡ್ ಕ್ಷಮೆ ಬೋಡಿತ್ ಅಯಿಂಡ ಅಪ್ಪಣೆಕ್ ಬೋಡ್ಚಿ. ಋಷಿ ವರ್ಯ ಆನೇರಕ್ ಋಷಿ ಧರ್ಮತ್ನ ಮಂದಿತ್ ಇಂಜತ್. ಅಯಿಂಡ ಚೆಡಿ ಕಮ್ಮಿ ಆಕಂಡ್ಯಾಂಡ ಬದ್ಲ ಜಾಸ್ತಿ ಆಯೆಂಡತ್. ರಾಜನಕಂಡ ವಿಶ್ವಾಮಿತ್ರ ಇದೇ ನೀಡ ಕೆಲಸವಾ? ನಾಡ ಪ್ರಾಣಿಯಲ ಕೊಂದಿಯ. ನಾಡ ಮದತ್ನ

ಪಾಳು ಮಾಡಿಯ. ನಾಡ ಮಕ್ಕಳ ನಿಷ್ಕರುಣಿಯಾಯಿತ್ ಸದೆ ಬಡ್ಂದಿಯಂದೆಣ್ಣೆಚಿ.

ರಾಜಂಗ್ ಮುನಿರ ತಕ್ಕ ಕೇಟಿತ್ ಆಶ್ಚರ್ಯ ಆಯೆಂಡತ್. ಮುನಿವರ್ಯಾನಾನ್ ನಿರಪರಾಧಿ. ಗುರುಕ್ ವಂದನೆ ಮಾಡೋಕ್ ಬಪ್ಪದ್ ತಪ್ಪಾಚಾಂದ್ ರಾಜ ಋಷಿನ ಕೇಟಿತ್. ಈ ತಕ್ಕನ ಕೇಟಿ ಋಷಿ ರಾಜನ ನೋಟಿತ್ ಏದ್ ಕನ್ನಿಯಳ ಅಯಿಂಡಾಟ್ ಸಂತೋಷ ಪಟ್ಟಿತ್ತಿಂಜಿಯೋ, ದಾಡ ಪಾಟ್ಲ್ ಕುಷಿ ಪಟ್ಟಿಯೋ ಅಲ್ಲಿಂಜಿ ಏದ್ ಕನ್ನಿಯಳ ಪೊಜ್ಜಿಯೋ ಅಯಿಂಗಳ ಇಕ್ಕನ್ನೆ ಮಂಗಲ ಮಾಡಿಯ. ಅಂದಕ ನಿನ್ನ ಕ್ಷಮಿಚಿದುವೀಂದೆಣ್ಣೆಚಿ.

ಹರಿಶ್ಚಂದ್ರ ಆ ತಕ್ಕನ ಒಪ್ಪಲೆ. ವಿಶ್ವಾಮಿತ್ರಂಡ ಅಸಮಾಧಾನ ಇಂಞಾ ಜಾಸ್ತಿ ಆಯೆಂಡತ್. ಕಡೆಕ್ ರಾಜ ತಾಂಡ ಪೂರ್ತಿ ರಾಜ್ಯತ್ಯಾಚೆಂಗ್ಯೂ ನಿಂಗಕ್ ತಂದುವ್ರೀಂದಲ್ಲತೆ ತಂಗ ಎಣ್ಣೆನ್ನೆಕ್ಕೆ ಆ ಕನ್ನಿಯಳ ಮಂಗಳ ಆಪ್ಲೆಂದ್ ಖಿಡಾ ಖಿಂಡಿತ್ ಎಣ್ಣೆರ್ತ್. ಸೆರಿ, ಅನ್ನನೆ ಆಚೇಂಗಿ ನೀಡ ಸರ್ವೆ ರಾಜತ್ನೇ ತಂದ್ರಂದೆಣ್ಣೆಚಿ. ಹರಿಶ್ಚಂದ್ರ ಮಹಾರಾಜ ಚೆನ್ನಂಗೂ ಗ್ಯಾನ ಮಾಡಲೆ. ತಾಂಡ ರಾಜ್ಯತ್ತ್ ವಿಶ್ವಾಮಿತ್ರಂಗ್ ಧಾರೆ ಬೂಕಿತ್ ಕೊಡ್ತತ್.

ಅಚ್ಚಕ್ಕಾಂಗ್ ಮಹರ್ಷಿ ಒಪ್ಪಲೆ. ರಾಜಧಾನಿಕ್ ಪೋಯಿತ್ ಎಲ್ಲಾ ಪ್ರಜೆಯೆಡೆದಿಕೆ ನೀಡ ರಾಜ್ಯತ್ಲಾ ನಾಕ್ ಒಪ್ಪಚಿಡ್ಂದೆಣ್ಣೆಚಿ. ಹರಿಶ್ಚಂದ್ರ ರಾಜ ಅದಂಗೂ ಒಪ್ಪಿತ್ ಋಷಿ ವರೇಣ್ಯನ ರಥಲ್ ಅಳಪ್ಪಾಚಿಟ್ಟಿತ್ ಕಾಕಿಯೆ ಪೋಯಿತ್ ಅರಮನೆರ ಪಕ್ಕತ್ ವಿಶ್ವಾಮಿತ್ರ ಋಷಿ ಮಿಂಞಾ, ರಾಜ, ಬಯ್ಯ ನಡ್ಂದಂಡ್ ಮೆರವಣಿಗಲ್ ಕಾಕಿಯೆ ಬಂದಿತ್ ಮುಖ್ಯ ಮಂತ್ರಿರೆದಿಕೆ ಚತುರಂಗ ಸೈನ್ಯ ಎಲ್ಲಾ ಖಜಾನೆ, ರಾಜಧಾನಿ ರಾಜಮುದ್ರೆ ಇನ್ನನೆ ಒಂದೊಂದಾಯಿತ್ ವಿಶ್ವಾಮಿತ್ರ ಮಹರ್ಷಿಕ್ ಒಪ್ಪಚಿಟ್ಟಿತ್.

ಇಚ್ಚಕ್ಕಾಚೆಂಗ್ಯೂ ವಿಶ್ವಾಮಿತ್ರ ಮಹರ್ಷಿ ತೃಪ್ತಿ ಪಟ್ಟಿತ್ತಾಂದ್? ಇಲ್ಲೆ ನೀಡ ಮಾಲ್ ಮುಟತ್ಲಾ ಎಡ್ತಿತ್ ರಾಜ ಪೋಷಾಕ್ನೆಲ್ಲಾ ಉತ್ತಿತ್ ಬೆಯ್ಯಿ.

ಪೊಣ್ಣೆ ಮೋಂವಂಡ ಪದೀಚತ್ನಲ್ಲಾ ಲೆಕ್ಕ ಮಾಡಿತ್ ಉತ್ತಿತ್ ಬೆಯಿಂದಣ್ಣೆಚಿ. ಪಿಂಞ ನಾರ್ ಬಟ್ಟೆ ಕೊಡ್ತಿತ್ ಇದ್ನ ಇಟ್ಟಾಂದಣ್ಣೆಚಿ.

ಹರಿಶ್ಚಂದ್ರ ಮಹಾರಾಜ ತಾಂಡ ಪೊಣ್ಣೆಕ್ ಮೋಂವಂಗೂ ನಾರ್ ಬಟ್ಟೆನ ಉಡ್ವೆಚಿಟ್ಟಿತ್ ತಾನೂ ನಾರ್ ಬಟ್ಟೆನ ಉಡ್ವೆಂಡ್ ಪೋಕಲು ಅಲ್ಲಾ ಗುರುವೇಂದೆಣ್ಣೆತ್ ನಮಸ್ಕಾರ ಮಾಡ್ಚಿ. ವಿಶ್ವಾಮಿತ್ರ ಮಹರ್ಷಿ "ಹ್ಲೂಂ"ದೆಣ್ಣೆತ್ ತಾಂಡ ಅಸಮಾಧಾನತ್ನ ಕಾಟ್ಚಿ. ಹರಿಶ್ಚಂದ್ರಂಗ್ ವಿಶ್ವಾಮಿತ್ರಂಡ ಚರ್ಚೆಯೇ ಅರ್ಥ ಆಯೆಂಡ್ಲೆ. ಅರಮನೆ ತೇಕಿತ್ ಬೀದಿಕ್ ಬಂದಿತ್‌ಳೆಂಜತ್. ನಗರತ್ರ ಜನ ಪ್ರಜೆಯೆಲ್ಲಾ ಈಯೆಂಗಳ ಸುತ್ತ ಕಟ್ಟಲ್ ಮುತ್ತಿಯೆಂಡತ್. ರಾಜಂಡ ಅವಸ್ಥೆನ ಕಂಡಿತ್ ಬೆರಗಾಯಂಡತ್. ರಾಜ ಅಯಿಂಗಳೆಲ್ಲಾ ಸಮಾಧಾನ ಪಡ್ತಿತ್ ಇಂಞಿ ಮಿಂಞಿಕ್ ವಿಶ್ವಾಮಿತ್ರನೇ ನಿಂಗಡ ಚಕ್ರವರ್ತೀಂದ್ ನಂಬ್ಚಿಟ್ಟಿತ್ ಪೊರ್ಟತ್.

ಪೊರ್ಟ್ ಪೋನ ಸತ್ಯಹರಿಶ್ಚಂದ್ರನ ವಿಶ್ವಾಮಿತ್ರ ಮಹರ್ಷಿ ಪುನಃ ಕಾಕ್‌ಚಿಟ್ಟಿತ್. ಹರಿಶ್ಚಂದ್ರನ ತೇಡಿತ್ ವಿಶ್ವಾಮಿತ್ರ ಹರಿಶ್ಚಂದ್ರ ಇಂಞಿೋರ್ ವಿಚಾರ ಉಂಡಲ್ಲಾಂದೆಣ್ಣೆಚಿ. ನೀನ್ ಸುವರ್ಣ ಮಾಡ್ಲೊಕ್ಕ ನಾಕ್ ದಕ್ಷಿಣ ತಂದಿತುಳ್ಳಿಯಲ್ಲಾ. ಅದ್ನ ನೀಡ ಪಕ್ಕತೇ ಬುಟ್ಟಿತಿಂಜಲ್ಲ ಅದ್ನ ನಾಕಿಕ್ಕ ತಾಂದೆಣ್ಣೆಚಿ.

ಹರಿಶ್ಚಂದ್ರಂಗ್ ಇದ್ನ ಕೇಟಿತ್ ದಿಗ್ಗುಮೆ ಆಯೆಂಡತ್. ಭಾರೀ ಎತ್ತರತ್ ಓರ್ ಆನೆರ ಕೊಡಿಲ್ ಓರ್ ಮಾಲೋನ್ ನಿಂದಿತ್ ಓರ್ ಕವುಡಿನ ಬೊರ್ಚತ್ತೇಂಗಿ ಎಚ್ಚೆಕ್ಕೆತ್ತರಕ್ ಪೋಪೋ ಅಚ್ಚೆಕ್ಕೆತ್ತರತ್ರ ಗುಡ್ಡೆ ಪಣ, ಈ ತಕ್ಕಾ ಕೇಟ ಬೀದಿ ಪಾಲಾನ ಮಹಾ ರಾಜ ಹರಿಶ್ಚಂದ್ರ ವಿಶ್ವಾಮಿತ್ರಂಗ್ ಆ ಪಣ ಬೆಚ್ಚಿತ್ತಿಂಡ ಭಂಡಾರ (ಖಜಾನೆ)ತೇ ತಂಗಕ್ ಒಪ್ಪ್ಚಿಟ್ಟಿ ಪಿಂಞ ಇದೇದೋರ್ ಚೂರ್‌ಪಾರ್‌ಂದೆಣ್ಣೆಂಡ್ ಒಪ್ಪ್ಚಿಟ್ಟಿ ಪಿಂಞ ಸುಂಕ ತರಂಡಿಯೆ ಕಾರಣ ಇಲ್ಲೆಲ್ಲಾಂದೆಣ್ಣೆಚಿ ಮಹಾರಾಜ. ವಿಶ್ವಾಮಿತ್ರ ಮಹಾಮಿತ್ರ ಮಹಾಮುನಿ ರಾಜಂಡ ವಾದಕ್ ಒಪ್ಪ್ಲೆ. ಕಡೆಕ್ ರಾಜ ನಾಪತ್ತೆಟ್ಪ್ ದಿನತ್ರ ಅವಧಿ ಪಡ್‌ಂದಂಡ್

ಊರ್‌ನ ಬುಟ್ಟಿತ್ ಪೋರ್ಟಿತ್ ಪೇಟೆ, ನಗರತ್ರ, ಪುಣ್ಯ ಪೋರ್ಟ್ ಪೋಯೆಂಡತ್‌ಂದ್ ಜನ ಗೋಳಾಟ್ಟತ್.

ಅಲ್ಲಿಂಜಿಪ್ಪರ ವಿಶ್ವಾಮಿತ್ರ ಮಹರ್ಷಿ ತಾಂಡ ಶಿಷ್ಯಂಗಡ ಕೂಟ್‌ಲೊಬ್ಬ ನಾನ್ ನಕ್ಷತ್ರಿಕನ ಕಾಕಿತ್ ಹರಿಶ್ಚಂದ್ರನುಂಡ್ ಪದೀಚಿ ಬಕ್ಕಡ್. ಬಕ್ಕತಾನಕ ಬುಡಡ್. ಅಂಪನ (ಹರಿಶ್ಚಂದ್ರ) ನಿಷ್ಕರಣೆಲ್ ನಿರ್ದ್ಯಾಕ್ಷಿಣ್ಯತ್ ಕಾಡಿಯೆಂಡಿರ್. (ಪುಡ್‌ಚಿಟ್ಟುಂಡಿರ್) ಕಾಡ್ ಮದ್ಯತ್ ತೊಂದರೆ ಉಂಡಾಕ್ ಪಟ್ಟಣ ಬೂಕ್, ಬಟ್ಟೆ ತಪ್ಪಚಿಡ್, ಅವಧಿ ತೇಂದತ್‌ಂದ್ ಬೊತ್ತಚ್ಚಿಡ್. ಅವಂಗ್ ಓರಿಚ್ಚಕ್ಕೂ ದಯ ದಾಕ್ಷಿಣ್ಯ ಕಾಟತೆ, ಅಳ್ತಲ್ಲಿ, ಅಳಪ್‌ಚ್ಚಿಡತೆ ನಿಂದಲ್ಲಿ ನಿಪ್ಪಕ್ ಬುಡತೆ ಚೋಪನ್ನೆಕ್ಕೆ ಮಾಡ್. ಅಂವಂಗುಂಞಿ ನೀಕ್ ಸೋಲ್ (ಆಯಾಸ) ಜಾಸ್ತಿ ಆಪಾಂದ್ ಅವನುಂಡ್ ಉಪಚಾರ ಮಾಡ್‌ಚಿಟ್ಟು. ಎನ್ನನಾಚೆಂಗ್ಲೂ ಅಂವನುಂಡು ಪೋಟ್‌ಪರೀಚ್ಚಿಡ್ ಇಚ್ಚಕ್ಕೆಲ್ಲಾ ಸೀನ್ ನಕ್ಷತ್ರಿಕ ಪ್ರಪಂಚತ್ಲಾ ತಾಂಡ ಪೆದ ಶಾಸ್ತ್ರಿತವಾಯಿತ್ ಉಳಿಕೆಯಾಪನ್ನೆಕ್ಕೆ ನಡ್‌ಂದಂಡತ್. ತಾಂಡ ರಾಜ್ಯಕ್ಕ್ ಇಕ್ಕ ಒಡೆಯನಾಯಿತ್ತುಳ್ಳ ವಿಶ್ವಾಮಿತ್ರಂಗ್ ತಕ್ಕ ಕೊಡ್ತಿಂಜನ್ನೆಕ್ಕೆ ಹರಿಶ್ಚಂದ್ರ ಸಾಲತ್ರ, ಪಣತ್ರ, ಕಾಲವಧಿ ತೇರ್ಪಾಂಡೊಳ್‌ಲ್ ಸಾಲತೇ ಕಂಡಿಂಜತ್.

ಅದ್‌ನ ವಿಶ್ವಾಮಿತ್ರಂಡ ರಾಜ್ಯತ್ ಸಂಪಾದನೆ ಮಾಡೊನ್ನಕ್ಕಿಂಜಿಲೆ. ಬೋರೆ ರಾಜ್ಯತ್ ನೈಚಿತ್ತೋ, ಸಾಲ ಮಾಡಿತ್ತೋ ಅಥವಾ ಬೋರೆಂತೆಂಗಿ ಸ್ವರೂಪತ್ ಸಲ್ಯೆ ಮಾಡಂಡಿಯೆದುಂಡ್. ವಿಶ್ವೇಶ್ವರಂಡ ಸಾನಿಧ್ಯತ್ಲಾ ಕಾಶಿನಲ್ಲ ಜಾಗಾಂದ್ ನೆನತಿತ್ ಅಲ್ಲಿಕ್ ಪೋರ್ಟಿತ್.

ಕಾಶಿಕ್ ಪೋಪಕ್ಕ ಕಾಡ್‌ನ ದಾಟಿತ್ ಪೋಕಂಡ್ಯಾಚಿ. ಕೂಟ್‌ಕ್ ನಕ್ಷತ್ರಿಕಂಡ ಉಪದ್ರ ಬೋರೆ. ಒಮ್ಮೆಕೆ ಕಾಡ್‌ಕ್ ಬುದ್ಧ ತಿತ್ತ್ ತುಯಿಚಂಡ್ ಪಬ್ಬಾನನ್ನೆಕ್ಕೆ ಎಲ್ಲಾನೋ ಆಹುತಿ ಎಡ್ವೊನ್ನೆಕ್ಕೆ ಸುತ್ತುಕೆಟ್ಟಲ್ ಮಾರ್‌ಟ್ಲ್ ಪೊದ್‌ಚಿ.

ಚಂದ್ರಮತಿರ ಪಾತಿವ್ರತ್ಯತ್ರ ಶಕ್ತಿಂಜಿ ಈ ಕಪಟ ಜ್ವಾಲೆ ಮಾಯ

ಆಯಂಡತ್. ಇಂಜೊಮ್ಮ ಬೆದಾರ ಕಾಚಲ್ ಮರತ್ರ ನಳ ಕೊಡ್ತಿತ್ ತಿತ್ತಾಯಿತ್ ಕಾಂಜಿತಿಂಜತ್. ಚುಡುವೊ ನೆಲ, ತಿತ್ತ್ ಗಾಳಿ ಇಪ್ಪಕ್ಕಾಗಂಜಿಲೆ. ನಿಪ್ಪಕ್ಕಾಗಂಜಿಲೆ, ಅಳ್ಳನ್ನೆಕ್ಕಿಂಜಿಲೆ. ಆಚೇಂಗಿ ಎಂತೋರ್ ಕಷ್ಟ ಬಕ್ಕಡ್ ಹರಿಶ್ಚಂದ್ರಂಡ ಸತ್ಯವೃತತ್‌ರ ಮಿಂಞಿಲ್ ಅವೆಲ್ಲಾ ನಿಪ್ಪಕ್ಕೈಯ್ಯತೆ. ಓಡಿಪೋಯಂಡತ್. ಅಂತೂ ಇಂಜೂ ಅಯಿಂಗೆಲ್ಲಾ ಕಾಶಿಕ್ ಬಂದಿತ್ತೆಚ್ಚಿ.

ಪುದಿಯ ಊರ್ ದಾಡೊಬ್ಬಡದೂ ಪರಿಚಯವಿಲ್ಲೆ. ಪಣ ಒದ್‌ಗ್‌ಚಿಡ್ಚೊ ಎನ್ನನೆ? ಅವಧಿ ತ್ತೇಂದಂಡೂ ಬಾತ್. ನಕ್ಷತ್ರಿಕ ಜಾಪಾಂಗಾಲ್‌ಟ್ಟಿಂಡ್ ಬಯ್ಯನ್ನೇ ಬುದ್ಧಿತ್ ಸಮಯ ತ್ತೇಂದಂಡ್ ಪೋಯಿತ್‌ಂದ್ ಈಯಂಗಳ ಬೊತ್ತ್‌ಚಿಡ್ಚೊ ಬೋರೆ.

ದಿಕ್ಕ್ ಅರಿಯತೆ ಹರಿಶ್ಚಂದ್ರ ಕಾಶೀ ವಿಶ್ವೇಶ್ವರಂಡ ದರ್ಶನ ಮಾಡಿತ್ ಪಿಂಞ ಯೋಚನೆ ಮಾಡನಾಂದೆಣ್ಣಿಂಡ್ ಗಂಗಾಪೊಳಲ್ ಕುಳಿಚಿತ್ ಕಾಶೀ ವಿಶ್ವೇಶ್ವರಂಡ ಪಾದಕ್ ಬುದ್ಧತ್. ನಂಗಕ್ ಬಟ್ಟೆ ಕಾಟ್ ಭಗವಂತಾಂದ್ ಅವನ ಬೋಡಿಯೆಂಡತ್. ಮನಸ್ಸಕ್ ಚೆನ್ನ ಸಮಾಧಾನ ಉಂಡಾನನ್ನಕಾಯೆಂಡತ್. ಋಷಿರ ಋಣತೇಪ ಎನ್ನನೆ? ಇನ್ನನೆ ಫಲತರತ್ರ ಚಿಂತೆ ಪೊದ್ಚಿ. ಆ ನೇರತ್ ಚಂದ್ರಮತಿ ಓರ್ ಸಲಹೆ ಕೊಡ್ತತ್. ತನ್ನೋ ಪಿಂಞ ಕುಂಞಿನೋ ಮಾರಿತ್ ಸಾಲತೇತ್ರಂದೆಣ್ಣೆಚಿ.

ಹರಿಶ್ಚಂದ್ರಂಗ್ ಚಂದ್ರಮತಿರ ತಕ್ಕ ಕೇಟಿತ್ ಮಂಡೆತಿರ್‌ನನ್ನೆಕ್ಕಾಯೆಂಡತ್. ಪೊಣ್ಣೊನೊ, ಕುಂಞಿನೊ ಮಾರೋದಾ? ಇದ್‌ನ ಕೇಟ ಚಂದ್ರಮತಿ ಕೊಡ್ತ ಬಾಷೆನ ಉಳಿಕೆ ಮಾಡ್ಚಿದ್ ಮುಖ್ಯವಾ? ಪೊಣ್ಣೊ ಮಕ್ಕ ಮುಖ್ಯವಾ? ಈ ಚಾಕ್ರಿಕ್ ಬಯ್ಯಕ್ ನಿಕ್ಕಂಡ ನಂಗಕ್ ಏದೋರ್ ಅಸಾಮಾಧನವಿಲ್ಲೆಂದೆಣ್ಣೆಂಡತ್.

ಬೋರೆ ಬಟ್ಟೆ ಇಲ್ಲತ್ತಾನ ಶ್ರೀರಾಮಚಂದ್ರಂಡ ವಂಶಕಾರನಾನ ಹರಿಶ್ಚಂದ್ರ ಮಹಾರಾಜ ತಾಂಡ ಪೊಣ್ಣೊನೋ, ಮೋಂವನೋ ಮಾರೋಕ್

ತಯಾರಾಯಂಡತ್. ಬೀದಿ ಬೀದಿಲ್ ಈಯೆಂಗಳ ಮಾರುವೀಂದ್ ಕೂತ್‌ಟ್ಟಂಡ್ ಮಾರಂಡಿಯ ಕುಂಞಾನೋ ಪೊಣ್ಣಾನೋ ಕಾಟಿಯೆಂಡ್ ನಡಂದಂಡಿಂಜತ್. ಕಡೆಕ್ ಇಂವಂಡ ದುರಾದ್ಯಷ್ಟಕ್ ಓರ್ ಪಟ್ಟಿ ವ್ಯಾಪಾರಿ ಇವಂಡ ಪಕ್ಕ ಬಾತ್. ಪೊಣ್ಣ್ ಮುದ್ದಿ, ಕ್ಕಣ್ಣ್ ಕೈಲಾಕತವಂದ್ ಚೌಕಾಶಿ ಮಾಡ್‌ಚಿ. ಅಂತೂ ಚರ್ಚೆ ಮಾಡಿ ಅಯಿಂಗ ದಂಡಾಳಾನೋ ಪಣ ಕೊಡ್‌ತಿತ್ ಎಡ್ತಂಡತ್.

ಆ ಪಣತ್ ಹರಿಶ್ಚಂದ್ರ ನಕ್ಷತ್ರಕಿಂಗ್ ಕೊಡ್ತತ್. ಪನಿಬುಟ್ಟತ್ತೆಂಗ್ಲೊ ಬರೆ ಮಾಲ್ಯೊಂದೆಣ್ಣಿಟ ನಕ್ಷತ್ರಕಿಂಗ್ ಹರಿಶ್ಚಂದ್ರ ಕೈಯಿಂಜಿ ಪಣಕೆಟ್ಟಿತೂ ಅಂವಂಡ ಚೊರೆ ಮಾಲೆ ಎಣ್ಣೆ ಚೇಂಗಿ ಸಾಲ ವಸೂಲ್‌ಕ್ಕಾಯಿತ್ ಹರಿಶ್ಚಂದ್ರಂಡ ಕೂಡೆ ನಡಂದಾಂಗಾಯಿತ್ ಕಷ್ಟ ಪಟ್ಟಂಗಾಯಿತ್ ಈ ಪಣ ನಾಕ್ ಭತ್ಯ ತಂದನ್ನೆಕ್ಕಾಯೆಂಡತ್‌ಂದ್ ನಕ್ಷತ್ರಕಿ ಅಂವಂಡ ಚೇಬ್‌ಕಟ್ಟಂಡತ್.

ಹರಿಶ್ಚಂದ್ರ ಮಿಂಞಾಕುಳ್ಳ ವಾಯಿದತ್ ನೆನತಂಡ್ ಗಾಬರಿಯಾಯೆಂಡ್ ಕಡೆಕ್ ತನ್ನೇ ಮಾರೋಕ್ ತಯಾರಾಯೆಂಡತ್. ಮಂಡೆಲ್ ಪಿಲ್ ಕಡ್ಡಿ ಇಟ್ಟಂಡ್ ಇಕ್ಕಾಕ್ ವಂಶತ್‌ರ ರಾಜ, ಅಯೋಧ್ಯ ರಾಜ್ಯತ್ರ ರಾಜ ನಾನ್. ನಾನ್ ನನ್ನೇ ಮಾರಿಯೋವೀಂದ್ ಕೂತ್‌ಟ್ಟಂಡ್ ಬಯಿಟ್ಟಾಪಲ್ಲಿಕೆತ್ತಣೆಯೂ ಕಾಶಿರ ಬೀದಿ ಬೀದಿಲೆಲ್ಲಾ ಓಡ್ಯಾಡ್‌ಚಿ.

ಕಡೆಕ್ ಒಬ್ಬ ಇಂವನ ಎಡ್ತವೊಕ್ (ಕ್ರಯಕ್) ಬಾತ್. ಅಂವನೇ ವೀರಬಾಹು. ಅವ ಚಾಂಡಾಲ ನಗರತ್ರ ತೂಟ್‌ಂಗಳತ್ರ ಅಧಿಕಾರಿ (ಯಜಮಾನ) ಚೊಕ್ಕನ ಶರೀರತ್ ತೂಕ್‌ಡಿಚಿಟ್ಟಂಡ್ ಅಂವಂಡ ಪಕ್ಕ ಬಂದಿತ್ ನಾನ್ ಕ್ರಯಕ್ ಎಡ್ತೊವಿ. ದಾರ್ ಮಾರೋಕ್ ಪೊರ್ಟಿವೊಂದ್ ಕೇಟತ್. ಇಕ್ಕಾಕ್ ವಂಶತ್ರ ರಾಜನಾನ ನಾನ್ ಪೊಲಿಯಂಗ್ ಮಾರಿಯವದಾಂದೆಣ್ಣಿವೊ ಶೋಕ ಹರಿಶ್ಚಂದ್ರನ ಚೆನ್ನಂಗ್ ಕೇಡ್‌ಚಿ (ಪೀಡ್‌ಚಿಟ್ಟತ್). ಆಚೇಂಗಿ ಸಾಲತ್ರ ಹೊಣೆ (ಬಾಕಿ) ಎಚ್ಚಕ್? ಸಾಲಕಾರಂಡ ಪೀಡೆರ ಪೋಡಿ ಎಚ್ಚಕ್ ಎಣ್ಣಿವೊ ಅರಿವಾಚಿ. ಅಲ್ಲತೆ ತಕ್ಕ ಬೋರೆ ಪಂದಿತೂ ಆಯೆಂಡತ್‌ಂದೆಲ್ಲಾ ತಾಂಡ ಮನತ್ ಹರಿಶ್ಚಂದ್ರ ನೆನತಂಡತ್.

ಇಕ್ಕ ಹರಿಶ್ಚಂದ್ರ, ಈಂಗ್ ಮುಪ್ಪಡೆತ್ರ ಮಾದ್ರಿ ಉದಾಸೀನ (ಅಸಡ್ಡೆ) ಮಾಡ್ಲೆ. ಪೆರ್ತ್ ಆಲೋಚನೆ ಮಾಡಿತ್ ತಾಂಡ ಬೆಲೆ ತೇರ್ಮಾನ ಮಾಡ್ಚಿ. ಆನೆರ ಕೊಡಿಲ್ ಎತ್ತರತ ಮಾಲೋನೊಬ್ಬ ನಿಂದಿತ್ ಕವ್ವಡಿಯಂದಾನ ಕೊಡಿಕ್ ಚೌಟ್ಚೇಂಗಿ ಅದ್ ಎಚ್ಚಕ್ ಎತ್ತರಕ್ ಪೋಪೋ ಅಚ್ಚಕ್ ಎತ್ತರಕ್ ಪೊನ್ನು ರಾಶಿ (ಗುಡ್ಡ) ನಾಡ ಬೆಲೆಂದ್ ಹರಿಶ್ಚಂದ್ರ ಎಣ್ಣೆತ್, ಆನ ಪೂಪಚ್ಚಕ್ ಪಣ ನೀಕ್ ನಾನ್ ತಾತ್ಲೆಂದಾಚೆಂಗಿ ನೀನ್ ಮಾಡುವೊ ಕೆಲಸ ಎಂತಾಂದ್ ವೀರಬಾಹು ಹರಿಶ್ಚಂದ್ರನ ಕೇಟತ್.

ಈ ತಕ್ಕ್ ಕೇಟ ಹರಿಶ್ಚಂದ್ರ ನಾನ್ ನೀಡ ಸೇವಕ, ನೀನ್ ಎಣ್ಣೆನ ಎಲ್ಲಾ ಚಾಕ್ರಿನ ನಾನ್ ಮಾಡ್ವೀಂದ್ ಎಣ್ಣೆಚಿ. ಇದ್ನ ಕೇಟ ವೀರಬಾಹು ಪಣತ್ರ ಗುಡ್ಡೆನೇ ತೊಂಜಿತ್ ಅಯೋಧ್ಯಾತ್ರ ರಾಜನಾನ ಹರಿಶ್ಚಂದ್ರ ಮಹಾರಾಜನ ತಾಂಡ ಆಳಾಯಿತ್ ನೇಮಕ ಮಾಡಿಯೆಂಡತ್. ಸ್ಮಶಾನ (ತೂಟ್ಂಗಳ) ಕಾಪಕ್, ಪಾರಕಾಪ ಚಾಕ್ರಿಕ್ ತಾಂಡ ಹುಕುಂ ಕೊಡ್ತತ್.

ಪಣತ್ರ ಪುದಿಯ ಗುಡ್ಡೆ ಕಣ್ಣ್ ಕುಕ್ಕುವೊನ್ನೆಕ್ಕೆ ಕಾಂಬಂಜತ್. ಹರಿಶ್ಚಂದ್ರ ಅಚ್ಚಕ್ ಪಣತ್ತೊ ನಕ್ಷತ್ರಕಿಂಗ್ ಒಪ್ಪಿಚಿಟ್ಟತ್. ನಕ್ಷತ್ರಕಿಂಗೇ ಇಾಣಕೇಡಾಯೆಂಡತ್. ತಾಂಡ ಗುರುರ ಚೆರಿಯ ಕಳೆನೋ ಹರಿಶ್ಚಂದ್ರ ಮಹಾರಾಜಂಡ ಬಲ್ಲಿಯೆ ಗುಣತ್ತೋ ಮೇಲ್ಕಟ್ಟತ್. ಇಂತೋರ್ ಮಹಾರಾಜಂಡ ಬಲ್ಯ ಗುಣತ್ತೋ ಮೇಲ್ಕಟ್ಟತ್. ಇಂತೋರ್ ಮಹಾರಾಜಂಡ ಸಂಪರ್ಕತ್ಲೆ ಇಂಜದೇ ತಾಂಡ ಪುಣ್ಯಾಂದೆಣ್ಣೆಯೆಂಡ್ ಪಣತ್ ತಾಂಡ ಯಜಮಾನಾನ ವಿಶ್ವಾಮಿತ್ರಂಗ್ ಒಪ್ಪಿಚಿಡೋಕ್ಕಾಯಿತ್ ನಕ್ಷತ್ರಕ ಪೋಟ್ ಪೋಯೆಂಡತ್.

ವಿಶ್ವಾಮಿತ್ರಂಗ್ ಪಿಂಞ ತಾಂಡ ಮನಕ್ ಎಲ್ಲಾ ವಿಷಯ ಪೊದ್ಂಜಿ ಬಾತ್. ಎಂತೋರ್ ಅಗ್ಗಿ ಪರೀಕ್ಷೆಕೂ ಹರಿಶ್ಚಂದ್ರ ಜಗ್ಗಲೆ. ಇಂಞ ಪ್ರಯತ್ನ ಮಾಡುವೀಂದ್ ನೆನತ್ತಿತ್ ಪಿಂಞೋರ್ ರೀತಿರ ಕಪ್ಪತ್ಲೆ ಯೋಚನೆ ಮಾಡ್ಚಿ.

ಚಂದ್ರಮತಿ ಪಿಂಞ ಕುಂಞ್ ಲೋಪಿತಾರ್ಕ ರುಟ್ಟಿಯ ಪುನಲ್ ಒಂದತ್.

ಓರ್ ಕರೆಲ್ (ತೂಟ್‌ಗಳ) ತಲ್ಲ ಚಾವುನ ಬೆಚ್ಚತ್. ಕುಂಞಿರ ಚಾವುನ ಚುಡ್ಡೋಕ್ ಪುಳ್ಳಿ ಬೋಂಡು. ಪುಳ್ಳಿ ಎಡ್‌ತವಕ್ ಪಣ ಇಲ್ಲೆ. ಅಲ್ಲಿ ಇಲ್ಲಿ ಬುದ್ಧಿತಿಂಜ ಪಾದಿ ಚುಟ್ಟಿತ್ ಚಾಡ್‌ನ ಪುಳ್ಳಿತುಂಡ್‌ನೆಲ್ಲಾ ಒಟ್ಟಿತ್ ಗುಡ್ಡೆ ಇಟ್ಟತ್. ಅಂಡ ಮೇಲೆ ತಾಂಡ ಕೈಯಿಂಜಿಯೇ ತಾಂಡ ಉಸ್‌ರಾನಿಂದ ಕುಂಞಿರ ಶರೀರತ್ ಬೆಚ್ಚತ್. ಅಲ್ಲಿಯೇ ಪಕ್ಕತ್ ಚುಡೋಂಜ ಚಾವುರ ತಿತ್ತಂಜ ಕತ್ತಿಯಂಡಿಂಜ ಕೊಳ್ಳಿನ ಬಲ್ಚಿತ್ ಕೊಂಡ್ ಬಂದಿತ್ ಮೋವಂಡ ಚಾವುಕ್ ತಿತ್ತ್‌ಕೊಡ್‌ಪಕ್ ಚಂದ್ರಮತಿ ಮೊಟ್ಟಾ ಮಿಂಞಕ್ ಇಟ್ಟತ್. ಅವಂಗ್ ಬಂದೊದಗ್‌ನ ಕೆಟ್ಟಿ ಗಳಿಗೆ ಪೆರ್ತ್ ಕರಿಣ.

ಇಪ್ಪರ್ತ ತೂಟ್‌ಂಗೊಳತ್ ಕುಂಞಿರ ಚಾವುನ ತಾಂಡ ಅವ್ವೊ ಚಂದ್ರಮತಿ ದಪನ ಮಾಡ್ಲೊ ಚಾಕ್ರಿಲ್ ಮೇಲೆಲ್ಲಾ ಕಣ್ಣಾಯಿತ್ ತೂಟ್‌ಂಗಳೊಳತ್ (ಸ್ಮಶಾನ) ಪಾರಕಾತಂಡಿಂಜ ಹರಿಶ್ಚಂದ್ರ ಬಂದಿತ್ ಚಂದ್ರಮತಿರ ಕಯ್ಲಿಂಜ ಕೊಳ್ಳಿನ ಅವಡ ಕಯ್ಲಿಂಜಿ ಬಲ್ಚಿ ಚಾಡಿತ್ ಪುಳ್ಳಿರ ಗುಡ್ಡೆರ ಮೇಲೆ ಬುದ್ಧವೊಚಿಟ್ಟ ಕಣ್ಣಂಡ ಚಾವುರ ಎಡ್ತೆಕಾಲಾನ ಪುಡ್ಡಿತ್ ಚಾಡ್‌ಚಿ. ಚಂದ್ರಮತಿಕ್ ದಿಕ್ ಕಾಣತ್ತಾಯಂಡತ್. ಗೊಳೋಂದ್ ಮೊರ್ಟಂಡ್ ಬೋಂಡ ಬೋಂಡ ಅವ ನಾಡ ಮೋವನಲ್ಲ, ನೀಡ ಮೋವ. ಚುಡುವೊಕ್ ಹುಕುಂ ತಕ್ಕಂಡೊಂದ್ ಬೋಡಿಯಂಡತ್.

ಈ ತಕ್ಕ ಕೇಟ ಹರಿಶ್ಚಂದ್ರ ತೂಟ್‌ಂಗೊಳತ್ (ಸ್ಮಶಾನತ್) ಪಾರಕ್ಕಾರ ಚುಡುವಾಂಗ್ ಮುಪ್ಪಡೆ ಚಾವುರ ಬಟ್ಟೆ ಎಡ್ಡಿತ್ ತಾ. ತೂಟ್‌ಂಗೊಳತ್ ಬಾಡಿಗ್ ಕೆಟ್ (ತರಂಡು) ಎಂದೆಣ್ಣಿತ್ ಹರಿಶ್ಚಂದ್ರ (ತೂಟ್‌ಂಗೊಳತ್ ಪಾರಕ್ಕಾರ) ಚಂದ್ರಮತಿಕೆಣ್ಣೆಚಿ. ನಾನ್ ಓರ್ ಯಜಮಾನಂಡ ಮನೆರ ಚಾಕ್ರಿಕರ್ತಿ ದಾಸಿ. ದೇವಕಿ ಬಡವತಿ ಕುಂಞಿರ ಚಾವು ಚುಡೋಕುಳ್ಳ ಕಂದಾಯ ಕಟ್ಟುವಕ್ ಓರ್ ಕಾಸ್‌ಂದ್ ದುಡ್ಡಿಲ್ಲೆಂದೆಣ್ಣೆಚಿ. ಈ ತಕ್ಕ ಕೇಟ ತೂಟ್‌ಂಗೊಳ (ಸ್ಮಶಾನ) ಕಾತಂಡ್ ಇಂಜ ಪಾರಕ್ಕಾರನಾ ಹರಿಶ್ಚಂದ್ರ (ಇರ್ಲ್ ಅಪ್ಪರಿಪ್ಪರ ಗೊತ್ತಾಗತ ಪರಿಸ್ಥಿತಿ) ಎಡ್ತೆ ಬಾಯಿಕ್ ನೀಡ ಕೊರತ್ತುಳ್ಳ ತಾಳಿನ ಅಡ್ಡೆ ಬೆಚ್ಚಿತ್ ಪಣ ಕೊಂಡ್ ಬಂದೆಣ್ಣೆಚಿ.

ಈ ತಕ್ಕ ಕೇಟ ಚಂದ್ರಮತಿಕ್ ದುಃಖ ತೊಂಬಂಡ್ ಬಂದ್ತ್. ತಾಂಡ ಮಾಂಗಲ್ಯ ಕಾಂಬ ತಾಂಡ ಒಡಿಯಂಗ್ (ಪತಿರಾಯ) ಮಾತ್ರ ಅಲ್ಲತೆಯೂ ವಡಿಯಂಗ್ ಎನ್ನೆಂಗಿ ವಡ್ವು ಉಂಡಾಚೇಂಗಿ ಮಾತ್ರ ಬೋರೆ ಜನಕ್ ಮಾತ್ರ ಕಾಂಬದುಳ್ಳದ್, ಈ ತೂಟ್‌ಂಗೊಳತ್‌ರ ಕಾವಲ್‌ಗಾರಂಗ್ ನಾಡ ಮಾಂಗಲ್ಯಿಯೂ ಕಾಂಬಕ್ ಕಟ್ಟುವಕ್ ಎಡೆ ಇಲ್ಲೆಲ್ಲಾಂದ್ ನೆನೆತಿಯಂಡ್ ತಾಂಡ ವಡಿಯಂಡ ನೆಟ್ಟೊಲೂ ಪೋಡಿ ಭಯ ಉಂಡಾಯಂಡತ್. ತಾಂಡ ವಡಿಯಂಗ್ ಏದು ರೂಪತ್ ಕೇಡ್ ಉಂಡಾಚೊ? ಈ ಮೋಂವಂಡ ಕೂಟ್‌ಕ್ ಇದು ಉಂಡಾಚಾಂದ್ ನೊಂದಂಡತ್. ಅಯ್ಯೋ ಮೋಂವನೆ ರಾಜಕುಮಾರಂಗ್ ಇನ್ನತ್ತೋರ್ ಚಾವು ಉಂಡಾಯಂಡತಲ್ಲ? ಚಾವು ಚುಡುವಕ್ ಕಂದಾಯ ಕೆಟ್ಟೊಚ್ಚಕ್ ದಾರಿದ್ರ್ಯ ಉಂಡಾಚಲ್ಲ. ನೀಡ ಅಪ್ಪ ಇಂಜಿತುಂಡೇಂಗಿ ಇಂತೋರ್ ಪರಿಸ್ಥಿತಿ ನೀಕ್ ಬಪ್ಪದಿಂಜತಾ? ಮಹಾರಾಜ ಹರಿಶ್ಚಂದ್ರಂಡ ರಾಜಕುಮಾರಂಗ್ ಈ ಗತಿಯಾ?

ಈ ತಕ್ಕನ ಕೇಟ ಹರಿಶ್ಚಂದ್ರ (ತೂಟ್‌ಂಗೊಳತ್‌ರ ಕಾವಲ್‌ಗಾರ) ನೆಡ್‌ಗ್‌ಚಿ. ಎಂತದ್ ವಿಧಿರ ಕಾಟ ಇನ್ನೆ ಉಂಡಾ? ಪುಳ್ಳಿರ ಮೇಲೆ ಬುದ್ದಂಡ್ ಇಂಜ ಚಾವು ಅದ್ ನಾಡ ಮೋಂವಂಡದಾ? ಚತ್ತ ಚಾವುನ ಚುಡುವಕ್ ಬಾಡಿಗೇ ತಪ್ಪಕ್ ಕಯ್ಯತೆ ಗೋಳ್‌ಡುವವ ಚಂದ್ರಮತಿಯ? ಮೊರ್ಟಿಂಜಿ ಪೊಣ್ಣಾಳ್‌ನೆ ಕೇಟತ್. ಎನ್ನ ಅಂವ ಹರಿಶ್ಚಂದ್ರಂಡ ಮೋಂವನೆಯಾ? ಕರುನ ಕತ್ರಿಚಿಡುವೊ ಕಥೆನೆಲ್ಲಾ ಕೇಟಂಜಂಡತ್.

ಎಚ್ಚಕೋ ಕಾಲ ಕೈಂಜ ಪಿಂಞ ಇಕ್ಕ ಒಬ್ಬನೊಬ್ಬನ ಕಂಡ ಚಕ್ರವರ್ತಿ, ನಡ್ಪಾದರೆಲ್ ತೂಟ್‌ಂಗೊಳತ್ಲ್ ಮೋಂವಂಡ ಚಾವುನ ಎದಿಕೆ ಬೆಚ್ಚೆಂಡ್ ಬಿಕ್ಕಿ ಬಿಕ್ಕಿ ಮೊರ್ಟತ್. ಆಚೇಂಗಿ ಹರಿಶ್ಚಂದ್ರ ತಾಂಡ ಕರ್ತವ್ಯತ್‌ಂಜ ಬಟ್ಟೆ ತಪ್ಪಿ ನಡ್‌ಂದ್‌ಲೆ. ಚಾವು ಚುಡುವೊಂಡೇಂಗಿ ನೆಲ ಬಾಡಿಗೇ ತಂದಿತೆ ತರಂಡು. ಚಾವು ಚುಡುವೊಂಡೇಂಗಿ ಎಲ್ಲಿಂಜಾಚೆಂಗ್ಯೂ ಬೋಡಿತ್ ಕ್ವಾಂದಾಂದ್‌ಣ್ಣೆ ಚಿ ಹರಿಶ್ಚಂದ್ರ. ಚಂದ್ರಮತಿ ಬೋರೆ ಬಟ್ಟೆ ಕಂಡ್‌ಲೆ. ಪಣಕೊಂಡ್ ಬಪ್ಪಕ್,

ಪುನಃ ಊರ್‌ರತ್ತಟಿ ಪೊರ್ಟತ್.

ಸೋಲಾರ ಮೇಲೆ ಸೋಲ್ ಅನುಭವಿಚಿಟ್ಟುಂಡಿಂಜ ನೇರತ್ ವಿಶ್ವಾಮಿತ್ರ ಕಡೆಯದಾಯಿತ್ ಇಂಞೋರ್ ಸಾಧನೆ ನಡ್ಚಿ. ಕಾಶೀರಾಜಂಡ ಮೋಂವ ಕಳ್ಳಂಗ ಅದೇ ಇಲ್ ಅರಮನೆಂಜಿ ಅಪಹರಣ ಮಾಡಿತ್ ಕಾಡ್‌ಕ್ ಕೊಂಡಬಾತ್. ಅವಂಡ ತಡಿಲಿಂಜ ಮಾಲ್‌ಮಟ (ಪದೀಚಿ)ತ್ರ ಆಸೆಕ್ಕಾಯಿತ್ ಅವನ ಕೊಂದಿತ್ ತಕ್ಕೊಂಡೂಂದ್ ಖಾತರಿ ಮಾಡಿತ್ತಿಂಜತ್. ಚಾಕ್‌ಲ್ ಆ ಕಣ್ಣಾನ ಕುತ್ತಿತ್ ಕೊಂದಿತ್ ಪದೀಚಿತ್ ಕೊಂಡ್ ಕೂಟ್‌ಚಿ. ಪ್ರಾಣಪೋಪಕ್ಕ ಆ ಕುಂಞಿ ಅವ್ಮಂದ್ ಕೂತ್‌ಟ್ಟಿತ್. ಆಂಡ ಸ್ವರ ಊರ್‌ಕ್ ಬಯ್ಯಕ್ ಪೋಯೆಂಡಿಂಜ ಚಂದ್ರಮತಿಕ್ ತಾಂಡ ಕುಂಞಿರ ಸ್ವರತ್ತರನ್ನಕ್ಕೇ ಕೇಟತ್. ಇವ ಒಬ್ಬ ಒಮ್ಮಕ್ಕೇ ಲೋಹಿತಾಶ್ವ ಕುಂಞೀಂದ್ ಕಿರ್ಚಿಯೆಂಡ್ ಬಂದ ಬಟ್ಟೆಕ್ ಓಡ್‌ಚಿ. ಓಡಿಯೆಂಡ್ ಬಂದಂಡಿಂಜ ಪೊಣ್ಣಾಳ್‌ನ ಕಂಡ ಕಳ್ಳಂಗ ಪಡಿಚಿತ್ ಅಕ್ಕ ಅಲ್ಲೆಯೇ ಬುಟ್ಟಿತ್ ಮರೆಯಾಚಿ. ಚಂದ್ರಮತಿ ಕುಂಞಿನೆಡ್ತಂಡ್ ತೊಡಲ್ ಬುದ್ಧವಚಿಟ್ಟಿತ್. ಕುಂಞಿರ ಮೇಲೆ ತವುಡಿಯೆಂಡ್ ಮೊರ್ಟತ್. ಆ ನೇರತ್ ರಾಜಂಡ ಮೋಂವನೋ ಪಿಂಞ ಕಳ್ಳಂಗಲೋ ತೇಡಿಯೆಂಡ್ ರಾಜಂಡ ಸೇವಕಂಗ ಬಂದಂಡಿಂಜತ್. ಇಪ್ಪತ್ ಚಂದ್ರಮತಿರ ಕಯಿಲ್ ಕುಂಞಿನ ಕಂಡತ್. ಅವಡ ಬಟ್ಟೆ ಚೋರೆಯಾಯಿತುಳ್ಳಾನ ಕಂಡತ್. ಅವಳೇ ರಾಜಂಡ ಕುಂಞಿನ ಕೊಂದವಾಂದ್ ತೀರ್ಮಾನ ಮಾಡಿರ್.

ರಾಜಭಟ್ಟಿಂಗ ಚಂದ್ರಮತಿನ ದರ ದರಾಂದ್ ಈತಂಡ್ ಪೋಯಿರ್‌ತ್. ರಾಜಂಡ ಮಿಂಞಲ್ ನಿಪ್ಪಚಿಟ್ಟಿತ್. ದುಃಖತ್ ಬೆಂಜಿಪೋಯಿತಿಂಜತ್. ಚಂದ್ರಮತಿ ಈಂಡೆಡೆಯೂ ವಡಿಯನ ಕಂಡಿತಿಂಜತ್. ಎನ್ನನೆ? ಚಕ್ರವರ್ತಿಯಾಯಿತಿಂಜವ (ರಾಜ) ತೂಟ್‌ಂಗೊಳತ್‌ರ ಪಾರಕಾಪಂವ, ಮೋಂವ ಚಿತ್ತಿತ್ ಚುಡೋಕ್ ಕಾಸಿಲ್ಲೆ. ತಾನೋ ನಿಷ್ಕರುಣಿಯಾನ ಯಜಮಾನಂಡ ಆಳ್. ಇಂಞಿ ಬದ್ಕಿತ್ತೆನ್ನಾಂಡಿಯೆ?

ರಾಜಂಡ ಪ್ರಶ್ನೆಕ್ (ಉತ್ತರ) ಜವಾಬ್ ಕೊಡ್ಕತೆ ಮಂಡೆ ಬಗ್ಗೆ ಚಿಟ್ಟುಂಡ್

ನಿಂದತ್ ರಾಜಂಗ ಅವಡ ವಿಷಯತ್ ಕನಿಕರ ಉಂಡಾಚಿ. ಆಚೇಂಗಿ ತಾಂಡ ಮೋಂವೊ ಚತ್ತತ್‌ಂದ್ ದುಃಖ ಕಾಡಿಯೆಂಡಿಂಜತ್. ಶನಿಕಾಟತ್ ಚಂದ್ರಮತಿಕ್ ಮರಣ ದಂಡನೆನ ತೂಟ್‌ಂಗಳತ್ರ ಪುಡ್ತುಳ್ಳ ವೀರಬಾಹುನ ಕಾಕಿತ್ ರಾಜ ಒಪ್ಪ್‌ಚಿಟ್ಟಿತ್. ವೀರಬಾಹು ಈ ಚಂದ್ರಮತಿಕ್ ಮರಣದಂಡನೆನ ನಡ್ತುಪೊಕ್ ತೂಟ್‌ಂಗಳತ್ರ ಪಾರಕಾರ ಹರಿಶ್ಚಂದ್ರಂಗ್ ಒಪ್ಪ್‌ಚಿಟ್ಟಿತ್.

ಮೋಂವಂಡ ಚಾವುನ ಚುಡೋಕ್ ಪೊಣ್ಣ್ ನೆಲ ಬಾಡಿಗ್ ಕೊಂಡ್‌ಬಪ್ಪಾಂದ್ ಪಾರ ಕಾತಂಡ್‌ಚ್ಚವಂಗ್ ಪೊಣ್ಣ್‌ರ ಕೊಲೆರ ಕೆಲಸ ನಾಕ್ ಬುದ್ಧತಲ್ಲಾಂದ್ ಹರಿಶ್ಚಂದ್ರ ತಾಂಡ ಮನತ್ ಎಣ್ಣಿಯವ. ಅದ್ ಯಜಮಾನಂಡ ಉಕ್ಕುಂ ಸೆರಿದೆಣ್ಣಿಯಂಡ್ ಚಂದ್ರಮತಿನ ಕೊಲೆ ಕಲ್ಲರ ಪಕ್ಕ ಕಾಕಿಯೆ ಪೋಯಿತ್ ಕಡೆಯದಾಯಿತ್ ನೀಡ ದೇವಳ ಪ್ರಾರ್ಥನೆ ಮಾಡಿಯಂದೆಣ್ಣ್‌ಚಿ. ಅವದಾರ್‌ಂದ್ ಹರಿಶ್ಚಂದ್ರ ಕೇಟರ್‌ಂಜಿಲೆ. ಅರಿಯಂಡಿಯೆ ಅವಶ್ಯಕತೆಯೂ ಅಂವಂಗಿಂಜಿಲೆ. ಅವ ಇಂಜ ಪರಿಸ್ಥಿತಿಲ್ ಅವಳ ಗೊತ್ತ್ ಮಾಡುವೊ ಅವಸ್ಥೆಲೂ ಅವ ಇಂಜಿಲೆ.

ತೂಟ್‌ಂಗಳತ್ರ ಕಾವಲ್‌ಗಾರ (ಹರಿಶ್ಚಂದ್ರ) ಮಾಡ್‌ನ ಹುಕುಂ ಪ್ರಕಾರ ಚಂದ್ರಮತಿ ಪದ್ಮಾಸನ ಇಟ್ಟಂಡ್‌ಚ್ಚತ್. ಕಣ್ಣ್ ಮುಚ್ಚಿತ್ ನಮಸ್ಕಾರ ಮಾಡಿಯೆಂಡ್ ಪರಮಾತ್ಮನ ನೆನತತ್. ಶಿವಂಡ ಸ್ವರೂಪತ್ ತಾಂಡ ಮನತ್ಲಾ ನೆಲೆ ನಿಪ್ಪ್‌ಚಿಟ್ಟಿಂಡತ್. ಅಯಿಂಡ ಗುರು ವಿಶಿಷ್ಟ ಮಹರ್ಷಿಕ್ ಅಂತರಾಳತ್ ವಂದನೆ ಮಾಡಿತ್ ತೊತ್ತಂಡತ್. ಪಿಂಞಿ ಆಕಾಶತ್ ನೋಟಿಯಂಡ್ ಹರಿಶ್ಚಂದ್ರರಾಯ ತಾಂಡ ಸತ್ಯತ್‌ಂಜಿ ಅಮರನಾಕಡ್‌ಂದ್ ಅಂವಂಡ ಕೀರ್ತಿ ಸೂರ್ಯಚಂದ್ರ ಇಪ್ಪಲಿಕೆತ್ತಣೆಕ್ ನಿಕ್ಕಡ್. ಚತ್ತ ಸುಪುತ್ರ ಬದ್ಕಡ್, ರಾಜ್ಯತ್ರ ಒಡೆಯ (ಯಜಮಾನ) ವಿಶ್ವಾಮಿತ್ರ ಸ್ಥಿರವಾಯಿತ್ತಿರಡ್. ಇದೇ ನಾಡ ಪರ್ಕೆ - ಹ್ಲೂಂ- ಕೊಲ್‌ಲೆಂದೆಣ್ಣ್‌ಚಿ.

ಮಂಡೆ ಬಾಂಗಿತ್ ಪೊಣ್ಣಾಳ್ ಪರಂದ ತಕ್ಕನ ಹರಿಶ್ಚಂದ್ರ ಕೇಟತ್.

ಅವ ತಾಂಡ ಕುಂಞಾನ ಚುಡೋಕ್ ಕಾಸ್ ಕೊಂಡ್ ಬಪ್ಪಕ್ ಪೋನ ಪೋಣ್ಣಾಳ್‌ಂದ್ ಗೊತ್ತಾಯೆಂಡತ್. ಮೋಂಪಂಡ ಚಾವೂ ಅಲ್ಲಿಯೆ ಬುದ್ಧಿತಿಂಜತ್. ಸೆರಿ, ಇದ್ ವಿಧಿರ ಬೋರೆ ಓರ್ ಬೋಟೇಂದೆಣ್ಣೆಯೆಂಡತ್. ಹರಿಶ್ಚಂದ್ರ, ಒನ್ನಾಂದಿಯೆಕ್ ಮಿಂಞಾ ಮೋವಂಡ ಚಾವು ಚತ್ತವನ ದಪನ ಮಾಡಿತ್ತಾಯಿತಿಲ್ಲೆ. ಇಕ್ಕ ಪೋಣ್ಣಾರ ಕೊಲೆ ಇದ್ ವಡಿಯಂಡ ಹುಕುಂ ವಿಧಿರ ಕೊದಿ. ಚಾಕ್ರಿ ಮಿಂಞಾಂದ್ ತೇರ್ಮಾನ ಮಾಡಿತ್ ಬಾಳ್‌ಕತ್ತಿ (ಖಿಡ್ಲ) ಕೊಡಿಕ್ ನೇತಿತ್ ಪೋಣ್ಣಾರ ಬೋಳೆಕ್ ಗುರಿ ಇಟ್ಟಿತ್. ಕೆತ್ತುವೊಕ್ ಸಿದ್ಧನಾಯಿತ್ ನಿಂದತ್.

ತಾಂಡ ಕುಲತ್ರ ಬೊಳ್ಳಾ ಇಂದ್ ಎದ್ ಕತ್ತುವಾ. ಜ್ಯೋತಿ ಕಾಂಬ ನೇರ ಬಾತ್‌ಂದ್ ಸೂರ್ಯ ಅಕ್ಕನ್ನೆ ಪುಟ್ಟಿತ್ ಕುಂದ್‌ರ ಕೊಡಿಯ ನಿಂದಿತ್ ನೋಟಿಯೆಂಡುಂಡ್. ಜಬ್ಬೂಮಿರ ಓರ್ ರಾಜ ಸ್ವರ್ಗ ಸಮಾನವಾನ ನಡೆಂಜಿ ದೈವದತ್ತ ಪಡ್‌ವೊ ಸಮಾರಂಭ (ಸಭೆನ) ನೋಟುಪೊಕ್ ದೇವತೆಯ ಮೇಲೆ ದಯ ಕಾಟೋಕ್ಯಾಗಂಜಿಲಿಯಾಂದ್ ವಿಶಿಷ್ಠ ಮಹಾಮುನಿ ಆತೂರತುಂಡ್. ಸಕಲ

"ನಾಡ ಕನ್ನಿಯಳ ಮಂಗಲಾಯಿರ್; ಎಲ್ಲಾ ವಿರೋಧತ್ ಬುಟ್ಟುವಿ, ಮೋಂವನ ಬದ್ಕಿಚಿಡಿ ಪೋಣ್ಣಾರ ಕೂಲೆ ತಪ್ಪಿಚಿಡಿ. ರಾಜ್ಯ ವೈಭವತ್ ಬಯ್ಯಕ್ ತಂದ್ರುವೀಂದೆಣ್ಣೆ ಚಿ ಅಸ್ವರ (ಕೂತ್)

ಈ ಕೂತ್‌ನ ಕೇಟ್ ಹರಿಶ್ಚಂದ್ರ ಒಮ್ಮ ಮಂಡೆ ನೇತಿತ್ ಕೊಡಿಕ್ ನೋಟ್‌ಚಿ. ಆ ಕೂತ್ (ಸ್ವರ) ವಿಶ್ವಾಮಿತ್ರಂಡ. ಅಕ್ಕ ಅವಂಡ ಮನಸಾಕ್ ತೋಂದ್‌ಚಿ. ನಾಕ್ ಬಂದ ಕಷ್ಟ ಕರ್ಮ ಫಲಾಂದೆಣ್ಣೆಯೆಂಡದ್ ತಪ್ಪಿ.

ವಿಧಿರ ಚದಿ, ವಿಧಿರ ದೋಷಾಂದೆಣ್ಣೆನದ್ ನಾಡದ್ ತಪ್ಪಂದೆಣ್ಣೆಯೆಂಡತ್. ಗುರುಸ್ವಾನ ನಿಪುಣನಾನ ವಿಶ್ವಾಮಿತ್ರ ಮಹಾಮುನಿರ ಕಾಟಿ, ಉಪದ್ರ ನಾಡ ಮೇಲೆ ಈ ಮಾದ್ರಿ ದ್ವೇಷ ಎನ್ನಂಗಾಯಿತ್ ಸಾದ್‌ಚಿಟ್ಟಂಡ್‌ಳ್ಳನೋ? ಎನ್ನೋ ಅರಿಯಲೆ, ಅಯಿಂಡ ಮುಡ್ಕಂಗಳೆಕ್ ನಾನ್ ಬೊತ್ತೋಕಾಗಾಂದೆಣ್ಣೆವ ನಿರ್ಧಾರಕ್ ಬಂದಂಡತ್ ಸತ್ಯ ಹರಿಶ್ಚಂದ್ರ.

ವಿಶ್ವಾಮಿತ್ರನು ಕೂತ್‌ಕ್ ಮರಕೂತಾಯಿತ್ ತಾಂಡ ಸತ್ಯತ್ರ ಭೀರ್ಯತ್ ಧರ್ಮಕಟ್ಟೆತ್ ಓ ಪೂಜ್ಯಂಗಲೇ, ಅಂತೋರ್ ತಕ್ನನ ಪಿಂಞ ಪರಿಯತ್ತಿರಿ. ನಾಕ್ ಇಕ್ಕ ಏದೋರ್ ತರತ್ರ ಲೋಭವೂ ಇಲ್ಲೆ. ಉಳ್ಳದ್ ಒಂದೇ ಅದೆನ್ನತದೆಣ್ಣೆ ಚೆಂಗಿ ಸತ್ಯ ಪರಿಪಾಲನೆ ಚಂಡಾಲ ವೃತ್ತಿಯಾಯಿತ್, ಪೊಣ್ಣಾಳ್ (ಪೊಣ್ಣೆ) ರಾ ಕೊಲೆ ಆಕಂಡಿಯದುಂಡ್ ಆಯೋಡ್. ಪರಂದ ತಕ್ನ ನಡಂದೋಡ್. ಇಟ್ಟ ಆಣೆ (ತಂದ ಭಾಷೆ) ನಡಂದೋಡ್, ತಪ್ಪತ್ತಿಕ್ಕಡ್ ಎಂತಾಚೆಂಗ್ಲೂ, ತಂಗಡ ಅನುಗ್ರಹ (ಆಶೀರ್ವಾದ)ವೊಂದಿಕ್ಕಡ್ ಎಂದೆಣ್ಣೆಯುಂಡ್ ಕತ್ತಿನ ಓಂಗಿತ್ ಬೀಜೆ ಕೆತ್ಚಿ.

ಅಯ್ಯೋ, ಅಪರಿಸ್ಥಿತಿನ ಆದಿಶೇಷನಂಗುಂಡೂ ವಿವರಿಚೋಡಕ್ ಕಯ್ಯಲೆ. ಕಡ್ಜನೆ ಅಲ್ಲಿಯೋರ್ ಆಶ್ಚರ್ಯತ್ರ ಸಂಗತಿ ಕಂಡತ್. ಹರಿಶ್ಚಂದ್ರಂಡ ಕತ್ತಿರ ಬಾಯಿ ಚಂದ್ರಮತಿರ ಕೊರಕ್ ಪಡುವೊ ನೇರತ್ ಆ ಕತ್ತಿಯೇ ಪರಮೇಶ್ವರಂಡ ರೂಪ ತಾಳಿತ್ ನಿಂದೆನ್ನಕ್ಕಾಯುಂಡತ್. ಈಶ್ವರ ಪಾರ್ವತಿರ ಕೂಡ ಪ್ರತ್ಯಕ್ಷವಾಯಿತ್ ಅಭಯ ಹಸ್ತಕ್ ಆಶೀರ್ವಾದ ಮಾಡುವ ಮಹಿಮಾ ಪೂರ್ವಚಿತ್ರ (ಪರಿಸ್ಥಿತಿ) ಉಂಡಾಚಿ (ಕಂಡತ್) ಸತ್ಯ ಹರಿಶ್ಚಂದ್ರ ಕಡ್ಜನೆ ಶಿವಂಡ ಪಾದತ್ರಡಿಲ್ ಸಾಷ್ಟಾಂಗವಾಯಿತ್ ಬುದ್ಧಿತಿಂಜತ್. ಹರಿಶ್ಚಂದ್ರ ಸತ್ಯಚಾರಣೆಂಜಿ ಅಲ್ಲಿ ಕೂಡ್‌ನೈಂಗಕ್ ಪಾರ್ವತಿ ಪರಮೇಶ್ವರಂಡ ದರ್ಶನತ್ ಉಂಡಾಕ್‌ಚಿ.

ಪಾರ್ವತಿ ಪರಮೇಶ್ವರಂಗ ಪ್ರತ್ಯಕ್ಷವಾಯಿತ್ ಎಲ್ಲಾ ಕೂರ್ ಕಾಂಬ್‌ಚಿಟ್ಟುಂಡತ್. ಹರಿಶ್ಚಂದ್ರ ಪಿಂಞ ಅವಂಡ ಸಂಸಾರ (ಪೊಣ್ಣೆ ಮಕ್ಕ)ಕ್ ಬೋಂಡಿಯಚ್ಚಕ್ ಕಷ್ಟ ಕಾರ್ಪಣ್ಯ ಕೊಡ್‌ತಿತ್ತು ಹರಿಶ್ಚಂದ್ರಂಡಲ್ಲಿ ಓರಿಚ್ಚಕ್ಕೂ ಪೊಟ್ ಅಸತ್ಯತ್ಯ ಕಾಣತ ವಿಶ್ವಾಮಿತ್ರ ಓಡಿ ಬಂದಿತ್ ಪಾರ್ವತಿ ಪರಮೇಶ್ವರಂಗಕ್ ಸಾಷ್ಟಾಂಗ ನಮಸ್ಕಾರ ಮಾಡಿತ್ ಕೈತೊತ್ತಂಡ್ ನಿಂದತ್. ಅಕ್ಕನೇ ಈಶ್ವರಂಡ ಕೃಪಾಕಟಾಕ್ಷುಂಡ್ ಲೋಹಿತಾಶ್ವನ ಬದ್ಕೆಚಿಟ್ಟುತ್. ಹರಿಶ್ಚಂದ್ರ ನೀನ್ ಗೆದ್ದುಟೆಯಾ ನೀಡ ಸಮಾನಂಗ ದಾರೂ ಇಲ್ಲೆಂದೆಣ್ಣೆ ಚಿ. ತಂಗ ವಿಶಿಷ್ಟಂಡ ಕೂಡ ಉಂಡಾಕ್‌ನ ಪೈಪೋಟಿ ತಂಗ ಮಾಡಿಯುಂಡ ಪ್ರತಿಜ್ಞೆ. ಪ್ರತಿಜ್ಞೆನ

ನೆರವೇತುಪೊಕ್ಕಾಯಿತ್ ಅಂವಂಗ್ ಕೊಡ್ತ ಕಷ್ಟ ಪರಂಪರೆ, ಅದತ್ ಅಂವ ಜೈಚಂಡ್ ಬಂದ ಮಾದ್ರಿ ಎಲ್ಲಾನ ವಿಸ್ತಾರವಾಯಿತ್ ವಿಶ್ವಾಮಿತ್ರ ಎಣ್ಣೆ ಕಾಟ್‌ಚಿ.

ಹರಿಶ್ಚಂದ್ರ ತಾಂಡ ಪೊಣ್ಣ್ ಮೋವನೋ ಮಾರಿಯ ಅಗ್ನಿ ದೇವಂಗ್, ಅಂವ ಆಳಾಯಿತ್ತಿಂಜಿಯ ವೀರಬಾಹುರ ರೂಪ ತಾಳ್‌ನ ಯಮರಾಜಂಗ್ ಮೊಂವೊ ಚಿತ್ತದ್ ಒರ್ ನಾಟಕಂದೂ ಎಣ್ಣೆ ಕಾಟ್‌ಚಿ.

ಸರ್ವ ಋಷಿಯಡ, ದೇವತೆಯಡ, ಪರಮೇಶ್ವರಂಡ ಎದಿಕೆ ವಿಶ್ವಾಮಿತ್ರ ಸಂಪಾದನೆ ಮಾಡ್‌ನ ಪುಣ್ಯತ್ರ ಪಾದಿ ಭಾಗತ್ತ್ ಧಾರೆ ಬೂಕಿತ್ ಹರಿಶ್ಚಂದ್ರಂಗ್ ಬಪ್ಪಚಿಟ್ಟ್ ಕೊಡ್ತತ್.

ವಶಿಷ್ಠ ಮಹಾಮುನಿ ತಾಂಡ ಶಿಷ್ಯೆ ಸತ್ಯ ಹರಿಶ್ಚಂದ್ರಂಡ ನಡೆನೆ ಮೆಚ್ಚಿಯಂಡತ್. ಇಂದ್ರನೂ, ಬೋರೆಲ್ಲಾ ದೇವತೆಯಳೂ ಸಂತೋಷತ್ರ ಪೂಮಳೆ ತೊಂರ್ಜತ್. ವಿಶ್ವಾಮಿತ್ರ ಮಹಾಮುನಿ ರಾಜ್ಯತ್ತ್ ಯಥಾವತ್ತಾಯಿತ್ ಸತ್ಯ ಹರಿಶ್ಚಂದ್ರ ಮಹಾರಾಜಂಗ್ ಒಪ್ಪಚಿಟ್ಟತ್.

ಕೊಡವ ಮಾಲೆ ಪೊಮ್ಮಾಲೆ ಕೊಡಗ್‌ಕ್ ಸತ್ಯ ಹರಿಶ್ಚಂದ್ರ ಏದ್ ಪವಾಡತ್ ಬಾತ್? ಏದ್ ಕಥೆ ಕೆಟ್ಟಿತ್ ಪೊದುವಾಡ ಹರಿಶ್ಚಂದ್ರತ್ ನೆಲೆಗೊಂಡತ್. ಅಯಿಂಡ ಅವತಾರ ಏದೇದ್ ಸ್ವರೂಪತ್ತಿಂಜತೇಂದ್ ಓದಿನೋಟನ. ಏದೇದ್ ಕಥೆ ಕೆಟ್ಟಚೀಂದ್ ನೋಟನ.

ದೇವಾನ್ವೇವತೆಯಳೇ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್‌ಲ್ ಅಲ್ಲಲ್ಲಿ ನೆಲೆ ನಿಂದಿತ್ ಓರೋರ್ ಪವಾಡ ಉಂಡಾಕಿತ್ ಸತ್ಯ ಪ್ರಮಾಣ ಉಂಡಾಕಿತ್‌ಂದಿಪ್ಪಕ್ಕ ಈ ನೆಲತ್ ಓರೋರ್ ನೀಚ ಕೃತ್ಯತ್ತ್ ಚೆನ್ನಂಗ್ ದುಷ್ಟಮಿಯ ಉಂಡಾಕಿತ್ ಶಾಂತಿ ಕೆಡ್ತುವೊಕ್ ಪೊಟ್ಟಾಂಗಳೆ (ದುಷ್ಟಂಗಳೆ) ಅಲ್ಲಲ್ಲಿ ಚಾಯಿಚಿಟ್ಟಿತ್. ತಿದ್ದಿತ್ ದುಷ್ಟಂಗಳ್ ಆಂಡಾಡ ಶಿಕ್ಷೆ ಕೊಡ್ತೇತ್. ದೇವಾನ್ವೇವತೆಯಡ ಫಲ ಮಹಿಮೆನ ಕಾಟಿತ್ ಈ ಮಣ್ಣೆರ ಶಕ್ತಿನ ಕಾಟಿತ್ ಉಳಿಕೆ ಮಾಡಿತ್ತಿಪ್ಪಕ್ಕೆ ನಂಗನಂಗಾಂದ್ ಮನಕ್ ತೊಂದತೆಯೂ ಇಲ್ಲೆ. ಕೂಟ್‌ಕ್

ಮಾಪಿಳ್ಳೆ ತಕ್ಕೂರ ಪಳಂಜೊಲ್ಲ ಪೋಲೆ ಪಳ್ಳಿಂಡೆ ಕಾರ್ಯ ಅಲ್ಲಾಹುಕೇ ಅರಿಯಾಂದ್ ಅದದ್ ನೆಲೆ ಎಡ್ಡದೆ ದೇವೊಮಕ್ಕೆ ಗೊತ್ತ್. ಅಂತೂ ಇಂತೂ ಉಪ್ಪ್ ತಿಂದಂವಂಗ್ ಉಪ್ಪ್ ಕೂಲಿ ಮುತ್ತ್ ತಿಂದವಂಗ್ ಮುತ್ತ್ ಕೂಲಿಂದಾಕಡ್.

ವಿಶ್ವಾಮಿತ್ರ ಮಹರ್ಷಿ ವಿಶಿಷ್ಟ ಮಹರ್ಷಿಕೂ ಸತ್ಯತ್ರ ಸತ್ಯಾಂಶತ್ರ ತಕ್ಕೊ ಮೊಳ್ಳಿತ್ ಎನ್ನನಲ್ಲಾಯಿತ್ ಸತ್ಯ ಹರಿಶ್ಚಂದ್ರ ಮಹಾರಾಜ ಲೋಕತ್ ಜಬ್ಬೂಮಿಲ್ ಸತ್ಯ ಮಿಗಿಲಾನ ಮಹಾಪುರುಷಂದ್ ವಶಿಷ್ಟ ಮಹರ್ಷಿರ ಬಾಯಿಲ್ ಬುದ್ಧಿತ್ ಆನ ತೀರ್ಮಾನ ಮಾಡೋಕ್ಕಾಯಿತ್ ವಿಶ್ವಾಮಿತ್ರ ಮಹಾಮುನಿ ಹರಿಶ್ಚಂದ್ರಂಡ ಮೇಲೆ ಅವಂಡ ಸಂಸಾರತ್ರ ಪೆರ್ತ್ ತಿತ್ತನ ತೊಂಜಿತ್ ಸತ್ಯ ಹರಿಶ್ಚಂದ್ರ ತಾಂಡ ಪತಿವ್ರತೆ ಅರ್ಧಾಂಗಿ ಚಂದ್ರಮತಿ ಪಿಂಞ ಮೋಂವೊ ತಿತ್ತ ಚಡಿ ಸತ್ಯ ಪೊದಿಯಾನ ಲೋಹಿತಾಶ್ಚಂಡ ಒಬ್ಬುದ್ಧಿಲ್ ಮಳೆಯಾಯಿತ್ ಬಂದಾನ ಮಂಜಿಯಾಯಿತ್ ಪಾರ್ವತಿ ಪರಮೇಶ್ವರಂಗಡ ಸಹಾಯತ್ ಸತ್ಯ ಹರಿಶ್ಚಂದ್ರ ಮಹಾರಾಜ ಇಡೀ ಲೋಕಕೂ ಸೂರ್ಯ ಚಂದ್ರಂಗಕೂ ಸತ್ಯ ಪ್ರಧಾನಿಯಾಯಿತ್ ದೃಢ ಸಂಕಲ್ಪತ್ ಸಾಬೀತ್ ಮಾಡಿ ಕೊಡ್ತತ್.

ಸತ್ಯತ್ ಗೆದ್ದ ಸತ್ಯ ಹರಿಶ್ಚಂದ್ರ ಮಹಾರಾಜ ಜಬ್ಬೂಮಿಲ್ ನಲ್ಲಾಮೆ ಕೆಯ್ಯೊಕ್ಕಾಯಿತೂ ಲೋಕತ್ ಮಾಲೋಂಗಳ ನಲ್ಲ ಬಟ್ಟೆಕ್ ಕ್ಷಾಂದಾಪಂಗಾಯಿತೂ ತಾಂಡ ರಾಜ್ಯಭಾರತ್ರ ಹೊಣೆನ ಸಿಂಹಾಸತ್ಯ ತಾಂಡ ಮೋವಂಗ್ (ಲೋಹಿತಾಶ್ಚಂಗ್) ವಹಿಸಿಕೊಡ್ತತ್. ತಾನ್ ದೇಶಾಟನೆಕೆಂದ್ ಪೂರ್ಟತ್. ದೇಶಾಟನೆಕೆಂದ್ ಪೂರ್ಟತ್ ಹರಿಶ್ಚಂದ್ರ ಮಹಾರಾಜ ಏಲೇಲೆಯೋ ನಡ್ಂದ್ ಕೂಟಿತ್ ಮಣ್ಣಿನ ಪವಿತ್ರ ಮಾಡಿಯೆಂಡ್ ಸುತ್ತಿ ಸುತ್ತಿ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್ಕ್ ಮೊಟ್ಟ್ಪಟ್ಟಿತ್ ಪಾಲೂರಾರ ಪಕ್ಕ ಹರಿಶ್ಚಂದ್ರಂದೆಣ್ಣು ವಲ್ಲಿಕ್ ಬಂದಿತೆತ್ತಚಿ.

ಆಲೆ ಈಲೇಂದೆಣ್ಣು ವೊಕ್ಕ ಅಂದಿಮುಂದಿ ನೇರ ಸಂಧ್ಯಾವಂದನೆ

ಮಾಡಂಡಿಯ ನೇರ (ನಿತ್ಯ) ಪೂಜೆ ತಾಂಡ ಪಕ್ಕ ಇಂಜ ಅಪೂರ್ವ ಸ್ವಟಿಕತ್ರ ಶಿವಲಿಂಗತ್ವ ಅಲ್ಲಿ ಓರ್ ಮರತ್ರಡಿಲ್ ಬೆಚ್ಚಿತ್ ಪಕ್ಕತ್ತೇ ಇಂಜ ಚೆರಿಯ ಪೊಳೆಕ್ ಪೋಯಿತ್ ಕುಳ್ಳಿತ್ ಬಂದಿತ್ ಪೂಜೆ ಮಾಡ್ಪೊಕ್ ನೋಟಣೆಕ್ ಅಲ್ಲಿ ಬೆಚ್ಚಿತ್ತಿಂಜ ಅಪೂರ್ವ ಶಿವಲಿಂಗ ಕಾಂಗತ್ತಾಯಿತ್ತಿಂಜತ್. ಆನೇರತ್ ಮಹಾ ಸತ್ಯವಂತನೂ, ಜ್ಞಾನಿಯು ಆಯಿತ್ತಿಂಜ ಸತ್ಯ ಹರಿಶ್ಚಂದ್ರ ಮಹಾರಾಜಂಗ್ ಗೋತ್ತಾಚಿ. ಅದ್ ಭೂಮಿಲ್ ಅಂತರ್ಗಾಮಿಯಾಯಿತುಂಡೇಂದ್.

ಅಕ್ಕ ಮಹಾರಾಜಂಗ್ ಈ ಮಣ್ಣ್ ಭಾರೀ ಪವಿತ್ರವಾನದೂ ಪಿಂಞ ಶಕ್ತಿಯುತವಾನ ಮಣ್ಣೇಂದ್ ಅರಿವಾಚಿ. ಅನ್ನನೆ ಬಯ್ಯಕ್ ಪೋಪಂಜಿ ಇಕ್ಕ ಉಳ್ಳ ಕಾವೇರಿ ಪೊಳೆರ ಕರೆಲ್ ಯಜ್ಞಕುಂಡ ತಯಾರ್ ಮಾಡಿತ್ ಯಜ್ಞಕ್ ಸುರು ಮಾಡಿತ್ ಎಚ್ಚಕ್ಕೊ ಕಾಲ ಯಜ್ಞ ಮಾಡ್ನ ಗುರ್ತ್ ಇಕ್ಕಲೂ ಉಂಡ್. ಅದ್‌ಂಗ್ ಉದಾಹರಣೆ ಬಲ್ಯ ಬಲ್ಯ ಪೂಜೆಕ್ ಯಜ್ಞತ್ರ ಮಣ್ಣ್ ಬೋಂಡೂಂದೆಣ್ಣ್ ಚೆಂಗಿ ಭಕ್ತಂಗ ಹರಿಶ್ಚಂದ್ರಂಡಲ್ಲಿಕ್ ಬಂದಿತ್ ಎಡ್ತಪೋಪ. ಆಧಾರ ಉಂಡ್ (ಇಂದೂ) ಅಲ್ಲತೆ ಮಹಾರಾಜಂಡ ಕಾಲತ್ತೇ (ತಪಸ್ಸು ಮಾಡ್ನ ಇಲ್ಲಿ ಶಿವಲಿಂಗ ಸ್ಥಾಪನೆ ಮಾಡಿತ್ ಶಿವ ದೇವಸ್ಥಾನತ್ತೋಡೆ ಪೂಜೆ ಪುರಸ್ಕಾರ ಮಾಡಿಯೆಂಡಿಂಜ ಆಧಾರ ಇಂದೂ ಕಂಡ್ ಬಪ್ಪ. ಅನ್ನನೆ ಹರಿಶ್ಚಂದ್ರ ಇಲ್ಲಿ ನೆಲೆ ನಿಂದತ್.

ಇನ್ನನೆ ಇಪ್ಪ ಕಾಲತ್ತ್ ಎಂಗಡ ಅಧಿದೇವತೆಯಾನ ಶ್ರೀ ಮೂಲ ಕಾವೇರಮ್ಮ ಮಹಾತಾಯಿ ಏಳ್ ಕೋಟಿ ತೀರ್ಥ ಪೊರಿಯೋಡೆ ಪರಿಯೊಕ್ಕ ಪಕ್ಕ ಕವೇರ ಮುನಿಯೂ, ಅಗಸ್ತ್ಯ ಮಹಾಮುನಿಯೂ ನೀನ್ ಭಾರೀ ಸತ್ಯವಂತನೂ, ಹರಿಶ್ಚಂದ್ರ ಮಹಾರಾಜಂಡ ಪಾದಧೂಳನ್ ಕತ್ತಿಯೆಂಡ್ ಪೋಂಡೂಂದ್ ಎಣ್ಣಾನಾಂಗ್ ಬಗ್ಗಿತ್ (ಒತ್ತಿತ್) ಏಲೇಲೆಯೋ ಪರಂಜಿ ಪೋಂಡಿಯ ಕಾವೇರಿ ಪೊಳೆ ಆಶ್ಚರ್ಯ ರೀತಿಲ್ ಹರಿಶ್ಚಂದ್ರಂಡಾಲೆ ಬಂದಿತ್ ಹರಿಶ್ಚಂದ್ರಂಡ ಪಾದತ್ತ್ ಕತ್ತಿಯೆಂಡೇ ಕಾವೇರಿ ಪೊಳೆ ಪೋಯೆಂಡುಂಡ್.

ಅಲ್ಲತೆ, ತುಲಾ ಸಂಕ್ರಮಣ ಆನಾಂಡಪಿತ್ಯಾದಿಕ ಇಲ್ಲಿ ಜಾತ್ರೆ ನಡ್ಪ. ಆ ನೇರತ್ ಕಾವೇರಿಕ್ ಪೋಪಕ್ ಕಯ್ಯತ್ಯೆಂಗ ಇಲ್ಲಿ ಚತ್ ಕೆಟ್ಪೋನ

ಪೆರಿಯಯಿಂಗಕ್ ಪಿಂಡ ಬೆಪ್ಪ ಚಾಕ್ರಿ ನಡ್ಡ. ಅಲ್ಲತೆ ಮಹಾಲಿಂಗೇಶ್ವರ (ಪಾಲೂರಪ್ಪ) ಪಾರ್ವತಿ ಪರಮೇಶ್ವರ) ದೇವಡ ಜೋಡಿ ತಡಾಂಬ್ ಇಕ್ಕ ಎಣ್ಣವೊ ಎಪ್ರೆಲ್ ತಿಂಗ ಪದ್ಧಟ್ಟ್ ಪತ್ತೊಯಿಂಬದಾರಂದ್ ನಮ್ಮೆ ನಡಾಪ. ಪಾಲೂರಪ್ಪ ದೇವ (ಮಹಾಲಿಂಗೇಶ್ವರ)ಡ ದೇವಕುಳಿಪ ದಿನ ಜೋಡಿ ತಡಾಂಬನೆಡ್ತಂಡ್ ಸತ್ಯ ಹರಿಶ್ಚಂದ್ರಂಡ ನೆಲೆಕ್ ಬಂದಿತ್ ಅಲ್ಲಿ ಲಿಂಗತ್ರ ಪಕ್ಕ ದಂಡ್ ಬಿಂಬತ್ ಬೆಚ್ಚಿತ್ತಿಪ್ಪ. ಅಲ್ಲಿಂಜ ದೇವ ಕುಳ್ಳಿತ್ ಮೂಂದ್ ಸುತ್ತ ಬಂದಿತ್ ಅಲ್ಲಿ ಪೂಜೆ ಪುರಸ್ಕಾರ ತೇತಿತ್ ಮಹಾಲಿಂಗೇಶ್ವರ ದೇವಸ್ಥಾನಕ್ ಬಪ್ಪ. ಇದ್ ಎಂತ ಪಾವಿತ್ರತೆ. ಅಂದ್ ಸತ್ಯ ಹರಿಶ್ಚಂದ್ರ ಮಹಾರಾಜಂಡ ಸತ್ಯಕ್ ಮೆಚ್ಚಿತ್ ಪಾರ್ವತಿ ಪರಮೇಶ್ವರಂಗ್ ಪ್ರತ್ಯಕ್ಷವಾಯಿತ್ ವರ ಕೊಡ್ತತ್. ಇಂದಿಕ್ಕ ಕಲಿಯುಗ ಆಯಿತುಂಡೆಂಗ್ಲೊ ಹರಿಶ್ಚಂದ್ರಂಡ ಪಕ್ಕತ್ತೇ ಪಾರ್ವತಿ ಪರಮೇಶ್ವರಂಗ ಪರೋಕ್ಷ ದರ್ಶನತ್ ಸಮ್ಮಂಧ ನಡ್ತಿಯೆಂಡೂ ಉಂಡ್. ಮಾಲೋಂಗಳೊ ಜೀವರಾಶಿಯೊಳೂ ಚಾಕ್ರಿ ಪೊಲ್ತಿಯೆಂಡುಂಡ್. ಅದೂ ಕೊಡವ ಮಾಲೆ ಪೊಮ್ಮಾಲೆ ಕೊಡಗಾರ ಶ್ರೀಮೂಲ ಕಾವೇರಮ್ಮೆ ಮಹಾ ತಾಯಿರ ಪೊನ್ನ ಭೂಮಿ ಪವಿತ್ರ ಭೂಮಿ ಮಣ್ಣಾಲ್ ನಂಗ ಎಚ್ಚಕ್ ಧನ್ಯಂಗ. ನಂಗಲೂ ಇಂಞಿ ಶ್ರೀ ಮೂಲ ಕಾವೇರಮ್ಮೆರ ಕೊಡವ ಮಾಲೆ ಪೊಮ್ಮಾಲೆ ಕೊಡಗಾರ ಮಣ್ಣು ಧನ್ಯ ಪಾವನವಾಯಿತುಂಡೆಂದೆಣ್ಣವೊತ್ಲ ದಂಡಿಲ್ಲೆ.

ಇನ್ನನೆ ಇಪ್ಪ ಕಾಲತ್ ಕೊಡಗಾನ ಆಳಿಯಂಡಿಂಜಿಯ ಲಿಂಗರಾಜಂಗ್ (ತಾಂಗ್) ನಾಕ್ ಹರಿಶ್ಚಂದ್ರಂಡ ಮಹಿಮೆನ ಕೇಟಿತ್ ಅಲ್ಲಿ ಬಪ್ಪಂಜಿ ನಿತ್ಯ ಪೂಜೆ ಮಾಡೋಂದೂಂದೆಣ್ಣವೊ ಪುರ್ಡ್ ಉಂಡಾಚಿ. ಅನ್ನನೆ ಇಪ್ಪಕ ಅಲ್ಲಿಯೋರ್ ಅರಮನೆ ಕಟ್ಟೋಂಡೂಂದ್ ಹರ ಪುಡ್ಡತ್. ಇಕ್ಕ ಉಳ್ಳ ಪೊಳೆರ ಆಬರಿ ಬೇತ್ ಗ್ರಾಮಕ್ಕಡಾಂಗ್ ನ (ಇಕ್ಕ ಆಸ್ತಿ) ಜಾಗತ್ ಅರಮನೆ ಕಟ್ಟುವೊಕ್ ಬಲ್ಯ ದಳ (ಅಯಕಟ್ಟ್) ಎಡಾಪಕ್ ಸುರು ಮಾಡ್ಚಿ. ಇಲ್ಲಿಯೆತ್ರ ವಿಶೇಷತೆಂದೆಣ್ಣಕ್ಕ ಕೊಡಿಲೆಣ್ಣಿಯಂಡ್ ಅಪ್ಪಣೆ ಮೇರೆ ಕಾವೇರಮ್ಮೆ ಮಹಾತಾಯಿ ಹರಿಶ್ಚಂದ್ರ ದೇವಡ ಕಾಲ್ ಕತ್ತೋಕ್ಕಾಯಿತ್ ತಿರಿತ್ ಇಂಗ್ಲಿಷ್ ಅಕ್ಷರ ಯೂ (U) ಆಕಾರತ್ ಚಿಹ್ನೆ

ಉಂಡಾಯಿತ್ ಪಂಜಿತ್ ಲಿಂಗರಾಜ (ಯೂ) ಮಾದರಿ (ಸೇಪ್)ರ ಮಾದ್ರಿಲ್ ಇಂಜ ಪೊಳೆನ ತುಂಡ್ ಮಾಡಿತ್ ಅಲ್ಲಿ ಕಟ್ಟಿ ಕಟ್ಟಿತ್ ದೇವಡ ಪೂಜೆ ಮಾಡುವಕ್ಕುಳ್ಳಾಂಗ್ ಏರ್ಪಾಡ್ ಮಾಡಿತ್ ಪೊಳೆನ ತುಂಡ್ ಮಾಡ್‌ಚಿ.

ಆ ನೇರತ್ಲ ಶ್ರೀ ಮೂಲ ಕಾವೇರಮ್ಮ ಮಹಾತಾಯಿ ರಾಜಂಗ್ ಸೊಪ್ಪತ್‌ಲ್ (ಇಲ್ಲೆ) ಬಂದಿತ್ ಓಹೋ ರಾಜನೇ ನೀನ್ ಪೆರ್ತ್ ಬಲ್ಯ ಚಾಕ್ರಿ ಮಾಡಿಯೆಂಡುಳ್ಳಿಯಾ, ನೀನ್ ಎನ್ನನೆಯೂ ಎಚ್ಚಕ್ ತುಂಡ್ ಮಾಡ್‌ಚೆಂಗ್ಲೂ ನಾನ್ ನೀನ್ ತುಂಡ್ ಆಪಾಲೆ. ಪರಾಂಜಿ ಪೋಪುಲೆ. ನಾನ್ ಪೆರಿಯೆಯಿಂಗ ಎಣ್ಣೆನಾಲೆ ಪೋಪದುಂಡ್.

ಇದಾನೋ ಮೀರಿತ್ ರಾಜ ಇಟ್ಟಿಗೆ ಕಡ್ಲೋಕ್ ಸುರು ಮಾಡೋಕ್ಕಾಪೆಕ್ ವಜ್ರದುಂಬಿ ಬಂದಿತ್ ಇಟ್ಟಿಗೆ ಕಡ್ಲೆಯಿಂಗಕ್ ಕಡ್ಡಿತ್ ಇಟ್ಟಿಗೆನ ಪೊರ್ತಂಡಿಂಜೆಂಗ ಇಟ್ಟಿಗೆನ ಅಲ್ಲಲ್ಲಿ ಚಾಡಿತ್ ಬುಟ್ಟ್ ನಡಂದದ್, ಅಲ್ಲಿ ಒಯಿಂಜಿತ್ತಿಂಜದ್ ಕಂಡಾಧಾರ ಉಂಡ್.

ಇನ್ನನೆ ಇಂಜ ಕಾಲತ್ ದೇವಸ್ಥಾನತ್ಲ ಡಿಸೆಂಬರ್ 2001ಂಡ ಅವಧಿಲ್ ದುಷ್ಕರ್ಮಿಯ ಫಲವಿಧತ್ಲ ಅಪವಿತ್ರ ಮಾಡಿತೂ ಕೆಜ್ಜತ್. ಈ ನಾಟ್ಪಲ್ ಇಡೀ ಕೊಡವ ಮಾಲೆ ಪೊಮ್ಮಾಲೆ ಕೊಡಗ್‌ರ ಎಲ್ಲಾ ಭಕ್ತಂಗ ಒಂದಾಯಿ ಕೂಡಿತ್ ಪೋರಾಟ ಪ್ರತಿಭಟನೆ (ಅರ್ಕತ್) ಮಾಡಿತ್ ಕೋರ್ಟ್ ಕಛೇರಿ ಪತ್ತಿತ್ ಫಲತರತ್ಲ ನಷ್ಟ ಕಷ್ಟ ಅನುಭವಿಚಿಟ್ಟಿದ್ ಎಲ್ಲಾಕೂ ಅಂಜ್ ವಿಷಯವಾಯಿತ್ತುಂಡ್.

ಇದಾಂಗೋರ್ ಪೋರಾಟ ಸಮಿತಿ ರಚನೆ ಮಾಡಿತ್ ಕೊಡಗ್ ಹಿಂದೂ ಸಂಸ್ಥೆರ ಎಚ್ಚೆಕ್ಕೆಚ್ಚೆಕ್ಕೋ ಶಾಖೆ ಒಂದಾಯಿತ್ ಪೋರಾಡಿತ್, ಅನ್ನನೆ ಇಕ್ಕ ಇಂಜ ಮಂತ್ರಿ ವರಿಯಂಗ ಮುತುವರ್ಜಿ ಇಟ್ಟಿತ್ ಸರ್ಕಾರತ್‌ಂಜ ಅಲ್ಲತೆ ದಾನಿಯಡ ಸಹಾಯತ್‌ಂಜ ದೇವಸ್ಥಾನಕ್ ಪೋಪ ರಸ್ತೆ ಉಂಡಾಕಿತ್ ಪುದಿಯದಾಯಿತ್ ದೇವಸ್ಥಾನ ಕೆಟ್ಟೋಂಗಾಯಿತ್ ಪಣ ಮಂಜೂರ್ ಮಾಡಿತ್ ಶಾಸ್ತ್ರೋಕ್ತವಾಯಿತ್ ದೇವಸ್ಥಾನ ಕೆಟ್ಟಿತ್.



ಶ್ರೀಮಾನ್ ಬಡ್ಡಿರ ಎನ್. ಚಂಗಪ್ಪ (ಮಣಿ ಮಾಸ್ವರ್)
ಕೊಡವತಕ್ಕರ ಓರ್ ಎಳ್ತಕಾರ. ಇವು 'ಕಚ್ಚಿದುಡಿ', 'ಹಿತ್ತು
ಮದ್ದು' ಪಿಂಞ 'ಏಡ್ಸ್ ರೋಗ ತಡೆಗಟ್ಟಲು ಜನಸಾಮಾನ್ಯರ
ಪಾತ್ರ' ಪುಸ್ತಕತನ ತಾನೆ ಎಳ್ತದಿತ್ ಬೊಳಿಪಡ್ತಿತ್.

ಇದಲ್ಲತೆ, ಕೊಡವ ತಕ್ಕಲ್ 'ತೇಂಗುಡಿ' ಪಿಂಞ
'ಚೇರಂಬಾಣೆ ಸಿದ್ಧಾಶ್ರಮ ಚರಿತ್ರೆ' ಎಣ್ಣುವ ಕಥಾರೂಪಕ
ಎಳ್ತದಿತ್. ಇವು ಕೊಡವತಕ್ಕಲ್ ಆಚಾರ- ವಿಚಾರತರ
ಬೊಳಚೆರ ಬಟ್ಟೆಲ್ ಪುರ್ಡಲ್ ಕೆಲಸ ಕಾರ್ಬಾರ್
ಮಾಡಿಯಂಡುಳ್ಳೊ ಓರ್ ಕೊಡವಾಭಿಮಾನಿ.

ಇಯಂಗಡ ವಿಳಾಸ :

ಬಡ್ಡಿರ ಮಣಿ ಚಂಗಪ್ಪ
ಕೊಳಗದಾಳ್, ಚೇರಂಬಾಣೆ